







MARIA MAGISTRA MAGISTRORVM.

Tobias Sadlersculp.

THE UNIVERSITY OF CHICAGO
PRESS
CHICAGO, ILL. 60637
1967

MARIA
HONESTISSIMARUM
ARTIUM, ET SCIENTIARUM
ANTIQUISSIMA, AMPLISSIMA,
ET CELEBERRIMA
VNIVERSITAS

Celebrata

In Schola Rhetoricæ

à

Discipulis

P. MATHIÆ NEÜMAN,
Societatis J E S V.



VIENNÆ AUSTRIÆ,
Typis & impensis Joannis Chrittophori Cosmerovij,
S. C. M. Typographi Aulici.

ANNO MDC LXXVI.





DEI PATRIS

Dilectissimæ Filix,

DEI FILII

Integerrimæ Matri,

DEI SPIRITUS S.

Speciosissimæ Sponsæ,

MARIÆ,

Natæ ex Tribu Juda, de Domo
David, &c.

Cæsarum Augustissimæ, Regum Se-
renissimæ, Ducum Potentissimæ, Principum
Illustrissimæ, Nobilium Nobilissimæ. Cœlestium,
Terrestrium, & Inferorum Domi-
næ, &c.

*Patronæ Generis humani
Clementissimæ.*

AD Majestatis Tuæ solium me sisto
O MARIA! sisto Altissimæ in-
fimum, Immaculatæ macularum,
Dominæ mancipium, Patronæ reum,
A 2 Magi-

Magistræ discipulum, Eloquentissimæ infantem, Regina tributarium. Tributum, laudibus tuis debitum, exigebas ab eo, qui de FILII TUI Téque laudantium Societate obsequi paratam mentem gessit semper; exequendi facultatem, nisi privatos inter parietes, non habuit unquam. Hinc ut multa sæpe voluerit, impulit obligata & ubique prona voluntas; pauca vel nihil ut potuerit, fecit rerum in Te commendandarum sublimitas, & amplitudo. *In Te siquidem* (liceat ex S. Germano germanè tecum loqui) *si quis innumera dicat elogia, nunquam sequetur scopum; tantum abest, ut illum attingat, & propositum in laudanda assequatur; cum superes omnem disertam linguam, & omnem mentis aciem prætergrediaris. Etenim Tua magnalia vastissimum pelagus fecit gutta illa cælestis, quæ à Te manavit. Idcirco immensitatis Tue divitiæ nulla vi comprehendi possunt, nec absumi delicia. Et in quavis quidem alia re datur planè satietas: in Te verò laudanda & celebranda non est præ jucunditate voluptatis epulantium.*
modus.

modus. Hinc fit, ut laudationum anse, quas ipsa porrigis, conijci mente non possint. Et quia indeficiens est fons, & hauriendo non exhauritur, imò quò plus hauritur, eò majorem centies aut millies aquarum copiam effundit, ideo fieri non potest, ut desinant, qui hauriunt. Siquidem dum hauriunt, aqua mysterium redundat, & redundatio mentes etiam vincit incorporeas, quanto magis immerfas corporibus? Tanta es Beatissima & Immaculatissima Virgo! (a)


Libenter proindè, ac ingenuè Fateor, me quoq; in laudès tuas pertractum esse; sed non alio, quàm inductæ obligationis pondere; non alterius voluptatis illicio, quàm quæ nasci solet ex imbecillitatis conscientia, & impotentia Te dignè prædicandi. Hinc ex compluribus Celsitudinis Tuæ titulis pauculos hósce selegi, quibus Te obsequosè compellarem cum discipulis meis, eorúmque facundiam ex tyrocinio provocarem. Et fecerunt quidem illi, quantum per vires licuit; an autem fecerim Professor, quantum per officium

cium debui, non leviter dubito, certo
judicabunt alij. Nonnullos eorum, præ-
sertim de schola Censorini, quia non pa-
rum simul timemus, *Sub Tuum præsidium*
confugimus, ut judiciorum severitati cly-
peum obtendas, nostrique non oris, quod
indisertum fatemur; sed cordis, quo
multum volumus, eloquentiam defen-
das: ijs verò, qui amore vulgandæ, vel
recantandæ laudis Tuæ condire sciunt,
insipida (quis enim hoc delicato erudi-
tionis sæculo ad gustum paret omnia?)
mercedem de reciproco amore, mater-
nique cordis benevolentia non deneges.
Hanc dum cum Discipulis meis avarâ cu-
peditate depereo, non ista solùm modi-
ca, sed omnia omninò vitæ studiâ Tibi,
post DEUM meum, addico, dedico,
mancipoque; sum enim, ac æternùm
maneo affusum pedibus

Majestatis Tuæ

Vile mancipium

Matthias Neñman.



*ILLUSTRISSIMO AC EXCEL-
LENTISSIMO DOMINO,*

**DN. JOANNI
JOACHIMO,**

Sac. Roman. Imp. Comiti
Slavata de Chlum & Kofchum-
berg, Gubernatori Domus Novo-
domensis, Domino in Novadomo,
Teltſch, Biſtritz, Chlumetz, & Han-
ſpach, &c. Sac. Cæſ. Regiæque Maje-
ſtatis Conſiliario, Camerario, Ma-
gni Judicij Provincialis Aſſeſſori, Re-
gio Locumtenenti, Supremo aulico-
rum Feudorum Judici, & Hæredi-
tario Pocillatori in Regno
Bohemix, &c.

*Domino, ac Patrono obſer-
vandiffimè Colendo.*

Sub Deiparæ in cœlo trium-
phantis præſidium priùs, ut

A 4

dece-

decebat, confugi, quàm in terris
opusculi hujus patronum quære-
rem, *Illustrissime ac Excellentissime*
Domine Domine Comes. Sic enim,
â me fieri velle suspicabar Te cli-
entem studiosum *Patrona*, filium
addictum *Matri*, Parthenium de-
votum *Virgini*, servum ingenua
sponte obsequentem *Regina*.

A coelo igitur in terras, â mon-
tibus æternis in profundam hanc
miseriarum vallem oculos defle-
ctens, dum Patronum inquiero,
qui non tam pertenuem hunc co-
natum, quàm ipsius conatûs ar-
gumentum, quia Marianum est,
foveat, atque defendat, non alius
occurrit, quem majore ad eam
fiducia, quàm Tu *Illustrissime ac*
Excellentissime Comes. Polles enim
verò benevolentia contra male-
volos, moderatione contra in-
temperantes, prudentia contra
temere

temere judicantes, pietatis fervore contra frigidos Marianæ excellentiæ propugnatores. Ut nihil dicam de authoritate, quam prisca generis claritas, honorum sublimitas, & gestorum magnitudo componunt; quàmque ex fontibus suis producturus eram, nisi modestia Tua prohibuisset, & calamo pressè notatam typo subtraxisset. Dicendum tamen est aliquid; ut, cùm meritis ac gratijs obviare non possim re, affectûs saltem vicissitudinem reponam, simûlque potissimam, causam obiter exponam, cur exiguum hoc opusculum Illustrissimo Nomini Slavatino dicari exposcat. Nimirum, ut jam insinuavi, quia Marianum est, Marianæ quoque familiæ, cum præfidentia veniæ, vult nuncupari. Quis autem in patria tam peregrinus est, quem fugiat magna

A 5

in

in cœli terræque Reginam pietas, qua cultui ejus laudumque titulis semper intenti amores tantæ Matris Vobis conciliare studuistis, vetustæque Vestræ profapiæ adijcere ornamentum? Nolo redire in sæculum proximè lapsum, unde veritati huic adferam suffragium; viridem adhuc labentis sæculi consulo memoriam, indèque produco dignissima immortalitate nomina, quæ se se nominibus multis Dei-parenti fortissimè obstrinxerunt. Occurrit Excellentissimus ille Guilielmus, Supremus regni Cancellarius, qui pronissima voluntate plenissimoque in Matrem pulchræ dilectionis propendens affectu, nè pretium deesset affectui, liberale insuper adjecit argentum, quo nobilis in primis perficeretur Basilica Boleslaviæ, & ejusdem historia typis expressa
ad

ad posteros promoveretur. Occurrit *Illustrissimus Baro Joachimus*, qui postquam fabricandæ illi moli pia promptitudine præfuiſſet ædilis, invigilâſſet operis, attendiſſet figuræ, dimensioni, distributioni, reliquiſque partium, ædificandarum modis, nè quid informe irreperet in ædem formoſiſſimæ Dei Matris; ac nihilominus graſſantium Svecorum ſqualor non modicam partem deformâſſet, ſic deformatam ex ære non tantùm proprio ſed & alieno, quod piorum liberalitas contribuit, priſtino reſtituit nitori ac venerationi. Occurrit ultimus Roſenſis ſanguinis ſurculus Lucia Ottilia, quæ laudato Guilielmo non magis thoro, quàm Mariana pietate conjuncta, pari ſtudio æmulisq; curis Deiparæ cultui intendebat; id quod loqueretur Divæ hujus
ama-

(a) *Simon*
Kapshorsky
in hist: Mo-
naft: Sedli:
ad ann: 1619.

amabili pulchrâque gratiâ fabricata statua, in metropolitana Ecclesia Pragensi speciali devotione culta, & pretioso ornatu excultâ, nisi turbulentæ hæreseon insolentia pium illud simulacrum, ausu impio confregisset, ac profanâset. (a) Sed loquitur tamen Veteris Oetingæ celeberrima Statio, quantâ affectuum conspiratione, quâque munifica sedulitate Magnæ Matris benevolentiam sibi demereri studuerit tam nobile par conjugum Guilielmus & Lucia. Tria namque aureorum millia liberaliter elargiti perpetuum alunt censum binis in hebdomades singulas celebrandis Sacrificijs, & pauperum indigentiae quandoq; sublevandæ; alia tria aureorum millia in auro gemmisque fulgentia dona, Slavatinæ liberalitatis monumenta, piæque obligationis vin-

vîncula , quibus Marianos favo-
res trahere voluerunt , sibiq̃ue
æternûm illigare.

Et verò eam traxere beneficio-
rum seriem , quæ Familiæ tantæ
æstimationem , futuris sæculis
non levem conciliat admiratio-
nem. Proturbabatur ex arcis
Pragensis fenestra in subjectam
fossam pro Deo dimicans , pro
fide flagrans , pro Maria zelans,
pro Cæsare constans Guilielmus;
& Mariam , quæ tunc in aëre vo-
litare visa est , præsentem habuit,
ac protegentem. (a) Morbo pe-
riculi plenissimo vexata non se-
mel ingemiscebat Lucia , & in
sævissimis doloribus vitæque li-
mine artis medicæ quærebat
præsidia ; quæ cûm apud Ar-
chiatros reperiret nusquam , ad
Divam Boleslaviensem ac Oerî-
nganam precibus votoq̃ue conver-
sa

(a) P. Laur:
Chrysog. p. 2.
Mundi Mar:
in Dedice

(a) *Arsen:*
ih Diva Be-
lest. c. 15.
Iacob. Trsing
S. I. lib. 3.
c. 10.

sa desideratam retulit gratiam;
sanitatis. (a) Infestabat Novodo-
menes incolas pestiferæ luis per-
tinacia, qua prostrati contribu-
les non pauci domicilijs multis
sui excessu faciebant orbitatem;
non erat in humanis, qui graf-
fantem tyrannidem coërceret,
coërcuit, luemque diffusam ab-
sterfit DEI Mater, quia spon-
sionibus utriusque Domina-
tionis inducta, supplicationibus
fatigata muneribus honorata.

(b) *Iac. Ir-*
sing l. 3. c. II.

(b) Adeo verum est: quidquid in
Dei Deiparæque cultum impen-
ditur, non projici, sed bene col-
locari: nec collocari solùm, sed
felicissimè etiam elocari, quoni-
am cum fœnore recipitur, quod
liberalitate modica honori Par-
thenio profunditur.

Et hæc Marianæ pietatis, mu-
nificæque voluntatis specimina,
quæ

quæ in Illustrissimis Slavatis, jam
vitâ functis, refulserunt, suffici-
ent, opinor, brevitatem amanti-
bus, cum prosequi omnia nequea-
mus. At de vivis quid referemus?
Nolo eorum provocare rubo-
rem, quia facere quisque mavult,
quàm *dicier hic est*. Illud tamen,
non assentationis lenocinio, sed
vulgatæ veritatis impulsu dicere
liceat, Te, quocum mihi hîc præ-
cipuè sermo est, *Illustrissime ac Ex-
cellentissime Comes*, non sangvi-
nem solum à Majoribus traxisse,
sed Marianam etiam pietatem,
sub Matre præsertim solidarum,
virtutum, ac constantissimæ de-
votionis Magistra, Cæsarei que
sanguinis Educatrice capacissi-
mo pectore concepisse; calenti-
bus siquidem succensus flammis
eos erga Partheno-Parentem Dei
MARIAM exhibuisti affectus in
ætate tenera, quos cum incre-
mento

mento annorum nutris in adulta,
& de provecta deferres in annos²
æternos. Tua accessione aucta,
illustratâque diversa per Germa-
niam Sodalitia, eadèmq̃ exem-
plo magis quàm authoritate gu-
bernata; Tuo sequendi studio
calcata vestigia, quæ posteris re-
reliquere antecessores Tui, cur-
rentes pro beneficijs sive ad Oe-
tinganam Bavariæ, sive ad Cel-
lensem Styriæ, sive ad Hitzinga-
nam Austriæ, sive ad Sacromon-
tanam Bohemiæ; Tua precandi
constantia interpellata gratia-
rum Mater, & non obstante ne-
gotiorum mole fusiùs interpella-
tur quotidie; Tua denique in-
cœli Reginam obsequia produnt
reverentiam, qua Te servum pro-
funda dejectione profiteris; a-
gnosceris interim magnæ Matris
filius, & dulcedine materna ex-
ceptus continuò roboraris ad
cul-

cultum ejus tum in Te, tum in alijs augendum, præconesque defendendos. Ut proinde dubitare non audeam, quin hi pauci tituli, sub Illustrissimi Nominis Tui patrocinium confugientes, experturi sint, M A R I Æ titulos Tibi proprijs esse potiores. Quæ quidem præcipua fuit ratio nuncupationis meæ: sed & aliam non subticeo, edendi nimirum signum aliquod meæ in Te observantiæ ac gratitudinis, quam effusa humanitate Tua sæpius provocâsti. Signum hoc parvum, censeretur, si opera spectetur; magnum dici potest, si affectus, vehementer magnum si materia, quæ tractatur; de M A R I A si quidem dicitur: *Signum magnum apparuit in cælo, mulier amicta sole.*

(a) Aliud proferre non volui, in primis quòd adverterem, signum ad placitum futurum animo Tuo, cui

(a) *Apocal.*
c. 2.


cui nihil displicuit unquam, quod
honori magnæ Matris impende-
batur ; deinde quòd ominarer,
quemadmodum Solis & Lunæ
beneficio marinæ conchæ pro-
generant margaritas, ornamen-
ta nobilissima, ita sub hoc signo
MARIÆ, sole lunáque fulgentis,
Tibi ex una MARGARITA na-
scituros seros nepotes, qui non
tantum familiæ Slavatinæ, sed &
Marianæ multiplex facient orna-
mentum. Ita vover, ita precatur

*Illustrissima Excellen-
tia Tua*

Addictissimus in Christo servus

Matthias Neuman,
è Societate Jesu.

P R Æ



PRÆFATIO

AD LECTOREM.

M*Emineris, Amice Lector, ex Ratione studiorum, quæ Juventus in Scholis nostris profequitur, esse, partim, ut Declamatio vel prælectio, vel carmen, vel græca oratio, vel carmen simul & oratio Humanistis convenientibus postremâ semihorâ antepomeridianâ ab uno aut altero discipulorum è suggestu alternis Sabbatis; partim ut in aula templôve gravior oratio singulis fere mensibus habeatur. (a) Quibus re-* (a) Reg. 18. & 17. Prof. Rhet.
gulis, ut qua par est, promptitudine satisfacere Rhetorum cathedris ad-
motus, cæpi mox apud animum me-
um disquirere, quam potissimum ex
sacris materiam tractandam suscipe-
rem

rem. quidve à Discipulis dici prædicariue præstaret. Occurrere tunc nonnulli, qui annuos Rhetoricæ suæ labores Verbo Incarnato dicârunt; & placuere: cui enim melius dicarentur à Socijs, quàm Societatis totius Duci ac Capiti? Constitui proinde Ego Dei-Hominis elogia quædam carmine simul & oratione exprimenda, eaque in ordinarium thema digesta Discipulis tradidi componenda. Sed non stitit hic scholasticarum cogitationum sollicitudo; fluentibus siquidem annis, & refricante memoriâ illo, quod in R. P. Joannis Nadafe Annalibus Marianis (a) legi, universam Societatem Jesu esse simul Societatem laudantium B. Virginem: accedente insuper S. Patriarchæ nostri monito, (b) ut disquisitis studiosè verbis ipsius Dei Matrem dignè compellaremus; solite indagavi nonnullos titulos, quos in immensa prope Marianorum encomiorum

(a) Anno
1556. §. 115.

(b) In lib.
Exerc. hebdom.
2.

mioram copia repertos nonnihil premerem. Et ecce multa cogitanti, nec in magnis præsumere volenti arriſerunt hi pauculi, quorum argumenta Discipuli non ſine ſedulitate ac emulatione elocuti ſunt, & calamo dein meo nonnihil limita declamârunt cû audientium admurmuratione, quæ & dicentes laudarent, & dicta, inſuper legenda, expeterent. Rogatus non ſemel, quid facerem? Puduit perexigua, ac non exculta elocutionis; argumenti non puduit. Occurrit animo, multorum ſcripta à Lectõribus vilipenſa eſſe, quæ cum admiratione ab iſſdem Auditoribus ſunt excepta; & ideo à communicatione legendorum retrahabar: ſuggeſſit tamen memoria Purpurati Eccleſiæ Doctoris luctam, in qua: Deſiderium, inquit, me trahit, ut de Deipara verba faciam, & formido me retinet in ſilencio, ut non habeam facultatem dicendi pro dignitate.

Animus

Animus hortatur, & metus deterreret; ille quidem trahit me, iste verò me abstrahit. Cùm ergo ab utroque detinear, expedit mihi, ut sermonem habeam de celebri & Sancta Virgine. (a) At-

(a) S. Hier.
scr. de Af-
sum.

que his verbis ita animabar, ut Mariana encomia, qua de Scholarum pulpito audienda dederam, etiam ex papyro legenda proponerem. In considerationem proinde denuo revocavi omnia; alienas periodos, si bene memini, expunxi, citationibus instruxi, & illo demum stylo conformare conatus sum, quem accuratiores discipuli ex Authoribus haurire velle videbantur. In quo quidem nonnullâ reprehensione dignos censere posses, quasi ab uno Cicerone

(b) Reg. 1.
Prof. Rhet.

(b) recesserint: nisi similem reprehensionis notam illis ipsis Authoribus nostris inurere necesse foret. Non enim deest Cicero, ubi suas in periodos, & verborum copiam oratio fluit, quam-

quamvis subinde ponderibus senten-
 tiarum suspendatur. Varietas quan-
 doque delectat ; & in Sapientum
 quoque convivio non idem semper
 placet ciborum apparatus. Princi-
 pem omnino locum apud nos tenuit
 in omnibus eloquentia princeps ; in
 genere tamen demonstrativo , ubi
 multa ad voluptatem aurium af-
 feruntur, (a) seculi genio , & Audi-
 torum gustui nonnunquam sese ac-
 commodare , dignum veniâ judica-
 vimus. Sed & hic iudicio fortasse
 tuo non satisfacimus. Quid mirum ?
 labores enim sunt talium , à quibus
 difficulter perfectionem exposcas ; cum
 ipse illorum Professor sit adhuc disci-
 pulus Magistrorum , & Magistra Rbe-
 torum MARIÆ. Qui satis habuit
 in laudibus Marianis saltem imma-
 duisse , nec sicco prorsus pede facun-
 das Authorum panegyres percurrif-
 se, licet apud eum non exundent elo-
 quia magnis majora fluminibus.
 Non

(a) Causa.
 de Eloq. l. 20
 c. 12.

Animus hortatur, & metus deterreret; ille quidem trahit me, iste verò me abstrahit. Cùm ergo ab utroque detinear, expedit mihi, ut sermonem habeam de

(a) S. Hier.
ser. de Af-
sam.

celebri & Sancta Virgine. (a) *Atque his verbis ita animabar, ut Mariana encomia, quae de Scholarum pulpito audienda dederam, etiam ex papyro legenda proponerem. In considerationem proinde denuo revocavi omnia; alienas periodos, si bene memini, expunxi, citationibus instruxi, & illo demum stylo conformare conatus sum, quem accuratiores discipuli ex Authoribus haurire velle videbantur. In quo quidem nonnullâ reprehensione dignos censere posses, quasi ab uno Cicerone*

(b) Reg. 1.
Prof. Rhet.

(b) *recesserint: nisi similem reprehensionis notam illis ipsis Authoribus nostris inurere necesse foret. Non enim deest Cicero, ubi suas in periodos, & verborum copiam oratio fluit, quam-*

quamvis subinde ponderibus senten-
tiarum suspendatur. Varietas quan-
doque delectat ; & in Sapientum
quoque convivio non idem semper
placet ciborum apparatus. Princi-
pem omnino locum apud nos tenuit
in omnibus eloquentia princeps ; in
genere tamen demonstrativo , ubi
multa ad voluptatem aurium af-
feruntur, (a) sæculi genio , & Audi-
torum gustui nonnunquam sese ac-
commodare , dignum veniâ judica-
vimus. Sed & hic judicio fortasse
tuo non satisfacimus. Quid mirum?
labores enim sunt talium , à quibus
difficulter perfectionem exposcas ; cum
ipse illorum Professor sit adhuc disci-
pulus Magistrorum , & Magistra Rhe-
torum MARIÆ. Qui satis habuit
in laudibus Marianis (saltem imma-
duisse , nec sicco prorsus pede facun-
das Authorum panegyres percurrif-
se, licet apud eum non exundent elo-
quia magnis majora fluminibus.

(a) Causin.
 de Eloq. l. 26
 c. 12.

Non


*Non intendimus, crede Amice Lector,
oratores videri; sed Magna Patro-
na clientes, & tales quales Divæ
Matris pracones. Postquam Dei-
Genitrix (loquor cum S. Petro Da-
miano) stylum direxerit, & lin-
guam pauperis venustiori resper-
serit eloquio, tunc fortasse de
magnificentijs ejus aliquid niti-
diore facundiâ depromemus. (a)
Interim paucos hos titulos velim ita
legas, ut eos nonnisi praeunte bene-
volentiâ judices. Si tibi placuisse
cognovero, dabo fortasse plures de
Deo-Homine, dabo de Sanctis.*

(a) S. P.
Dam. hom.
de Assum. &
S. Bern. Sen.
ser. 61. de
B. V.

Vale.



Appro-



Approbatio.

R. P.
PROVINCIALIS,

Soc: J E S V , p̄r Provinciam
Bohemiæ.

*Cùm Librum , cui titulus
est : Maria Honestissima-
rum Artium, & Scientiarum
Universitas, &c. à P. Mathia
Neüman , Societatis nostræ
Sacerdote, conscriptum , tres
eiusdem Societatis Sacerdotes
recognoverint, ac in lucem edi
posse judicaverint : potestate
à Pa-*

*à Patre Nostro, Joanne Paulo
Oliva, Præposito Generali, ad
id mihi datâ, facultatem con-
cedo, ut liber typis mandetur.*

*In quorum fidem has Literas
manu meâ subscriptas, & si-
gillo officij mei munitas dedi.
Pragæ 28. Decembris 1675.*

Georgius Hohenegger.

IN.



INDEX ORATIONUM.

Oratio I.

MARIA, Antiquissima, Amplissima, & Celeberrima

Vniversitas Scientiarum.

Oratio II.

MARIA, rectè loquendi atque scribendi rationibus imbuta, ideóque

Magistra Grammaticæ.

Oratio III.

MARIA, pangendorum in laudem Dei carminum gnara, ideóque

Magistra Poëseos, & Musices.

Oratio IV.

MARIA, præceptis bene sanctissimèque dicendi instructa, ideóque

Magistra Eloquentiæ.

Oratio V.

MARIA, naturalium rerum cognitionibus illustrata, ideóque

Magistra Philosophiæ.

Oratio VI.

MARIA practicâ de moribus scientiâ instar paradisi amænissima, ideóque

Magistra Ethices.

Oratio VII.

MARIA, necessariam Mathematicum varietatem sapiens, ideóque

Magistra Matheseos.

Oratio

Oratio VIII.

MARIA, ad humani corporis sanitatem tuendam morboſq; profligendos erudita, ideóq;
Magiſtra Medicinæ.

Oratio IX.

MARIA, juſti & iniqui ſcientiâ Clariffima,
generiſque humani Advocata, ideóque
Magiſtra Jurisprudentiæ.

Oratio X.

MARIA, ad apicem ſcientiarum, Theologiam eveſta, ideóque beatiffima
Magiſtra Theologiæ.

Oratio XI.

MARIA, de actionibus Chriſtianorum licitis,
vel illicitis edoſta, ideóque prudens
Magiſtra Moraliſ Theologiæ.

Oratio XII.

MARIA, hæreſum & falſarum opinionum interemptrix, ideóque glorioſa
Magiſtra Controverſiarum.

Oratio XIII.

MARIA, vas electionis, vero Sacrarum Literarum ſenſu abundans, ideóque
Magiſtra Sacræ Scripturæ.

Oratio XIV.

MARIA, vera Chriſtianorum Minerva, ideóque cæterarum honeſtiſſimarum
Magiſtra artium.

Oratio XV.

Ad

MARIÆ, & Scientiarum honeſtiſſimarum
amatores parænetica.

P R Æ -



PRÆCONIUM.

S Germanus, Constantino-
 politanus Antistes, & fa-
 cundus Marianorum decorum
 præco MARIAM vocat *Dabir*,
 in quo divini Sanctæ Ec-
 clæsiæ *Mystagogi*, Judicis te-
 nentes sedem, divinarum re-
 velationum futura prædixe-
 runt (a) *Dabir* autem fuit
Academia Palæstina (b) ab
 Hebræis dicta *Cariathsephor*,
 seu *Civitas litterarum*, vel
toquela (c) enucleans, quod
 abditum latebat. (d)

(a) *Orat. de*
Nat. B. V.

(b) *Adrico-*
mus.

(c) *Origenes*
hom. 20. in
Iosua sub fin.

(d) *Theoph.*
Raynaud.
Glossar. No-
mencl.

B O R A-

ORATIO I.

MARIA Antiquissima, Amplissima, & Celeberrima Scientiarum Universitas.



Anescentibus Autu-
 mni Gratijs, à quibus ad
 virium vestrarum restau-
 rationem per profunda
 vallium, excelsa montium, frondosa
 nemorum, piscosa fluminum, diffusa
 pratorum, fructuosa hortorum ha-
 ctenus circumducti estis; & transa-
 ctis, ut opinor, feliciter turgentium
 uvarum vindemijs, repleta demum
 (a) *Cantic.* *vinis Regij Sponsi Cellaria*; (a) vel, ut
 6. l. *ex Chaldaea Hebraeaque versione lo-*
quar, Secretam Divinae Doctrinae Domum,
ac Civitatem, vel, ut sensum aliorum
 exponam, honestissimarum Scientia-
 rum Universitatem vobis aperturus,
 adveni, Adolescentes Lectissimi, Au-
 ditores humanissimi. Universitas
 hæc nova quidem, quia *Novum crea-*
vit Dominus super terram: Mulier circum-
 (b) *Jerem.* *dabit virum*; (b) antiquissima tamen
 9. 36. *est*

est à temporum ætate , amplissima à Fundatoris munificentia , celeberrima à laudum frequentatione ; quia siue nobilissimam , purissimamque originem attendas , siue gratiarum ac privilegiorum amplitudinem exposcas , siue Magisterij præcellentiam requiras , siue discipulorum nobilitatem spectes , siue Bibliothecæ selectum desideres ; superat Romanam Sapientiam , Sorbonica Augusta , Salmantica Emporia , Atheniensia lycæa , cæteraque scientijs illustrissima Athenæa. Quòd nè magnificè magis ex verborum pompa , quàm veraciter ex veritatis amore dicere videar ; adeste animis , qui ad sublimiores cogitationes nati , ad sincera iudiciorum sensa proni , ad veritatis indagandæ negotia educati estis , & unde veritati suffragium deponcam , quive nervus eloquentiæ meæ futurus sit , mente , qua prædicti estis , animadvertite. Potuítne , quæso , cæteris pretiosissimis operibus illud esse inferius , quod ab initio & ante sæcula in uberrima Dei

mente conceptum, efformavit universorum Opifex; liberalitatis suæ thesauro fundavit Altissimus; disciplinis optimis instruxit Magister unus
 (a) *Math.* Christus; (c) gratijs ac privilegijs donavit idem Rex regum, & Pontifex etiam futurorum bonorum longè maximus? Non potuit. Quis igitur verborum magnificentiæ adscribat, aut vocum blandimenta reputet, quæ de argumenti soliditate, deque veritatis robore à me prolata sunt? Non delector AA. inani verborum flumine, si pro causæ gravitate, gravissimè ponderata SS. Patrum autoritas, possit adduci, & rationis perspicuitas in eloquentiæ obsequium vibrari. Non sapiunt sine medullis ossa candida, picturata sine succo poma, tumentes sine lacte mamillæ, sermonis amplitudo sine condimento. Quanquam quæ tanta dicendi copia, quæ longissimarum periodorum mensura sufficiat, quæ Rhetoricæ discipulus dimetiri valeam materiam Damiano ineffabilem, Hugoni ineffabiliter sublimatam, Augustino indiscibilem?

bilem ? Non est verbosa rei exaggeratio, ubi facundia omnis profusissimo impendio sui deficit, & causæ commendationi est impar. Nec potest à verborum splendore adscisci ornatus, ubi dictionis materia creatam superat pulchritudinem.

Agam proinde, quod ago; & sive vocum selectu, sive rerum granditate *Amplissimam* omnino atque *Antiquissimam* scientiarum *Vniversitatem* celebrabo. Quod dum prono magis in comunem Matrem, quàm docto in *sapientiæ sedem* amore facio, cogitate, insuper subditum Regiæ studiosi laboris tributum deponere; & si impensus in magna conatus suâ destitui non debet mercede, hanc à vobis humillimè depono, ut me libenter audiat.

Constat ex Divinissimi Spiritus oraculo, Sapientiam ædificasse sibi Domum, materiâ elegantem, structurâ augustam, artificio mirabilem; (a) ejusque molem suffulcisse columnis septem, numero citra dubium, mysterijs pleno, nisi addidisset vo-

(a) *Ferdin. Salazar in Prov. c. 9.*

(a) *Hugo
Cardin. a
pud Salazar.*

cem sibi, ad denotandum, non alterius usui destinatam esse, quàm Sapientiæ, quæ septem liberalium artium institutionibus (a) veluti quibusdam basibus innixa omnium facta est Vniversitas scientiarum. Sed quæ demum est illa moliminis tanti, tamque augusti nominis Domus? aut si cum Jobo, sapientiæ sedem inquirente, interrogare licet: *Sapientia ubi invenitur, & quis est locus intelligentiæ?*

(b) *Iob. c.
18.*

(b) Si circa cæli, nos ambientis, cardines eam studiosè quæritis, non improbo; si dum gyrum rotundæ illius, totque facibus illustratæ molis circuiret, columnas suas in gyrum cæli posuisse, sapienter existimatis, non contendo; si circumfuso in aëre, ubi Dominus tribus potentiæ suæ digitis appendit fundamenta terræ, sollicitè indagatis, non impedio; si in altissimis plenæ majestatis sedibus habitare suspicamini, non inficio; si denique cum Propheta Baruch (c) eam ultra rejecta maria investigatis, permitto; interim tamen piè fidentérque assero, non ultra vel extra

(c) *Cap. 3.*

Mariam

Mariam fuisse fundaram, & vel ideo antiquissimam, quia *ante omnem creaturam præfundatam*. (a) Vos ego hic testor Sacros Ecclesiæ Sanctæ Patres, Sapientiæ virtutisque miracula, Augustine (b) Hieronyme, c) Ambrosi, (d) Damiane, (e) Ignati, f) Bernarde, (g) Bonaventura, (h) Ildephonse, (i) Idiota, (k) & Andrea Cretenfis, (l) an non omnes uno simul ore affectuque in hoc conspirastis, ut dicere etis Domum istam, tot divinæ providentiæ sumptibus elatam, esse Dominam vestram, MARIAM? O præconium! quo in immensa titulorum copia, laudumque Marianarum affluentia. (Maternitatem reliquarum gratiarum radicem excipio) vix excellentius aut sublimius potuit enuntiari!

Ite nunc alij magnæ Patronæ clientes, Dominæ defensores, Reginae ministri, Advocatæ advocati, Matris adoptivi filij, & pro generosa ingenij vestri fecunditate celsitudinem ejus magnificis celebrate præconijs; nos in ejusdem obsequia ju-

(a) *Psal. 26.*

v. 5.

(b) *Lib. 5. de Civ. Dei.*(c) *In cap. 7. Isaiæ.*(d) *l. 2. de Sp. S. c. 2.*(e) *Ser. de Nat. B. V.*(f) *In Epist. ad Philipp.*(g) *In Ser. 9. ex parvis.*(h) *In Spec. c. 2.*(i) *In lib. de Virg. & parv.*(k) *In Contempl. Virg.*(l) *Orat. in Salus. Ang.*

ratissimi, hâc solum voce Deiparâm
extollemus : *Sapientia edificavit sibi Da-*
rum. Salutate illam ex religiosissi-

(a) *Oras. de* ma Ephremi (a) pietate *Paradisum*
Deip. *delictarum* ; ex aurea Chrysostomi (b)
(b) *Oras. de* facundia *Animatam Dei civitatem* ; ex
Annunt. ambrosia suavitate Ambrosij (c) *Æ-*
(c) *Epist. 79.* terni Regis aulam ; ex mellifluo Bernar-
di (d) *Ser. 4.* di (d) flumine *Habitaculum Filij Dei* : nos
de Assumpti. academicis incedentes cothurnis,
cum Sanctissimis Oratoribus eam di-
cimus *Sapientie Domum* , Matrem &
nutricem Doctorum ; ut quod fla-
grant corda , volunt sensa , sitiunt
vota , laborant ingenia nostra , non
obscurò a gumento evincamus op-
timarum scientiarum & artium Uni-
versitatem.

Enim verò si celeberrimas inter
Italiæ urbes non postrema Bononia,
studiorum mater seu nutrix audire
voluit , quia Sapientiæ studiosos &
Sinu complectebatur materno , &
mentes ex ignorantiae tenebris vin-
dicabat in lucem , & humanos intel-
lectus amabili disciplinarum lacte
nutriebat ad politioris vitæ ratio-
nes;

nes; quanto magis Sapientum nutritrix dici debet MARIA, à cuius uberrimis tot cum Bernardo pendent filij, quot Catholicæ orbis palæstræ habent doctores? quanto verius sinceriusque prædicari potest Mater, cujus cura tam accurata est, ut propositâ Sapientiæ mensâ vinum miscet, (a) nè discipuli plus sapiant, quam oportet sapere, sed sapiant ad sobrietatem? cujus benefaciendi promptitudo tanta est, ut mittat ancillas suas (b) seu scientiarum Supremæ Facultati ancillantium præcones, qui ad Vniversitatis mœnia mansuetioris & sobriæ litteraturæ epulo reficiendos parvulos, ad ipsam verò sublimiorum disciplinarum arcem insipientes, sive divinarum rerum ignaras mentes (c) convocent, ut in hoc spiritali verborum convivio (loquor cum Andrea Cretenfi) à Verbi Matre secundum carnem cognoscant Filium, qui omnem superat Theologiam? (d)

(a) Prov. c.
9. vers. 20.

(b) Ibid.
v. 3.

(c) Ferdin.
Salazar hic.

(d) Hom.
de derap.
B. V.

(e) Psal.
127.

Et verò filij tui sicut novella olivarum in circuitu mensæ tuæ (e) O MARIA! Habuerunt profectò invitantium.

B 5

præ-

præconum voces robur aliquod, quando à sedecim & ultra sæculis infinitam pene discipulorum multitudinem sacerrimis doctrinis erudientiam, in gremium tuum suavissimo illicio pertraxerunt, & non tam *Matriculam*, quàm Augustissimam pulcherrimamque Matrem tot filiorum nominibus fecundârunt. Vix enim in bene constitutam, atque ab æterno ordinatam hanc Vniversitatem intravit Magistra Veritas, doctoralique Virgineæ carnis epomide circumdata, in *Sapientie Domo* (sic uterum Virginis vocat Hieronymus (a) tanquam in cathedra confedit, & statim nacta est discipulum nondum natum, sed maternis visceribus adhuc clausum, qui ad præsentiam Verbi non sine subsultu didicit *Alpha & Omega*. Vix ea luci publicæ decastissimo Matris gremio proposita fuit, & jam advolârunt de cœlo angeli, ex oriente reges, ex arvis pastores, *omnes omnino docibiles DEI* (b) discipuli; cùm etiam bos & asinus cognoverint *Verbum*: Vix fama illius per

(a) *S. Hieron. in Is. c. & lib. contra Helvid.*

(b) *Ioan. c. 6.*

per vicinas regionis oras percrebuit, & jam ambiebant eum tunc fluentis sæculi sapientes, sedentemque in medio Doctorum stupebant omnes *super prudentia & responsis ejus.*

(a) Magna nimirum Sapientiæ vis ^{(a) Luc. 6. 2.} est, ubi semel amorem sui per corda mortalium conciliavit. Fæcundus ejusdem partus brevissimo etiam temporis spatio non modicum capit incrementum. Nam ut taceam dilectos illos, qui relictis vel malè contextis retibus, vel periculoso telonij quæstu, vel judæis placendi studio, Incarnatæ Veritati sacramentum dicentes in Academiæ gremium sunt recepti, dicite, obsecro, an omnes discipuli (quamvis eos plerumque ponderare non numerare oporteat) numeris Arithmeticæ comprehendi, orbis admiratione capi, eloquentiæ Oratoris exprimi possint, qui à Nobilissima pariter ac dulcissima Sapientiæ Nutrice MARIA ad florem adolescentiæ lactati, ad fructus maturitatem educati, ad honorum messem exercitati, ad gloriæ denique

que lucra per Philosophiæ pulpita,
 Sacra scripturarum oracula, subtiles
 Theologiæ quæstiones sunt erudi-
 ti, ac instituti? Succumbet Arith-
 metica, deficiet disertissimus orator,
 attonitus hærebit mundus, si ad cal-
 culos revocaverint Doctorum mul-
 titudinem, qui ex hac Parthenia
 Univerſitate prodiverunt, & ſcien-
 tiæ ſuæ radijs illuſtrârunt Europam,
 inflammârunt Aſiam, incenderunt
 Africam, conſoverunt Americam.
 Numera ſtellas, ſi potes, & nume-
 rabis orbis Doctores, qui in fulgido
 Sapientiæ cælo, quaſi ſtellæ reful-
 gent in perpetuas æternitates. Si
 diſtinguendis notandisque ſideribus
 conatus tuus non ſuccubuerit, ne-
 que recensendis Doctoreſ ſuccum-
 bet. Numerabis fortaffe penden-
 tium in firmamento nitidos ſacula-
 rum ignes, qui vegetas oculorum
 acies non fugiunt; ſed numerabis
 etiam Doctores Parthenios, Augu-
 ſtinos, Gregorios, Hieronymos,
 Ambroſios, Chryſoſtomos, Aquina-
 tes, Albertos Magnos, Chryſo-
 logos

logos , Bernardos , Leones , Nazianzenos , Bonaventuras , Suarezios , Scotos , Cajetanos , Bellarmynos , Vasquezios , Salmerones , Lessios , & sexcentos alios; quia viri magni sunt , scientiarum soles , Magistrorum Magistri , eruditionum columnæ , hæreticorum mallei , labantium Academiarum fulcra , vacillantis Sapientiæ firmamenta. Verum sicuti illas cælo pendentes faculas in computum minimè trahes; quas vel nimia distantia , vel luminosi corporis parvitas , vel confusa multitudo oculis nostris eripit; ita in numerum difficillimè coges tot sæculorum Magistros , qui in remotissimis terræ angulis , in rejectis litoribus , in omnibus quæ publicis , quæ privatis cathedris , & nationes barbaras , & populum moribus humanum , gloriosâ Sapientiæ luce perfuderunt , non sine ingenti commendatione sui & Vniuersitatis Marianæ , ex qua scientijs instructissimi prodire. Ego enim sic existimo , quemadmodum debentur Phœbo radij ,
fru-

fructus radici, trunco ramī, ramis-
folia, germen semini, fontibus rivi,
mari flumina, quæ longis circum-
acta flexibus tandem recurrunt; ita
gloriam omnem, quam orbis Ca-
tholici litterariæ respub. unquam
comparârunt, redundare in hanc
nostram Vniversitatem, quæ à so-
briè sapientibus amplissimè semper
audiit: *Mater Academiarum.*

Et si celeberrima Vniversitas Pra-
gensis simili Matris titulo gloriatur,
quòd condendis Academijs Craco-
viensi, Erfordensi, Tubingensi, &
Lipsiensi submiserit colonias, atque
incorruptæ tunc, veritatis professo-
res; si Archigymnasium Viennense,
amplissimum litterarum augustale
gaudet, se tot almas filias, Græcien-
sem in Styria, Ingolstadiensem in Ba-
varia, Friburgensem in Helvetia,
Diliganam in Suevia, Tyrnaviensem
in Hungaria genuisse Academias; Si
Parisiense Lycæum omnium, quæ in
Hispania, Gallia, Italia, Lusitania,
Germania sunt, celebrium Schola-
rum florem & incrementa in com-
men-

mendationis suæ partem gloriōse magis , quàm verè trahit , quòd ex ea vel transfulerint institutionis rationem , vel exemplo ejus impulsi fuerint ad æmulationem ; (a) longè majori laudum & decorum suorum censu gloriari poterit **M A R I A** , quam non paucæ , sed omnes omnino melioris mundi Vniversitates venerantur ut Matrem , foveant ut nutricem.

Non potest , nisi cum impudenti ausu , & palmari perversi animi scelere negari , à **M A R I A** enutritam esse veram æternamque Sapientiam , quæ per omnium Scholarum pulpita gloriōsis curulibus circumvehitur , & anhelis Discipulorum mentibus instillatur. Injurius sit Catholicorum Doctorum aliquis , qui ad sublimiores scientias educatum se agnoscit , debitum tamen honoris ac grati animi tributum denegat educatrici Mariæ , quam devotissimæ mentes semper veneratæ sunt cum **Ruperto Magistram Magistrorum** , (b) cum **Idiota Doctricem Doctorum** , (c) cum **Anto-**

(a) *Perpina*
et al. 18.

(b) *S. Rup.*
lib. 1. in Can-
116.

(c) *Cap. 3. de*
Contempl. V.

Antonino Magistrum Doctorum Ecclesie

(a) S. An- Apostolorum & Evangelistarum, (a) cum
 donum apud
 Carthaginem. Andrea Hierosolymitano Domum be-
 nedictam, quæ celestem thesaurum, in quo
 omnes Sapientie & Scientie thesauri sunt
 absconditi, in tuto Virginitatis, velut cellâ
 (b) Ibidem. penuaria, sine coarctatione conservavit. (b)

Agnosco ego te talem O M A-
 RIA! & quia me quoque sapientie
 desiderium accendit, da mihi sedium
 (c) Sap. 8. 9. tuarum assistricem Sapientiam (c)
 v. 4. ut & ego lacteo illius rore, quem pri-
 mis discipulorum tuorum labris in-
 stillas, enutriar, & felicissimis ado-
 lescam auspicijs ad meam multo-
 rumque salutem.

Sed nè longius abeam in affectus,
 lubet inquirere, unde tanta Univer-
 sitatis nostræ per omnes terras dila-
 tatio? unde tanta MARIÆ digni-
 tas, ut quotquot eadem habuit dis-
 cipulos, tot Christiana tempora nu-
 merârint Doctores; quot laudum ti-
 tulos regulere Gymnasia, tot eadem
 nacta sit sui præcones? Dicam A. A.
 quod sentio. Advolant ad pabula
 florum apes, quia dulcia sunt; ada-
 mant

mant solem aquilæ , quia clarus est ;
 currunt ad matrem filij , quia beni-
 gna est ; bibunt de fontibus plurimi ,
 quia limpidis aquis abundant : quid
 mirum , si ad Mariam quoque advo-
 let discipulorum multitudo , quia
 pascit Sapientiæ dulcedine , instruit
 verborum claritate , fovet materna
 benignitate , implet doctrinarum
 abundantiam , sustinet morum Sancti-
 tate , excellentissimi denique Magi-
 sterij exhibet argumenta. Non po-
 test non enitentibus ad Sapientiam
 appetibilem propinare succum , cu-
 jus *spiritus super mel dulcis est* : (a) refu- (a) *Eccle-*
 git obscuritatem doctrina , ubi ipsa *sist. c. 24.*
 doctrix est *amicta sole* : (b) frequen- (b) *Apocal.*
 tantur pulchri filiorum affectus , ubi *c. 12. v. 1.*
Mater pulchræ dilectionis (c) ludit amori- (c) *Eccles.*
 bus ; non potest abesse ordinata Sci- *c. 24.*
 entiarum copia , cum & *Dei virtus ac*
Sapientia , & omnes thesauri Sapientiæ &
Scientiæ sint in Maria : (d) aderit mo- (d) *Ansel.*
 rum integritas in ea Domo , quam *super illud :*
debet Sanctitudo : (e) illam denique di- *Intraui Te-*
 sciplinarum Magistram oportet esse *sus in quod-*
 perfectissimam , sub *cujus disciplina* & *dum castell.*
 (e) *Psalms.*
 29.

C

arbi-

(a) *Idophon.*
ser. 1. de
Assum.

arbitrio Infans Deus versatur. (a) Ut proinde mirari nemo debeat, à tam facunda, amabilique studiorum Matre tot Universitates, velut filias, esse prognatas, tam frequentem per universa lycæa Discipulorum coronam,

(b) *S. Ambrosius*
in 2. Thessal. c. 1.

Magistræ esse gloriam. (b)

Illum tamen Universitatis nostræ splendorem à vobis desiderari, non obscure animadverto, qui in Selecta Bibliothecæ raritate refulget, & quo litterarum studia diligentibus nihil charius est, nihil optatius. Obsecundo animorum vestrorum desiderijs, & Bibliothecam exhibeo selectiorem Vaticanâ Romæ, Marcianâ Venetijs, Regiâ Lutetijs, Constantinianâ in Oriente, Susianâ in Perside, Alexandrinâ Ptolomæi. Illæ unius, & invariata compacturæ normam non servârunt; hæc nostra suam variavit, nunquam, à quo semel rerum omnium compactor Deus eam ossibus &

(c) *Iob c. 10.*

nervis compegit: (c) illæ tineæ corrosionibus fuerunt obnoxia; hæc nostra ab omni sive originali sive personali corruptione immunis est:

illæ

illæ mendis & maculis scatent quàm plurimis; hæc nostra *tota pulchra*, & *macula in ea non est*: (a) illæ multitudi- (a) *Cantic.*
 ne librorum celebres sunt; hæc no- c. 4.
 stra unum, sed novum complectitur librum (b) *cujus author Deus*, cha- (b) *S. Damas. orat. 2. de Dorm. Desp.*
 racter *Verbum*, calamus *Sapientia*: illæ
 plerumque constant tomis, scriptis in membrana, de animalium tergo-
 ribus excissa; hæc nostra Virgineæ carnis membranam exhibet, è com-
 muni mortalium massa præcisam, & *chartam purissimam* (c) *in integro folio San-* (c) *Gregor. Nicomed. orat. de Ma-*
ctimonie non scripto, (d) *in quam cala-* (d) *S. Germa. Patr. Conf. orat. in Nat. Maria.*
mus Scribe velociter, antequam con- (e) *Psalm.*
 trahendæ maculæ exponeretur, *Scri-*
bentis, (e) *unicum inaravit Verbum*, tota æternitate non absolvendum.
Pulchram profectò Bibliothecam! 44.
 tantoque admirabiliorem ac præ-
 stantior, quanto alijs multitudine
 tomorum est inferior. Unum siqui-
 dem continet librum, sed reliquos li-
 bros universos exhaurientem, quia
 thesauros Sapientiæ & Scientiæ Dei
 complexum, (f) *quia divinitate ple-* (f) *Ad Rom. c. 11.*
num; cui concipiendæ ingenium,

repræsentandæ intellectus, comprehendendæ memoria, amplectendæ voluntas succumbat, est necesse.

Agite ergo Sapientiæ Studiosi, & hanc Bibliothecam, hunc librum, amate, legite, æstimate. Æstimabilis, si quemadmodum Julius Cæsar in fugam undâsque actus, relictis alijs, librum sibi amantissimum per flumen elata manu detulit, & conservavit; ita & vos inquietum mundi mare tranantes, ubi veneritis *in altitudinem mari*, & tempestas demerserit vos in mortem, majorem curam gesseritis conservandi hujus libri, quàm vitæ. Amabitis, si eum in vestro corde, pulcherrima amoris sede, recluseritis, prout olim Artaxerxes librum præ cæteris charum in intimum regij palatij cubiculum recondidit. Legetis, si vel obiter inspexeritis, quod

(a) *Psal. 39. in Capite libri scriptum est*, (a) ex quo totius operis conijciatis præstantiam, & conceptuum sublimitatem; cum

(b) *S. Greg. sit adeo singularium Dei cogitationum* (b) ut postquam homini litterarum perito datus est, ab eo lectus non sit: Neque enim

Joseph

Joseph Mariam cognovit, neque ipsius mysterij potentiam. (a)

(a) S. Damas. orat. de Nativitate

Prius tamen, quàm vos lectioni accingatis AA. Humanissimi, nolim benevolentiam vestram privari, quàm mihi dicenti hactenus auscultastis. Date proinde, date, obsecro, hoc meo juxta ac vestro in MARIAM affectui; date hoc Magnæ Matri, quæ suarum laudum præcones non magis, quàm ipsos auditores maternis semper fovet visceribus, ut antequam vela orationis contraham, aure prona excipiat, si quid dicturus sum de privilegijs ac gratijs, quibus gaudet hæc Universitas Mariana. Scio quidem, quòd de ijs loqui, magis sit tacere, & velle *Pelagus gratiarum* (b) percurrere, sit ad exiguam scrobis cavitatem undarum cogere amplitudinem: quia tamen etiam ipsa taciturnitas damnablem videri potest, quando debitum linguæ affectusque nostri officium turpi negamus verecundiam, erumpe tandem, erumpe, quàm licet ex corde, ex oculis, ex ore filialis in MARIAM amor, & brevi, quod superest,

(b) Idem ibidem.

C 3



pereſt, temporis ſpacio eloquere,
 quam plenitudinem gratiarum poſſi-
 deat Dei Mater. Hæret ſpiritus, con-
 cidit ſudantis ingenij conatus, defi-
 cit memoria, torpet lingua, ſacer
 horror invadit corpus univerſum.
 Quid agam hîc AA. proniſſimo filia-
 lis obſequij niſu effuſus in Parentem?
 Egône infelix ille filius, qui dum pro-
 lixæ grataque voluntatis ſpecimen
 exhibere contendo; prius opprimor,
 quàm erigar; prius obmutefco,
 quàm loquar; prius in deſperatio-
 nem redigor. quàm dicere incipiam?
 Agnoſco, O Magna Mater! amabi-
 lis ingenij tui indolem, & inexplica-
 bilem veneror benignitatem. Perceſ-
 lis nimirum me explicandarum ma-
 gnitudine gratiarum, ut, quoniam
 earum abyſſum capere non poſſum,
 ab ipſa me capi ſinam, & inextricabi-
 liter involvi. Promptiſſimis omni-
 no excipio ulnis tam miſericordem
 affectum, eúmque quâ poſſum reve-
 rentiâ ac ſubmiſſione exolcutor: &
 quia ſic vult Mater, ego, quamvis
 indignus, vocari filius tuus, libentiſ-
 ſimè

simè me in hoc gratiarum pelagus
 demergo piè, quemadmodum phi-
 losophorum princeps Aristoteles, in
 maris profundum, *in quo non est substan-*
tia, (a) se immerfit insipienter. Non- (a) *Psalms,*
 timeo, ut hîc immerfus moriar, cùm 68. v. 20
 sic demergi sit enatare, & hîc interi-
 re sit vivere: nec metuo, ut sic mu-
 tus taceam, cùm Orator materiæ
 ineffabilitate perculsus ad silentium,
 ipsâ eloquentiâ sit facundior. Perci-
 pient abunde satis omnes Sapientiæ
 Studiosi, non posse non gloriosissi-
 mis gaudere privilegijs illud littera-
 rum Domicilium, cui *fecit magna*, qui
potens est: (b) proindè que festivè ac- (b) *Luc. c. 1.*
 clamabunt: *Multæ filiæ*, (orbis Chri-
 stiani Academiæ) *congregaverunt divi-*
tias, *Maria supergressa est universas*, (c) (c) *Prov. c.*
 quando nec jura Græca & Romana, 31. v. 29.
 civilia & ecclesiastica, publica & pri-
 vata omnibus illis tot privilegia at-
 tribuunt, quot ab ipso gratiæ Autho-
 re sunt collatæ huic uni, quæ *congre-*
gatio est omnium gratiarum. (d)

Jactent Academiæ cæteræ Fride-
 rici Barbarossæ (e) liberale imperium,

(d) *S. Bo-*
nav. in spe-
cul. c. 7.

(e) *Lib. 4.*
Codic. tit. 13.

quo studiosis omnibus ; bonarum
 artium emporia frequentantibus ,
 quietam sanxit securitatem ; erunt
 interea Marianæ Universitatis alu-
 mni tutissimi , & sive arduo itinere
 anhelantes accurrerint , habebunt
 comitem , cujus Societas tutelam
 præstet , conversatio tædia tollat ,
 præsentia difficultates dissipet : sive
 in termino jam constiterint , tran-
 quillæ vitæ potientur suavitate ,
 quando ipse Deus ab itineribus æter-

(a) *Habac.* nitatis veniens (a) requievit in Ma-
 6. 3. ria. Proferant alij immunitatem à

(b) *Con-
 stantin. &
 Martian.*

vectigalibus , seu ut vocant *merces im-
 professas* ; (b) sint liberi ab oneribus
 muneribusque Civium ; congratula-
 buntur sibi interim nostri Academici
 de libertate filiorum Dei , in quam
 æterni Regis Regina Mater eos ita
 asseruit , ut nullius onerosæ servitu-
 tis ac tributorum legi sinat subjace-
 re , cum sint filij Reginæ , quæ ad ve-
 ctigalia non tenetur. Abundent cæ-
 teri regum favoribus , Cæsarum San-
 ctionibus , Pontificum bullis , quibus
 severissimè cavetur , nè studiosi , deli-

ctorum

& eorum rei, ab alijs tribunalibus de-
 tineantur, prohibeanturque refuge-
 re ad Academici Magistratûs Recto-
 rem; gaudebunt interim nostri,
 quotiescunque fragilitati succum-
 bentes facinoribus sese contamina-
 verint, quòd ad Magnificam Rectri-
 cem suam, quæ teste S. Richardo (a) (a) Rich. à
S. Laur. lib.
4. ipsa Magnificencia Dei est, possint accur-
 rere, & in illas solatij voces erumpe-
 re: *Sub tuum præsidium confugimus.* (b) (b) Brev.
Rem. & S.
Bern.
 Glorientur alij optione judicium,
 qui in clementiam faciles, in veni-
 am proni, in supplicia tardi emen-
 dant potius pietate, quàm conde-
 mnent severitate: mitiorem dabit
 judicem alumniis suis M A R I A, si
 quos ad Misericordiæ aras consper-
 xerit supplices & gemebundos. Nam
 si Deum ultionum Dominum (c) (c) Ps. 93. qui per sce-
 lera cujuscunque provocatus inflammat in-
 circuitu inimicos suos (d) (d) Psalm. 1 velut miles (ver-
 ba sunt S. Ildephonsi (e)) 96. v. 3. invincibilem (e) Ser. de
Assump.
 vincit, & ut Musicus iratum placat qui-
 buscunque peccatoribus; quanto
 mansuetiorem exhibebit suis disci-
 pulis, quos singulari affectu & favore

complectitur, quosque ipse, qui hanc
 (a) Ps. 86. Universitatem fundavit *Altissimus* (a)
 gratijs suis ideo voluit exornare, ut
 nobilissimum juventutis florem ex
 omni populo, & natione ad eam pro-
 liceret, unde postea cultissimos di-
 mitteret ad sacras exedras oratores,
 ad gymnasia Magistros, ad popu-
 lum patres, ad curias consules, ad
 aulas ministros, ad tribunalia maxi-
 ma patronos afflictorum.

Agite ergo Adolescentes optimi,
 quorum pectora litterarum amor,
 honoris decus, patriæ splendor,
 emolumentum cupiditas pridem occu-
 pavit; hanc Marianam Universita-
 tem divinæ mentis consilio ab æter-
 no ordinatam, ab ipso *Altissimo* fun-
 datam, à Sapientia ædificatam & ad-
 ornatam animis subite alacres. Ex-
 cutite inibi ingeniorum vestrorum
 tenebras, & pulcherrimis doctrina-
 rum luminibus illustrate. Excolite
 indolem, aptate solertissimam natu-
 ram, quam ad litteras fortiti estis
 idoneam, quæque spem frugis pro-
 mittit amplissimam. Cogitate labo-
 res

res vestros, quos coronari aliquando cupitis, non alibi melius, aut gloriosius posse collocari, quàm sub disciplina Mariæ; sub cujus præsidio, prò Deum Immortalem! quot quantique, jam per tot sæcula, infensissimum Sapientiæ hostem, Ignorantiam, expugnârunt. Inde inde prodibitis ex Philosophiæ spinis acuti, ex Pharmaceutica morborum Medici, ex odæis juris prudentiæ Advocati, ex Augusto divinarum quæstionum Sacrario Theologi, ex Eloquentiæ viridario Rhetores, ex castis Musarum delubris Poëtæ, ex omnium denique Scientiarum antiquissima, amplissima & celeberrima Universitate tales Doctores, quales hætenus obstupuit orbis, & fera posteritas admirabitur omnis litteraturæ miracula, ac rerumpub. ornamenta. Non enim possunt non efformari viri doctissimi, quibus se totam impendet *Scientia scientiarum* MARIA. (a) Quam (a) *S. Bern. super Salve* ut ego quoque docentem audiam, (amant siquidem silentium studia Sapientiæ) libenter obmutesco.

P R Æ

PRÆCONIUM.

Grammatica, nisi reliquis scientijs fundamenta fideliter jecerit, quidquid superstruxeris, corruet. Quintil: Instit. orat. l. i. c. 5.

ORATIO II.

M A R I A, rectè loquendi atque scribendi rationibus imbuta; ideoque

Magistra Grammatica.

VT quis præcellam scientiarum sublimitatem, ipsùmque fastigium, quo Universitas hæc reliquis præeminet, eloquentiæ suâ humilis attingat orator, necesse habet ab infimis Grammaticæ classibus

bus exordiri. Non scanduntur suspi-
ciendæ Ægypti pyramides, vel ex-
celsæ Ptolomæi turre, nisi prius ima
teneantur. Non dantur Rhodiorum
colossi sine bassibus, sine profunda
radice altissimæ solidæque arbores,
fastigia sine fundamentis. Gramma-
tica tradendarum scientiarum basis
est, A.A. sine qua posteritati difficul-
ter fuissent consignatæ, & transcri-
ptæ, si non sub exilibus mundi incu-
nabulis, unâ cum Proto-parente
nostro nata, per Moysen in judæos,
per hos in Phænices, Athenienses,
& Thebanos (a) propagata, toto, (a) *Euseb.*
quâ patet, orbe invaluisse, sui que *l. 9. de præp.*
antiquitate & necessitudine æstima- *c. 4. & Ta-*
tionem conciliâset. Illa litteras *cit. in annal.*
commenta, syllabas architectata,
voces enixa, suppeditavit loquendi
formas, præscripsit differendi ratio-
nem, præcepta demonstravit. Ne quis
igitur (verba sunt doctissimi Quinti-
liani (b)) *Grammatices elementa, tanquam* (b) *Lib. 1.*
parva, fastidiat; quia interiora velut sacra *inst.*
hujus adeuntibus apparebit multa rerum sub-
limitas, quæ non modò acuerè ingenia, sed
exercere

exercere quoque altissimam eruditionem & scientiam possit. Nequis etiam imma-

turè existimet, me ex humili (quam-
 (a) *Lib. 10. vis eodem Quintiliano teste (a) nihil*
instr. c. 3. in studijs parvum sit) ex humili, inquam,

& vili materia (quid enim inter tumidos Sapientes Grammaticis contemptibilius?) Marianarum laudum præconium concinnare, quæ altissimarum rerum est argumentum, &

(b) *S. Bern. S. Bern. negotium omnium seculorum. (b) E mini-*
Serm. an Pent. mis quandoque laus maxima nascitur: atque ex deciduis è lautissima-

aliorum mensa reficimur subinde micis; suntq; tanto gratiores, quanto avidius colliguntur. Et si ex sensu Magni Præfulis Augustini non minor laus redundat in Creatorem Deum ex parvitate muscæ volantis, quam ex magnitudine jumenti gradientis, quis neget in Dei Matrem ingentem quoque laudum materiem posse congeri ex humili litterarum notitia; cum præsertim ex ea scientiarum omnium emergat altitudo? Date proinde mihi benevolas aures AA.

Humanissimi, & ego vobis dabo
 MARIAM

MARIAM Grammaticis præceptis instructissimam.

Nolo tamen ad comprobendam causam meam ex eo sumere argumentum, quòd sciam vernam tenellæ Virginis ætatem ac capacissimam disciplinarum omnium indolem inter privatos Parentum Sanctissimorum parietes non ita delituisse, ut tempus omne, quod à ferventissimis precibus supererat, exercenda solum lanæ, contexendis telis, pingendis acu Sacrorum vestibustudiosè impenderit; & non etiam litteris hebræis, Syriacis, græcis tam noscendis, quàm efformandis industriam posuerit singularem. Non pono causæ fiduciam, quòd turpe videatur, Genitores optimos tantæ seu incuriæ seu desidiæ arguere, ut quis impudenter dicat, vel imprudenter cogitet, illam Dilectam Filiam, illas parentum delicias, Davidicæ stirpis gloriam, floridæ juventutis principem, generis humani florem, & omnium virginum exemplar, quod ardentissima pietas, impensis votis, celo

cœlo extorserat, fuisse ab ijs destitutam, nec imbutam litteris, ad copiosam rerum sacrarum eruditionem, perquam necessarijs; siquidem mihi constat ex Authorum triade Epiph-

(a) S. Epiph.
erat. de laud.
B. V.

(b) S. An-
sel. in fine
Operum.

(c) Cedren.
in compen-

nio (a) Anselmo (b) & Cedreno (c) *MARIAM* cum adhuc pater viveret, *hebraicas litteras didicisse*. Illud illud ad immortalem divinæ Bonitatis gloriam assero, tenerrimam Virginem ab ipso Supremo Numine ita fuisse edoctam, Grammaticisque præceptis instructam, ut nullius pene creaturæ adminiculo, nullius magistri prælectione necessario indigeret. Testor ego te, O pulcherrima Divinæ mentis filia, animarum regina, virtutum vita, castigatrix morum, moderatrix affectuum, honestatis splendor, ipsius etiam, si ita loqui liceat, Supremi Numinis magistra Decentia: dic age, decuitne, ut quæ æternæ Sapientiæ Mater, & Magistra magistrorum futura erat, illis cognitionibus exornaretur, quæ sub scientiæ rationem cadere possent, & sublimiorum facultatum essent fundamenta? Decuit.

De-

Decuitne, ut gloriaretur præter
 Deum alius de tenero illo magiste-
 rio puellæ Virginis, *quam*, teste Lau-
 rentio Justiniano, *adhuc in matris utero*
decumbentem adamavit Verbum, *sibi que*
in Genitricem elegit, utpote *superabundanti*
benedictione præventam, jamq; S. Spiritus
 magisterio deputatam? (a) Non decuit.
 Decuitne, ut prudentissima hæc Vir-
 go, relicto fonte, biberet rivulos, ne-
 glecto corpore sequeretur umbram,
 infundente se Sapientiæ sole lucem,
 mutuaret à stellis, docente Docto-
 rum, Prophetarumque Magistro, au-
 diret didascalos? Non decuit, AA.
 non decuit; & vel ideo non voluit,
 solenne illud, ac toties decantatum,
 in protestationem opponens: *Oscu-*
letur me osculo oris sui, (b) non alieno. (b) *Cantic. c.*
 Non audio (inquit apud S. Bernar-
 dum (c)) *Mosen; impeditioris siquidem lin-* (c) *S. Bern.*
gue mihi factus est; Isaia labia immunda, in *Cantic.*
sunt; Jeremias nescit loqui, quia puer est, &
Propheta omnes elingues sunt: ipse, ipse
Magister Doctorum omnium, ipse
me osculetur osculo oris sui, ut, qui est
Alpha & Omega, mihi in osculo
 D com-

communicetur ; qui Nomen habet super omne nomen , me dirigat illud cum adjectivo laudis construere ; qui â Patre , pulcherrima generatione gignitur , ideóque *Verbum derivativum* dici potest , in me derivetur in tempore ; qui secunda tantum in Deitate adoratur Persona , me doceat *im-personale* ; qui solus est per excellentiam , ideóque verbum substantivum , mihi sese uniendo , ad meam eruditionem , exigit aliquando genitivum â genitura Deum & Hominem ; qui lingua est , scientiam habens vocis , linguam meam instruat proprietate vocum , & pulchritudine Sermonis.

Pulchro sanè desiderio ipsius divini oris gratiam efflagitavit MARIA , quod *de ea* (verba sunt Guarici Abbatis) *sibi formaturus erat conditus & Con-*
 (a) *Serm. 2. ditor !* (a) Si enim â natura ita instituti sumus , ut artium & scientiarum eos sequamur Magistros , quos novimus omnibus numeris esse perfectissimos , si pictores feruntur in Appellem , aut Rubenium , Statuarij in Lissippum aut Polycletum , milites in Hecto-

(a) *Serm. 2.
de Assum.
B. V.*

Hectorem, Poëtæ in Maronem, Philo-
 sophi in Stagyrten, quia artis excel-
 lentia eos singulariter commenda-
 vit; cur non consurgat in vota
 Maria, exæstuet in desideria, erum-
 pat in concupiscentiam illius Magi-
 stri Grammaticæ, quem scivit esse
 Magistrorum præstantissimum, quiq;
 nōset gravioribus disciplinis teneræ
 ingenia præparare, sermonis mira
 dexteritate gustum excitare, decen-
 tissimæ elegantix saporem insperge-
 re, & denique suavissima amabilita-
 te parvulos suos, per litterarum ru-
 dimenta ad ipsa Sapientix limina fe-
 licissimè manu ducere? Et quis du-
 biter non tantum ore tenus, & in
 prima labra; sed in ipsum etiam
 tam amabile, tamque avidum disci-
 plinarum pectus intrasse Sapientiam,
 ut ibi instar auroræ, scientiarum so-
 lem præambulantis, per elementa-
 res litteras exoreretur, & ad futurum
 aliquando plenissimum Sapientix
 meridiem nuntiaret? Enim verò cre-
 ditisne cum Sacrorum Interpretum
 agmine, quod Salomon *tenellus coram*

D 2

patre,

patre, unigenitus coram matre sua Sapientiam

(a) *Prov. c.*
4. v. 3 &
c. 7. v. 4.

ardens, (a) calidòque concupiscen-
tiæ affectu illius nuptias ambiens
voto frustratus non sit; sed primis
statim Grammaticæ regulis, rectèq;
loquendi & scribendi præceptis à

(b) *Pineda*
de rebus Sa-
lom. l. 3. c. 11.

Deo fuerit ita institutus, (b) ut ma-
gnificâ lætantis animi voce gloriari
audeat: *In manu illius nos, & omnes ser-*
mones nostri, quoniam ipse Sapientia Dux est,

(c) *Sap. 7.*
9. 16.

& *Sapientium emendator?* (c) Creditisne
hominem primum, primùmque di-
sciplinarum omnium doctorem, de-
liciosissimi paradisi incolam, ipsam
divinis elaboratam manibus Dei ima-
ginem, perfectissimum tam corpore,
quàm animo virum, ideòque Sapi-

(d) *Pererius*
in Genes. l. 5.

entissimum (d) protoparentem no-
strum ex largissimo divinæ Sapientiæ
fonte, ultro se se infundente, prima
Grammaticæ elementa hausisse, non
diurno conatu comparâsse? Credi-
tisne, Præcursores Verbi, Evangeli-
starum principem, & Prophetarum
clausulam Joannem, nullo à teneris
instructum magisterio, sed loquendi,
legendi, scribendi, & prædicandi
gratiam

gratiam ab ipso Spiritu Sancto vel accepisse, vel in eam non tantum nomine, sed etiam virtute ita transfusse, ut puer adhuc, & infans Grammaticus, parentem suum loqui docuerit; nec sine prodigio illam sermonis gratiam linguæ calamoque insperferit: *Joannes est nomine ejus?* (a) (a) *Luc. c. 1.*

Creditis? Bene habet: peroravi. Nemo siquidem sine ingenti trepidatione animi, aut insigni vacillantis judicii nota dicet, vel cogitabit, ipsius immensi Numinis futuram Matrem, quâ sub cœlo nihil sublimius ad præstantiam, nihil dignius ad meritum, nihil splendidius ad decorem, nihil grandius ad stuporem inveniebatur, idem divinæ gratiæ ornamentum non accepisse. Imò firmissimè mihi persuadeo, omnes omninò in eam affectûs teneritudinem abripiendos, ut illam mecum ore facundo celebrent unicam à Deo electam, atque ab æterno ordinatam Discipulam, quæ sicut omnigenam, & excellentissimam primæ litteraturæ notitiam mente bibula ex ipso di-

vinæ Sapientiæ fonte hausit, ita præclarissima ejusdem edidisse specimina, tum in vocum notionibus explanandis, tum in ethymologijs à fontibus suis arcessendis, tum in obscuris atque ambiguis sensibus mirâ ingenij dexteritate illustrandis, tum denique in articulis, membris, totiusque orationis partibus ornatè componendis; cum linguam Hebraicam, Syriacam, & Græcam calluerit abundanter, (a) & Apostolorum, orbisque universi futura Magistra necesse habuerit non tantum omni scientiâ informati, verum etiam ejusdem magisterium nonnunquam exhibere. O quàm pulchrum dedit Grammaticæ scientiæ experimentum, quando Alpha & Omega, primum & novissimum litterarum apicem, utrumque naturâ suâ vocalem, interjecto, de nomine suo, consonantè M. in dulcissimum verbum AMO fecit consonare Maria; illudque à primo rationis usu continuò eructavit, tanquam verbum bonum; atque per omnia vitæ tempora flexit, studiisque

(a) *Christoph. de Vega in Theol. Mariana.*

dijsque suis ita conjugavit , ut opera omnia , in hac Universitate Mariana elaborata, Regi Sæculorum integerrimè dicarentur ! O quàm aptè *Substantivo* Nomini copulavit *adjectivum* , quando in laudes Supremi Numinis effusa, exultante, præ gaudio , spiritu, exclamavit : *Et Sanctum nomen ejus !* O quàm elegantem fecit constructionem, dum Deum & Hominem , per proto-parentem , primum orbis exerrantem Grammaticum, malè disjunctos , in unum Christum pulchrâ conjunctione conjunxit ! O quàm nitidum formavit characterem (Grammatici est , teste Cornelio Nepote, non tantum scienter dicere , sed etiam scribere) quando in Virginea sui corporis membrana , pulcherri-
mo sanguinis liquore incircumscrip-
tum inscripsit Verbum ; Verbum mirabile ! quia & tempora & casus regit omnes : Verbum infans ! Sed quo tamen omnia dicuntur : Verbum ad mortalium legibile gustum ! quia *Caro factum*. O quàm sedulè , quàm fructuosè, quas scivit litteras ,

repuerascentem mundum docuit ;
quando in Bethlehemitico stabulo
scholam aperiens , atque ab Alpha
lectionem suam incipiens , tot indi-
cibus illud ostendit, quot fœni stipu-
las supposuit !

I nunc gloriosissime Salomon , quo
(a) Nazian. non Sapiëntior alter extiterat, (a) & primis
de Virgini-
tate.

(b) Prov.
c. 2.

Grammaticæ rudimentis â Deo re-
institutum prædica , quoniam *omnis*
tua Sapiëntia â Domino est ; (b) non ce-
det tamen tibi , neque mortalium
ulli M A R I A , quæ teste S. Epipha-
nio, *solo Deo excepto, cunctis superior existit.*

(c) S. Epiph.
or. at. de laud.
B. V.


(c) I quoque virorum Sapiëntissime
Adam, & gloriare, quòd cum rerum
omnium humanarum divinarumque
scientia tibi fuerit infusa, Grammati-
cæ peritiam , ipsius scilicet scientiæ
fundamentum , acceperis solidissi-
mum : gloriabitur præ omnibus Dei
Mater , ut quæ & ipsam Sapiëntiam
æternam portavit , & cui Spiritus
Sanctus virtusque Altissimi pulcher-
rima divinitatis mole superincubuit.
Ite & vos Catones, & orbilij Priscia-
ni & Ennij, Pacuvij & Flacci (inania
satis

fatis Grammaticorum nomina) & superfluis quæstiunculis fatigate puerorum ingenia; discruciate non tam vos, quàm voluminum Scriptores vestris litterarum notationibus & notulis, scrupulosis significationum argutijs, obscuris nominum ac verborum derivationibus: nostra interim Magistra Grammaticæ discipulorum suorum animos solido fundamento ac fundo instruet, mentisque ad gravissima disciplinarum studia properantes, non illitteratis nugis distinebit; sed veris æternæ Sapientiæ radijs diriget & deducet. Disputate cum Palamone, toties in balneis loto, quid stillam inter & guttam discrepet; ostendet MARIA, inter Roris stillam, quam cœli desuper irrorârunt, & guttam, quâ terra olim maledicta denuo germinavit, in Salutem, discrepantiæ esse nihil. Contendite cum alijs non ineruditis Grammaticis apud Carras, nobilem urbem, argutantibus, in quonam genere nominum collocanda videatur Luna? num significatione, se-

sus declinari in quamcunque mortem, quàm amores tuos malè declinare. Perge porro, perge lacteum Sapientiae tuae rorem illis instillare, teneris in annis, ut albæ gallinæ, hoc est, Candidissimæ atque Amabilis Matris filij candidis auspicijs ad maturitatem perveniant, & in dilectione tui majoribus semper roborentur incrementis. Quod quia fieri amant, affectuúmque suorum aliquod testimonium vicissim formare; tenerè adolescentibus suis cordibus jam jam Grammaticè inscribunt: M A R I A, ut vel sic cum ijs in perfectam crescas ætatem, semperque in illis legaris, quemadmodum inscripti plantulis characteres in adultis etiam arboribus leguntur.



P R Æ -



PRÆCONIUM.

POësis, *Supremi Numinis*
aspiratione concepta, ex ar-
cano ejusdem pectoris sinu in
hanc pulcherrimam lucem de-
lapsa ; Sapientissimorum in-
fusa gremio Philosophorum,
habitu verecundo, facie vir-
ginali, Sacrorum interpres, cu-
stos Religionis, Nuntia Divi-
nitatis. Ex Platone in Jone.
 Cicerone pro Arch. Poë: Cæ-
 lio in antiq: lect: l. 4. c. 1. &
 S. Aug. l. 2. de civ: Dei & l. 1.
 Conf. P. Vincent: Guinifius.

ORA-

ORATIO III.

*MARIA, pangendorum,
in laudem Dei carminum gnara,
ideoque*

Magistra Poëseos & Musices.

POësim & Musicam, si temporum modernorum opiniones & sensa inspiciam, duas esse res; si monumenta Veterum, & peritorum in artibus animorum judicia (a) consulam, eandem olim fuisse, publicâ, eâque non temerariâ sententiâ palam enuntiabo, AA. Humanissimi. Altera enim ita fuit in altera, ut teste divino apud suos Platone, (b) istam sine verborum gratia, & carminis venustate auribus infundere ausi non sint; illam sine modulamine produxerint nunquam: istam vocis altitudine & longitudine dimensi sint; illam per Syllabarum tum brevium, tum longarum, tum mediocrium juncturam vocali moderatione extulerint: istam coluerint ut cordium reginam, quæ tristibus jucun-

(a) Apud
Athen. Kyr-
cher. Musur:
lib. 2. §. 2.
& l. 7. §. 2.

(b) Plato
Dial. 7. de
legibus.

cunditatem, furentibus blanditiem,
ignavis animos, vigilantibus quie-
tem, per dulcissimas harmoniæ vo-
luptates conciliat; illam suspexerint
ut animorum dominam, quæ in ijs
emolliendis vehementior, in exci-
tandis fortior, in percellendis po-
tentior semper extitit, quòd eâ nil
sonaret dulcius, nil subtilius pene-
traret.

Tolle à veteri canendi facultate,
poëtici locutionis suavitatem, ver-
borumque nitorem; remove à Poësi
compositionis numerum; & quid ali-
ud erunt, quàm corpora sine vigore,
arbores sine ramis, rami sine folijs,
cortices sine nucleis, nuclei sine Sa-
poribus, sapes sine dulcedine?
Maneat vicissim ars altera in altera;
serventur artificiosi illius numeri, &
hujus modi; sumatur versus ad ci-
tharam, cithara animetur à versibus;
& quàm suaviter, quàm blandè per-
aures in animos illabentur, quàm
dulciter intimas medullas permea-
bunt; quos non affectus molientur,
& excitabunt? Vivit nimirum ista
in

in illa, & mutua vegetationis titulo dicere potest quælibet: *altera ego.* Quæ res non mediocriter animum meum recreat, dum in amplissima Marianarum laudum ubertate versans, vivensque ad delicias, Poësim cum Musica ita conjungo, ut unico seu Poëtæ seu Musicæ encomio honorare velim MARIAM, quando Recentiorum quorundam judicio, duplicis orationis conatu, binaque honoris ac excellentiæ compellatione eam possem celebrare. Putant enim isti, opinione quidem non improbabili, tantum abesse, ut ars Musica sit eadem cum Poësi, ut potius natura ipsa illas quàm longissimè disgregaverit, dum omnes omnino modulorum charites, omnesque dulcitudinis gratias canoris saltem reliquerit instrumentis, quas aliàs carminibus, aut concinnis verborum textibus indidit, & counivit. Verùm quia mihi negotium non est de melita instrumentorum harmonia, neque de nova illa Musica, quæ fractis minutim sonis, fictisque ad numeros

tonis

tonis coacta se se jam voce explicat, jam modulatione variat, jam suspirijs suspendit, jam fugis persequitur, jam minuritione palpitat; sed de ea, quæ veteri gravitate plenissima minutas, levesque concentuum argutias respuit, adeoque gravem minimæque tremulum, aut titubantem metitur gradum, quam à Poësi discernere non voluit litterarum parens Homerus; (a) nec etiamnum sejungit illa Germaniæ gloria, & pacissimum scientiarum pectus, Athanasius Kircherus: (b) ideo hanc solum in Augustissima Dei-Parente, prædicabo, eamque dicam, hac arte, seu Musicam voces, seu Poësim, præclare fuisse imbutam, & Magistram magistrorum. Quod dum unius orationis contentione facere aggredior, cogitate AA. Humanissimi, me duplici facundiæ flumine non delectari, si veterum desit authoritas. Quæ suis coloribus spectantium oculis ita subijciuntur, ut idem appareant, & dici possint, quid opus est, facundioris eloquentiæ advocare penicillum,

(a) *In Clytemnestra Cust:*

(b) *In sua Musurgia.*

E

qui

qui eosdem colores ita disgreget , ut quod ante cum veritate simplex fuerat, nunc videatur esse duplex, fucati sermonis beneficio , dicam , an maleficio ?

Quanquam temerarius , imò improbus videri possem , quòd in Marianæ commendationis materiam trahere adnitar illud , quod, infamiæ calculo non levi notatum , à multis ridetur, & exploditur. Quid enim Poësis aliud est, inquiunt non pauci, quàm jocus , modestis gravibusque ingenijs indignus? Quid aliud sunt carmina , quàm lascivientium parerga, turpitudinum lenocinia , invercundiæ fomenta, morum tineæ, mentium illudia , humanæ rationis hostes & eversores? Quid aliud ex sensu veterum sunt Poëtæ, quàm proditores , qui infimas hominis partes, seu affectos turbatosque sensus unice palpant, & contra reginam pectorum , illam divinitatis pretiosam particulam , rationem , concitant & perturbant? Sed plectar , si improbus sum in MARIAM : obmutescam

fi

si fauce maledica compello Dei Ma-
 trem, cujus dignitas, atque adeo en-
 comium *excedit omnem altitudinem*, quæ
 post Deum dici, vel cogitari potest. (a) Fa-
 teor equidem, iterumque repeto, *(a) S. An-*
 Augustissimam Virginem calluisse, *selm. de ex-*
 perfectissimos versuum concinnan- *celli Virg. c. 2.*
 dorum modos, proindeque Poësi fu-
 isse instructissimam; non tamen adeo
 projectæ sum impudentiæ, ut illam
 intelligam, quæ omnem prorsus pu-
 dorem exuit; & animis mollitiem,
 moribus perniciem, affectibus inve-
 recundiam, voluminibus mendaciæ
 insperfit, castissimumque disciplina-
 rum regnum obscænis maculis co-
 nata est deturpare. Illam illam suspi-
 cio, profundèque veneror in Maria,
 quæ Platonis (b) sententiâ divina au- *(b) Plato in*
 dijt, non humana; quæ Plutarchi *Fedro.*
calculo morum ac vitarum ab omni repre-
hensione immunium imitatio est; quæ gra-
 tias suas ita semper impendit, ut au-
 ribus illecebram, animis vigorem,
 moribus modestiam, cordibus pie-
 tatem, Numini laudes conciliaverit;
 quàmque Isacidæ præeunte ac præ-
 E 2 cinente

cinente præstantissimo Duce suo
 Moyse jam multis ante sæculis glo-
 riosè professi sunt; dum post edu-
 ctum per divisum pelagus populum,
 post involutum funestissimis aqua-
 rum procellis Pharaonis exercitum,
 coactis in orbem pueris puellisque,
 non tantum misericordias Domini,
 ob insignem victoriam; verùm etiam
 justitias, ob haustam aquis impieta-
 tem, carmine Eucharistico decantâ-
 runt. Hac enim poësi æterni filiam
 Principis eminuisse, non ego solùm
 imbecilli meâ eloquentiâ, sed facun-
 diffimi pridem encomiastæ, plenis
 oribus celebrârunt, quando carmen
 illud, gravitate heroicum, acumine
 plenum, suavitate varium, perspi-
 cuitate dilucidum, sententiarum
 pondere augustum, quo exultans
 MARIÆ anima totis viribus Domi-
 num magnificat, accuratiùs perpen-
 derunt. Audiamus, si lubet, clarissi-
 mum Ecclesiæ Sanctæ jubar, Augu-
 stinum, qui dulcedine Marianæ
 Poëseos abreptus, ut plures secum
 ad eam degustandam pelliceret.:

Audite,

Audite, exclamat, (a) *quomodo Tympani-* (a) *Serm.*
stria nostra cantaverit; ait enim Magnificat 10. *de San-*
anima mea Dominum. Audiamus tanti *His.*

Patris voci consonantem filium, San-
 ctissimum juxta ac Religiosissimum.

Valentiæ Patriarcham Thomam de
 Villanova: Ipsam, inquit, Virginem ca-
 nentem audiamus: Magnificat anima mea

Dominum. Quàm venustè (pergit) quàm
 pulchrè, quàm piè, quàm humiliter impensas
 sibi laudes in bonorum omnium largitorem.

Deum detorquet repleta gaudio, fervore spi-
 ritûs inflammata. (b) Audiamus Bedam, (b) *In conc.*

venerabilis Virum eloquij, & non *de Visit. B.*
v.

vulgaris in MARIAM pietatis; au-

diamus mellifluum Bernardum, Al-
 bertum Magnum, Joannem Gerfo-

nem, aliósque Patres disertissimos,

qui Canticum hoc vocant Novi testa-

menti hymnum, (c) Psalterium decachordum; (c) *Apud*

(d) Marianam cytharam, perfectissimè tem- (d) *Tract. 2.*

peratam. (e) Audiamus tandem Præ- *in Magnifi-*

fulum decus Rutilium Benzonium; *cat.*

(f) qui, ut clarissimè in nostram sen- (e) *Apud*

tentiam abeat, disertis verbis asserit; *Christoph.*

Marianam hanc Oden ea metri va- *Veg. in Theol.*

rietate fuisse compositam, quâ omni- *Mar.*

(f) *l. 1. su-*
per Magni-
c. 3.

*um carminum divinorum quasi Anacephalec-
sim continere videatur. Ut meritò etiam
Religiosissimus Ephrem eam appel-
let optimorum Magistram Poetarum.*

I proinde meticolosè Zoile; sub-
verere, nè quid indignum Dei Matre
dicatur, quando tot Sanctissimi Ora-
tores consensu unanimi, sine pavore
etiam modesto, Patronam suam ver-
suum faciendorum peritissimam edi-
xerunt. Assentior tibi libenter, præ-
stare silentium, dum periculum est,
nè Marianam magnitudinem eâdem
dictione minuas, quâ eam vis extol-
lere: sed meminisse tamen etiam
oportet, pleno eloquentiæ flumine,
velificandum esse, ubi Advocatæ ad-
vocati jus dicere, & nè in titulorum
plenitudine injuriam patiatur Do-
mina, tanquam Servi prohibere ob-
ligamur. Quis negavit unquam, in-
ter perfectiones & excellentias, crea-
turis à Deo communicari solitas,
collocandam esse illam artem, de
qua haustâne sit è divinæ an humanæ
industriæ fontibus, non frustra du-
bitârunt complures; cùm Poëtæ di-
cantur

cantur nasci, reliquarum verò scientiarum Magistri laboris industriâ possint efformari? Nunquid Regum Sapientissimus divinæ tribuit largitati illam loquendi perfectionem, quâ posset *dicere ex sententia, & præsumere digna horum, quæ ei fuerant data?*

(a) Quis autem nescit excellentias omnes, quas in creaturarum animas, velut in rivulos dispersit Deus, tanquam in mare contraxisse in Maria, quando ex Arnoldi Carnotensis affectuosissima fide, *quidquid Creator singulis, distributor justus, contulit, Matri adornandæ congeffit?* (a) *Sap. 7. v. 15.*

b) Fuerint admirationi Moyse, David, Salomon, Jeremias, & alij ex hebræa gente viri celebres, quòd ligati sermonis elegantia præditi, ut Deum ter Optimum colerent honestiùs, adorarent suaviùs, certos excogitârint numeros, verborumque harmoniam, qua immensas ejus laudes, operumque amplitudinem divulgarent: Miraculum certè illius Poëseos dici debet.

M A R I A, quæ longè suavioribus modulis Numini est blandita. Ada-

(b) *Apud
Laur: Chry-
sog: Mundi
Mar: p. 1.*

maverint Ennium Scipio , Lucillum Marius, Virgilium Augustus , Horatium Mecænas , Papinium Domitianus , Tibullum Messalla , Ausonium Gratianus , quòd suis versuum artificijs placuerint , quamvis Poësim , honestissimam illam & innocentissimam Virginem prostituerint : adamari debuit supra omnes sui temporis poëtas Maria , quæ Virginem illam cœlo delapsam , & ipsa numinis adpiratione conceptam, verecundo in habitu conservavit integram , facie virginali modestam , pietatis antistitem, Divinitatis celebrandæ Magistram præstantissimam. Suspexerit antiquitas , non sinè veneratione, veteres cantatrices ; prædicaverit, Sybillarum , aut aliarum mulierum nomina , quòd in pangendis componendisque carminibus artem exhibuerint singularem ; Super omnes tamen efferri debet Magistra nostra, quia *quidquid Creator singulis distributor justus contulit , Matri adornandæ concessit.*

Præterea si persuasione superbâ gloriari audent Poëtæ , apud eos esse

Jovis

Jovis omnia plena; nunquid gaudebit cum veritate Maria, quod antequam plenum Deo haberet uterum, eundem in speciosa virtutum varietate complexa sit amplissimo pectore? Si jaçant illi sedibus æthereis Spiritum illum venire, quo in Musarum choreis aguntur; nunquid in cœlum, imò Deum usque exultavit Maria, quod Spiritus Sanctus in eam venerit, & Virtus Altissimi ita obumbrârit, ut nil nisi Sanctum, adeoque perfectum ex utero, ex corde, ex ore, nasceretur?

Et verò feliciter genuisse, seu potius eructâsse de castissimo & amoris plenissimo corde *Verbum bonum* quis nescit? Verbum! aptissimum omnino, quod in suavem cogeretur verbum, quia ad eam semper fuit *conversio ejus*. (a) Verbum! ex quo pulcherrimum concinnavit poëma (homo Græcis poëma est à Deo descriptum) quando Deum carne virginea vestiendo, Hominem efformavit. Verbum! quod æternitate longissimum, ipsa, versibus viarum intenta, non-

- nisi semel piâ maternâque licentiâ
- (a) *Luc. c. 2.* corripuit; *Fili, quid fecisti nobis sic?* (a) sine qua authoritate crudeliùs nimìò corripendus erat ab olim dicturo: *corripiam illum.* (b) Verbum, in quo unicam; sed quæ pulcherri-
 (b) *Luc. c. 24.* mas quasque superaret, fecit cæsuram, quando illud sanguinariæ Circumcisionis legi, octavo â Nativitate die, subjecit; paritèrque ostendit, quàm ei ex hoc Verbo faciles manarent versus, cùm nonnisi unicam admiserit lituram. Neque dum est, eosdem optimè fuisse illigatos pedibus, ut quæ tam pulchrè noverat pedes Incarnati Verbi fascijs illigare. Cecidisse quoque ad exactum numerum, conijci potest, quòd Verbum, in quo cætera omnia comprehēdebat; ad numeros subinde induxerit, quando illo proficiente & crescente, numerabat annos ætatis:
- (c) *Luc. c. 2.* *Cum factus esset annorum duodecim.* (c) Firmissimâ præterea inducor persuasione, ut credam, nobilissima, atque ad animorum oblectionem aptissima Sacræ Poëseos finxisse commenta, quæ

quæ se dignissimam Dei Matrem tam
 sedulò , tam constanter , tam nitidè
 semper effinxit ; nihilque omisit un-
 quam in vita , ab æquiore mente re-
 prehensibile , cùm non ignoraret ,
 quod paradoxè protulit Tullius : *Vita*
nostra carmen est ; cui si vel Syllaba deest ,
exsibilis. Quod si tamen hæc alijs vi-
 deantur ingenij lusus , non solida ,
 ut fateor , rationum libramenta ; co-
 gitent , obsecro , mihi negotium esse
 cum Magistra Poëtarum , quibus vo-
 lupe est , rebus serijs similes quando-
 que , imò longè meliores , inspergere
 argutias , & verborum lenocinijs ere-
 ctas aures animosque adfricare . Sed
 meminerint etiam , satis abundèque
 probatum esse , ad Marianorum titu-
 lorum plenitudinem spectare , ut ve-
 rè dicatur Magistra Poëseos , quæ ta-
 lem se probavit , dum Canticum su-
 um rarâ metri elegantia pepigit ;
 talem esse decuit , quia fuit fœmina-
 rum nobilissima , creaturarum perfe-
 ctissima , Scripturarum peritissima ,
 Spiritus Sancti Sponsa , Verbi Ma-
 ter , Patris Filia ; talem denique Deus
 esse

esse voluit, ut ex obscuro tãdem protraheretur veritas, clarissimã sui luce proscriptura umbras universas. Umbra fuit ornatissima divinæ beneficentiæ modulatrix Soror Moyfis; sed approno demissa vultu hunc titulum ultro exuit, quando audita est **M A R I A** cantare Domino *canticum*

(a) *Salmeron
de Cant. B.V.*

novum. (a) Umbra fuit fortissima sui temporis Jahel, quæ post trajectory Sifaræ tempora de hostibus victrix, concinna metri suavitatem, potentiam Numinis prædicavit; sed facta est pedissequa, omnemque honorem cessit mundi Dominæ, quando augustiore carminis cothurno per excelsos Judææ montes incedebat. Umbra fuit magni Samuelis genitrix, quæ sublata sterilitatis beneficium eleganti, & ad numerum bellè cadente hymno celebravit; sed disparuit, recessitque hæc umbra, quàm primum comparuit **M A R I A**, & triumphale carmen suum intonans ostendit adesse corpus veritatis. Umbra denique fuit patriæ libertatis vindex Judith, quæ famæ immortalitatem non
tam

tam ex eo retulit, quòd truncato Ho-
lofernis capite Bethuliam obsidione
solverit; quàm quòd adeo insignem
victoriam metri artificio ad divini,
non sui Nominis commendationem
consignaverit; sed occulit se se,
conticuitque gloriosissima hæc ho-
stium triumphatrix, veterisque Poë-
seos gloriam adscribi voluit Dei Ma-
tri, ut quæ non minùs hujus, quàm
cæterarum creatarum perfectionum
excellentiâ compendiariâ quadam
virtute in se contraxerat. Sed quid
verba fundimus? nunquid ipsam
Virginem audire licet, quàm variâ
vocum dulcedine carmen suum ani-
met, quàmque sonoro miraculo Mu-
sas superet universas? Licet. Audia-
mus proinde, aut si malumus, in spi-
ritu auscultemus Amici & Sodales
ejus, quia tunc modulatur suavissi-
mè, quando amici auscultant, & fer-
ventissimis subinde suspirijs, tremu-
lisque colliquescantium animorum
vocibus rogant singuli: *Fac me audi-*
re vocem tuam. (a) O vocem cœlo ter- (a) *Cantic.*
ràque admirandam! Ecce ex *Basso* ^{c. 8.}
hu-

humilitatis incipit Virgo tenera, & profunda demissione ancillam se ingeminat, quæ antequam infans esset, jam erat regina, & Regum ac Reginarum Imperatrix: *Quia respexit humilitatem ancille sue.* Perge, perge, O MARIA! Sonet vox tua in auribus meis, quia vulnera tristitiæ sanat, mœrorem abstergit, defessam mentem erigit, infirmitatem roborat, animam ipsam per extrema labra jam jam fugientem retinet, & quasi ad perennis vitæ fontem constituit lætabundam. Pergit MARIA, & ex *Basso* in *Altum* ascendit, quando exultantem Spiritum, veluti quibusdam pennis subnixum, librat in *Altissimum*, eumque inter mortales extollit, quòd in ea exornanda ipsam suam potentiam impenderit: *Fecit mihi magna, qui potens est, & Sanctum nomen ejus.* In *Tenorem* demum suavissimè devolvitur, eumque licet durum, inter humanæ vitæ ærumnas servat constantissimè, dum de Misericordia Dei vitam suam moderatur ad eam sanctitatem, cujus excellentiâ creaturas

turas transcendit omnes , Deumque ipsum vicinitate aliqua attingit : Et misericordia ejus à progenie in progenies timentibus eum. Sed & *Cantum* (quæ tenerissima vocum vox est , quàmque liquidissimam omnino habuit , quia nunquam infecta ex ore Altissimi prodivit) *Cantum* , inquam , subinde audita est adeo dulciter canere , ut ipsum Deum non tantum detineret , verum etiam ex Supremæ Majestatis folio pelliceret in angustias uteri Virginalis. O vocem ! O concentum ! O Musicam ! quâ nihil suavius ad auditum , nihil jucundius ad hilaritatem , nihil aptius ad castissimæ voluptatis augmentum , nihil potentius ad ipsum Deum trahendum , potest inveniri ! Nolite tamen putare , me , quasi Grammaticæ simul , & Musicæ ignarum , unius cantantis vocem vocare concentum : acutioribus siquidem auribus ausculto , videorque mihi , ipsam *Æterni Patris cytharam* ex casto Virginis utero audire consonantem , & exultantem. Illam sine dubio cytharam , in qua Deus ab æterno lusit se,

se, omnesque creaturas, & hanc abyssalem ærumnarum vallem dulcissimam ejusdem suavitate demum effecit sonoram in tempore *Christus enim* (inquit Amadeus, novum efformans Orpheum) *Deus ex substantia Patris ante secula genitus, & homo ex substantia Matris in secula natus, exultavit Gygas gemine substantie, modulatisq; vocibus, simulque chordis suavissimis, in cythara corporis decantare, & in carnis organo, virtute Spiritus Sancti compacto, dulcissimos sonos edere, & ineffabili concordia resonare cepit; adeo, ut lapides suscitaret, ligna commoveret, feras traheret, homines abstractos à carne educeret* in sublime. (a) Ecce Musicam! ecce concentum, ipsa dulcedine dulciorum! Sed perge porro, O amabilis Mater! perge cantu tuo amores tui prolicere; insatiabilis siquidem sum auditor; quamvis simul balbutiens Orator. Repetatur, sonet millies vox tua in auribus meis; Sonet vox illa, quam ut purissimam conservares semper, ab Adameo insuper pomo abstinuisti, non ignara illius paræmiæ: Poma, pyra, nuces destruunt Cantoribus

(a) *Amad.*
Lausan. Ep.
hom. 4. de
laud. B. V.

ribus voces. Sonet vox illa, qua ex more ipsos lucis præcones, canoros alites, pulchræque modulantes lusciniæ, divinæ laudis hymno antevertens psallebas spiritu, psallebas & mente. Sonet vox illa, qua adeo suaviter, jucundæque tuam salutasti consanguineam, ut ad saltum excires Joannem (siquidem adhuc infans exultavit in utero matris suæ,) mutoque patri solveretur lingua, & vicina tota in gaudia & gratulationes animaretur. Sonet vox illa, qua vagientis Dei lacrymas tranquillasti, tremantium membrorum in malè compacto tugurio frigus mitigasti, arreptæ in Ægyptum fugæ amaras molestias dulcorasti, ac non rarò insomnem pro dormientibus mortalibus Salvatorem filium in mellitam Somni suavitatem immerfisti. Sonet vox illa, qua in cœlestibus regnis Prælata, seu cunctis Virginum Præfecta choris (a) ad delicias immaculati Agni, per speciosa collum æternorum spatia præambulantis, cantabis (b) *Canticum illud novum*, quod nemo cantare

(a) *Fulber.**Carno: Ser:**II. ar. 2. c. 2.*(b) *Bern.**serm. 2. de**Annunt.*

F

po- B. V.

poterit, nisi *Virgines*, nisi *empti ex hominibus*, *primitiæ Deo & Agno*, & in quorum

(a) *Apocal.* ore non est inventum mendacium. (a)

c. 16.

Amara hîc mentem subit cogitatio AA. Humanissimi, dum subeunt plurimorum commentationes, dicam? an compositæ levitates Poëtarum. Vix enim mihi temperare possum â gemitu, dum considero, quàm dispar & infelix sit conditio eorum, qui ex hac Marianæ Poëseos palæstra non prodeunt; sed ex nescio cujus Parnassi prostibulo choros ducunt non Virginum, sed meretricum, cothurnis incedentes non ad modestiam morum, sed ad omnem turpitudinem amorum. Miseret me certè, quòd dum possent esse poëtæ, in quorum ore non inveniatur mendacium, gloriosum putent mendacia ducere, in triumpho; dum ex purissimo perennis vitæ fonte, non fabulosi Pegasi ungulâ, sed occisi Agni castissimi pede excusso, limpidissimam haurire possent puritatem, malint fædissimas lasciviæ cloacas non tantùm ipsi bibere, sed & alijs copiosè propinare
ad

ad abominandam innocentium animarum ebrietatem. Quasi verò ipsa vitia, & humanæ naturæ pravitas satis robusta non sint, ut à talium poetarum lasciviente ingenio debeant roborari. Quasi verò ad incendium necesse sit ignibus ignem addere, fornacibus ligna, oleum camino, furij flagellum subministrare. Protruduntur frequenter speciosa versuum volumina, & quid aliud sunt, quàm contactæ sordium lacunæ, impudentium animorum characteres, quibus & Plauti scurrilitas, & Martialis obscænitās, & teneritudo Ovidij, & Tibulli facetiæ, & Propertij ignes, & Terentij lubricum exprimitur; quiq; dum curiosè leguntur, dolosè illigant, dum animos subeunt, sauciant & occidunt? Insatiabilis nimirum est malitia, cui satis non est, si similitum carminum aures proprias animas spurco commaculent spiritu, nisi etiam aliorum corda scelestis libidinum scintillis sufflamment. Non satis est nigrum Theta mentibus suis altè impressisse, nisi etiam chartæ ac

Bibliothecæ propudijs istis incæstentur ; non fatis est ore, aut oculis vulnera inflixisse, nisi etiam impuris calamis saucient lectores, sola plerumque Dei manu consanandos. O monstra, non homines, in Vulcani, fabri ferrarij antro ad nocturnos diurnosque Veneris ignes fabricata ? O belluæ omnibus belluis immaniores ! O probra nunquam eluenda, quàm diu inscripti amores vestri ex chartis & animis mortalium non eradentur !

Sed pudet, tædétque plura dicere. Ad vos se se mea tandem convertit oratio, O Juvenes ! uti scientiarum omnium, ita castissimæ Poëseos innocentes adhuc, sive candidi Candidati. Vos obsecro, obtestorque, ut si ad conficiendam carminis dulcedinem alicubi sugere vultis mella

(a) *Odorum:* (sunt enim Poëtæ teste Horatio (a) apes) non aliud viridarium, non alias florum areolas involetis, quàm Marianæ nostræ Universitatis. In his aperientur vobis â Magistra Virginé fontes nobilissimi, limpidissimi, atque in vitam æternam salientes ; è quibus

bus non tantum bibetis abunde ad
fundendos acutos Elegos, graves
Jambos, rotundos Hendecasyllabos,
jucundos Lyricos, festivos Dithy-
rambos; qui reliquos superemine-
ant poëtica amœnitate, historica ve-
ritate, metaphorica majestate; sed
quod supra meritum est, ac prorsus
divinum, ipsum Deum haurietis, ut
cum veritate canere possitis, quod
cum falsitate cecinit infamis ille:

Est Deus in nobis, agitante calescimus illo. (a) (a) Ovid.

Fastor. 6.

Hoc Deo plenus, suas inter apiculas
canendo, pura delibavit mella sedu-
la illa operatrix apis, Urbanus VIII.
ad omnem urbanitatem

- - - Dulcior illo

Melle, quod in ceris Attica ponit apis.

Hoc Deo plenus pulchros spirabat,
pectore versus Hermannus Hugo, cui
puriore fontes

Apésque de cœlo propinant

Lethifero sine felle, mella.

Hoc Deo plenus vernanti carmine,
chartas emollivit Jacobus Biderman-
nus,

qui quotidiana

*Saxa & robora, cornea/que fibras
Mollit, dulciloqua canorus arte.*

Hoc Deo plenus Lyram suam animavit Mathias Sarbievius, qui ab æquiore quacunque mente judicari debet,

*Tenuisse celsa junctus astra Pindaro,
Montémque victor isse per biverticem,
Nulli secundus inter astra Delphica.*

Hoc Deo plenus calamum suum condidit Jacobus Balde, qui

*Seu vult cothurnos Noricus, induit;
Soccata seu arridet Hellas,
Sotto Helicon Patris intumescit.*

Hoc Deo plenus gemmeæ dictionis vibravit lumina Nicolaus Avancinus, quem dum nomino,

*Favete linguis;
Vestra est illa dies, favete Muse,
Dum, qui vos geminas tulit per artes,
Et victæ pede, vocis & solutæ,
Romani colitur chori Sacerdos.*

Hoc denique Deo pleni ad suavissimam Poëseos majestatem cecinerunt Bentius & Stephonius, Remondus & Frusius, Rosvveydus & Cabillia-

vus,

vus, Hesius & Bahufius, Malapertius
& Causinus, Bisselius & Masenius,
Wansinus & Petavius, Donatus &
Cellotius, Ines & Verpæus, Vincar-
tius & Wallius, Libenius & Sanctius,
Gazæus & Gallucius, ac Sexcenti
alij, omnes J E S U Socij, MARIÆ
clientes & Discipuli; quibus Virgi-
neum os canendi, pedésque fuere,
Angelici ad castissimos nitidissimós-
que versus illigandos.

Quisquis igitur horum virorum
æmulatione tangitur; quisquis tan-
torum Poëtarum exemplo inflam-
matur, hanc nostrâ Magistram adeat,
ea duce ac auspice desideria pascat,
Parnassum tentet, fontes degustet;
promitto certè, venas ejus ita irri-
gatum iri, ut non tantum ambrosi-
um nectar possit fundere; verùm
etiam lauro, temporibus suis redi-
mendis jam jam destinatæ, procura-
re undas ad virorem, nunquam in-
teriturum.

Sed & nunc fortasse scire quis de-
siderat, quo carminis nitore disci-
pulum instructura sit Dei Mater.

Num veterem illam, & pridem exoletam Hebraicæ scholæ Poësim, annovam hanc, tot festivis salibus conditam, tot mellitis verbis plenam sit professura?

Obsecundo votis, & quâ doctrinâ suum quendam Auditorem impleverit, quave vos omnes sustentura sit, exhibeo perlibenter. Audite versus, venam æternæ vitæ, non equi Pegasei sapientes ungulam, quos ipsa de novo Parnasso, ubi divina Sapientia non uno, sed quinque fontibus in cruce manabat, venustè mutavit, & cuidam suo discipulo non latini, sed Indici sermonis elegantia dictavit.

*Pater eni noster! Genitor noster
Rigidis clavis in cruce fixus!
Cor transfixum cuspide amoris,
Sanguine toto corpore manans
Omnes circum proluit artus:
Cernisne caput, declive caput,
Caput hoc flavæ simile aristæ?
Viden, ut cingunt spinea ferta,
Usque ad tenerum fixa cerebrum?
Patris heu nostri cerne capillum,*

Spar-

Sparsum, incomptum, sanguine fadum!
 Oculi tristes, lumina mesta
 Rosas lacrymas large effundunt:
 Fluxisse putes molle corallum.
 Heu confudit jam decus oris,
 Pallorque genis sedet exanguis!
 Etiamne manus, Patrisne manus
 Ferro affixæ, sanguine rorant?
 Os mellifluum, Patris os nostri
 Pro me misero jam contuit?
 Extra Solymæ mœnia terræ
 Crucis exiit mole gravatus,
 Et pro scelerum mole meorum
 Extra Solymam crucifixus obiit.

Ita cecinisse Mariam, Franciscus Ben-
 tius (a) & Joannes Bonifacius (b) te-
 stantur, ego dixi.

(a) In An-
 nal. de hist:
 sedis Iul:
 Prev: Peru:
 n. 22.

(b) De B.V.
 vita & mi-
 rac. l. 2.

PRÆCONIUM.

Illustris Eloquentia! hac
 Dei laudes celebros: hac vir-
 tutem laudibus in cælum fero:
 hac vitij robur frango: hac
 mundos divido, cœlestem ni-
 mirum,

mirum, *Deum*, qui ad interitum tendit: hac etiamnum hinc versans animum à corpore disjungo, utque à formis imagines, sic ego alterius vite naturam ab altera, finemque beatum ab exitioso fine distinguo. O Eloquentia, ad cujus laudes prædicandas mihi eloquentiâ opus foret, quàm cuperem parem facundia tuâ orationem, afferre posse? S. Greg. Nazian: in carm: Nicobuli ad filium. Interprete Jacobo Billio.

ORATIO IV.

MARIA, præceptis bene,
Sanctissimèq; dicendi instructa;
 ideòque

Magistra Eloquentia.

O Quàm vellem hodie, ad evincendâ Marianæ facundiæ præstantiam,

stantiam, tranquillo potius auriū obsequio Mariam audire dicētem, quā imbecilli linguæ conatu eam dicere eloquentem! Suspicio enim, omnes illos, qui Deiparentem â taciturnitatis severitate, conversationis parsimonia, morum actionūque constanti gravitate gloriosa panegyri extollunt; prompta voluntatum inclinatione credituros, Rhetoricæ flores, verborum Favonios, sententiarum acumina, figurarum amœnitates, periodorum amabiles circuitus, gestuum modestissimorum charites non tam iniquæ conditionis esse, ut non etiam in gravissima Matrona, quamvis aliàs verborum parca, suum quandōque habeant pretium; cū præsertim de DEI Matre adstipuletur Fulbertus: *Coruscabat foris in superficie sermonis.* (a) Pulchri, (a) S. Ful:
fateor, ingeniorum lusus sunt, Ma-^{ser. 1. de}
riam unius tantum Verbi & quidem B. V.
Infantis fuisse Matrem; illius labia favum solummodo distillasse non pluisse; guttur ejus fuisse, sicut vinum optimum, seu annosum, quod in vase

vase nulla loquacitate tumultuatur, quemadmodum vinum novum: pulchrum etiam, agnosco, cum Ambrosio (a) & Bernardo (b) in virgine decus est, abstinuisse ab hominum cætibus, vitasse viciniam, interdixisse sibi publico: pulchrum præterea, erubuisse pudiciam, quâ nulla purpura est pulchrior; constituisse probitate, qua nullus ornatus cultior; enituisse modestiâ, qua nullum pigmentum venustius; emicuisse verborum actionumque verecundiâ, quâ mortalibus nihil gratius: Sed matronam, totque filiorum, ab Adamo descendentium, novam, augustissimamque Matrem, mundi Dominam, Doctorum Magistram verecundo silentio pressisse omnia, si quando locus incideret de amplectenda virtute, dirigendis docendisque discipulis, erudiendis infidelibus, fugienda voluptate, contemnendis honoribus, oppetenda morte, continendis denique in officio Christianis, induci non possum, ut assentiat. Inane quoque illud argu-

(a) *S. Ambr.*

l. II. in Luc.

c. 11. t. 5.

(b) *S. Ber.*

hom. 3. de

B. V.

argumentum est, ac potius ingenij
 commentum, DEI Sponsam Sacri
 Epithalamij cautelâ fuisse admoni-
 tam, ut facunda cogitationibus ac
 verbis soli Sponso loqueretur, jux-
 ta illud: *Quæ habitas in hortis, fac me,*
non mortales, non angelos, licet,
arrectis adstent auribus (ut loqui-
tur hic Richardus) me, inquam fac
audire vocem tuam: tantum enim abest,
 ut is solus & unicus ambiverit Di-
 lectæ suæ loquelam, ut tunc potius
 eam loqui voluerit, ad persuaden-
 dum, quando *amici auscultant.* (a) (a) *Cantic.*
 Non est igitur AA. non est, cur me^{6. 8.}
 dicere incipientem paucorum sensa
 perturbent, si aliunde ad hanc cau-
 sam parem animi magnitudinem af-
 ferre possum. Verum hic labor, hoc
 opus. Quæ enim dicendi vis tanta,
 quæ linguæ facundæ opulentia tan-
 ta, quæ vocis elegantia tam diserta,
 ut par sit illi facundiæ, quam obse-
 quioso conatu intendo explicare?
 An non ingens imprudentiæ argu-
 mentum est, velle in solem oculos
 defigere, & tamen aciem nolle per-
 celli;

celli; oceano se immergere, & sub-
 mersionis periculum non formidare;
 cælum cum Icaro scandere, & ca-
 lum non expavescere? O quàm me-
 tuo, nè quemadmodum aureus ille
 astrorum princeps sol serenissimo
 corporis sui splendore omnium side-
 rum lumina, quæ noctis beneficio,
 nobis in firmamento apparent, ab-
 sorbet; aut sicuti fluvij majorum na-
 vium baiuli à latere influentes aquas
 exhauriunt, & quasi submergunt; ita
 ab eloquentiæ Mariæ vel lumine
 vel flumine dictionis meæ tenues ad-
 huc & exigui seu radij seu rivuli, ubi
 se se in illud imerserint, absorbeantur;
 cogarq; prius quodammodo facere
 orationis finem, quam initium. Sed
 me recreat, & reficit Mariæ Sapien-
 tissimæ ac benignissimæ Matris pa-
 trocinium: quæ profectò nec beni-
 gnitatis suæ putaret esse, quem in su-
 arum gratiarum præconiū animas-
 set, eundem voce ac viribus desti-
 tuere: nec sapientiæ, quæ in ea sum-
 ma fuit, animatum jam ab ea clien-
 tis conatum exanimare. Quamob-
 rem

rem illud agam pro mensura virium, ut licet pauculi in hac causa arbitri judicent, Dei-parentem tantum fuisse taciturnitatis amicam, quantum alij eam extollunt facundam Eloquentiæ Magistram, omnes tamen intelligant, & Rhetoricæ præceptis in juventute, & amabili dicendi exercitio in provecta ætate præcelluisse.

Fabularum opifices poëtæ, dum in profanæ Sapientiæ Scrutaria, aut nundinis, merces suas exponunt, & ficta pro veris, fucata pro sinceris sine lucro ac fidei mercede venditant, illud tam pretiosum quàm verum commentum non in postremis jactitare solent, quòd in efformanda ad omnes pulchritudinis ac præstantiæ regulas Pandora, deorum singuli se se ita impenderint, ut Phæbus in vultu bina succenderit sidera, Flora genas expinxerit, Gratia frontem serenârint, Venus candorem corpori afflârît, Jupiter majestatem addiderit, Bellona fortitudine obarmârît, Saturnus animi constantiam
indi-

indiderit, Pallas universitate scientiarum instruxerit, Svada denique, & Mercurius ad eas exhibendas ejusdem labris mella, linguæque facundiam inspirârint. Verum nugivendulis sint hæc ad pretium & æstimationem; nobis, qui in amplissimo religionis, diviniorisque Sapientiæ emporio saniora mercamur, ad insignem cedant falsarum mercium detestationem, & disquirendæ veritatis opportunam occasionem. Quæ est igitur illa, in quam, ut esset mulierum pulcherrima, incomprehensibiles divinitatis personæ omnem derivârunt venustatem? Quæ est illa, cui se totum quodammodo impendit Pater, communicavit Filius, infudit Spiritus Sanctus? Est Patris filia, Filij mater, Spiritus Sancti Sponsa. Sed quæ est illa, quæ tam magnificis effertur titulis, tam sublimi celebratur honore? Est M A R I A. Hanc siquidem in initio viarum suarum ita possedit; seu potius, ut sapientiæ procures commentantur, (a) omnibus creaturarum, omnium

(a) Apud
Salazar. in
Prov. Sal.
c. 3. v. 22.

omnium facultatibus, & excellentijs
 Deus exornavit, ut dum alijs orna-
 menta partiretur, in Maria pulcher-
 rimâ varietate componeret, coacer-
 varet. Quando enim orbi terræ ad
 pulchritudinem imposuit montes, ut
 decorâ proceritate appropinquaret
 cœlo, filiæ suæ augustam corporis
 dedit eminentiam; hinc *caput tuum*
sicut Carmelus: (a) quando hortos & (a) *Cantic.*
prata capillavit gramine pinxitque 6. 7.
viore; crinibus filiæ regalem tribu-
 it honorem, quia *coma capitis ejus sicut*
purpura regis: (b) quando segregatis (b) *Ibidem.*
 â terra undis & fontibus insolitum
 inspersit nitorem; in nitidissimas
 gemmas gyravit filiæ oculos, ut es-
 sent perspicui, *sicut piscine in Hesebon*:
 (c) quando cultiores terræ areolas (c) *Ibidem.*
 purpuravit rosarum sanguine, & in
 arboribus fructuum prodromos
 protrusit flores; in filiæ suæ genis
 elaboravit ad omnem vernantis ille-
 cebræ invidiam florem mali punici;
 hinc *sicut flos mali punici, ita gene tue*: (d) (d) *Ibid. c. 4.*
 quando botros in vineis ad partum
 nobilissimi liquoris fecit intume-
 scere;

- scere ; lacteum rorem distillavit in
uberibus Filia, futura olim Dei Ma-
 (a) *Ibid.* c. 7. tris ; hinc *ubera tua sicut botri vinea* : (a)
 quando de agrorum pinguedine fru-
 ctum præstantissimi *frumenti extraxit*
 triticum, jam tunc destinavit in ute-
 rum Filia *Frumentum Electorum* , (b)
 (b) *Zach.* crudelibus Judæorum flagellis tritu-
 c. 9. randum ; hinc *venter tuus sicut acervus*
 (c) *Cant.* *tritici* : (c) quando denique (quis enim
 c. 7. omnia percenseat) ad prædicanda
 divinitatis opera mortalibus distin-
 xit labia, linguasque resolvit ; Filia
 suæ non tantum decorè aptavit lin-
 guam & labia ; sed insuper , ut ama-
 bili sermonis elegantia præcelleret
 universos , melle ac lacte irrigavit ;
 (d) *Ibid.* c. 4. hinc *mel & lac sub lingua tua* , (d) O
 Maria ! ideoque eloquium tuum
 dulce atque decorum , (e) vel ut
 (e) *Hebr.* *lectio apud*
Sanctium. habet Nicephorus (f) *labia tua florida*
 (f) *Lib.* 2. *& verborum suavitate plena.* Illa pro-
hist. c. 23. cul dubio suavitate, cujus copia Se-
 raphicus Doctor nutritus , non-
 nunquam exclamavit : O quam *melli-*
flua verba distillaverunt dulcissima Ma-
ria labia ! melliflua in orationibus ad
Deum ;

Deum ; lactiflua in colloctionibus ad proximum ! (a)

(a) *S. Bonav.*
in spec. 6. 20.

Videtis, opinor, AA. quàm liberalis in structura corporis Mariani extiterit Pater ; quàm munificâ potentia suæ virtute adaptârit tenellos artus, conformârit membra, nobilitârit animam, ut omnium creaturarum pulchritudinem transcenderet Filia, essetque Augustissima, nitidissima, floridissima, fructuosissima, Sapientissima ; & quod unice hic evincere contendo, eloquentissima.

Verùm itane Pater supereffluentis largitatis fontes diffudit in Filiam, ut in Matrem nihil contulerit Filius, in adornanda Sponsa defuerit Spiritus Sanctus ? An non, testibus Romano & Nazianzeno Gregorijs, totius consilio Trinitatis homo factus est ? Si homo, cur non illa creatura, quam *celi et terræq; mysteriū* appellavit Epiphanius (b) *Deiformem* Augustinus, (c) *Deificatam* Damianus ? (d) Absit, absit, tam grande piaculum cogitare de Filio,

(b) *S. Epiph.*

serm. de laud. B. V.

(c) *Apud Avancin.*

orat. 4. de B. V.

(d) *S. Damian. serm. 2. de Nat.*

Filio, qui non tantum ex filialis ob-
servantiæ legibus, sed etiam ad li-
beraliter contestandos amores in
Matrem, nihil unquam omisit,
quod erat vel subline, vel singulare.
Et quomodo abesse potuit Filius,
quando *Verbo* cæli firmati sunt; *Ver-*
bo sol & luna radiârunt; *Verbo* terra
constitit; *Verbo* aquæ à terra segre-
gatæ sunt; *Verbo* aër alite, mare pi-
scibus, arva messibus, campi grami-
ne, Sylvæ, animantibus repleta sunt?
Ipse siquidem *dixit (Verbum)* & facta
sunt omnia, etiam M A R I A. Quo-
modo abesse potuit Spiritus San-
ctus, qui, dum congregationes aqua-
rum fierent, jamque dimanarent in
mare, circuissent in flumina, fere-
batur super MARIA? Maneat pro-
inde, quod pridem senserunt Patres,
totius Trinitatis opus & complementum (a)
esse MARIAM; maneat, quod cum
teneriorum affectuum Theologis as-
fero, eam jam tunc comptissimæ elo-
quentiæ præceptis fuisse imbutam,
quando ab initio, & ante Sæcula Pa-
ter exornavit linguam & labia; Fi-
lius

(a) Eucba-
stus Orat. de
B. V. tom. 5.
Bibl. Pa-
trum & Esi-
chius.

lius linguam infedit ut *Verbum*; Spiritus Sanctus totâ sui plenitudine se infudit ad complendam omnibus numeris perfectissimam, verissimamque Pandoram. Et talis erat, dum ab initio viarum divinâ conciperetur mente, *Filia singularium Dei cogitationum*. (a) Sed nec alia esse potuit in tempore, nisi, quod horret animus, impiè quis cogitet, fecundissimam Numinis mentem monstrum abortivum parturisse. Vos ego hîc testor beatissimos Sanctissimosque Parentes Joachime & Anna; nunquid dum maternis solutam visceribus vidistis filiam, illa vestra decrepita vota, illam orbis universi felicitatem; vidistis in tenero corpore insolitam pulchritudinem, in fronte Serenitatem, in oculis sidera, in genis amœnitatis theatra, in labijs rosas, in pectore candorem, in utero lilia, in membris alijs majestatem, in omnibus denique motibus ornatissimas gratias, ipsam ætatem prævertentes, ac celerrimo postea gradu secuturas? Vos testor, O nimium

(a) S. Damascenus.

fortunatæ Virginum animæ, quibus
 illa felicitatis obtigit occasio, ut intra
 templi claustra contubernalem ha-
 beretis Virginem, ad cujus amænif-
 simam conversationem, veluti ad
 tersissimum speculum, mores vestros
 potuistis conformare; nuncquid eâ
 fuit taciturnitate, ut si quando inci-
 deret opportunitas sive invehendi in
 puellarem mollitiem & levitatem;
 sive prædicandi castarum mentium
 beatitudinem, vestium frugalitatem,
 morum modestiam & verecundiam;
 sive avocandi vos à perituris ad pe-
 rennatos Sponsi cælestis amores,
 quasi elinguis conticuerit, & non po-
 tius facundo, inflammatoque affe-
 ctibus ore, voce verò ad modestis-
 simam temperatâ suavitatem munus
 expleverit perfectissimæ Oratricis?
 Te testor facundissimi præcursor Ver-
 bi, & Christi amabilis consanguinee,
 quo inter natos mulierum non sur-
 rexit major, magnè coram Domino
 Joannes; nunquid in Verbo potens
 Maria, quæ optimorum Rhetorum
 est felicitas, ad motum peroravit,
 quan-

quando matri tuæ Salutem non tantum attulit, sed & copiosâ dixit humanitate? Memini enim, Te quôque non sine maternorum viscerum commotione ad dicentis vocem exultasse, applausisse. Vos testor denique superbos Judææ montes, humilisque valles; felices, quia plena Numine Oratrix nostra vos jam pede Sacratione conscendit, jam se se ad vos inclinavit Magistra Orbis & Domina; edicite, nunquid, ut posteritati quôque faceretis resonantem, cavernosis fissuris, quasi ore hiantem, canoram illam Mariæ eloquentiam excepistis, quando benedicienti cognatæ suæ Elisabeth non ad numeros solùm poëticos cadente, sed insuper composito ad Rhetorum præcepta sermone respondit, ac ingentia divinæ bonitatis beneficia extulit, & dilaudavit? Eucharisticus namque ille lætantis animi júbilus habet profectò Rhetoricæ artis conformationem, quâ præcellit; flores, quibus delectat; verborum mella, quibus influit; vires, quibus

penetrat; flammæ, quibus accendit; alas, quibus sese in Deum librat; argutias, quibus Sponsi sui petus in amorem vulnerat; figuras denique quibus eloquentiam orbi propalam profitetur. Enim verò si quis *gradationem*, qua supra communem loquendi consuetudinem ex alio in aliud proceditur, in jubilo desiderat, deprehendet sanè gradientem augustius, dum beneficia, munificæ Dei liberalitate profusa, paratis verborum gratijs celebrans, tandem ad Supremum omnium beneficium Divini Verbi Incarnationem gradum faciendo, facundissimè concludit: *Suscepit Israel puerum suum, recordatus misericordie sue.* Si quis amænos descriptionum fontes, ipsasque *periphrases* apud eam investiget; inveniet nobilissimas, indeque liberaliter scaturientes, unde ortum traxit illa, qua delicias suas, DEUM, non nominans, honorificis circumscripsit epithetis: *Fecit mihi magna, qui potens est, & Sanctum nomen eius.* Si quis *antitheses, tropos, emphases*, aliaque Sermōnis

nis ornamenta exposcit, dabuntur ei ad voluptatem; quia, ut verbis Gersonis, Magni Sorbonæ Cancellarij loquar, *sub varia tropica antithesi junxit cum misericordia morem severitatis; cum dispersione, & depositione superborum, humilium exaltationem; cum esurie satiantem, Saturitatem inanem: tandemque conclusit, ut Oratrix peritissima, per hoc verbum: Suscepit Israel puerum suum. (a)*

(a) Tract. 2.
in Magnificat.

Sed quid ego sermonis Mariani elegantiam extollo? Schemata certè ad persuadendum, movendūque adscita, infimæ Rhetoricæ partes sunt, quæ ex munere suo servire debent sententiæ, non dominari. Oratio non magis figurarum coloribus pingenda est, quàm rerum opulentia nutrienda. Auditorum animi non chameleontis instar verbis, quasi ære, pascuntur; sed succoso argumentorum robore cupiunt sustentari. Non vestis, non comæ, non cincinnatiæ commendanda sunt in MARIA; sed præcipua membra, sed nervus, sed medulla. Bene habet, AA. Si fontes & locos cum intrinsecos,

seu ab ingenijs oratorum ex ipsis rebus erutos ; tùm extrinsecos, & aliunde mutuatos, quos Summi Sapientia Magistri & aperuerunt & indicârunt, MARIAM liberaliter degustasse; si reliqua disertissimæ facundia munia calluisse, non obscuro argumento ostendero, dicetisne, quidquid in arguendo magnum, in concipiendo sublime, in disponendo concinnum, in eloquendo grave reperiri potest, ei adscribi oportere? Dicetis. Nam is est vester in Patronam affectus, & amoris indoles, ut, siquando ad novam Marianorum decorum accessionem conficiendi sunt tituli, malitis sagaci arguendi facilitate prævenire, quàm lentâ assensûs benevolentia subsequi oratorem. Arguetis proinde mecum, uberimos *Inventionis* fontes in ea manasse non tantum tunc, quando nobilissimum elaborans conceptum, *Inventa*

(a) *Luc. c. 2. est in utero habens de Spiritu Sancto; (a)* sed tunc etiam, quando conceptus ille, nonnunquam elapsus, *Inventus* est in medio Doctorum, subtilitatem ejus ad-

admirantium. Arguetis mecum maturam, exactamq; disponendi dexteritatem, quâ inventas rerum materias, & materiârum selectas copias studiosissimè ordinabat, quia cum Deo erat *cuncta componens*. (a) Arguetis mecum suis numeris perfectam *elocutionem*, quâ capiendis sive mortalium animis, sive Angelicorum Spirituum intellectibus, sive Supremi Numinis benevolentia delitiosè occupabatur, quando illo ipso eloquentissimo *Verbo* mundum recreavit, quo tota æternitate DEUS fuit facundissimus. Arguetis mecum elocutionem, nullis pigmentis fucatam, nulloque Poppyismate contectam; sed nudam sinceramque, cum per annos complures habuerit Magistrum, qui postquam cum ea, cum amicis, cum latronibus, cum hostibus cum Patre suo voce magna locutus fuisset, lanceâ transverberatum exhibuit pectus, ut aperto pectore nudatoque corde ostenderet, se sine fallacia locutum, & sine fuce perorasse. Arguetis mecum præcellentem *Memoriam*,
am,

(a) *Prov.*
c. 3.

am, quia! constat ex Sacrorum oraculorum apicibus, eam verba omnia in corde suo conservâsse. Unicum, fortasse *Pronuntiationis* munus in ea requireret frivolus aliquis, quia *turbata*

(a) *Luc. x. i. est in sermone*: (a) Sed nec hîc vacillasse dici potest; cùm, siquid trepidationis, ad illustrem pudicitiae commendationem, passa est Virgo, id non suâ, sed insolitâ formosissimi Juvenis allocutione probabile sit, provenisse. Et quamvis datura responsum nonnihil hæsitâset; cùm Oratoris sit, dicenda prudenter cogitare, cogitata consultè disponere, disposita maturè expedire, atque ad audientes proferre, meritò sanè prius *cogitabat*, (b) antequam loqueretur,

(b) *Ibidem*, divinaq; voluntati subscribens profunda humanitate ancillam se profiteretur. Atque ita quidem, accommodè mecum arguentes, eloquentiae Magistram constitueris MARIAM; orationem tamen meam necdum, omni ambiguitate ac dubio, evolvi videtis; siquidem leviora hæc censerî possunt, magisq; ad palpandos

in

in pium affectum animos apta, quàm ad pertrahendos in assensum. Vehementior proinde moles adhibenda videtur, quæ in ipsa reluctantium pectora irrumpat, & veritatis extorqueat confessionem. Meministisne, congregatos aliquando fuisse in concilium, omnesque pariter discipulos in eodem loco consedissee? Meministisne etiam, tunc factum esse repente decælo sonû, tanquam advenientis Spiritûs vehementis, qui disruptis cœlorum nubibus illapsus super duodenos Apostolorum vertices constitit, seseque totum mentibus eorum infudit? Quorsum illa ad terrorem auribus, ad aspectum oculis, ad amorem animis portentosa miracula? quorsum illa fulminantis, sonantis, ardentis, spirantis, unientis, amantis vehementia? Dicam, quod gestic animus. Promissus erat discipulis professor, qui cùm eos esset docturus, necesse habuit dotes Magistri Optimi exhibere: hinc ut doceat, sonat; ut inspiret, spirat; ut inflammet, ardet; ut placeat amat; fulminat

ut

ut compellat. Sed quam facultatem docendo auspicatum fuisse arbitramini? An illam disciplinarum omnium Magistram Theologiam? an tribunalium, magistratuumque præsidem Jurisprudentiam? an generis humani fulcrum, & conservatricem Medicinam? an naturalium Scientiarum Dominam Philosophiam? Dicam iterum, quod obsequiosior, extorquet opinio: Divinissimus ille Magister, ut compendiariâ quadam brevitate omnium litterarum evolveret facultates, talésque formaret oratores, qui omnium disciplinarum supellectile instructi, in omni arena, omniq̃ue materia possent perorare, de discipulorum suorum verticibus, veluti è cathedra, Rhetoricâ est professus. Hinc, ut de rerum dicendarum copia non essent solliciti, docuit *omnem veritatem*; ut essent facundi, omnium eruditrices supeditavit linguas; ut accenderentur in fervorem, affudit ignem; ut dictionem illustrarent luminibus, insperisit flammam; ut in diffitis audirentur

rentur terrarum tractibus , addidit sonum ; ut percellerent timore, concessit tonitrua ; ut flecterent animos, ingessit vehementiam. O temporum illorum felicitatem ! O felices beatósque Discipulos , quibus contigit , in prima statim Magistri lectione ità imbui , ut opus non fuerit in inania illa verbosorum rhetorum vota prorumpere , quibus disertissimorum linguas , oráque centum solent exoptare ; quia non unius , sed multarú linguarum beneficium sunt consecuti ! Iterum iterúmque felices rhetores, qui vix scholam ingressi adeo facundè perorarunt , ut in omnem terrá exiverit sonus eorum , jámque Parthi & Medi , Ælamitæ & Judæi, Cappadoces & Phryges, Asiatici & Ægyptij , Romani & Profelyti, Cretes & Arabes fortius tracti sint dicendi potentiâ , quàm Gallicani Herculis commentitijs viribus mortales, auribus aureè catenati. Prævertitis opinor, AA. celeri mentis acie meam in dicendo tarditatem , & quod pridem dixisse oportuit,

oportuit, irrefragabili decernitis
sententiâ, Dei-parentem in hac Spi-
ritus Sancti effusione longè abun-
dantius fuisse repletam; & dum
Apostoli eloquentiæ flumen excepe-
runt, in eam derivatum esse ocea-
num; non illum quidem, qui con-
tra pertinaces mentium rupes effe-
vesceret; sed qui auditores suos
tanquam adblandientis osculi tactu
adlamberet, ac demulceret. Nisi
fortè cum nuper natis Scripturæ In-
terpretibus (a) minùs Marianè
malletis sentire, ac dicere, hic, si
unquam aliàs, discipulos fuisse su-
pra Magistram, quando de cælestium
donorum & linguarum affluentia ij
soli, Matre, nescio cur & quomodo,
exclusâ, communicârunt. Sed O
insignem humanæ mentis lentitudi-
nem! quæ, quod exigua sua virtute
apprehendere non valet, quem in fi-
nem eloquentiæ facultate debuisset
exornari, mavult ex intelligentiæ
sux angustia tam nobilem scientia-
rum gemmam inconsultè detrahere,
quàm cum laudis mercede attribue-

(a) *Apud
Ioan: Lori-
num in acta
Apostolo-
rum.*

re

re DEI Matri. Habent hoc quorundam ingeniorum indoles, ut singularitatum amantes, sinant se potius opinionibus abripi in errorum devia, quam trita senum vestigia legendo per avia deduci in amplexum veritatis. Humani intellectus, vel voluntatis non tenerè affectæ vitium est, sic sibi sapere, ut alijs dissipiat, quando de authoritate Doctorum veterum in Marianæ præstantiæ comendationem renuit consentire.

Quid ad hæc Sanctissimi Præsules, Gregori (a) & Augustine, (b) pro amplissimo vestro in Mariam affectu? Sentitisne divinissimæ facundiæ dona descendisse in solos Apostolos, futuros orbis prædicatores, & non etiam in alios, ac præcipuè in Deiparentem? Quid ad hæc Hieronyme, (c) Cypriane, (d) Chrysostome, (e) & Theodorete? (f) Statuitisne apud vos, tam iniquum esse debiliorem sexum, ut eum ab hac tam nobilium charismatum communione excludatis? Quid ad hæc religiosissimi Doctores Alberte Magne

(a) S. Greg.
l. 5. c. 7.
(b) S. Aug.
Tract. 2. in
Ep. S. Iean.

(c) S. Hier.
in Ep. S.
Paulæ.

(d) S. Cyp.
ser. de Spiritu
Sancto.

(e) S. Chrys.
hom. 74. in
Matth.

(f) Theod.
q. 11. in Iud.

H

gne

(a) *S. Alb. in Mar. c. 155.* gne (a) Antonine (b) & Dionysii Richeli ? (c) Dicitisne, Spiritum Sanctum in celeberrimo ; maximè-que solenni adventu suo declinasse ordinariam sedem ac habitaculum, & non potius pleno flammarum lumine se infudisse, ut quod ante ad suavem, per novem menses, Dei quietem obumbrarat, jam ad omnem, quæ in terris dari potuit, divinorum ornamentorum abundantiam illustraret ? Non sentiunt, non dicunt, non statuunt. Imò fusio-rem laudis materiam ingressi ultimi, luculenter asserunt, illo divini fluminis influxu longè pleniorẽ evasisse MARIAM, eamq; solam plus cæteris omnibus de tam copioso fonte hausisse. Si igitur, communi orbis Christiani consensu, Apostolici Senatûs Proceres ingentia facundiæ flumina ex ignea linguarum pluvia collegerunt ; si tales oratores effecti sunt, ut eloquio suo gentes, genio diversas, in admirationem raperent ; dictatoriâ demum sententiâ decernendum est, sub eodem eloquentiæ

quentiæ Professore numinis Augustam Matrem, quam Rhetoricæ artis excellentia, partim à Deo liberaliter concessa, partim assiduâ discretissimæ scripturæ lectione comparata jam ante insigniter commendabat, omnibus alijs præripuisse palmam, & magistralem in hac facultate coronam retulisse. Néque dubium est, altissimo quodam Stupore animos oculosque audientium tenuisse defixos sæpius, quando ad proliciendas è cordibus humanis reciproci amoris flammæ de cæli ornatu, divinique amoris magnitudine; ad excitandam rerum credendarum fidem, de reconditis Scripturæ mysterijs; ad acuendam in pusillis animis fiduciam, de inexhaustis Filij sui meritis; ad provocandas ex oculis reorum lacrymas, de immensa Dei misericordia; ad retrahendos à lubrico pravæ cupiditatis tramite, de æterni ævi venturi supplicij differebat. Testatur enim id ipsum Abbatum gloria Rupertus, (a) adstipulatur Sophronius,

(a) B. Rup.
in Cantica.

H 2

(a) af-

(a) *Serm.
de Assum.
B. V.*

(a) affirmat Hispaniæ jubar Ignatius, dum ad eum, quem non tantum diligebat JESUS, sed & MARIA, familiariter scribens ita refert: *Magnus est concursus populorum, Reginam cæli videre, & audire cupientium.* Et quis non credat, hanc oratricem ad instaurandas cœlestis Jerusalem ruinas multo facilius attraxisse saxea mortalium corda, quam ædificandis Thebæ mœnibus lapides attraxerit Amphion? Quis non credat complures animas, æternum perituras, disertis, sed modestis ejus sermonibus felicius ab orco fuisse revocatas, quam à facunda Orphei Lyra Euridices? Si enim verbo unico Deum Immortalem de cœlo traxit; cur non decen- tissima verborum liberalitate mortalia cogeret pectora, & in quem vellet, pelliceret assensum?

Vivat proinde absolutissimæ Magistra eloquentiæ MARIA! vivat magnorum, quos ab adolescentia usque ad hoc senium suum suspexit orbis, Rhetorum regina! Vivat in animis omniū mortalium; sed præcipuè di-

discipulorum, quorum numerus nobis est innumerus! Inter quos quia tamen etiam referri nos anhelamus, nè laudes ejus in posterum balbutiamus, vivat in linguis nostris! nè in affectibus simus frigidi, vivat in cordibus nostris! nè in conceptibus serpamus, vivat in intellectibus nostris! nè in verbis rusticemur, vivat in sermonibus nostris! nè dicendi viribus succumbamus, vivat in lateribus nostris! nè in gestibus displiceamus, vivat in manibus, brachijs, fronte, oculis, ore, labris, in totius denique corporis flexibilibus membris nostris!

Atque ita viventes vitâ tuâ, O MARIA! superabimus non tantum dicendi copiâ Tullios, dulcedine Theophrastos, amantitate Hortensios, vehementiâ Antonios, subtilitate Menelaos, modestiâ Diogenes, gravitate Catones & Critholaos, quos antiquitas vel eloquentiæ parentes, vel latinas Syrenes adoravit; sed proximè etiam accedemus damascenos, mellifluos, aureos, cyprios,

bs, ambrosios oratores, quos Sa-
cula nostra diviniore facundia ma-
gistros suspiciunt & venerantur:
cum quibus stabimus, quam diu vi-
ta stabit, jurati Magistra discipuli ac
pracones, donec sudantes in ejus
laudibus conatus nostri concidant,
atque hunc demum sui referant fru-
ctum, ut deficiente undique Spiritu,
hanc omnium Orationum nostrarum
faciam clausulam: JESUS! MARIA!

—§§§— —§§§— —§§§— —§§§— —§§§— —§§§—

PRÆCONIUM.

Philosophia unum opus est,
de divinis humanisque vera
invenire. Ah hac nunquam,
recedit Religio, Justitia, Pie-
tas, & omnis altus comitatus
virtutum. Seneca Ep. 62.

—§§§— —§§§— —§§§— —§§§— —§§§— —§§§—

H

O R A—

ORATIO V.

MARIA, naturalium rerum cognitionibus illustrata, ideoque

Magistra Philosophia.

Actum videbor agere, Auditores humanissimi, si quam supra reliquos tum Sacros tum profanos oratores gloriæ pennis evolasse ostendi, fusiùs hîc, singularique nisu contendam, pulcherrimis rerum naturalium cognitionibus se se in eminentem extulisse sublimitatem; cum è Sacro Sapientum Senatu jam pridem intellexeritis, eum, qui omnibus numeris absolutum vult agere, oratorem, ex omnium scientiarum viridarijs flores non tantùm delibare, verùm etiam fructus, amæna dulcedine refertissimos degustare, atque in sanguinem, succùmque suum convertere oportuisse. Verùm quia oratione, non pressa ratione, subobscuro argumento, non firmamento, id insinuavi non probavi; ut amplissi-

mos Marianarum laudum campos ingressus plures flores colligam, quorum odores & pulchritudines Auditoribus aliquam saltem faciant voluptatem, placuit penitiora camporum spatia subintrare, atque in primis inter vellicatrices spinas investigare *Rosam*, hoc est, de spinosis Philosophiæ difficultatibus triumphantem exhibere Magistram, eamque mundo proponere venerandam. Erit, opinor, conatus iste non inamænus; quia pulcherrima rosarum MARIA enim floridâ induet purpurâ, quando ob meam in dicendo imbecillitatem erubescam; erit aspectu sui non injucundus, quia renidente ac amabiliter annuente vultu illum exhilarabit; erit impendij sui liberalitate non frustraneus, quia ex rationis ductu, autoritate Patrum, consensu Interpretum, ita dictionem moderabor, ut quam hætenus Grammatici Grammaticam; Poëtæ Poëtam, Musici Musicam, Rhetores oratricem crediderunt, Philosophi Philosopham revereantur.

Unum

Unum vereri possem, nè si ardor aliquis dicentem fatigaverit, desint aspirantium aurarum animæ, quæ & me in cepto cursu orationis animent, & Auditorum meorum animos in assensum conspirent. Sed ut etiam hunc metum excludam, facit fiducia, quam promptissima vestra audiendi benevolentia jam pridem excitavit, quàmque singulare ac eximium studium, religiosissimâ voluntatum unionione, ad divulgandas Deiparæ laudes, à vobis susceptum conciliavit.

Quare dum argumentum approbatis, mecùmque agnoscitis, nihil ad Philosophiæ tum naturalis tum divinæ pretium esse accommodatius, nihil ad Philosophorum gloriam sublimandam excellentius, quàm si Deiparentem eorum constituamus Magistram; consuetis benevolentia vestra Favonijs dicenti aspirate, & ego non sinè animi voluptate, ac dulcedine in hoc affectu vestro respirabo.

Tu verò O sanctissima, suavissima & amabilis Mater! Rosa granoso cortice adhuc inclusa, (a) Rosa spinarum

(a) *Plin.*

Nat. hist.

l. 21. c. 4.

H 5

fatel-

satellitio munita, Rosa inter filios
Adæ, sive primi, maximique Philo-
sophi discipulos emicans, pande si-
nus tuos roseos Virgo perpetua;

(a) S. Au-
gustin: in Vi-
rid: Mendo-

74:

(b) S. Vi.
Herinus.

(a) diffunde rubentes foliorum tuo-
rum calathos, seu purpurea labra;
exere caput tuum flos de Spinis, sed
spinâ carens; (b) transcede demum
vertices Philosophorum omnium,
spinis Adæ redundantium, ut te do-
ctissimam illorum legamus Magi-
stram, teque in sæcula celebremus,
quæ à sæculis fuisti celeberrimâ.

A sæculis dixi, AA. nec immeritò.
Si enim cogitationes nostras ad pri-
ma illa tempora revocemus, unde
reliqua usque ad hæc nostra, serie
continuâ profluxerunt; inveniemus
talem aliquando extitisse Philoso-
phum, quem ipse mundi conditor
in primam voluptatis sedem collo-
cans, amplissimum totiùs naturæ non
tantum fecit principem, sed & per-
spicacissimum contemplatorem. Hic
quàm divinâ, quàm multiplici, quàm
variâ cognitione completum habue-
rit pectus, ex eo potest colligi, quòd
nactus

nactus sit animum, quem Deus de-
 sumptis à sua imagine lineamentis
 efformavit: quòd ipsam rerum omni-
 um causam intuitus, cum eaque lo-
 cutus sit: quòd aspexerit nascentis
 mundi principia, animadverterit,
 progressionem, penetrârit naturam
 cœli, terræ, aëris, & aquarum; no-
 taverit creaturarum quarundam æ-
 ternitatem & constantiam, aliarum
 celeritatem & tarditatem; harum
 ortum & interitum, illarum transmu-
 tationem & vicissitudinem; harum
 causam & effectus, illarum motus &
 potentiam; harum pretia & excel-
 lentiam, illarum sordiam & vilitatem;
 nihil deniq; ignoraverit, cujus igno-
 rantia fontium cristallis, verticibus
 montium, speciebus florum, fructi-
 bus arborum, animabus stirpium,
 luminibus siderum, bestiis aquarum,
 turmis avium, gregibus ferarum, fla-
 tibus ventorum ex vi sua, & naturæ
 proprietate aptissima nomina requi-
 ret impertire. Prô quantus Philo-
 sophus! quanta in uno homine vis
 ingenij ac Sapientiæ! quàm admi-
 rabilis,

rabilis, quàm illustris in una mente scientiæ gloria? Viditne sæculum aliquod inter sapientissimos Chaldaeos & Hebræos, Ægyptios & Phœnices, Græcos & Romanos, Persas & Arabes Adamo parem? Nunquid magnus fuit Noë, novus humani generis parens, & mortalium omnium conservator, qui *doctos antea Theologiam & sacros ritus, insuper cepit erudire humanam Sapientiam, & multa naturalium rerum Secreta literis commendavit?*

(a) *Berosus*
l. 3. *antiquit.*

(a) Fuit; sed primam Philosophiæ lauream non eripuit Protoparenti. Nunquid magna fuit in Perfide Sybilla, Noë progenies, quæ de venturo mundi Redemptore, de suæ gentis origine, de orbis ortu quatuor

(b) *Petrus*
Perpin. orat.
12.

supra viginti conscripsit libros? (b) Fuit; sed neque in certamen venit filia cum parente. Nunquid magnus fuit in Chaldæa Abraham, quem *rerum omnium peritum, eloquentem, & in conjectando sagacem* Josephus celebrat,

(c) *Lib. 1.*
antiquit. c. 8.

(c) quémque ex primo fonte per Mathusalem derivato, suas hausisse scientias testantur Interpretes?

alij dnt

(a) Fuit;

(a) Fuit ; sed tamen fontem non ex- (a) Pineda
in Sal. pra-
vio l. 3. c. 27.
hausit. Nunquid magnus fuit Abra-
hami nepos, & Israëliticæ gloriæ ful-
crum, Jacob, qui naturæ cognitione
adeo valuit, ut caprarum oviûmque
partus modò unicolore, modò ma-
cularum varietate sine tinctura &
fucò potuerit expingere? (b) Fuit ; (b) Gen.
c. 32.
sed limitatæ scientiæ dedit argumen-
tum. Nunquid magnus fuit in Æ-
gypto Joseph, qui ætate adolescens,
domo externus, conditione servus,
quod Philosophiæ tunc esset prin-
ceps, principem in aula locum gra-
tiæ favorisque obtinuit? Fuit ; Sed
Adami magnitudini detraxit nihil.
Nunquid magnus fuit orbis mira-
culum, Salomon, quem mortalium
omnium sapientissimû illimitatè ce-
lebrare videtur Thaumaturgus Gre-
gorius, & Abulensium pontifex To-
status, (c) quémque *Sapientie laude ita* (c) Toft.
præstitisse omnibus cum suæ tum superioris ^{p. 11.}
memoriæ hominibus, asseruit Nazianze-
nus, (d) ut eum *Sophiæ verticem* appel- (d) S. Gr.
Nazian.
orai. 29. &
34.
laret? Fuit ; sed nec Adami verti-
cem excessit, nec sapientiæ gloriam,
quâ

(a) *Theologi apud Pinced. de rebus Sal. l. 3. c. 10. §. 12.* quâ is refulserat, obscuravit. (a) Deus Immortalis? Ergo nullus est, qui primi hominis magnitudini certamen indicat? Ergone ad eam sublimitatem philosophici præstantia nominis Adamum extulit, ad quam nemo alius unquam est evectus?

(b) *S. Bern. ser. 1. super Salve.* Bono animo, AA. Respondet pro me de clara valle clarissimus Encomiastes: *Scientia scientiarum Sanctarum, Maria: quia sicuti sol universa celi lumina præcellit prerogativâ claritatis, sic ipsa totam rationalem creaturam (post filium) excelsit splendore virtutis ac Scientiæ.* (b) Respondet pro me Albertus, magnus Ratisbonæ Præsul: *Perfectius, quàm Adam, quàm Joannes, quàm Paulus cognovit mysteria supernaturalia,* (c) ut de naturalibus non ausim dubitare. Respondet pro me Petrus Damianus: *Non excellentissimus Patriarcharum chorus, non providus Prophetarum numerus, non Judex Apostolorum Senatus, non martyrum victor exercitus, non aliquis antiquorum, non quispiam sequentium Patrum huic Beatissime Virgini poterit comparari, si perfectionum ejus plenitudinem mensuremus.* (d) Nam si

(d) *S. P. Damian. ser. de Nat. B. V.*

III.

si nobilissimam tam humanæ quàm
divinæ Sapientiæ portionem qui-
dam Adamo vendicant, quòd mor-
taliū princeps non alijs modò rebus
imperaturus esset; verùm etiam ini-
tium allaturus ijs, qui in omni per-
petuitate successuri temporis impe-
rarent: quanto magis attribui de-
bet Patriarcharum Regina, cujus
regnum ut nullo limite terminaret,
sed imperio paterno æquipararet,
ipse D E I filius Matri famulabatur
in terra: *Et erat subditus illis?* Jactet jam
infelix mortalium parens, se quia
princeps fuit, & generis humani ca-
put, ingentia humanæ Sapientiæ de-
cora ex divinæ liberalitatis inex-
hausto fonte traxisse, illáque conti-
nuâ dein experienciâ pro orbis uni-
versi emolumento cumulasse; ja-
ctantiam confundet M A R I A, quæ,
quia Regina fuit humanæ naturæ, (a) *Andr.*
Recuperatrix perditæ orbis, (b) *Cret. de*
paratrix ipsius Adæ, (c) *Dorm. B. V.*
longè illu- *(b) Bern.*
rioribus Philosophiæ cognitioni- *Busten. in*
bus fuit exornata. Jactent alij fa- *Mariali.*
mosi vel fumosi Philosophi felicitatem *(c) Serg.*
Hierosol. de
Nat. B. V.

tem

tem differendi, promptitudinem difficultates enodandi, dexteritatem argumentis depugnandi, celeritatem latentes rerum causas eruendi: fastum ingenijque ostentationem. comprimet Maria, quæ tantum excessit omnes, quantum sol radios, aurum scoriam, flos spinas; quia sicut lilium inter spinas, sic amica mea inter filias, (a) hoc est, ut quorundam Patrum judicia referam, inter pungentes disputantium, ac male philosophantium aculeos constituta, quasi inter spinas, quàm inter rosas pulchrior triumphavit.

(a) *Cantic.*
c. 2.

In Dialectica quidem, quæ densissimis dumetis horret, quàmque hominum ad divinam Sapientiam manuductricem Clemens, (b) Disciplinarum disciplinam Augustinus, (c) earundem apicem Plato (d) nuncuparunt, eximiè prominuisse, illo concludenius argumento, quod ad intelligendos sacrarum litterarum sensus sit perquam necessaria. Nam si alteri, hoc est, Romano credimus Clementi, (e) divinæ illæ paginæ, Spi-

(b) *Clem.*
Alexand.
apud Men-
doz. in Virid.
(c) *S. Aug.*
contra Aca-
dem. l. 5.
(d) *Lib. 2.*
de Rep.

(e) 1. *Con-*
stit. c. 6.

Spiritûs Sancti calamo exarata, abundant argumentationum varietate, constant illationum certitudine, lucent definitionum claritate, scitent dubijs terminorum & sensuum; quæ omnia subtiliter inventa, providè disposita, concinnè pronuntiantur; nec sine insigni Dialecticæ peritia faciliè penetrantur. Quis autem sine perversæ voluntatis nota credat, sedulam illam, ac prudentissimam apem, MARIAM, in lectione Scripturarum assiduam collocasse operam, nec tamen Sacrorum voluminum veritatem dispexisse? Quis nescit

Floriferis ut apes in saltibus omnia libant,
 & collectum de floribus succum in liquorem suum suavissimè digerunt, sic studiosissimam Virginem, ex Sacrorum oraculorum, quasi florum quibusdam areolis, copiosam Spiritûs dulcedinem suxisse, atque in succum proprium traduxisse? Insipiam, si credo, Deiparentem ignorasse optimas disceptandi, ratiocinandi quæ

nandique formas, quæ Prophe-
 rum ratiocinia quotidianâ medita-
 tione cognoverat. (a) Erubescam,
 si mentior, omnem speculandi vim
 posuisse in unum Nomen & Verbum,
 ex quibus orationem ac enuntiatio-
 nem formant Philosophi, (b) quando
 & Verbum ulnis mentèque comple-
 xa est, & Nomen, quod est super
 omne nomen in germana significa-
 tione accepit, in qua J E S V S non
 minus esset *Salvator*, quàm *Abraham*
Pater multitudinis, *Isaac risus*, *Joseph aug-*
mentum, *Aron docens*, *Moyſes assumptus*,
David dilectus. Stupeſcam, si non as-
 sentior, illam perfectè novisse natu-
 ram *Prædicabilem* & *Prædicamentorum*,
 quæ nihil magis prædicavit à *Specie*,
 quam *Speciosum* formâ præ filiis ho-
 minum; quæ *Genus*, aut generis cla-
 ritatem tanti duxit, ut se ancillam
 diceret; quæ inter esurientes & di-
 vites, si quando maternis visceribus
 essent vel excipiendi, vel fovendi,
 nullam faciebat *Differentiam*; quæ *Ac-*
cidentia nunquam penetravit acutius,
 quàm dum *Substantiam* carnis Filij sui
 in

(a) *Origenes*
hom. 6. in
Lucam.

(b) *Arist.*
lib. de Inter-
pret.

in Evcharistico Sumebat epulo; cui *Proprium* ille fuit, qui in propria venit; cui denique *Individuum* unus Deus erat, cum quo non tantum divinæ maternitatis *Relatione*, verum etiam ardentissimo, ac continuo amoris æstu ita fuit unita, ut neque *Passio*, neque *Actio*, neque æternitatis *duratio*, neque *Situs* altitudinis, aut profunditatis, eam potuerint separare à charitate. Nihil dico de tertiamentis humanæ operatione, seu discursu, quem *Dialectica* suas ad leges rite solet ordinare; Satis enim superque constat, quòd illa, quanta, ac qualis fuit ab æterno ordinata, ea dederit optimorum discursuum specimina, ut ipsius Spiritus Sancti oraculo celebraretur: *MARIA conservabat omnia verba hæc, conferens in corde suo.* (a) Tunc nimirum, quando nocte media natus est *Sol Justitiæ*, & lux in tenebris luxit; quando flos odorem fidei toto sparsurus orbe ex ejus *Virginali utero germinavit*; (b) quando in Bethlehemitico exesæ rupis antro parvulum in præsepi reclinavit;

(a) Luc. 2.
v. 19.

(b) S. Amb.
de benedict.
Patriarch.
c. 4.

quando belluæ adorabundo anhelitus afflatu rigorem auræ mitigabant; quando cælestium epheborum multitudo concentu replebant aëra, & agrestes ab arvis animæ, potentes ab oriente Reges in venerationem procurrebant. Tunc tunc Dialecticæ peritissima revocabat cogitationes suas, ad evidentes illas, quas sæpius ruminârat, Sacrorum Vatum præmissas: *Habitantibus in regione umbræ mor-*

(a) *Isai. c. 9. tps lux orta est eis: (a) Egredietur virga de radice Jesse, & flos de radice ejus ascendet:*

(b) *Isai. (b) Et tu Bethlehem . . . ex te mihi egredietur,*

c. 11. v. 1.

(c) *Mich.*

c. 5. v. 2.

(d) *Ibid.*

c. 4. v. 8.

(e) *Isai.*

c. 60.

tu turris gregis nebulosa filie Sion, usque ad te veniet: (d) Ambulabunt gentes in lumine tuo, & reges in splendore ortus tui. (e) Ex quibus omnibus superiores consequentias evidenter deduxerit, se sequæ excellentissimam Magistram,

(f) *S. Chry-
sost. orat. de
Annun. B. V.*

imò, ut aureo loquar ore (f) Paradisum rationalem comprobârit. Et quia non satis habuit Rosa Mystica inter rationalis Philosophiæ spinas eminuisset, nisi etiam Physicæ scientiæ vitæ vegetaretur amplius, naturæ myste-

ria

ria scrutata dulcissimas inde referebat cognitiones , quibus non tantum discipulos suos, sed omnes insuper mortales ad rarissimas & pulcherrimas eruditiones poterat animare. Cui enim dubium foret, illam sæpius , si ferret occasio , mente indagatrice discussisse matrem omnium terram , & rerum ex ea natarum considerasse diversas formas, causas, effectus, & virtutes ? Vererer profecto, nè, si aliud vel animis agitemus, vel oribus proferamus , vel calamis evolvendæ retro ætati consignemus, simul prodamus corda, tenerioribus in Mariam affectibus vacua , formidine plena, & prudenti audendi licentiâ destituta. Quare non frigidus affectu, non trepidus mente, non destitutus audendi prudentiâ , ex prudenter sentientium autoritate pronuntio, Sanctissimam Deiparentem, occasiones libenter arripuisse, modò in intimas auri, argentique venas se se immittendi , ut admirandam remotissimi solis, aliarumque causarum virtutem animadverteret ; modò

aquarum fontiumque miracula penetrandi, ut ibi ignito vapore æstantium, hîc glaciali frigore horrescentium redderet rationem; modò in vastissimos oceanos cogitationes suas immergendi, ut, in quo succubuit Aristoteles, eorundem incrementa & decrementa, cursus & recursus, quos ad lunæ vicissitudines solent alternare, adspectaret; modò flantes à quatuor orbis partibus ventos examinandi, ut, ubi mortalium caligant ingenia, vincique se farentur, eorum origenem & naturam, humiditatem Africi, Siccitatem Cori, nives Aquilonis, æstum Austri, tepiditatem Favonij explicaret. Ex harum enim, & aliarum creaturarum cognitione plerumque solet humana mens abripi in admirationem, & quibusdam quasi pennis se se librare in Sapientissimum earum architectum, illumque suspicere ac adorare. Quis autem ex toto piorum mortalium cœtu dabitur, qui sentiat, his pennis caruisse volucrem Mariæ animam; cùm sanctissimis cæteroquin

terroquin animabus à Deo concedantur, quò celerius ex amplo rerum creatarum theatro se possint elevare, & colliquescentibus uberrima dulcedine sensibus, divinarum perfectionum excellentias contemplari? Quis credat eam ignorâsse hunc *Modum*, Deo se affigiendi, quæ tam diversos à prima statim ætate speculata est *modos*, non tantum ab alijs creaturis, sed etiam à se ipsa emigrandi, atque in Deum, quo nihil sibi voluit esse præsentius, velocissimè abeundi? Et si teste Doctore gentium (a) invisibilia per ea, quæ facta sunt, intelliguntur, quomodo non præ cunctis Philosophis res naturales perfectissimis cognitionibus penetrâset, quæ acutissimâ subtilissimâque intelligendi vi liberaliter fuit exornata? Si autem perfectissimè penetravit, quis ambigat, eam copiosas laudum divinarum materias concinnâsse, quas nullius eloquentiæ copia, nullius ingenij felicitas, nullius dicendi vehementia potuit; sed sola oratorum princeps Maria ideo explicare con-

(a) *Ad Rom.*
c. I. v. 20.

I 4 suevit,

fuevit, ut explicando in liquidissimæ voluptatis abiret affectus, abeundo in diviniore rueret amplexus, ibiq; æternæ Sapientiæ amantissimè colluderet, cum qua se pridem oblectârat, *ludens in orbe terrarum?* Utinam! utinam AA. licuisset aliquando abditissima Mariani cordis penetraliâ intueri, quando sive in itinere, sive domi, sive alibi, subjectæ telluris faciem modestissimis lustrabat oculis! Vidissemus profectò, quàm facilè, quàmque profundè ex camporum latitudine, vallium planitie, montium altitudine, orarum excursu, collium acclivitate, sylvarum recessu, aëris amplitudine in Supremi Numinis immensitatem se immerferit; vidissemus, quàm dulciter ex florum amœnitate, foliorum virore, colorum diversitate, odorum expiratione, fructuum sapore, omniq; ridentis naturæ ornatu omnigenam Dei pulchritudinem suspexerit; vidissemus, quàm magnificè ex rotundato in orbem cœlo, ex siderum pulchro ordine lucentium aspectu, ex immota

& tamen pendula in aëre terra, ex animalium tum terræ, tum maris, tum aëris mirabili genere ac utilitate; ex nutrice agrorum, hortorumque fecunditate, Authoris providentiam, omnipotentiam, & bonitatem adorârit; vidissemus, quàm suavi, & devoto sensu inspexerit illam discordem concordiam, quâ in rerum universitate, calida frigidis, gravia levibus, arida humidis, maxima minimis, solida liquidis, firma mobilibus inter se aptissimè conjunguntur; vidissemus denique, quàm pulchris ac evidentibus rationibus illa omnia contulerit in corde suo, clarissimèq; probârit, se omnium Philosophorum scientias superare.

Illud fortasse in dubium vocari posset, an Magistra nostra libros de generatione inspexerit, adeoque ex hac parte non aliquem naturalis scientiæ defectum passa sit; cùm castissimam Virginem non videatur decuisse cogitationes suas eò deflectere. Verùm huic dubio facilè occurret, qui noverit ex Christianorum tem-

porum historico, illam juvisse componere *Librum generationis*, quando de ea natus est *Iesus*, qui vocatur *Christus*.

Advertite hîc prodigia A.A. Virgo vestijt carne Verbum sine Patre; Pater generat filium sine matre: qualis generatio! Natus est de illa Deus, & Deus esse non desijt; genuit Virgo Deum, & virginitatem non amisit: qualis generatio! Filius patris generatur ab æterno, & ante omnia; filius Matris generatur in tempore, & ferè post omnia; qualis generatio! Et tamen *generationem ejus* qui

(a) *Isa. c. 53. enarrabit*, (a) nisi Maria, quæ vidit, & experta est, se concepisse non opere humano, & se peperisse parvulum cum virginitatis ho-

(b) *S. An. nore.* (b)

senin. 4. p. lit. 15. c. 17.

9. 1.

Præterea si ex Patrum quorundam sensu censendum est, ut paulò post censebo, illam perfectè cõmentari potuisse divinas litteras, quas tam sedula lectioneolvebat; quis nostrum ambiget de ingeniosis ejusdem commentarijs super illud Eccle-

(c) *Eccle. c. 1. v. 3.*

(c) *Generatio præterit & generatio advenit? Ut hinc quoque argui vel inferri*

inferri possit, libros de Ortu & Interitu, qui post octo Physicorum explanari solent, illi fuisse perspectissimos, cum nōset creaturas omnes alternæ subesse vicissitudini, eo solum excepto, *apud quem non est transmutatio, nec vicissitudinis obumbratio.* (a)

(a) Jacobi I.

v. 17.

Sed & reliquas Philosophiæ lites, ac tricas extricari potuisse à Maria, facile mihi persvadeo, quod sciam, gravissimarum difficultatum nodos, quos subtilium ingeniorum contentio convolvit, felicissimè dissolvisse. An non enim in facie totius universitatis ad oculum demonstravit, *Infini- tum* actu dari in creatis, quando *Infinitus* finitis membrorum articulis constrictus, inter mortales comparuit? An non in *Continuo* Dilecti sui amore terminantia puncta negavit, quando non tot exæstuantis pectoris flammæ protrusit, quin plures semper addiderit? An non verissimè ostendit *Animam* esse actum corporis organici, dum animâ suâ, velut vivo quodam & animato organo, à Spiritu Sancto ad virtutum modulos pulsato,

pulsato ; membrorum omnium motus plus quàm Pythagoricâ harmoniâ animavit ? An non *Conceptum vitæ* dedit nobilissimum , quando virgineo concepit utero , divinum Verbum , quo in deflendam projecta mortem vniversa mortalitas revixit ? An non denique Metaphysicam ingressa , & â rebus sub sensum cadentibus abstracta , *Passiones Entis* profundissimè speculata est , quando in consideratione universorum nulla *Res* ei visa est aliquid , nisi Ens illud , quod ita semper propugnavit , *Vnum* , ut tamen etiam admitteret , *Trinum* ; ita dilexit *Bonum* , ut voluntate pronissima in liquidissimas mergeretur dulcedines ; ita cognovit , *Verum* , ut in illud toto intellectu absorberetur . O verè in signem naturæ indagatricem ! O vim intellectûs incredibilem . O perspicacem ingenij felicissimi aciem ! O nunquam satis deprædicandam Philosophiæ Magistram ! O profusam in Matrem suam *Supremi Numinis liberalitatem* .

Agite

Agite ergo , agite mundi melioris Philosophi , & hanc Magistram vestram suspicite, honorate, celebrate. Suspicite oculis , & videbitis *Multoculam*, (a) quæ non uno, sed mille ^{(a) S. Epiph. de laud. B. V.} mentis oculis abdita naturæ toties inspexit; honorate obsequijs , & tantæ Magistræ beneficijs , quoniam aliter non potestis, respondebitis; celebrate præconijs , & ad vestram quóque commendationem illustrem facietis accessionem. Arbitror enim , si ingeniosis commentationibus domi , foris linguâ , in pulpito calamis , in schola argumentis sublimem in Maria rerum naturalium scientiam extuleritis , quoniam eadem in vobis , tanquã in speculo recepta , non obscuros rejicit radios, copiosè quóque reflexuram in vestram laudem, commendationem, honorem, admirationem.

Vos verò Adolescentes optimi, qui sapientiam in monte adhuc arduo, sed laboribus pervio, collocatam cernitis , simulque ambitis; adeste animis , propellite impetus,
 acuite

(a) S. E-
phrem. de
laud. M. A.
R I. E.

acuite studium, duratę operam; & siquid ingenij, siquid felicitatis a natura vobis collatum est, sub hac Magistra liberaliter elocate. Hac duce calcabitis, quidquid horridum, atque infestum in ipso Sapientię auditu vobis occurrerit; hac Magistrā non palpabitis in tenebris, quia est *Lumen Studioforum*; (a) hac pręunte venietis quā citissimē ē spinis ad rosas, ē vepribus ad delicias, ē felle ad mella, ē tribulis ad amānissimos fructus, quos de laboribus vos percipisse gaudebitis, quando impolita singulorum mens, Dialecticę institutionibus formata, in *divisione* ad distingvendas formas solers; in *definitione* ad explicandas naturas facilis; in *argumentatione* ad vibrandas rationes efficax; in discursibus formandis solida, in scrutandis rerum latebris sagax; in omni denique Philosophię difficultate solvenda erit expedita. Gaudebitis post subacta ignorantię monstra de insigni victoria; & ex studiorum conatu, ex conatūs sudore, ex sudoris constantia

stantia facietis solatia vobis , Magistrae , amicis , parentibus , bonis omnibus , patriae universae. Vnum commoneo , quod ipsa quoque à vobis petit Magistra , & jure quodam afflagitat , ut Mariani nominis memores , non uni tantum intenti studio , pulchro insuper virtutum pietatisque genere rerum magnarum scientiam exornetis ; quo sine , nihil five ad vitae ornamentum pulchrum , five ad commendationem celebre , five ad patriae utilitatem salubre potest comparari. Quare si meo statis consilio , libenter omnino suafiero , ut in eruditis Sapientiae certaminibus Eduardi Sexti , Britanniae Regis , clypeo vos obarmetis , in cuius pectore referebatur orbis , inter ipsas nubes pendulus cum lemmate : *Nil sine DEO*. Tunc enim futurum promitto , ut quam primum in Antiquissima & Celeberrima totius orbis Vniversitate Mariana , Supremâ Philosophiae laureâ corone mini. Dixi.

P R Æ

PRÆCONIUM.

TRanseamus nunc ad alteram Philosophiæ partem, quam *Moralem* vocant, in qua totius Philosophiæ ratio continetur. Siquidem in *Physica* sola oblectatio est; in hac etiam utilitas. Et quoniam in disponendo vitæ statu, formandisq; moribus, periculo majore peccatur, majorem diligentiam necesse est adhiberi, ut sciamus, quomodo nos oporteat vivere. Lactantius 3. Instit. c. 7.

ORATIO VI.

MARIA, practicâ de moribus scientiâ, instar Paradisi, amenissima, ideoque
Magistra Ethices.

Inter

INter innumera magnæ Matris
 elogia, quæ vel Rhetorum facudiâ
 hæctenus sunt vulgata, vel illustrium
 Scriptorum calamis signata, vel San-
 ctissimorum Patrum prædicationi-
 bus testata, vel Sacrosanctæ Ecclesiæ
 autoritate suffulta, vel gentium
 omnium consensione stabilita & de-
 fensa; illud quoque animo meo ar-
 risit semper, quo illam Jacobus (a) &
 Proclus, (b) Gregorius (c) & Hesy-
 chius, (d) Ephrem (e) & Andreas
 Hierosolymitanus, (f) Damascenus
 (g) & Bernardus, (h) Bonaventura
 (i) & Rupertus, (k) secundum orbis
 recreati paradisum celebrârunt; &
 novo quodam gaudio omnium no-
 strum lacrymas, quas in nunquam
 satis deploranda primævæ beatitatis
 jactura profudimus, temperârunt.
 Enim verò quoties infelix ego (O!
 quam offendit memoriam recorda-
 tio perditorum!) quoties, inquam,
 infelix ego Adæ filius in amænissi-
 mam stationem illam, ex qua ob gu-
 losam perduellionem ejecti sumus,
 memorem reflecto mentem, simulq;

- (a) *S. Jac. in Liturg.*
 (b) *In Conc. habita in Concil. Eph.*
 (c) *Orat. 2. & 3. de Annunt.*
 (d) *Orat. 2. de S. Deip.*
 (e) *Orat. de laud. Maria.*
 (f) *Orat. de Annunt.*
 (g) *Serm. 2. de Dorm. B. V.*
 (h) *Serm. de Nat. B. V.*
 (i) *S. Bonav. Specul. B. V. c. 12.*
 (k) *Rup. in cantica.*

Augustissimæ Dei-parentis sinceram
solidasque contemplor delicias, to-
ties quidem ingentis copiam felici-
tatis ibi me perdidisse ingemisco,
amabili tamen cum fœnore hîc repe-
risse gaudeo, ac obstupesco. Memini
siquidem, illum ad orientem posi-
tum, adeoque nubium ac nebularum
expertem, prima illibati solis exce-
pisse oscula, & amœnam sinceræ lucis
hilaritatem præ se tulisse continuò:

(a) S. Basil.
orat. de pa-
radiso.

(a) sed & recordor, istum primis ex-
ceptum osculis à Sole Justitiæ, qui, ut
visitaret nos oriens ex alto, nocte
media, ante Luciferum, ex utero Vir-
ginis prodijt, eamque comptissimis
radijs perfudit. Scio, illum nullis ven-
torum turbinibus pervium, nulli æ-
ris inclementiæ obnoxium, nulli ma-
lignioris astri dominatui subditum,
suavissimam auræ temperiem qua-
quaversum diffudisse: sed & intelli-
go, istum copiosas cœlestis ubertatis
influencias, blandissimos divinæ au-
ræ favores, amabiles gratiarum Fa-
vonios undique expirasse. Conci-
pio in illo agrorum opulentiam, flo-
rum

rum delicias, fructuum dulcedines, aromatum fragrantias, vinearum florulentiam, & quidquid vel auditui jucundum, vel gustui suave, vel visui peramænum liberaliter exhibitum esse: Sed & invenio in isto *Florem* florum, quo delectet; *Fructum* fructuum, quo sapiat; *Odorem* odorum, quo pertrahat; *Arbores* vitæ, quâ redanimet, productum feliciter. Suspicio illum in loco altissimo, atque in ipsis montium verticibus, sub vicino Lunæ aspectu consitum; (a) hortenses divitias, & (a) *Theophil. Patrarcha Antioch. in Genesim.* subjectæ telluris amœnitates despectisse universas: sed & veneror fundamenta istius in montibus sanctis, in quibus, tanquam in altissima perfectionis specula divini Solis ardores pleno exceptit pectore. Admitto in illo diversa animantia, dentibus horrida, unguibus efferæ, toxico turgida, ad nutum Domini sui hostilitatem nullam, contumaciam nullam prodidisse unquam: Sed & arguo in isto aureum pacis fluxisse sæculum, à quo in eum *Princeps pacis* est

ingressus. Fateor denique, illum quadripartito amne terras ad omnem fertilitatem irrigasse, aquisque bellè cadentibus suavissimos excivisse Sursurros: sed & profiteor, in isto, præter sororiantes lactei liquoris fontes, quos in castissimo Virginis petiore scaturire jussit Divinitas, quadruplices alios emanasse fluvios, quorum ubere diffusionem multiplicem fecerat ubertatem. Ut immeritò quis lugere videatur, floridum illum protoparentum nostrorum paradisum, ad exæstuantem gustandi fructus libidinem defloruisse, quando longè formosior, & gratiarum abundantiam præstantior nobis reffloruit: & iniquus sit rerum æstimator, qui mortalem immortalis, immarcescibilem caduco, corruptum virgineo, humanum divino conferat, & anteponat.

Verùm quid ista in meam sententiam? Quid scientiarum palæstræ cum hortensibus delicijs? Quid severiori disciplinæ cum blanda resflescentium amœnitatum illecebra? Quid Ethicæ cum paradiso? An unde

unde formosissima Divinæ Majestatis Tempe, ac paradisus evasit MARIA, inde politioris litteraturæ, ac universalis Ethicæ Magistra evadet? Omnino evadet. Si enim verum est, ut ex SS. Patrum oraculis censeripotest verissimum, rerum omnium conditorem Deum pro veteri novum condidisse voluptatis hortum, in quem post evoluta diuturni squaloris tempora descenderet, cum filijs hominum deliciaturus: & si paria vel consimilia in eum congerens ornamenta, *signatum* quoque ab æterno fontem, insigni postea ubertate scaturientem, quadripartivit; hic autem fontis quaternio, Magno teste Gregorio alijsque, ipsissimus est moralium virtutum & numerus & cardo: non incongruè demum conclusero, in Deiparente illimes moralis scientiæ thesauros copiosè scaturijisse, indeque in regna & imperia profluentes, reges Prudentiâ, Magistratus Justitiâ, cives Fortitudine, plebem Temperantiâ fœcundissimè irrigasse. Quam veritatem dum exili dicendi

facundiâ in aures insinuo, ita velim
in animos vestros illabi AA. HH. ut
ad reliquum Marianarum laudum
cumulum mecum decernatis, abso-
lutissimam Ethicæ Magistram fuisse
MARIAM.

Quemadmodum ab unius Ethicæ
spiritu in omnium sive Rerumpub.
membra, sive regnorum nervos ani-
malis quidam vigor, ad omne felici-
tatis augmentum emanat; ita vicif-
sim in eam infallibiles dirigendi re-
gulas â *Prudentia*; solidas stabiliendi
artes â *Fortitudine*; diversas puniendi,
præmiandique rationes â *Justitia*; or-
dinatas imperandi obediendique le-
ges â *Temperantia* promanare, iisdem-
que animari ad vitam, jam pridem
cum Tolosano Gregorio censuerunt
Sapientes. Ut insipiens videri possit,
qui ad omnem honestatem, rectique
regulam cuperet vivere; harum ta-
men quatuor virtutum elementa re-
nueret admittere! vel insipiente sit
hebetior, qui moralis Sapientiæ Do-
ctor per Academiarum pulpita vel-
let circumvehi, morumque normas
per

per aphorismos dictare ; hac autem quadrigâ uti nollet, aut promoveri. Tanto nimirum Magister Ethicæ est præstantior, quanto copiosiores ab his virtutibus trahit influxus, quibus discipulos suos, sive reges sint, aut principes, domini aut servi, plebs aut Magistratus, suavissimâ irrigatione possit facundare.

Agnosco hunc humanæ Sapientiæ articulum, & vel ideo non tantum ambabus, ut ajunt, ulnis eum amplector ; sed & liquidissimæ voluptatis sensu excipio, deosculor, atque adoro. Video enim, hoc argumento Deiparentem eam denuum futuram Magistram ; quàm non solum Platonēs & Aristoteles, Xenophontes & Taciti, Lyfiæ & Isocrates, Agryppæ & Lycurgi ; verum omnes omnino moralium institutionum Doctores suspiciant, & venerentur. Dicite

enim, amabo, si Oratori (a) argumentum prudentiæ est, *de bonis ac malis, quæ ad felicitatem pertinent, bene consuleri* ; Si Philosopho (b) & Philosophorum Angelo (c) *rectam agibilium rationem*

(a) Cicero 2.
Rhet.

(b) Aristoteles 6.
Ethic. c. 4.

(c) D. Thom.
22. q. 47.
art. 5.

facundiâ in aures insinuo, ita velim
in animos vestros illabi AA. HH. ut
ad reliquum Marianarum laudum
cumulum mecum decernatis, abso-
lutissimam Ethicæ Magistram fuisse
MARIAM.

Quemadmodum ab unius Ethicæ
spiritu in omnium sive Rerumpub.
membra, sive regnorum nervos ani-
malis quidam vigor, ad omne felici-
tatis augmentum emanat; ita vicif-
sim in eam infallibiles dirigendi re-
gulas â *Prudentia*; solidas stabiliendi
artes â *Fortitudine*; diversas puniendi,
præmiandique rationes â *Iustitia*; or-
dinatas imperandi obediendique le-
ges â *Temperantia* promanare, iisdem-
que animari ad vitam, jam pridem
cum Tolosano Gregorio censuerunt
Sapientes. Ut insipiens videri possit,
qui ad omnem honestatem, rectique
regulam cuperet vivere; harum ta-
men quatuor virtutum elementa re-
nueret admittere! vel insipiente sit
hebetior, qui moralis Sapientiæ Do-
ctor per Academiæ pulpitum vel-
let circumvehi, morumque normas
per

per aphorismos dictare ; hac autem quadrigâ uti nollet, aut promoveri. Tanto nimirum Magister Ethicæ est præstantior, quanto copiosiores ab his virtutibus trahit influxus, quibus discipulos suos, siue reges sint, aut principes, domini aut servi, plebs aut Magistratus, suavissimâ irrigatione possit facundare.

Agnosco hunc humanæ Sapientiæ articulum, & vel ideo non tantum ambabus, ut ajunt, ulnis eum amplector ; sed & liquidissimæ voluptatis sensu excipio, deosculor, atque adoro. Video enim, hoc argumento Deiparentem eam denum futuram Magistram, quàm non solum Platonem & Aristoteles, Xenophontes & Taciti, Lysia & Isocrates, Agryppæ & Lycurgi ; verum omnes omnino moralium institutionum Doctores suspiciant, & venerentur. Dicite

enim, amabo, si Oratori (a) argumentum prudentiæ est, *de bonis ac malis, quæ ad felicitatem pertinent, bene consuleri* ; Si Philosopho (b) & Philosophorum Angelo (c) *rectam agibiliū rationem*

(a) Cicero 2. Rhet.

(b) Aristoteles 6. Ethic. c. 4.

(c) D. Thom. 22. q. 47. art. 5.

tionem tenere ; an non ab hac virtute præ cæteris mereatur commendari MARIA , ut quæ tot gessit prudentiæ fœtus , quot habuit cogitationes ; tot peperit ejusdem filias , quot edidit actiones ; tot fecit felicitatis auctoria , quot agentibus dedit consilia ?

Ingressus ad eam Angelus , optatissimus ille restaurandæ salutis nuntius , inter humanissimæ salutationis verba enuntiabat gratiæ plenitudinem ; gratulabatur gratiosam Numinis in ea habitantis præsentiam , & in Divinitatis Sacrario *Benedictam* pronò venerabatur poplite : illa tamen , quod prudentioribus hujus sæculi filijs nimis paradoxum est , nec laudibus efferti , nec lætitiâ gestire , nec responso præcipitare , nec trepidatione collabi visa , cum à pulcherrimo juvene deprehenderetur sola , nativâ verecundiæ purpurâ vultum illico contexit , & prudentiâ colligente animum , *cogitabat , qualis esset ista saluta-*

(a) *Luc. 1. 2.* *tio.* (a) Sapientis nimirum est , movere linguam ad imperium rationis ; erumpere in verba post limam discretionis ;

secretionis; formare gestus ad regulam moderationis. Repentini rerum casus hominibus prudentiâ præditis, distrahere mentem solent, non eripere. Negotij magnitudo, aut novitas, consilium non aufert, sed acuit. Oraculorum naturam induunt responsa, quæ prævia mediatione digeruntur. Tacente igitur Virgine, urget muneris impositi partes Angelus, & duabus illis voculis *Concipies ac paries* eam defert dignitatem, quâ coronatos omnium regum reginarumque vertices erat transcendens. Sed & illa prudentiæ partem omittit, nullam. Dum enim illud æterni Patris corculum, illud desiderium æternorum collum, *DEI Verbum* in sinum ejus ingeritur; Sacram quâdam reverentiâ trepidat illa, & nè fortè humanæ ambitionis titillatio deliberationem prævertat, dignitatem ancillaris conditio attaminet, majestas tanta juratæ pietati repugnet; sustinet, ruminat, ponderat, providet, tandemque pulchrâ indagine disquirat: *Quomodo fiet istud, quoniam*

virum non cognosco ? An in brachio suo
facturus est potentiam D E U S, ut
virgo sim & mater ? Ita est, inquit,
ille, Virtus Altissimi obumbrabit tibi. Quis
sensus, quæ religio, quæ submissio,
quis sacer horror pectus virgineum
tunc occupavit ? quos motus affe-
ctusve tantæ verborum blanditiæ,
favorum nuntia, promissorum illicia,
Incarnationis media, denuo conci-
verunt ? An ita tamen hæc affectuum
varietas distinuerit deliberantis Vir-
ginis voluntatem, ut minus apta fue-
rit ad exequendum munus, quo Sa-
pientissimum Legatum Sapienter ex-
pedire oportebat, & desideratâ tam
Augustæ legationi coronidem im-
ponere ? Horret animus sic cogitare.
Quo ergo decernentis animi suffra-
gio, Cælestis Legati orationem,
humani generis suspiria, & vota,
ipsiusque supremæ curiæ expecta-
tionem coronavit ? Responsum vul-
tis ? Audite oraculum. Dum præ-
cellus Matris Dei defertur titulus,
reponit ista : Ecce ancilla Domini, fiat
mihi secundum verbum tuum. O verba !

O

O syllabæ ! O litteræ ! Supra ambrosiam ambrosiæ, supra sapientiam sapidæ, supra concentum sonantiores ! Dicite iterum, vos obsecro, quicunque vel intelligendi vi perspicaces, vel cogitandi maturitate, profundum tumetis in consilia, & responsa vestra limatis in oracula; potuitne vel in Thebanis curijs, vel in Sibyllarum Sacrarijs, vel in Athenarum Areopagis, vel in quocunque demum selectissimo Sapientum Senatu, etiam post tædiosas deliberantium moras, in simili negotio responsum cudi prudentius, aptius, gratiosius? Dixistis non potuit. Et bene. A limpido prudentiæ fonte non possunt derivari nisi aquæ limpidae, ab aquis argenteis non nisi guttæ argenteæ. Advertite autem, quæ illus Prudentiæ fuerint, scaturigines:

Quanto altius attolleris, tanto profundius te abijce. Nulla dignitas secuta est, quæ humilitate non scanditur. Favores principum, plausus populi, gloria nominis, bonorum tituli fulgetra sunt, vel evanida Somniantium

tium phantasmata, si divine voluntatis annutu non innitantur. Illa continuo solida sunt, quæ secundum supernæ virtutis verbum fiunt, & conformantur. Si munere donari illustri, ut gratus sis, fac, suo splendore tuos reflectat oculos ad propriæ vilitatis contemplationem. Digna largitori penditur gratiarum actio, si divi magnitudo ita æstimetur, ut accipiens illo se indignum reputet. Sæpe qui ante muneris appetitum eo dignus est, indignum se exhibet appetendo. Feliciores plerumque sunt oblati hymenæi, qui sine sensu gloriæ, sine appetitu bonoris, sine excessu cupiditatis admittuntur.

His veritatis margaritis cum abundaret fons noster, non potuit non eas, ad exornandas actiones suas, quasi in ripas egerere, atque in posterorum animis admirationem imprimis, deinde sanctam quandam avaritiam proritare. Obstupescunt nunc purioris Sapientiæ institores, dum eas legunt; & si quando ad faciendam earum matricem mentem advertunt, attoniti hæret aliqui, aliqui meditata in laudem verba solici-
tè

tè congerūt, quibus ipsam Virginem Matrem, seu originem, compellent augustius. Agmen ducunt cum Bernardo Ambrosius, cum Epiphonio Ephrem, cum Richardo Damascenus, cum Bonaventura Ildephonsus, qui eam vel *oculatissimam* Virginem, vel inter virgines prudentem, vel inter prudentes principem, vel inter principes prudentissimam, sagacissimamque Reginam deprædicant, quòd talem esse decuerit, quæ & callidissimi serpentis caput calcaneo suo erat contritura, & orbis utriusque imperium obtentura, & absolutissimum archetypon eorum futura, quos ipsa suis sive doctrinis, sive exemplis adeo animavit, ut gloriari possit: *Per me reges regnant.* (a) (a) *Prov.*

Atque hic est primus ille ac illius fons, seu fluvius, qui amæna sui in omnes actiones diffusionem paradysum nostrum ita inerrabat, ut tamen agendorum errorem omnem procul inde excluderet. Sed non minori amænitate fluebat alter, qui vel primis degustatus labris animo
robur,

robur, corpori vires indebat, *Fortitudo*. Hujus aquæ à primis Marianæ vitæ spatijs in longam annorum devexitatem adeo defluerunt constanter & fortiter, ut nihil arduum, nihil durum, nihil amarum, nihil grande illos potuerit sistere, aut perturbare. Illius fluxus ipsos adversitatum scopulos flagellabant assidue; illius guttæ objectos persecutorum lapides excavabant profundè; illius stillæ acerbam lacrymarum salsedinem temperabant dulciter; illius torrens rotum *amarum mare*, si-
 ve **MARIAM**, (a) cujus amaritudo ex Filij sui morte ac vita fuit amarissima, uberrimè dulcorabat. Nimirum virtutis hujus hæc est indoles, ut quas mentes divite sui perfusione permeat, easdem non tenuiore dulcedine perfundat eo etiam tempore, quo vel oblata vel quæsitæ acerbitates Sanctâ quadam aviditate exormentur. O quàm avidam, quàm sitibundam, quàm avaram, ideoque fortem, necesse est fuisse **Mariam**, in quam omnia dolorum, flumina,

(a) *S. Hieron. lib. de nom. hebr.*

flumina, quibus Dilectus ejus Filius
 mergebatur, pleno currebant im-
 petu, *amaro* tamen *Mari* non relu-
 ctante, sed absorbente! Difficilis
 profectò veritas hæc foret intelle-
 ctui, nisi probè constaret, quia *Spiritus*
Domini, sive Fortitudinis, *ferebatur su-*
per aquas (a) seu Mariam. Et quis (a) *Gen. c. 1.*
 de soliditate Virginis dubitet, quæ
 fugientibus, vel ruentibus Apосто-
 licis Ecclesiæ columnis, ad huc *Sta-*
bat juxta crucem; (b) quæque incon- (b) *Ioan.*
 stantiâ & mutabilitate omni fuit su- c. 19.
 perior, quia *Luna sub pedibus ejus*? (c) (c) *Apocal.*
 Credimus proinde, ac pronissimâ c. 12.
 judicij subjectione profiteamur, for-
 tissimam fuisse Virginem, qualem
 priora Sæcula non habuerunt un-
 quam, futura non videbunt. Fue-
 rit enim aliquando, nescio quæ, no-
 minari non digna, muliebri astutiâ
 non virtute fortis, quæ monstrum il-
 lud fortitudinis Samsonem, pretio
 venditum, blanditijs lassatum, crini-
 bus enervatum Philistinorum con-
 cludit carcere; Maria certè *in uno cri-*
ne colli sui, sive in una profundissimæ
 ab-

(a) *Jerem.*
c. 31.

abjectionis cogitatione, *Virum virorum*, DEUM, ita sauciavit, ut eum ex amoris vulnere quasi elanguidum è cælo in tetras pertraxerit, visceribus illigârit, & in virginalem uterum, velut in carcerem compegerit, illud demum testata: *Femina circumdabit virum.* (a) Fuerit veræ fortitudinis laude celebris Solymorum gloria Judith, quòd truncato immanissimi Holofernii capite cives metu, urbem obsidione, patriam hostibus liberaverit: longè magnificentius celebrari debet MARIA, quæ non Holofernem, sed draconem infernum, non hominem sed dæmonem, illum juratum generis humani hostem devicerit, phaleris exuerit, fascibus spoliârit, & luctuosissimum inferorum jugum à cervicibus suis declinârit, à nostris verò excusserit, ac in libertatem asseruerit à sæculis desideratam. Fuerint heroinæ, aut etiam heroës alij, qui ut viverent, mortem triumphârunt; quando vel inter telorum imbres, vel saxorum grandines, vel bestiarum dentes, vel ignium

ignium globos, vel licitorum acinaces, stabant erecti animis, quamvis conciderent corpore: gloriosius tamen triumphavit MARIA, quando mors & vita, quam genuit, duello conflixere mirando; siquidem tunc, ut canit Ecclesia, *mortem, quam femina intulit, femina protrivit.*

Verum nimium devolvar in his paradisi Mariani fluminibus, si reliqua fortitudinis, aut aliarum virtutum præcipua documenta velim recensere; cum præsertim illæ orationis meæ non tam sint argumentum, quàm fundamentum. Revocare proinde dictionis gradum oportet, & residua bina flumina in verborum cogere angustias, ut flumen eloquentiæ ab ijs potius exhausti absorberi quæ permittam, quàm ab hoc illa permeari, vel adæquari posse profitear. Renuunt piarum mentium virtutes inflatis verborum fluctibus intumescere, se ipsis magnæ. Non amnis ab aquis limpidis fit limpidior, si cristallineas aquas omnes suâ superet limpiditate. Quis
L autem

(a) S. Damascenus
 orat. I. de
 Dermis. B. V.

autem dubitet, Justitiæ aquas in Maria fluxisse limpidissimas, quæ ipsum *Justitiæ fontem* (a) purissimo excepit, utero, & novem mensium intercapidine sitientibus aperuit? Quis ambigat fuisse justissimam, quæ censum Augusto, par turturum legi, honorem Deo prona detulit voluntate? Quis non celebret integerrimam, quæ plenis laudantium choris *Speculum justitiæ* ideo fortasse decantatur, quòd vel ex regula æquitatis, suum cuique tribuentis, id totum sincerè reddat, quod in se recipit; vel quòd agnoscat orbis, ad hoc speculum omnes æqui amantium actiones posse conformari; vel quòd ipse *Sol Justitiæ*, illius adminiculo, radios suos voluerit reflecti in aulas principum, tribunalia judicum, odæa Jurisconsultorum? Quis ignoret actionem juris tot sæculis prorogatam, terminasse demum felicissimè, quando pro uno veteris paradisi fructu, furtim ablato, dedit *fructum ventris sui*; & ad eluendam unius serpentis fraudem reddidit quadruplum: *Carnem* videlicet

licet in passionem, *sanguinem* in effusionem, *animam* Filij in mortem, *Divinitatem* in crucem, ad nostram reconciliationem? (a)

(a) *In Stellaris corona benedicta l. 7. p. 2. c. 6.*

O quàm difficile est hæsitare de veritate, cujus tam manifesta prostant exempla & argumenta! O quàm ridiculum, ac pene iniquum est, à tenuiter fluentis Suadæ fonte mutuare rivos, ad ampliandum justitiæ flumen, quod divite undarum copiâ non minus est spatiosum, quàm speciosum! Sed demus tamen hoc obsequij tributum à cliente deberi Patronæ, ut eam vocali elevet encomio, cujus beneficijs ipse toties relevatur; nè, si silentio involvat omnia, mugili sit similior, quàm Sireni, cujus munus est, tenui saltem vocolâ viciniam aquarum, quas innatat, subinde demulcere. Concedamus etiam, quod moralis Sapientiæ antistites exigunt, Ethicæ magisterium extolli satis non posse, nisi laudatis ejus, unde profluit, primæ originis fontibus; an censorio calculo notandus sum, dum exili panegyri Patronam laudo,

ut non desim obligationi ; & fluminibus istis ita insisto , ut ea potius traicere videar , quàm decurrere . ? In quartum igitur flumen dum influo , etiam effluo , cum Mariophilis dixisse contentus , tantam rerum omnium eluxisse in Virgine temperiem , ut amænitate sua Deum in amorem , Angelos in oblectationem , Sanctos in æmulationem , orbem in stuporem , Rhetores omnes in quoddam silentium & eloquendi impotentiam pertraxerit. D. Damascenum (a) invoco , qui perspicacibus attentæ mentis oculis illam intuens , vidit tranquillitatem cum motibus , nitorem cum moribus , amictum cum honestate , cibum cum mensura , incessum cum gravitate , sermonem cum lenitudine , conversationem cum modestia , otium cum sedulitate , negotia cum quiete , sublimes contemplationes cum humanitate , ita fuisse temperata , ut in sono vocis , nutu oculorum , situ capitis , gestu manuum , flexu membrorum , cultu vestium , motu sensuum , in omni-

(a) *Orat. 1.
de Nat. B. V.*

omnibus denique tum corporis, tum animæ functionibus nihil asperum, molle, præceps, lentum, superfluum, tardiosum, vile, superbum, & affectatum adverteretur. O verè admirandam Virginis temperantiam!

O Paradisum sub tantorum decorum conspiratione, uniúsque virtutis moderatrice regula venustè floridum, & deliciosum! O jucundam malaciam fluminis, quod nullo fluctuum tumore, nullo alvei torrente, nullo vehementioris venti motu, sed suavissimis Favonijs, modestisque susurris temperatissimè devolvebatur! Gloriare nunc O M A R I A, illúdque intona:

Ego Sapientia (sive Sapientiæ parens) *effudi flumina*; (a) & nos cum Guarri- (a) *Eccl.*
co Abbate vocibus obsequiosis sub- *c. 24.*

sequemur: *Flumina de ventre M A R I Æ*
fluebant aquæ vivæ, & fons vitæ ac gratiæ
oriebatur de medio Paradisi. (b) Occinat (b) *Serm. 3.*
tibi nunc *Candidus* ille, ac *Rubicundus*, *de Ioan.*
Bapt.

tenerrimus tui amator, Sponsus:
Pulchra es, *Amica mea*, *Suavis* & *decora*
sicut *Jerusalem*, *Terribilis* ut castrorum
acies ordinata; & nos applaudemus

L 3

tibi

tibi cum altero Abbate Guilielmo: *Pulchra* propter virtutem *Iustitiæ*, quæ pulchritudo est animæ; *Suavis* propter virtutem *Prudentiæ*, quæ non tantum sapienter, sed & suaviter, tantoque suavius, quanto Sapientius operatur; *Decora*, propter virtutem *Temperantiæ*, quæ castigat animæ, simulque corporis indecoros motus; *Terribilis* propter virtutem *Fortitudinis*, quæ dum hostiles impetus constanter tolerat, hostilem audaciam potenter refrænât. (a) Atque sic quaternum universalis Ethicæ cardinem in te non tantum evincemus, sed insuper excellentissimam ejusdem scientiam, & magisterium arguemus.

(a) Guil.
Abb. apud
Delrio in
Cantic.

Quanquam neminem esse arbitror, qui de hac Ethicæ scientia possit dubitare, si rationum momenta librare, facundissimisque MARIÆ præconibus consuetâ patientiâ voluerit auscultare. Dicite amabo, quicumque in hac causa pendetis animis, an convenienter in paradysum, sive hortum suum descensurus fuisset *Dilectus*, ut inter lilia florésque pasceretur, nisi prius

prius eundem & lilijs & floribus exornâset ? Quos autem alios in hac capacissima virgineâque terra plantâset & educâset , quàm illos , qui omnem virtutum moralium flouentiam spirarent , & qui apti forent ad conciliandas ipsi culturæ Magistro amabiles extra cœlum delicias ? Quid aliud sunt etiam virtutes illæ , quàm generosiores divinissimæ fructus Ethicæ , quibus Sponsus , ab itineribus æternitatis fatigatus , in Sponsæ sinu , tanquam voluptuoso quietis loco , voluit refocillari ? O quàm durum est refragari veritati , quæ tanto rationis lumine circumfulget ! Profectò mihi tam peregrinum accidit , omnium virtutum Matrem fuisse MARIAM sine seminatrice Ethicæ , quàm novum est , excrevisse nonnunquam sine radice arboris truncum , sine trunco ramos , sine ramis folia . Tam incredibile videtur esse , Verbum æternum divinam (si loqui sic licet) cum humana copulâsse Humanitatem , & potissimum Ethicæ simulachrum non conjunxis-

se; quàm falsum est, cum in hoc orbis theatrum induxisse radios solis sine luce, indidisse hominibus vitam sine anima, dedisse animantibus visum sine oculis.

Sed pergamus tamen in argumento deliciari, quàm diu in hoc Mariano Paradiso nobis licet expatiari. Suspicionem enim, hoc insuper à me desiderari, ut ostendam, quo loco vel tempore professionem Ethicæ sit auspicata, quibusve doctrinis Auditores suos imbuerit MARIA. Quare ut desiderijs vestris quàm primum adblandiar, libenter assero, illam ibi moralis Sapientiæ Magisterium exhibuisse, ubi præstantissimi quique vix rude tyrocinium posuerunt. In exesæ rupis antro Ethicæ regulas, & Reipub: instituendæ normas hausisse dicetis Platonem; ego in Bethlemi stabulo, vel ut alij volunt, hiantis saxi latibulo fundamentales publici boni institutiones, in unum quidem caput (O quantum caput!) membra tamen multa, digito paternæ dexteræ congestas,

gestas, exposuisse, pronuntiabo Mariam. In tenebroso montis hiatu, philosophiam, merum magistrum, complexum, ejusdem conclusionibus assuetum, dicetis Xenocratem; ego in lacero Judææ tugurio ulnis & corde conclusas, & perspectas Incarnatæ Sapientiæ delicias discipulis communicasse, prædicabo Mariam. In tenebris ab Ægeria sua regni gubernandi & conservandi leges didicisse dicetis Numam Pompilius; ego in *vespera seculorum*, & in altissima quidem nocte, ipsum universi mundi conservatorem, omnibus servandi methodis instructissimum, dedisse affirmabo Mariam. In profunda terræ scrobe magnarum consilia rerum à Conso Deo suo attentâ mente excepisse dicetis Romanos; ego in malè clausa telluris specu ipsum *Magni consilij angelum* habuisse auditorem, asseverabo Mariam. Néque vereor, ut pro Sanctissima Virgine dicentem quispiam temeritatis arguat, cum magnum illud Hispaniæ decus Ildefonsus (a) (a) *Lib. de Virg. Mariæ*

(a) *In Indisth. tract. Append.*
c. 11. §. 15.

non me solùm , sed omnes omnino Marianæ doctrinæ discipulos sic loqui docuerit : *Sub Mariæ disciplina Infans Deus versatur.* Non ut erudiri videatur (explicat Doctissimus de Celada (a)) qui nulla eruditione indiget ; sed ut Matris docentis honoret Sapientiam , & in morum florulentia recreetur , gestuum formositate saucietur , virtutum suaveolentiâ inebrietur.

Bone Deus ! ergone satis non fuit , ex tuarum , quas in te vides , perfectionum pulchritudine intensissimam & inexplicabilem haurire beatitudinem , adhuc *respexisti Ancillam* , ut extensione quadam majorem ex ea perciperes ? Itane liberaliter te infudisti Virgini , ut etiam pulchritudo morum tuorum in illa reluceret ? Ita ! clamat Andreas Creten-

(b) *Orat. 2. de Assum. B. V.*

(c) *S. Hier. ser. de Assump.*

(d) *Isid. orat. 4.*

fis , (b) qui eam *Compendium incomprehensibilium perfectionum Dei* nuncupat : ita ! respondet Hieronymus , (c) qui *formam Discipline Christi* asserit ; ita ! subjungit Isidorus Thessalonicensis , (d) *Efformabat* , inquit , *se ipsam* , uti

pictor

*pictor peritus, intuens in imaginem Opificii
& filij sui: ita! conclamant Inter-
pretes, qui formam illam in Mariæ
moribus expressam, multo pulchrio-
rem, & quodammodo venustiore
apparuisse innuunt; cum idem lo-
queretur Maria morum & vitæ lin-
guâ, quod Christus ore prædicabat.*

(a) Non igitur jam miror Doctis-
simum Idiotam, quod Deiparentem
vitæ moralis ideam & exemplar vocet; non
obstupefco laudatum Hieronymum,
quod *vitam ejus omnium disciplinam, &
mores, instituta Ecclesiarum* indigitet;

(b) non invideo dulcissimo Ambro-
sio; (c) qui in Virgine *Magisteria probi-
tatis* habuit; non repugno ijs, qui
discipulos Domini, & Ecclesiæ Ma-
gistros sacratissimis morum discipli-
nis à MARIA institutos edocuerunt.

(d) Illud insuper addo, alios quô-
que Patres autoritate sua futuros
hic debiles, nisi admittant, DE I
parentem Ethicæ scientiâ præcellui-
se, adeoque totâ vitâ suâ (siquidem
ex hac, teste Chrysologo (e) *Magiste-
rii autoritas constat*) perfectissimam

fuisse

(a) Didacus
de Celada lo-
co citato.

(b) S. Hie-
ron. *supra*.
(c) Libr. 2.
de Virg.

(d) *Auctor
Supplem:
Gabrielis in*
4. Dist. 49.
q. 4. a. 3. d. 2.

(e) S. Chry-
sol. *serm. 176.*

(a) *Serm.
de Assum.*

fuisse Magistram. Vix enim credam Athanasio Sinaitæ, (a) fuisse summam orbis Imperatricem, nisi simul eam honoret moralium virtutum gemmis, in exemplum Reginarum, coronatam. Vix credam,

(b) *Orat. 3.
de Annun.*

Gregorio Neocæsareensi, (b) fuisse *Civitatem animatam*, nisi concedat, illius animam fuisse Ethicam, qua habitantes in ea cives ad tranquillitatis studia, candorem animorum, mutuae amicitiae fomenta, legum sanctissimarum cultum, & Superiorum observantiam animabat. Vix cre-

(c) *Orat. 1.
de Nat. B.V.*

dam Virgineo Damasceno (c) & alijs, fuisse *Templum DEI*, nisi pulcherrima Ethicæ instituta in Sacrorum reverentia, nitore altarium, hostiarum pretio illinc enituerint. Vix credam Hipponensium Antistiti Au-

(d) *S. Aug.
ser. de Ass.
qui habetur
coro 9.*

gustino, (d) fuisse *Aulam Regis aeterni*, nisi etiam fateatur, in hac habitasse moralem Sapientiam, illam consiliorum & mandatorum dictatricem, formosissimumque virtutum omnium gynæceum.

Sed à Magistra nostra dictata, atque

que in laconicos aphorismos digesta
 praecepta, vestrorum sunt fines de-
 sideriorum. Animadverto, quâ
 mentis astutæ intentione hoc expe-
 ctetis. Fateor namque in tota Scri-
 pturarum serie nonnisi septies locu-
 tam reperiri MARIAM. Sed quid inde?
 Ergo vox ejus aures clientum suo-
 rum frequentiore dulcedine non
 demulsit? Ergo inanibus tituli
 affanijs me ludere putatis, dum
 eam, non de communibus, sed altis-
 simis Doctorum subsellijs Magistram
 compello, quamvis illius commen-
 tarii litteris consignati non sint? An
 nescitis, vel ex Spiritus Sancti ora-
 culo, vel SS. Patrum testimonio,
 hunc demum vocari magnum, qui
 fecerit, ac faciendo docuerit; & docere
 factis solam esse normam doctrinæ? (a) An
 ignoratis Philosophiâ nō Philologiâ,
 vivere non disputare, magna agere
 non loqui, factis magis quàm ver-
 bis (licet nec his pepercerit, ut supra
 asserui) docuisse Magistram? Legite
 vitam, inspicite exercitia considera-
 te opera, & sincera Virginis sensa
 colli-

(a) S. Chry-
 sologus su-
 pra.

colligētis. Mihi certè, nuper à scholarum laboribus avvocato, dum inter profunda ad Magnam Matrem Suspiria, tantisper respirarem, jámque Marianum ingressus Paradisum, primum de fluminibus quatuor attentiore mentis obtutu contemplarer, cum suavissimis alijs susurris, auditi sunt etiam sequentes insusurrari

Prudentiæ Aphorismi.

Quisquis sinceram prensas felicitatem, illuc mentis tuæ fige oculos, unde obſciuntur optima, quamvis ardua, quamvis disſita. Dum verſaris in rerum delectu, cave, nè apparentis boni specie ſeducaris, quia jacturam irreparabilem facies ſincerioris. Ego MARIA, Magiſtra tua, optimam elegi partem, quia cælo intentæ, non terris, providebam Dominum in conſpectu meo ſemper. Cuncta providenda & diſpicienda ſunt, ut ames bona, mala vel fugias, vel præ-

*prævertas. Securius est damna præ-
 venire, quàm illata emendare. Ille
 carior est Medicus, qui phar-
 macis præservat, quàm qui sanat. Experte
 crede Magistra; meliùs honori suo
 consuluit, qui potens est, faciendo po-
 tentiam in brachio, quo, nè cum pa-
 rente primo laberer, me sustinuit,
 quàm si post indecorum sibi lapsum
 è communi ruina quantocyus erexis-
 set. Præcavenda nimirum sunt mul-
 ta, nè si admiseras, serâ eluas pœnit-
 tudine. Non admittendum quidquam,
 cujus finem deliberando non disqui-
 ras, non deprehendas consultando.
 Privata æquè ac publica salus, imò
 ipse ingentium regnorum moles deli-
 beratione fabricantur, consilijs ful-
 ciuntur. Illa consilia tutiora, quæ di-
 vine mentis consilijs sunt conformio-
 ra. Extra Deum nihil beatum, sine
 Deo nihil tutum, cum Deo nihil ti-
 mendum, nisi solus Deus. Non tuum
 percellat animum aureus divitiarum
 splendor,*

*splendor, non elevata in superbia ne
adificia pelliciant; non adspira ad
sublimes dignitatum apices; nec ap-
pete alia fortune decora. Sine Deo
sive possessa, sive perditâ, tormenta
sunt animorum. Divitiæ affluunt,
ut effluant: edificia stant, ut sati-
gentur: assurgunt, ut inclinato post-
ea vertice temporis edacis adorent
dominium. Dignitas trahit bonoris
fumum, ut evanescat; felicitas blan-
ditur, ut fallat. Nôsti illud mihi fa-
miliare: Dispersit superbos, & divi-
tes dimisit inanes, qui solam sui Sa-
pientiam, inter momentaneas mundi
ruinas immortalem, præponi voluit
regnis, ac sedibus, & divitias nihil*

(a) Sap. c. 7. esse duci in comparatione illius? (a)

*Hæc una calliditatis & humani astus
inimica est, amica sinceritatis. Hæc
rerum gerendarum præses, vitæ Ma-
gistra, lux operum, perennaturæ bea-
titudinis clavis, quam sine fictione di-*

(b) Ibidem. dici, & sine invidia communico. (b)

Ad

Ad hanc igitur Sapientiam, omnium Scientiarum gynaceo stipatam, generosiore impetu accurre, illiusque amor in te continua cum annis summat incrementa. Unum tamen ab Ancilla Domini disce: Scientias oportere semper manere ancillas, nunquam fieri dominas virtutum. Sic enim animum instabunt nunquam, nec nimium sublata minabuntur precipitia. Et quò majus honoris fastigium tibi extruxerint scientia, eò assurge altius humilitate. Dùmque in dignitatis subsellium fueris repositus, ad auxiliarem, atque amicam consuetudinem te submitte inferiorum, ut respectum habeas apud eum, qui tam in alijs, tum in me respexit humilitatem.

Attonito similior hic hærebam. Et quia uberem oblectationis materiam, solidasque ad erudiendam vitam veritates nactus fuerat animus, ulteriori sic loquentis dulcedi-

M

ne

ne pasci peroptâssem , nisi , ut nihil hîc diuturnum est , composito ad silentium isthoc fluvio, & invitantibus ex alia parte mollibus inspirationum veluti Favoniorum animabus, deductus fuisset ad flumen alterum, quod aquis fortiùs cadentibus, solidissimas hasce ciebat.

De Fortitudine admir- murationes.

I*nsignis Divinae Sapientia portio, sinceraq; prudentia Soboles est Fortitudo. Hac duplici robusta brachio res arduas aggreditur uno, sustinet altero : hominem supra conditionem humanam attollit uno, medium homines inter Deumque continet altero : audentibus præmium ostentat uno, perseverantibus promissum largitur altero; tanto augustior, quanto augustiorem sedem occupat hominis animum, non corpus. Quisquis igitur tam augusta virtutis ambis præmia, exerce animum, & divinis imbutus*

imbutus consilijs tenta inausa, vince
 obstantia, sustine difficilia. Salus
 tua, & proximi, gloria tua, & Filij mei
 non nisi casis obstantium hostium ca-
 teruis capeßitur. Una, eaque vali-
 da cetera sunt & propria tua cupi-
 ditates, & blanda voluptatis illece-
 bra, & depravati animi tui sensus.
 Crescent tua pugnandi cunctatione,
 teque in abominandam trahent ser-
 vitutem, ac ruinam; cadent exerta
 virtutis celeritate impetiti. Quid
 turpius, posse pugnando vincere,
 deque victoria certum esse ante præ-
 lium, velle tamen torpescere, ut vin-
 caris? Quid vilius, posse ordinata
 virtutum acie gloriosè dominari, &
 velle vitiorum monstris ignominiosè
 famulari? Propudiosa est emollita
 segnities indolis, celebranda sæculis
 animi celsitudo! Christianus es;
 Christum moribus exprime, non no-
 mine. Pudeat nominis, quem piget
 imitationis. Hic ex me progenitus in-

folescentem orci serpentem illico ag-
gressus fabulosum de Hercule com-
mentum elisit veritate, quaque Vi-
ragine natus esset, ad huc tenellus de-
monstravit: tu annis maturior
exemplo illius accendere, & magna-
nimitatem aut exhibe, aut nomen
Christiani exue. Ille frigoribus eta-
tem pro te indurari, inediâ vexari,
siti confici, exerceri laboribus, insidijs
impeti, premi injurijs, violari contu-
melijs, sauciari vulneribus glorio-
sum duxit: tu gloria illius ut sis co-
hares, similibus objice pectus, non ter-
gum. Rerum acerbè fluentium casti-
bus versari, nec everti; audere in
salutem ardua, nec absterreri; cir-
cumagi tempestatibus, & serenam ex-
plicare frontem, argumentum est
indolis, omni turbine superioris.
Non est fortis, cujus animata volun-
tas ad primam difficultatis pruina
emarcescit. Vertumnus est, qui à ge-
nerosis conceptibus ad alia facile
con-

convertitur. Tam sedè à ceptis quis
resilit, quàm gloriosè accessit. Syrtem
indue, quæ assilientes Oceani fluctus
robore non minori excipit, quàm ex-
ceptos reverterat. Arborem expri-
me, quæ radices suas in tanto mayo-
rem stringit soliditatem, quanto ma-
jore insultu à ventis impetitur. So-
lem amulare, qui nubibus tegi potest,
sed luce non privari. Rosam te ex-
hibe, quæ inter vepreti aculeos glò-
ria purpurâ renidet. Aromatum.
indolem sectare, quæ subinde contri-
ta majorem vicinia diffundunt odo-
rem. Olivæ assimilare, quæ, dum pre-
mitur, in suavisissimum utilissimūq;
succum mortalibus diffluit. In omni
denique vitæ inaequalitate semper
sis equalis, semper tibi similis. Sic
agendo mortalium cogitationes su-
perabis genuinus illius Magistræ di-
scipulus, quam nec rerum vicissitudi-
nes, nec maledicta scurrarum, nec
judæorum furor, nec satellitum sa-

vitiâ, nec plebis impudentia, in viscera Filij sui tumultuantia, potuerunt movere, aut deijcere: adhuc stabam juxta crucem.

Stabam & ego juxta hunc fluvium, non secus ac illa, cujus anima liquefacta est ad dulcem Sponsi loquelam. Verùm ubi vires mentemque collegi, & isthinc altum conticescerent omnia, ad tertium quoque flumen ingenti quadam discendi aviditate, me rapi permisi, ubi Superioribus non inferiora mihi visus sum excipere.

De Justitia Documenta.

IN pondere, numero, & mensura facta sunt omnia. Suâ mole ponderati montes; legum terminus aquæ coërcita; ad libram librati fontes; ipsa fundamenta terra appensa ad æquilibrium, ut, exclusâ omni defectûs vel excessûs inequalitate, in res universas Justitia mater, Æqualitas, induceretur. Pulchra virtus
Justitia!

*Justitia! Hac animorum servatur
concordia, litigantium procuratur
tranquillitas, dissidentium repara-
tur unio, compago Reipub. ad beati-
tudinem corroboratur. Tu justus ut
sis, pronam gere voluntatem suam
cuique tribuendi. Tribues, si eam
ipsam transfuderis in divinam, cum
in omnibus solius Dei fieri oporteat,
sicut in cælo & in terra. In te nihil
omnino tuum est, ut quem totum Fi-
lius meus inestimabili sanguinis pro-
fusi pretio redemit, fecitq. suum.
Toties illi es injurius, quoties tuam
exerces voluntatem, quia uteris alie-
no, non proprio. Soli Deo voluntas
est propria. Nunquam melius divi-
num ac Canonicum jus profiteberis,
quàm cum dices: Fiat mihi secun-
dum Verbum tuum. Pretiosus justiti-
æ actus est, cum nos totos exinani-
mus, ut universorum Domino tri-
buamus omnia: motus anima, quia
eam ab illo accepimus; bona exter-*

tutò fruatur sibi concessis. Tuis contentus opibus ingeniosis abstine aliarum exactionibus. Memineris magnis tragædijs vel unam subinde alienæ rei subtractionem expiatam fuisse. Sanguis pauperum, in ære alijsq; muneribus elicitus, ipsa Abelis voce in cælum est vocalior. Nunquam surdus ad afflictorum suspiria est vindex Deus. Tunc voluit ex me nasci, cum ad tributorum copiam describeretur orbis; ut non destituerentur solatio, qui operibus premebantur. Ideo præeris, ut alios leves, non opprimas. Ideo Justitiæ vibrabis enses, ut in te ac alijs iniquitatem ex æquo praeidas, non propugnes. Delicta non debent impunitate crescere; sed etiam severitate non superari. Quos ad æquitatem provocare nequiveris virtutis amore, trahere formidine pœna. Sape qui sensum honoris non habent, habent doloris. Sic in vijs Justitiæ ambulando nun-

quam offendes ad lapidem pedem

(a) Ps. 90. *tuum.* (a)

Quartus adhuc restabat fluvius. Hic quia per Paradisum amœnis flexibus ad pulchram oculorum illusionem oberrabat, & modestissimâ sui devolutione non exiguum eminus aspicienti faciebat indicium quarti Ethicæ cardinis; facili me negotio ad se pellexit. Vix autem illius littora speculabundâ mente subinstrâram, gratiosâque Marianæ vitæ temperiem, temperatissimo, argenteoque aquarum motu expressam, conspexeram; cùm subitò breve ad morum nostrorum moderationem occurrit.

Temperantiæ Dictamen.

Amplum virtutis imperium est, corpori & animæ bene imperantis. In sublimi consistens speculâ vigil excubat, ut ubi commotiones hominis inferioris de super prospectarit, maliciam imperet, & corporea tranquillitatis

tatis decora refundat in animam. Plerumque quod non decet corpus, animam dedecet. Insani motus illius perturbant hujus serenitatem. Co-bibe illud, & oriri solitos adversus istam tumultus securissimè declina-bis. Illius cupiditates maturè fra-na, nè, si concesseris, quod expetunt, appetendi gradum facias, non finem. Si tegendo illi arriserit saturata con-chylio purpura, & intexta auro, vel coloribus distincta tela; si pretiosi ab Indis lapides, fulgen(g) supellex; si auri argentiq(ue) copia; cogita non esse sitim, humore quodam satiandam; sed nimium exardescentis volunta-tis aestu exortum desiderium, proin-dèque morbum, solâ temperantiâ cu-randum. Superflua pro corpore cu-ra, veluti luxuriantis vitis palmes, est amputanda. Tantum indulge illi, quantum decenter opus est. Ita ciba, ut levamentum vita sint cibi, non pondus. Comedimus, ut viva-
mus;

mus; non vivimus, ut comedamus. Dissipit, qui sarcinam replet, ut profundius deprimatur. Ita pota, ut anima nullo unquam fluctuet periculo; natante siquidem in vino corpore, illa plerumque naufragatur: nec spem salutis habet, nisi abjectis oneribus, Simmodico rerum usu, in tabula pœnitentie. Terrori sit ille, qui epulabatur quotidie splendide, hoc est, intemperanter; nec jam guttam habet de tot excellentissimis vinis, quâ lingua ardorem possit temperare. Nimirum sine modo castigantur, qui nullum vivendo modum tenuerunt. Amant, prensantque, temperantiam, ubi retro est occaso calva. Æternam serviunt ibi servitutem, qui brevi tempore passionibus suis, cum possent, hic noluerunt dominari, sed depresso spiritu servierunt corpori. O quàm augustum est sui Dominium! quàm regius animus, qui affectus omnes rationis imperio

imperio ita regit, ut ab ijs non regatur; ita ducit, ut non ducatur! Tu dominus ut sis semper, corpus omne (q̄, potentias tuas hic moderare, verèque cum Magistra dices discipulus: Depresso corpore, exultavit Spiritus meus in Deo Salutari meo. (a)

(a) *Luc. c. 1.*

Ecce instituendæ vitæ regulas, virtutum præcepta; normas agendorum, eruditiones juvenum, pulcherrima Ethicæ argumenta, quæ morum eruditissima Magistra factis magis, quàm verbis communicavit clientibus, dictavit discipulis, præscripsit filijs. Si vobis quòque probantur AA. legite, notate, factis exprimate. Sunt pretiosæ margaritæ, quas in amæna quatuor fluminum littora egressa, ad proritandam discipulorum suorum avaritiam; si lubet, earum pretio ditescite, quoniam ipsa est, quæ *ditat diligentes se, & thesauros eorum replet.* (a) Sunt communiores quidem, non tamen viles, de Sapientiæ thesauris educæ gemmæ; si placet, in vitæ annulos in-

(b) *Prov. c. 8.*

inferite , ut magno æternitatis anno
beatis & nunquam solubilibus nexibus innectamini. Sunt optimi auri arenulæ ; si arrident , ijs mores vestros inaurate , ut vita vestra tota posthac sit aurea. Sunt lapides pro inauribus , si non displicent , auribus vestris sic accommodate , ut per eas in animum immittantur , pretiosum daturi ornamentum.

Vos tamen in primis obsecro , atque obtestor Juvenes , qui ad scientiarum emporia ideo ablegamini , ut ibi , non inter nugivendulos crepitacula , non inter cinciñatos & lacte lotos muliebre molitiem , non inter astutas vulpes vulpinandi vastitiam , non inter discolos libertatem quidlibet audendi ; sed inter maturrimos Sapientiæ Professores , probitatisque amantes condiscipulos , honestissimarum litterarum com meatum , in omnem vitæ necessitatem profuturum , comparetis. Vos inquam obsecro , atque obtestor , ut hanc Ethicæ scientiam affectu teneriore complectamini , ejusque

júsque quaternos fontes , hætenus
deductos , avidiore pectore combi-
batis. Prudentiâ enim & Fortitudine,
Justitiâ & Temperantiâ præminen-
tes coercebitis dissolutæ juventutis
licentiam ; revocabitis ab exilio
pietatem ; exaggerabitis vilipensæ
Religionis pretium ; conciliabitis
dissidentium animorum concordi-
am ; arcebitis à patria insidias ;
dissipabitis prementium bellorum
tempestates ; reducetis in tribuna-
lia æquitatem, in commercia fidem,
in domicilia honestatem, in animos
candorem ; universam Rempub. ad
omnem felicitatem per hos virtu-
tum cardines devolveretis , ac demum
figetis , stabilietis. Hoc exposcunt
à vobis parentes vestri, qui suum non
tantum sanguinem , sed & virtutum
gloriam gloriæque famam in vobis
ali voluerunt. Hoc efflagitat afflicta
per callidam , depravatamque in-
colarum progeniem patria vestra ,
quæ probos pro urbibus cives , pru-
dentes pro civibus magistros , do-
ctos pro curijs dictatores , integros
pro

pro foro advocatos , sanctos pro templis Sacerdotes , fortes pro mœnibus milites , peritos pro exercitiis duces , pro omni denique comparanda felicitate novos Hercules , pro sustentanda Atlantes præstolantur. Hoc exigunt sapientissimi Reges & principes vestri , qui non solius nobilitatis lenocinio , non sanguinis privilegio , non opulentia patrocínio ; sed illustrissimis simul scientia rationibus induci amant , ad conferenda aularum subsellia & officia provinciarum. Hoc obtestantur Magistri & præceptores vestri , qui nocturnis vigilijs , diurnisque laboribus sudorem suum vel ideo profundunt , ut immortalis gloriæ laureas , quibus capita vestra virere peroptant , irrigent , atque facundent. Hoc desiderat , ardētque indoles vestra , cuius scintilla non raro per actiones vitæ , quasi per rimas emicant ; plenè tamen eluctari non possunt , quia nescio quibus voluptæ vel libertatis satellitibus obsidentur.

Agite

Agite igitur Adolescentes optimi, Spes patriæ, heroum semina, illustres animæ; & concepta magistrorum vota, parentum desideria, principum expectationem, indolis vestræ vigorem amate, fovete, beate. Beabitis; si, quam probavi felicissimam esse morum conformatricem, doctissimam imperandi, obtemperandique regularum Magistram, prudentissimam humanarum actionum moderatricem, attentamente audiveritis, & doctrinas ejus non tam calamis in charta, quam operibus in vita exprefferitis. Sed dicite amabo, facietisne? Facietis. Ita suspicor, ita mihi persvadeo. Quare unum, & illud quidem Supremum, rogo; Si humanissimis his Ethicæ præceptionibus, quasi viatico quodam instructi, ex hac mortali vita in felici æternitatis viam præcesseritis, pro humanitate vestra, nomine tamen & corde meo, Salutate MARIAM. (a)

(a) *Ad Rom.*
c. 16.

N

P R Æ

PRÆCONIUM.

Mathematicarum discipli-
narum dignitas & utili-
tas permagna. Ipse mundi Ar-
chitectus in fabricando, ma-
chinandoque Universitatis o-
pificio Geometriam in pri-
mis exhibuit. Neque Plato
quidquam magnificentius lo-
cutus est, cum dixit, *DEUM*
μάλιστα Πάντων γεωμετεῖν.
Petrus Ramus Orat. de sua
Profess.

ORATIO VII.

MARIA, necessariam Ma-
thematicum varietatem sapiens,
ideoque

Magistra Matheſeos.

Solent nonnulli de Rhetorum or-
dine non mediocriter angī; & ſive
de

de argumentorum robore ac nervo, sive de varia eruditionum suppellectile ac raritate, verborum copia & selectu, figurarum numero & ornatu, periodorum fluxu & refluxu, majore concuti sollicitudine, siquando dicendi labor incumbit, & melioris orationis gloria pungit animum: ego tamen dicturus de præstanti Matheſeos ſcientia, quâ Deus Matrem ſuam exornavit, ornatâmq; alijs præſtituit Magiſtram, omnem ejuſmodi curam ſepono, audacter facundêque provocans in ornatum dictionis ipſam argumenti pulchritudinem, quæ quàm varia & elegans, tam varios & elegantes eidem vultus, amabilêſque formas poterit communicare. Poterunt enim verò tot tamque multiplicia mathemata panegyris eſſe themata, tanto aptiora pro acumine, quanto illa nobiliora ſunt â MARIÆ ingenio: poterunt hujus ſcientiæ ſororiæ ſpecies eruditionum ſubire vices, & in copioſam amœnitatem explicari, Nazarea ſiquidem Mater, quæ plerumque

cogitationibus eruditis interfuit, nonnisi florulentiam spirare solet: poterunt adeo diversi tum cœlestis, tū terrestris sphaeræ circuli sermonis esse periodi eo rotundiores, quo perfectiores in orbes hæc terra collecta, cœlum illud gyratum, Mariana insuper cogitatione sunt rotundata: poterunt circulorum divisiones esse periodorum membra, linearum sectiones Incisa, figurarum varietates orationis conformatio, verborum ac sententiarum perpolitio insignienda. Verum itane futurum sperem, ut in facundiæ ornatum hæc omnia cedant, & à rerum dicendarum dignitate in ipsam dictionem reflectat aliquid? Ita omnino spero, AA, ita penitus confido, ut quemadmodum solis radius tristes cœli nubes, candidus lucis nitor picturæ umbras, pulchra rosæ purpura dumeti folia trajicit, ac illuminat; sic hujus argumenti materies orationem meam convestiat, ut ab ejus gratia nonnihil gratiosa evadat, demumque per aures in animos vestros suaviter influat;

fluat; cū strepera solū loquacitate obstrepere, nefas esse putem, semper castigandum. Scio quidem ex B. Ennodio (a) *fulvi nobilitatem metalli, nisi ad unguem manus ducat artificis, maternis pene hebetari in tenebris*; nec ignoro, nobilium rerum pretia quandoque non apparere, nisi in eloquentiæ campis exponantur: ego tamen, virium mearum conscius, non possum de linguæ dexteritate tantum promittere, quantum sufficiat ad causæ pulchritudinem elevandam, vel amplius exornandam. Conamur (loquor ex mente laudati Patris) subinde vel *dicere*, vel *scribere pulchra*; sed interim *amantur plus fortia*. Sepe eadem redimita sunt floribus eloquentiæ; sed *poma plus diliguntur*. (b) Ab utroque cū non contemnendum subsidium expectem, AA, libenter prosequar laudis Marianæ seriem, ut quam sub benevolentiae vestræ Favonijs exponere cepi, consummata terminem aspiratione.

(a) B. Ennod. erat. 3o

(b) Idem lib. 1. Epist. 12.

Adeste igitur, quotquot estis vere Sapientiæ seu filiæ, seu Sorores;

N 3

vósque

vólque in primis Arithmetica, Astronomia, Geometria, Cosmographia, Hydrographia, & Topographia; quas cum Sapientúm antiquitas semper coluit, & venerata est, tum nostra non minore cultu recolit posteritas: adeste, inquam, & Mariannæ panegyris argumento fidem facite prolixiorē. Dicite, obsecro, nunquid vos quoque non exiguum induxistis jubar capacissimo Virginis intellectui, quando ipsa vel corporum cœlestium aspectus, magnitudines, intervalla, progressionē, institutionesque matura mente profecuta est; vel ex eorundem corporum motibus collecta temporum momenta ad rerum gestarum numeravit ordinem; vel elaboratas ædificiorum moles, absolutasque templorum structuras non circinis, sed circulorum, linearum, & angulorum rationibus distinxit; vel terrarum amplitudines, aquarum extractus, regionum situs, provinciarum ordines consideravit profundius, cogitatione dimensa est accuratius? Ita annunt

Virginis

Virginis amatrices omnes, appronis
vultibus adstipulantur omnes; utq;
materiam commendationis faciant,
ampliolem, quæ magis in ea refulse-
rit, contendunt omnes. Omnes enim
in ea refulsisse, confirmare videntur
Angelici Doctoris Magister Albertus,

(a) Seraphici Patris filius Antoninus, (a) *Super*
(b) Marianorum decorum vindices *Miss. c. 144.*
Theologi, (c) qui dictante pietate di- *& c. 146.*
ctant: *Augustam Virginem, utpote Sapi-* (b) *4. p. tit.*
entiae Domum, scientiarum, & errorum *15. c. 19.*
omnium peremptricem, in his scientijs excul- (c) *Chri-*
tissimam esse oportuisse. *stoph. Vega*
in Theol.
Mar. & alij.

Sed splendido potius ac trium-
phali fucō hæc Deiparenti appingi,
asseret non nemo: exuberantis si-
quidem affectûs iste defectus est, su-
pervacaneam, & inanem profana-
rum scientiarum pompam, velut ocu-
latam pavoni caudam illi affigere,
quæ serijs solidisq; profundæ men-
tis cognitionibus solita est distineri.
Risum teneamus amici, si gravissi-
mam Virginem, inutilibus occupa-
tionibus inimicam, videamus, jam
agi per ærem, & nescio quibus ma-

chinis examinare sidera, eorūque corpora mensurare; jam describere terrestris globi partes, notare locorum distantias, metiri turrium montiumque altitudines; jam numerare Ephemerides, discernere pondera, probare mensuras, inire sumptuum, pecuniarum, aut similium computus; jam delineare palatia, fabricare horologia, perpolire metalla, laborare vitra, tergere specula; & denique cum Archimede, nescio, quas aniles, in angusto illo, quam Lauretanam Domum dicimus, domicilio formas efformare. In stuporem insuper abeamus, si viderimus apud illam œconomiam optidorum, tuborum, circinorum, sphaerarum, astrolabiorum, & similium observationibus astronomicis subservientium instrumentorum copiam: vilescat Authoritas Magni Augustini, alicubi (a) sic loquentis: *Nihil tam est contra Christianos, quàm si arti Matheſeos adhibeant curam; hæc enim inimica dignoscitur Dei: non credamus Interpretibus (b) astrorum cognitionem soli DEO*

(a) *8. Aug. l. 2. de Doctr. Xri. an. c. 11. (b, Caiet. in Gen. 2. ad illud: Adduxit ea ad Adam.*

DEO reservantibus, juxta illud: *qui numerat multitudinem stellarum, & omnibus eis nomina vocat*, (a) Si uni Virgini, (a) Ps. 144. latendi studio intentæ, cælorum scientiam Deus communicavit.

Pro quanta sunt hæc argumenta! quantum robur adversæ partis sic argutantis! obmutescerem sanè, vel in Harpocraticum abirem silentium, nisi probè nôsem, vanas esse sine viribus iras; cælum quandôque tonare, non fulminare; parturire montes, & nasci demum ridicula; nonnullos verbis magis esse sonoros, quàm rerum pondere graves. Quis autem non advertit tumidam verborum pompam & affectatæ mentis indolem, quæ admirationem vel prodit, vel intendit; non solidæ rationis vibrat verbera, ad expugnandos animis auditorum? Dic enim, amabo, quisquis stupendo dicis, non peroras dicendo, vacavitne aliquando sacrarum scripturarû lectioni Maria? Vacavit: imò altissimè animo suo impressit. (b) Sed legitne etiam, quæ de mirabili, quam Noë constru-

(b) Carthagena tom. 2. l. 2. hom. 9.

xit, arcæ compagine, illiúsque capacitate, longitudine, latitudine, ac profunditate ex Geometriæ regulis præscripsit DEUS? Legit; sed Incarnatæ Sapientiæ parens non intellexit. *Risum teneamus amici.* Legitne, quæ de Salomonis templo, tabernaculo, aulæ palatio, cæterisque molitionibus, quæ peritissimi artifices non tam artis suæ monumentis nobilitarunt, quam ipsa Dei Sapientia per exactas linearum, angulorum, triangulorum, circulorum, & mensurarum amusses ad fastigium perduxit, Sacræ litteræ non uno produnt loco? Legit; sed DEI Mater non intellexit. *Risum teneamus amici.* Legitne illam scripturæ partem, in qua seu ad mensurandum, seu ad ponderandum *Amphoræ, modi, metretæ, cadi, Caph, bati, cori, ephi, sati, gomor,* & similia memorantur? Legit; sed Maria non intellexit. *Risum teneamus amici.* Legitne, quàm jucundus paradisi fuerit situs; num aliquas ejus loci plagas discriminârit quaternio fluminum; quæ post fatales diluvij aquas

aquas factæ sint divisiones gentium; quos terræ marisque tractus trans-
miserint peregrinantes Israëlitæ; quas provincias suis pedibus emen-
si sint Patriarchæ, quæ universa si-
ne Geographiæ, & Cosmographiæ
rationibus comprehendi nequeunt? Legit; sed non intellexit. *Risum te-
neamus amici*. Legitne in Isaia, illo *Se-
raphici Ordinis* (a) viro, retroactum ali- (a) *Cornel. &*
quando per denas lineas solem in *Lapide in*
horologio Achaz, eundem alibi Su- *argum: ad*
spenso cursu stetisse ad imperia pu- *Isaiam*
gnantis Josue, ejusdem luminis ab-
sentiam induxisse tenebras alibi, &
condensa caligine Ifacidæ involvis-
se? Legit; sed quo modo id factum
sit, non intellexit. Denique *risum*
teneamus amici Virginis, vel totis po-
tius stomachis stomachemur, quan-
do tam liberæ sunt mortalium men-
tes ac linguæ, ut pro libidine sua
quidvis apprehendant, & pro auda-
cia, quæ apprehenderint, opinen-
tur, ac eloquantur. Corticem, &
quæ meticuloso ingenio afforis inde-
cora videntur, exaggerant; nucleum,
&

& quæ in animum profundius descendere oporteret, non attendunt. Jurâsse se in Marianarum laudum temperantiam gloriantur, & interim improvidi, non levem ijsdem impingunt injuriam, dum fateri coguntur, intellectûs perspicacissimi Virginem Sacrarum litterarum apices legisse quidem, sed non intellexisse. Fateor & ego castigabilis temeritatis argumentum fore, si vel mente incitatiores sentirem, vel ore vehementiore propugnarem, illam Astrologiæ Judiciariæ, contra quàm D. Augustini superior fuit querimonia, operæ aliquid impendisse; vel tempus, ingeniûmque suum observandis astrorum cursibus, notandis solis ac lunæ deliquijs, mensurandis terrarum, aquarûmque tractibus, colligendis montium & turrium altitudinibus, delineandis ad superbam ostentationem regum domicilijs, aptandis ad capienda rerû spectacula, nescio, quibus machinis inutiliter distraxisse. Hoc tamen asserere præsumo, Deum integerrimæ Matheseos cogni-

cognitiones nobiles, eas præfertim, quæ ad intelligenda Scripturæ mysteria necessariæ sunt, excitasse in Matre, cui, si mortalium ulli, facere, voluit *memoriam mirabilium suorum*. Vel licat enim verò aurem Sapientissimæ ^{(a) Eccl. c. 17.} regum Salomon, (a) dum panegyrim primorum parentum contexens eos liberaliter celebrat disciplinâ intellectus repletos, scientiâ Spiritus imbutos, Deum posuisse *oculum suum super corda illorum, ostendere illis magnalia operum suorum, ut nomen sanctificationis collaudent, & gloriari in mirabilibus illius, ut magnalia enarrent operum ejus*. Subaudio etiam, & non modicè recreor, ambrosiam D. Ambrosij, (b) qua Sa- ^{(b) Apud Pinedam de reb. Salom. l. 3. c. 21.} lomonis encomium ad saporem con- diens, testatur, eum perspicua con- sideratione pervasisse omnia, quæ in arcanis abditarum dispositionum, tenebantur absconsa; novisse, qualiter hoc cælum ardua sublimitate, fuerit suspensum; quibus modis pigro ad imum delapsa pondere terra subsisteret; quo moderamine librat- us aër eidem circumfunderetur; quas

quas inter littorum metas liquidum
 elementi exæstualet impatiens flu-
 xus ; quod omnium rerum esset prin-
 cipium , quis finis , quæ media , quæ
 divisiones mutationesque tempo-
 rum ; quæ annorum mutua vicissitudo
 redeunte orbe sibi succederet ; unde
 stellæ in varios agerentur cursus præ-
 cedendo se nonnunquam , aut subito
 succedendo ; quàm denique admi-
 rabile esset nomen DEI in universa
 terra , & elevata magnificentia ejus
 super omnes cælos. Hæc , & simi-
 lia lego prædicari de Sapientissimi
 Regis parente , de mirabilium pa-
 tratore Moyse , (a) de viris plurimis,
 non minori Sapientiæ , quàm San-
 ctitatis famâ electis ; & ex animo cre-
 do : quid enim amicos suos celaret
 Deus , quibus non tantum in obvijs,
 & oculo se se infundentibus creatu-
 ris ; sed vel maximè in stupendis
 utriusque orbis operibus potentiam
 suam manifestare voluit , & dulcis-
 simæ pietatis sensum excitare ? Qua-
 re nos quóque persuasum habeamus,
 AA. hanc dulcedinem denegatam
 non

(a) *Actor.*
c. 7. & Phi-
lo: Iud. l. i.
de vita Moy-
se.

non fuisse destinata DEI Matri, ut
 quæ *dilectissima dilectarum* (a) semper
 fuit amica, quæque dulcissimo Vir-
 ginei lactis fonte illum erat potatu-
 ra. Et si alijs Mathematicarum re-
 rum peritis tam perspicaces oculos
 concedimus, ut Dioptricæ ductu re-
 motissima sive in cælo sive in terra,
 vel viderint, vel videre potuerint,
 consimiles quoque filiali obtutu ob-
 servemus in Magna Virgine, de qua
 in panegyrico suo jam pridem ceci-
 nit Sponsus: *Oculi tui sicut piscine in*
Hesebon, quæ sunt in porta filia mul-
 titudinis; (b) illius nimirum filia, (b) *Cant.*
 quam Rabbi Salomon vocat Hieru-
 salem, *cujus Sapientes sedent in portis, &*
occupantur in ratione revolutionum & side-
rum; Sapientia enim & eruditio sunt oculi
populorum. Credemus Chaldaicæ pa-
 raphrasi, scribas urbis illius fuisse
 plenos Sapientiâ, sicut piscina aquarum; &
 sciuisse constituere rationes embolismorum,
 & años intercalare, & signare principia año-
 rum, mensiumque in porta Domus consilij
 magni: & dubitabimus, an in ipsa di-
 vinæ Sapientiæ Domo, inque *Sacrario*
totius

(a) B. Rup.
l. 4. in
Cant.

(b) Cant.
c. 7.

(a) *S. Petr. totius Divinitatis* (a) defuerit aliquid
Dam. ser. 3. ad illius scientiæ plenitudinem ? Ah
de Nat. B. V. lubeat pronius veriùsque sentire de

Virgine ! Lubeat illud altius sapi-
 ùsque repetere : *Memoriam fecit mira-*
 (b) *Pf. 110. bilium suorum* (a) Deus, non tantùm
 opera digitorum , sed potentiam
 quóque brachij revelando Mariæ ,
 quæ, si Sacrarum litterarum Docto-
 ribus credimus, *cum eo erat cuncta com-*
ponens , sive cunctorum congruas
 perfectiones ac cognitiones reci-
 piens , quando summus ille universi
 architectus utrùmque præparavit,
 orbem, minores cælorum globos in-
 clusit maioribus , coagmentavit
 sphæras, diurna nocturnaque lumina
 digessit ordine , libravit aquarum
 fontes , terminis constrinxit ocea-
 num , circumfudit aërem , dimensus
 est terrarum amplitudinem, campo-
 rum planitiem , montium altitudi-
 nem , vallium profunditatem, sicque
 supernam internamque molem mor-
 talium admirationi proposuit. Tunc
 tunc (liceat hîc loqui verbis Joannis
 Geometræ) MARIA totam summi artificis
 hausit

hausit artem, (a) cujus eruditis con-
 siderationibus post evolvenda sæcu-
 la erat refulsura: tunc amplissima
 contemplationum explicabatur ma-
 teria, & divinarum laudum argu-
 menta mente præditis accumula-
 bantur. Certè ausim dicere,
 quid ego tranquilla mente non
 semel volutârim, dum hanc stupe-
 scendam sive terrestris, sive cælestis
 globi structuram contemplerer, &
 ab hac ad humanarum molitionum
 miracula curiosum animum nonnun-
 quam deflecterem. Quid sunt, co-
 gitabam, tam diffusæ murorum stru-
 cturæ, instar urbium assurgentes, &
 non unig solummodo populi capaces,
 quas ad subtilem artis perfectionem
 mortales artifices elaborârunt, si
 cum hac utriusque orbis fabrica
 conferantur? Et concludebam, esse
 ludibria, nugas, ferè nihil. Vbi
 sunt, quærebam ex veterum historia-
 rum monumentis, qui excitandis si-
 milium operum molibus non solum
 immensam divitarum copiam, sed
 insuper plurimorum artificum inge-
 nia,

(a) *Hym. 3.*
apud de Flo-
res p. 2. ad
v. 5. Eccl.

nia, virésque consumpserunt ? & reperi superesse inania nomina. Ex Plinio (a) occurrit Ephesiæ Dianæ templum, in cujus magnificentiam ducentis aënis tota se se impendit Asia; ex Diodoro Siculo (b) occurrerunt muri Babylonij, quos ob sui vastitatem & longitudinem perspicaci hominum visu metiri oportebat; ex authoribus alijs occurrere suspiciendæ pyramides Ægypti, constructum ab Artemisia Mausoli sepulchrū, erectus apud Rhodios solis colossus, adorata Jovis Olympij statua; aliæque istiusmodi machinarum portenta, suis in ruinis jam pridem obsoleta, occurrere. Et quem in finem constructa ? nimirum, ut potentia artisque suæ gloriam transcriberent posteris, eosque raperent in sui venerationem tantorum facti authores miraculorum. Ergo homo, inferebam, relictis potentia vel artis suæ monumentis cultum, laudēque meretur apud homines ? Meretur; Deo, qui nullius indigus, se solo sibi sufficiens, unius vocis imperio, cælum

(a) *Hist. natur. l. 36. c. 14.*

(b) *Lib. 3. c. 3.*

cælum, terram & creaturas omnes vocavit è nihilo, non tribuetur? Absit. Sed à quibus? A creaturis; præsertim gratissimis, & amantem redamantibus. Bene habet. Relinquamus proinde alijs Ægypti pyramides, muros Babylonios, Ephesina templa, Regum Mausolæa, Rhodiorum colossos, Jovis Olympij statuas, turres Ptolomæi, & si quæ sunt alia operum mirandorum monstra: ibi aciem oculorum suorum impendant; ibi stupefiant profusos regnorum thesauros, artificum ingenia, ornamentorum varietatem & magnificentiam; ibi palpent, ac venerentur eorum conditores, immortalitate nominis insanè abreptos; nos verò intrepidè profiteamur, Deiparentem & corporis, & mentis oculos fixisse in illustrem illam orbium supernorum vastitatem (prò quantum miraculum!) & absolutissimam eorundem structuram considerasse clarissimis cognitionibus, quas ei Deus tum ad proliciendos admirationis, gratitudinis & amoris affectus, tum

ad singulare tantæ Matris ornamen-
tum liberaliter infudit. Imò verò
quid opinari aut asseverare vetat,
ipsa astra sæpius inspecta, velut fa-
ces, præivisse, ut suprema quidem
Dei potentia etiam hac ratione mon-
straretur Mariæ; sed præcipuè ut
mens ejus ad intimæ Divinitatis lu-
cem, quam *inaccessibilem habitat*, per ex-
tima luminum theatra paulatim de-
duceretur? Hinc suspicor, eam tunc
quoq; abijisse ultra cælum Lunæ, saga-
ciq; oculo lustrâsse illum orbem,
quando Apocalyptica Aquila, super-
nas faces intueri assueta, vidit *lunam*

(a) *Apocal. sub pedibus ejus.* (a) Hinc infero, Regium
6. 12. Psalten & Prophetam verissimè præ-

nuntiasse: Deum *in sole posuisse taberna-*
(b) *Pf. 18. culum suum*, (b) ejusdemque fulgori-
bus amictam postea ac visam mulie-

rem, (c) quando Maria solis regio-
(c) *Apocal. ibid.* nem ingressa eundem longè profun-
diùs speculata est, quàm quiscunque
docta ecstasi in illum defixus, aut
maculoso; seu nimio lucis turbine
perstrictus. Hinc arguo, facili men-
te pervagatam fuisse illius, quem

Martem

Martem indigitant, Planetæ Domum,
 atque inde *terribi em ut castrorum aciem*
ordinatam (a) in prælia providisse. Hinc (a) *Cantic.*
 colligo progressam ulterius immis- *c. 6.*
 se in ipsas stellas ingeniosum caput,
 suum, quia cuidam contentis subin-
 de oculis intuenti refulsit *corona stella-*
rum duodecim in capite ejus. (b) Hinc au- (b) *Apocal.*
 tumo, neminem melius evolvere *ibid.*
 potuisse Zodiaci signa, neque con-
 gruentius differere de regum ductri-
 ce, ac moderatrice stellâ, quæ orta
 est ex Jacob; (c) num scilicet è vi- (c) *Num.*
 scosis putrescentis terræ vaporibus, *c. 24.*
 enata, vel ex compactis stellarum
 corporibus composita, vel aliunde
 à *Patre luminum* in Filij sui nativitate
 fuerit accensa. Hinc denique con-
 tendo, neque Magnum Dionysium
 Areopagitam, aut majores illo Astro-
 logos aptiore conceptu repræsentas-
 se; quomodo, moriente DEO, nun-
 quam aliàs visa solis meridiani defe-
 ctio terram tenebris & atra caligine
 induerit, quàm conceperit MARIA,
 quæ semper aliàs in concipienda *Ve-*
ritate felicissima extitit, & cui hæc

omnia suis temporibus vel in gaudium, vel in solatium perspecta esse, concedebat; multumque proficiebat. Ut nullus jam dubitem, copiosos exinde noctam fuisse tam variae pietatis proventus, quibus abundantius communita ad meritorum apicem per vias multiplices procurrebat. Ex creati enim solis consideratione abierit in contemplationem *Solis Justitiae*, in quo cum nullas inveniret maculas Virgo sine macula, tota abrepta fuit ejus pulchritudine. Dum *pulchra ut luna*, per indaginem, non tam oculorum, quam profundae mentis, exploraret lunarem orbem, notarétque in cursu suo fidus esse celerissimum; incitaverit se se, simulque exultaverit ad currendam viam amplissimae sanctitatis, potenter interrim in clientes suos influens, ut, quam plurimos haberet sui sequaces, seu lunaticos. Ex ordinario velati seu opacati solis deliquio occurrere poterat, & occurrisse vix dubito, se quoque virgineo utero totum aliquando velasse, ac contexisse Justitiae solem,

solem, ideóque admirandam, atque
 ab omni retro æternitate nunquam
 visam, eclipsim confecisse. Per reli-
 quas in firmamento succensas faces
 cluctata fuerit ad *Lumen gloriae*, æternæ
 illi beatitatis luci se penitus immer-
 sura, quæ quidem in umbra mortis
 nunquam, in spontaneæ tamen pro-
 fundissimæque humilitatis tenebris
 plerumque latitabat. Ex veteri de-
 mum sæpiusque inspecto solis circulo
 novum sibi tunc combinârit Zodiā-
 cum, quando cælum se se in terram
 effudit, & in adulta nocte Solem æter-
 num, per nubem humanæ carnis re-
 fulgentem, secuta sunt non tantum
 multitudo militiæ cœlestis; sed ipsa
 quoque sidera, lucem suam in terris
 mutuatura. Ibi Filia Solis, Maria
 vidit *Geminas* in unam personam coa-
 luisse naturas; agnovit, se Matrem
 Numinis esse simulque *Virginem*; ad-
 vertit per Agnum Dei, qui tollit pec-
 cata mundi, repræsentari *Arietem*; con-
 spexit ad cunas cornibus onustum
Taurum; indoluit duris exerceri, ac
 indurescere *Leonem* de tribu Juda;

deprehendit Deum à majestate sua
 tantisper retrocessisse velut *Cancrum*;
 adoravit quiescētem super sceno, qui
 salit à montibus æternis, *Capreolum*;
 notavit dulcium lacrymarum imbre
 inundare *Aquarium*; intuita est ja-
 centem in præsepio, *Pisciculorum* in-
 star, Infantem; ingemuit rigidam
 ad divinæ justitiæ *Libram* exigi pro
 peccatis nostris satisfactionem; sen-
 sit nata salute infirmari, qui nos in
 parentibus intoxicarat, *Scorpium*;
 spectavit denique divinum *Sagittarium*
 quaquaversum jacere sagittas, ut
 amore sui vulneraret mortales uni-
 versos. O verè ingeniosam Mathe-
 ses Magistram! O sedulam piēque
 operosam apiculam, quæ ex obvia-
 rerum creatarum scena mella suxit,
 dulcissimæ devotionis! Decernite,
 proinde, AA. humanissimi, decerni-
 te, obsecro, an non Mariano zelo
 castigandi sint, qui vel audacter ne-
 gant, vel meticulosè dubitant, num
 ad reliquam gratiarum abundanti-
 am Deus Matri suæ hanc sufflam-
 mandæ pietatis materiam addiderit;
 illi

illi verò deprædicandi, qui prono intellectûs obsequio in nostram sententiam abeunt, & thesauris ejus existimant aliquid defuturum fuisse, si in liberali donorum suorum effusione perfectâ mathematicum scientiâ MARIAM non donâisset. Decrevistis? Sic mihi de vobis persuadeo, sic ego quoque decerno. Quare veniâ vestrâ, consensu vestro, auctoritate vestra, quâ possum sinceri cordis abundantia, vocis contentione, manuum plausu, totiûsque corporis latissimo gestu laudo, & prædico Marianos præcones omnes, simulque dignos pronuntio, quorum nomina quam primum, adhuc hodie, hâc horâ, hoc momento, per omnes Arithmeticæ numeros festivè multiplicentur, per mellitissimæ Musicæ sonos alacriter canantur, per ingeniosas Geometriæ formas & figuras artificiosè ducantur, & denique infamosis Architecturæ operibus, operum propylæis, laquearibus, atrijs fornicibus, scribantur, sculpantur, & legantur. Legentur non dubito

ingentia nomina Bernardi, Alberti, Bonaventuræ, Antonini, Gersonis, Amadæi, & celeberrimorū Authorum, qui vel disertis verbis, vel involutis, sed facilè evolvendis, ratiocinijs comprobant, DEI Matrem celebrari oportere omnium Alpha Mathematicorum. Eorum dico, qui ingenuas Matheseos disciplinas non alio ingenij calore pertractant, quàm qui graves, & litterarum sobrietati deditos viros decet; non verò qui infructuoso studij temporisque impendio fucum, seu potius artis mendacia venditant. Semper enim exosos putabam illos, qui vel cum Archimede rerum mathematicarum, amoribus nimium abrepti, etiam in balneis, per ipsa unctorum corporum suorum balsama lineas ducunt; vel cum Thalete siderati ex astrorum aspectibus infallibiles futurorum rationes colligunt pro alijs, ad sua exitia fortunæve plerumque cæci; vel cum quibusdam ex Philosophorum Lyceis ad mechanicas opificum officinas transeunt, ibique non aureum Mer-

Mercurium ex metallis aut lapidibus, ubi non est; sed nobilissimam hominis partem, ingenium, ex cerebro suo extrahunt, atque in furnum fumumque emittunt, verè adusti fumosi que Mathematici.

Quales dum ego hîc averfor, summum extollo illos, qui nugivendulos hos, & inanium rerum sectatores veritate scientiæ confundunt, intemperiem temperantiâ castigant, levium ingeniorum libertatem gravitate comprimunt; & Philosophiam, sinceram, seu in ipso fundo à Deiparente haustam sapientibus propinant. Veneror viros magnos Clavium, Voëllum, Kepplerum, Grienbergerum, Ricciolum, Scheinerum, Adamum Schall, & Gregorium à S. Vincentio; suspicio miraculum temporis nostri Athanasium, qui in ipso mundi corde, Roma, plurimis cordi est; & quia scio, hujus & illorum mathemata Divæ Matri multis titulis esse devota, adeoque Mariana; capropter omnes alios adhortor, qui facultati huic operam suam addicunt,

dicunt , ut eorum exemplo néque in Superiorem , néque in inferiorem orbem cogitationes suas , sine præsidio Virginis unquam immittant. Hanc velim sequantur Magistram , ut diligentes discipuli ; hanc Patronam colant , ut devoti clientes : & non dubito, quin in hoc amænissimo studio insignes facturi sint progressus , atque hunc laboris fructum aliquando relaturi , ut post mensos vitæ suæ obtusos angulos , vel acutos triangulos , post extractas difficilis viæ lineas & recti-lineas , post evolutos errorum circulos , & semicirculos , post præteritam mundi hujus multifariam figuram , mors ultima linea rerum exactissimè fiat , & ab hac demum progrediantur ad magnum æternitatis circulum , in quo nostræ beatitudinis est punctum.

Dixi.

P R Æ

PRÆCONIUM.

Medicum creavit Altissimus. A Deo est enim omnis medela. Disciplina Medici exaltabit caput illius, Et in conspectu magnatorum collaudabitur. Altissimus creavit de terra medicamenta, Et vir prudens non abhorrebit illa. Ecclesiastici c. 38.

ORATIO VIII.

*MARIA, ad humani corporis sanitatem tuendam, morbosque profligandos erudita,
ideoque*

Magistra Medicinæ.

Ingentem morborum luem in humana corpora ex unico morsu defluxisse, à quo viventium parens suam, filiorumque suorum animas in arboris

arboris prohibitæ fructu per insignem audaciam momordit; testes sunt multiplices, bolum illum continuo ructantium stomachorum, nausæ, testes diffusi per membra sanguinis corruptelæ, testes articulorum nervorumque langviores, testes vertigines capitem, tormenta coxendicum, puncturæ laterum, dolores podagræ, æstus febrium, voracitates hecticæ, aquarum sub cute confluvia, & sexcenta infirmitatum genera, justissimo Dei judicio immissa in pœnam utrorumque parentis & liberorum. O morsum, tot sæculis insanabilem! O generis humani stragem, nullo verborum ambitu satis explicandam! O lutuosum posteris calum, ex tam amœna regione ac sanitatis aura in tam multiplices miseras cecidisse!

Atque hinc illæ lacrymæ. Sed quid aliud expectetis è valle lacrymarum? Hinc, inquam, illæ lacrymæ, quas in tantis ærumnarum fluctibus humana progenies per tot ætates ideo fortasse bibere coacta est, ut crudum illum
pomi

pomi bolum digereret, & inspiratum *Spiraculum vite* (a) non penitus suffocaret. Hinc illæ in vultu; totoque corpore prorumpentes sudoris guttæ; quia per *Sudoriferum* quoque haustam fructûs malignitatem conabatur homo propellere, dum in *sudore vultus* sui vescebatur pane. (b) Hinc breve illud, sed amarum, Saluberrimum tamen, *Recipe: Comedes herbam terræ*, (c) ut *Herbaria* quoque tanto malo medelam suam non negaret. Hinc illi lacrymarum inspersi sales ad prævertendam ulteriorem corruptionem; siquidem extractus de pomo succus in corpore parentum jam tunc fortè computruisset, & atra dein bile commixtus propagandum in posteris sanguinem magis corrupisset, quæ non exigua, teste Gregorio Nysseno, (d) gravium causa morborum à Medicinæ peritis solet assignari.

Quamquam quis arguat, quasi putrescentis humoris cum atra bile comixtio tantorum fuisset causa malorum; cum neque rationis, neque

autho-

(a) *Genes.*

c. 2.

(b) *Ibidem*

c. 3.

(c) *Ibidem*(d) *Orat. 2. de paup. a-
mandis.*

authoritatis alicujus pondus ullam præstet sic arguendi soliditatem. Quid si illa non inanis fuisset ratio, quòd infecto vigoris fonte, animâ, non potuerit sibi constare salubritas corporis; vel non decuerit infirmato per inobedientiam Spiritu, valere illam, de Damascena gleba formatam massam carneam? Nisi fortè jam abieritis in sententiam Senecæ,

(a) â capitis vigore membrorum san-
nitatem inferentis: tunc enim verò
necessè foret, eâdem ratione asserere,
quemadmodum â sano capite bonam,
ita ab insano valetudinem adversam
fuisse derivatam, postquam in uno generis
humani capite *semel insanivimus omnes*. Sed
mittamus indagatrices similibus cogitationes,
& in eos inquiramus, qui haustam
medicæ opis scientiam tot ægritudinibus
apprimè hætenus impertiverunt, ac præcipuâ
quadam dexteritate mortalium salutem subser-
vierunt. Revocemus evoluti temporis
spatia, examinemus sæcula, interrogemus
orbis regna, regnorum pro-

(a) Lib. 12.

de Clem. c. 2.

provinciās & civitates, ecquos aliquando habuerint ægrotantium curatores, adeo dignos, ut omnium oribus ac famâ circumferrentur? Dicent sine dubio Pargameni Medicos inter eloquentissimum, eloquentissimos inter acutissimum Galenum suum: dicent Persæ Galeno supparem Avicennam, quòd eum exaquarit curandi peritiâ, si non librorum à se scriptorum multitudine: dicent Romani Æsculapium *Salutem publicam*, eumque divinis celebrabunt honoribus: dicent Coi Hippocratem Medicorum clarissimum, à cujus ingenij jubare, ut dies à sole, Medicinæ scientia, tenebris jam pene sepulta, lucem mutuavit: dicent Græci Machaonem & Podalirium, maximos sanitatum vindices; qui, ut aliàs, ita ardente ad Troiam bello, militum sauciorum vulnera scitissimè persanârunt: dicent orientis Ecclesiæ Panegyristæ præcelluisse nobile par fratrum Cosmam & Damianum, quòd & corpora ex gravissima morborum pernicie, & vitas ex

P

præ-

præsentissimæ mortis periculo, & animas ex hiantis orci faucibus eripuerint : dicent alij, complures alios pellendarum ægritudinum fuisse peritissimos ; ego tamen nutu tuo, affectu tuo, ore tuo, O Excellentissima Facultas Medica, dicam tam verè, quàm confidenter, post natos mulierum (Filium Virginis excipio) in medendi scientia non fuisse præstantiorem Mariâ, ideóque & Galenos, & Æsculapios, & Hippocrates omnes Magisterij hujus laude antecessisse. Quod dum sentio, neminem quóque vestrûm dubitare, arbitror, AA. Deiparentis corpus, illud mundi miraculum, pulchritudinis epitome, dignûmque singulari animâ domicilium ita à naturæ benignitate fuisse præparatum ac formatum, utquam inter præcipuas corporis dotes numerarunt sanitatem Philosophi cum Platone(a), eandem illi non negaverit, sed liberali magnóque beneficio communicárit. Exaggerásse námque in ea venustatis omnigenæ decora ; formáse

(a) Plato
lib. 1. de
legibus.

se benignâ folertiq̃ue industria Virgineos artus; projecisse animi semina in oculos, majestatem in supercilia, candorem in frontem, ruborem in genas, cruorem in venas, robur in nervos, decentem agilitatem in membra, pulcherrimam denique Symetriad induxisse in corpus univ-
 versum; permisisse tamen in eo ægritudinem, seu ab intrinseca partium seditione discordiam, quam D. Nazianzenus (a) corporum vocat tyrannidem; quid aliud est, quàm reliquisse in veste purpurea tineam, in arboris folio erucam, in herba locustam, in semine formicam, scarabeum in rosarum liliorumq; areola?
 Aliter profectò senserunt Dionysius Carthusianus (b) & Sorbonæ cancellis præpositus Gerson, (c) quorum alter virgineo corpori *optimam* dabat *compaginem*; alter *omnem sanitatem, harmoniam, & temperantiâ complexionis* attribuebat. Aliter & nos opinari oportet, si consultum imus Deiparæ dignitati, quam Authores Sapientiâ non magis, quàm probitate

(a) Orat.
42.

(b) l. 2. de
Laud. B. V.
(c) Gerson
ser. de Conc.
B. V.

(a) *Suarez* conspicui (a) ex ingeniorum suorum
tom. 2. in 3. p. fecunditate differentes semper ad-
diss. 2. sec. 2. mirati, & vel ideo Virginem nullo
Galas. l. unquam morbo contemeratam cum
7. c. 10. alijs (b) sunt venerati. Sed quæri
Caiet: opusc. tamen posset, cui felicitas hæc, & ab
de Spasmo omni veræ ægritudinis molestia im-
Virg. munitas sit adscribenda? num con-
(b) Autho- tinuæ divinæ virtutis operationi,
res apud quâ Marianum corpus, viribus suis
Carthagen: fortasse impar, singulariter fuit con-
l. 13. bom. 4. servatum, & contra omnes morbo-
 rum, unde unde prorumpentium in-
 sultus defensum? Scio quidem, il-
 lam, de qua agimus, *totam dici miracu-*
 lum; (c) in eam tamen sententiam
 abire, severius prohibet præsens
 orationis materia. An tribuenda
 quatuor virtutum, seu principum
 qualitatum, humoris scilicet & fri-
 goris, siccitatis & caloris concordia,
 minimèque mutabili temperiei,
 quam in primo membrorum rudi-
 mento ad omnem futuram ætatem
 Deus æquavit semel, & stabilivit?
 Veneror Supremi Numinis manum,
 in Virginea illa molitione providè
 opera-

operatricem; ad causæ tamen meæ
 robur aliter loqui vestra sinet bene-
 volentia. An ministerijs obsequio-
 rum in salutem nostram cæli Spi-
 rituum, præsertim Raphaëlis, magni
sanitatum præsidis, (a) quibus ex impe- (a) *S. Hie-*
 rio Numinis, Matris incumbibat, *ron. in c. 8.*
 custodia, & ab omnis morbi conta- *Daniel.*
 gione præservatio? Suspicio etiam
 beatissimam illam, felicissimamque
 sanitatis ministram mentem, Rapha-
 ëlem, cæterosque de cælo Spiritus;
 inclinari tamen necdum possum, ut
 sententiæ huic subscribam, sinamque
 in angelorum laudem trahi, quod
 ipsam eorum Reginam singulariter
 exornat, atque commendat. Non
 enim licere videtur, debitum lauda-
 tionis splendorem derogare Domi-
 næ, ut domestici ejus, jam ante lau-
 dum duplicibus vestiti, magis illu-
 strentur. Et injuriam non levem
 existimo, suis titulis heram exuere,
 ut iisdem fervos & ministros conve-
 stiamus. Suum cuique decernen-
 dum est encomium, ut ad reliquas
 quoque panegyres Excellentissima

Medica audiat Dei Mater. Enim-
 verò quid dicere vetat, eam ideo sa-
 nissimo semper constituisse corpore,
 quia perfectissima Archiatra non
 magis scivit corrupta morbis alio-
 rum corpora Pharmaceuticæ medi-
 catu curare, quàm in proprio, per
 alteram primam artis medicæ par-
 tem Prophylacticen, observato com-
 plexionis temperamento, præsen-
 tire, & imminentes ex insidijs ægri-
 tudines antevertere? Reliquarum
 scientiarum flumina ex æternæ Sa-
 pientiæ oceano in eam derivata fuis-
 se ad eximium ornamentum, & non
 etiam Medicæ disciplinæ brachium
 se eò extendisse putabimus? Quor-
 sum illa herbarum, stirpium, fructu-
 um, escarum, animalium, metallo-
 rum, lapidum, & rerum vel medendi,
 vel nocendi virtute pollentium co-
 gnitio, quam eminentem in Virgine
 propugnant Interpretes, (a) robo-
 rant SS. Patres? (b) Quorsum no-
 bilis illa notitia, quâ tam varios
 quàm constantes in hac inferiora
 influxus, & aeris illi nocui, huic pro-
 ficui

(a) *Christoph.*
Viega in
Theol. Ma-
riana.

(b) *Albert.*
Magnus
trac: super
Missus. &
alijs apud
Carthagen.

ficuti vicissitudinem perspicuè discernebat , quàmque in illa excellentem fuisse sentiunt Marianorum decorum Commentatores ? An cogitabimus istis Medicæ Scientiæ luminibus instructam Virginem in solis speculationibus fixisse mentem , & non ijs etiam præluxisse seu sibi ad conservandam , seu alijs ad procurandam corporum sanitatem & incolumitatem ? Profectò si animos nostros alia tenet ratiocinatio , Patronæ placitis non respondemus cli-
entes ; & Deum aliquid fecisse , negamus ingrati , quo & ipse gloriari , & Matrem suam amplius commendare , & humano generi abundantius prodesse potuit , ac voluit perlibenter. Scimus enim verò ex Anselmo

(a) Sanctissimo Oratore, hoc de Sancta Virgine prædicari , quòd , quia Mater Dei est , excedat omnem altitudinem , quæ post Deum dici , vel cogitari potest : scimus hac dignitate Matris eò fuisse subve-
ctam , ut dici possit Affinis æterni Patris , Consanguinea Verbi , & Sponsa Spiritus Sancti : scimus etiam in ex-

(a) S. Ansel. de excell. Virg: c. 2.

ornanda Genitrice sua Filium ita laborasse, ut eam ex communi hominum conditione extractam constituerit Deo vicinam, feceritque quodammodo divinam, juxta effatum illud Guarrici (a) *Comunicasti mihi quod homo sum, communicabo tibi, quod Deus sum*: quomodo proinde ambigemus, an ei recluserit arcana Medicinæ, cuius ope, depositis, & jam pene extinctis mortalium corporibus reduces quandoque vitæ infunduntur, quod divinum potius, quam humanum opus esse, perhibuit antiquitas? *Æsculapij, Podalirij, Machaones, alijque putida quadam adulatione in Deorum aut divinarum prolium, numerum relati fuerint, quod hac peritiâ illustres compluribus desperatam reddiderint vitam, & nos tam facilem commendationis materiam subtrahemus DEI Matri? Hippocrati, quod inter Græcos medendi peritiâ excelleret, Athenienses Eleusinis Sacris, proximam ab Hercule, venerationem detulerint, hominemque quasi Deum coluerint; & nos, quem*

(a) Apud F.
Men. 107. 10
Virid. l. 2.
problem.

quem citra erroris periculum dare possumus, D E I Matri negabimus honorem? In Gallorum Anglorumque reges hoc suum beneficium gratis profuderit Deus, ut à sola curatione strumarum principes divini celebrarentur ab historicis; & Matri suæ illam scientiam non communicarit, unde divinæ, hoc est, Excellentissimæ titulum potuit adipisci? O quàm mallem potius credere, nullam creaturis omnibus à DEO inditam sublimis excellentiæ materiam, quàm hanc denegatam fuisse MARIÆ! Sed pergamus tamen argue-
re, ut ad cætera Mariani honoris insignia hoc quoque explicemus, non ut aliqui putant, affingamus; homo siquidem eorum decorum accessionem facere nequit, quæ Deus ipse jam pridem contulit profusâ in Dilectam liberalitate. Memineritis sine dubio, AA. divinis litteris memoriam vobis refricantibus, mundi conditorem Deum, posteaquam primum terræ dominum ex argilla vilique limo, ad imaginem sui, pol-

hæc divino efformârat, dixisse : *Faci-*
 (a) *Gen. 2.2. mus ei adjutorium simile sibi* ; (a) memi-
 neritis etiam, eo fine originalis justi-
 tiæ ac sanctitatis dono illud exornâsse ;
 ut umbra quædam evaderet me-
 lioris Evæ , quæ Adamo secundo in
 nostræ redemptionis ac salutis adju-
 torium ambabus omnipotentia fa-
 pientiaque manibus est fabricata ;
 memineritis præterea mulierem il-
 lam nihilominus excussisse sanctita-
 tem, profligâsse vitæ integritatem,
 violâsse Supremi Numinis imperi-
 um, invasisse prohibitam arborem,
 decerpisse fructum, & per infandam
 deliberati animi intemperantiam
 posterorum sanitatem cum multero-
 so conjuge suo degulâsse, tantorum-
 que malorum, de quibus orationis
 initio, fuisse cooperatricem. Potuit
 igitur prima parens Eva concurrere
 ad perdendam humani generis feli-
 citatem ac sanitatem ; & non po-
 tuerit secunda ac beatior Eva Maria
 cooperari ad eandem recuperan-
 dam, artèque medica stabiliendam ?
 Potuit illa ex unius arboris fructu
 pe-

pestiferæ labis succum trahere, illó-
que propinato nos ita corrumpere,
ut nihil integrum usquam, nihil sin-
cerum, nihil non communi clade,
noxæque depravatum maneret; &
non potuerit ista ex benedicto fructu
ventris sui habere pharmacum, quo
nos lethalis, ac miserrimi morbi vio-
lentiâ contabescentes ad pristinum
reduceret vigorem? O quàm ine-
ptus, quàm durus sum ad fidei hu-
manæ obsequium hîc denegandum!
quàm pronus & facilis ad MARIÆ
dotem ac gloriam propugnandam!
Ecquid mirum? existimo namque
non tam affectu filiali propellente,
quàm luculento sanioris intellectus
lumine illustrante, ita quemlibet
sentire, neminem dubitare oportere;
cùm præsertim constet, Joannem
ab ipsa vitiata radice infirmum, men-
te languidum, & angustiis mortali-
tatis adhuc laborantem ex illo salu-
berrimo fructu respirasse, exultasse.

Libenter proinde cum Tertulliano,
(a) Arnaldo Carnotensi, (b) & Mel-
lifuo Bernardo (c) Mariam recito

verum

(a) Tertul.

l. 2. contra

Marc c. 4.

(b) Tract. de

laud. B. V.

(c) S. Bern.

hom: 2. super

Missus.

verum secundi Adami, hoc est, Christi adjutorium, quamvis ex eodem Beato Arnaldo non ignorem, *Jesum alieno adjutorio non indiguisse, qui dixit : factus sum sicut homo sine adjutorio inter mortuos liber.* Imò ausim calientissimis Dionysij Richelij vestigijs fidenter, insistere, similique Laconismo asserere: *Quemadmodum vir non sine cooperante femina mundum infirmavit, sic nec absque contumace muliere vir mundum restabilivit.* (a) Ubi denuo memoriam subit infelix pariter ac felix illud sæculum, quo è regalibus sedibus venientem Deum Virgineo excepit, reddiditque utero Maria. Tunc enim, tunc (loquor cum S. Augustino) *Magnus de cælo venit Medicus, quia magnus per orbem terræ jacebat agrotus.* (b) Fatigatis nisibus luctabatur, tunc humana progenies cum continua infirmitatum serie; curis anxia, doloribus exhausta, ærumnis obruta, luctibus oppressa expectabat nobilissimum, qui morbis mederetur, Archiatrum, & eundem, novem mensum intercapedine, felicissimè demum

(a) l. 2. de
præcon. &
dign. B. V.
ar. 9.

(b) S. Aug.
serm. 9. de
verbis Apost.

mum obtinuit. Cùm enim gentium
 imperatrix Roma, ex effreni domi-
 natûs sui arrogantia, singula subdi-
 torum recenseret capita, nimium
 quantum insanientia, ex Nazareth,
 civitate florea in Bethleem ascendit
 Radix Jesse Maria, ibique beatissimo
 partu saluberrimum florem (Arbo-
 rem vitæ dicere malunt alij) filium
 suum primogenitum protulit, qui,
 ut eloquentissimus nonnemo asserit,
 in patentissimis campis optimi Me-
 dici daturus specimen, statim cæpit
 ipse infirmitates nostras portare.
 Hinc quia sanguis noster in eo nimi-
 um infirmus erat, septima post na-
 tivitatem die sanguinem mittendum
 censuit, ut ex arcanis Chirurgiæ lu-
 culenter proderet, quod Hippocra-
 tes, & Galenus pridem docuere: *In*
acutis morbis, si ætas floruerit, utendum esse
phlebotomiâ. Ulterius dein cum ætate
 progressus ulteriora dedit artis ex-
 perimenta, quia nunquam remitte-
 bat â curatione corporum, quamvis
 mercaturæ intenderet animorum.
 Secedens enim in partes Tyri & Si-
 donis

- donis reddidit filiæ salutem corporis; matris verò in fide sanavit animam. (a) Vocatus à Centurione, quam rogabatur sanitatem, imperijt servo; & cœli luce destitutam mentem illustravit domini. (b) Ascendens Hierosolymam apud pecuariam (c) piscinam, sub porticu, succurrit annosæ calamitati, & interrogationis argutiâ vecordiam sustulit voluntati. Intendens medicæ charitatis iter obvios subinde habuit decem leprosos, quos omnes corporis valetudine munditiæque donatos dimisit; & felicitis curationis gloriam ab alienigena extorsit. (d) Pertransiens Judæam, Gallilæam, & Samariam cæcis visum, surdis auditum, claudis rectitudinem, mutis verborum copiam, languentibus robur, aridis succum, paralyticis membrorum vigorem largitus; & temporalem impensi beneficii mercedem nullam expetivit. Adeo liberalis fuit, hic sanitatum baiulus! adeo gnarus & peritus Medicus, ut etiam pertransiens nesciret transire morbosos,
- ac

(a) *Matt: 15.*
Mar: c. 7.

(b) *Matt:*
c. 8. Luc.
c. 7.

(c) *S. Hieron.*
in Comment.

(d) *Luc.*
c. 17.

ac ærumnosos, quin optatissimo
successu curaret.

Jam quis ambigat prudentissimam
Matrem, cum hoc Doctore annis
compluribus versatam, familiari ejus
consuetudine communicasse quàm
plurima, quibus felicissimum inge-
nium amplius exornaretur? Alijs
Medicæ artis discipulis concedent,
nonnulli, si peracto tirocinio, ex Pro-
fessoris cujusdam eruditissima domo
ad procurandam corporum huma-
norum salutem dimittantur, eos
velut alteros Hippocrates è templo
Æsculapij venire medendi scientiâ
tumidos; nos inficiabimur Matrem
Virginem, quæ non tantum è domo,
institutione, usu, frequentissimoque
complexu Filij sui prodijt, ita edo-
ctam, ut saluberrimam ægrotis me-
dicinam posset adhibere? Neget ta-
men, qui audet: mihi profectò vo-
luntarius hic erit semper credendi
articulus, Partheno-Matrem *Excellen-
tissimam* fuisse, adeoque Medicam me-
dicorum. Neque opinor ullum, in
hanc saltem lectissimam Auditorum
coro-

coronam, implexum esse, cui veniret in mentem de tam pulchro articulo dubitare, taceo resilire. Quis enim medicam neget, quæ ut febrilem ac tabificam ægritudinem vel anteverteret sibi, vel amoveret alijs, caput contrivit serpentis illius, ex cujus venenato sibilo tota malorum Ilias profluxit? Quis medicam neget, quæ, velut balsamum aromatizans, odorem sparsit fragrantissimum, quo vel infirmorû, deliquia patientium, vires à fuga revocaret, vel diffusam ab ipsius colubris malignitatem pestis felicius enervaret? Quis medicam neget, quæ talia robustæ veneni potentia adhibere nôrat antidota, ut illæso pede, reliquoque corpore, super aspidem & basiliscum ambularet, & conculcasset leonem & draconem? Quis medicam neget, quæ blandè tractandorum ægrotantium perita, cum in primo generis nostri capite dolorem longævum pateremur, alterum ejusdem generis Caput, infirmitatum nostrarum baiulum, panneis vinculis molliter colligavit? Quis

Quis Medicam neget, quæ ut com-
mansum in paradiso fructum, illum
insalubrem, crudum, & ob immatu-
ritatem digestu difficilem bolû con-
coqueremus, benedictum fructum
ventris sui adeo subtiliter tempera-
vit, ut eum in alexipharmacum non
daret sine *Unione cum Verbo*, quòd sci-
ret à pretiosè medentibus medicinas
quandoque confici unione? Quis
Medicam neget, quæ prudenter me-
dicèq; considerans provectam mun-
di ægrotantis ætatem, ut conveni-
ens adhiberet remedium oñidui Fil-
lij sui propinavit sanguinem ad ro-
bur novum? Est enim svadente
Marfilio Ficino (a) singulare, & di- (a) *Marfil-*
ctante Lessio (b) licitum omnino me- *F. de sanit.*
dicamen: bullientem, ac è teneris *tuenda.*
adolescentum venis detractum, po- (b) *Less de*
tare sanguinem, ad conciliandum *Iure & Iust.*
senili corpori vigorem. Ite nunc ar- *l. 4. c. 3. d. 2.*
rogantia Medicorum agmina; ite,
& ad gloriæ vestræ tumorem jactate
artem modúmque medendi; efferte
vos supra humanæ conditionis fasti-
gium; ambite divinis compellari
Q titu-

titulis, quia curandis morbis divinas, judicio vestro, reperistis medicinas; vocate alexipharmaca vestra cum Philone Medico *Deorum manus*; insignite compositiones vestras cum alijs Archiattris *Manus Christi*, cum alijs *Apostolicon*, cum alijs *Gratiam Dei*, cum alijs *Antidotum Paulinum*: una nostra Medicinæ Magistra unum interim dabit, quamvis alia non ignoret, morborum remediū efficacissimum, sanctissimum, divinissimum, *JESU CHRISTI carnem & sanguinem*. Prescribite infirmis vestris delicatarum benéque coctarum carniū delicatas; una curatrix nostra porriget, *Medicinam omnium in festinatione nebule*, (a) hoc est, de carne Christi, (b) quæ de terra virginali exorta, nullo peccati pondere pregravata, ultra puritatem angelorum elevata, calore Spiritus Sancti formata, igne excessivi amoris in ultima cena est excocta. Qua unâ quidquid ægritudinum vel ingeniosa hominum imaginatione, vel audaci fingendi licentiâ excogitari potest, felicissimo sanitatis & immortalitatis eventu dispellet,

(a) *Eecl.*

c. 43.

(b) *S. Antonin.* 4.

par. tit. 15.

c. 19. §. 6.

let, curabit, restaurabit. Quapropter non miror jam venerandam SS. Patrum eloquentiam, quâ excellentibus titulis ac nominibus ad eum sublimitatis apicem Magistrum extollunt, unde Medicorum omnium audit verè Excellentissima. Impenditur nimirum illi decorum magnificentia, cui suffragium confert nobilissimæ artis præstantia. Non possunt non ab ea animari oracula & voces Ecclesiæ purissimæ, quibus non solum Spiritus, sed insuper Spiritus vitæ liberaliter infunditur. Joanni Damasceno jam est Pelagus curationum

(a) jam Fons universo orbi medicinam offerens; (b) Joanni Geometræ est mæronum medicina, (c) Alberto Magno Umbraculum egrotantium, (d) Richardo à S. Laurentio (e) Unguentaria pyxis ad curandos hominum morbos, Germano Constantinopolitano Archiepiscopo (f) Debilitatis suæ potentia, & insanabilium vulnorum Medica, universæ denique Ecclesiæ (g) vocalissimè canitur Salus infirmorum. Vultis plura? Sanctus Ephrem eam celebrat alicubi doctri-

(a) S. Da-

mas. or. 2.

de dorm:

B. V.

(b) Orat: 3.

de Aff:

(c) Hym: 1.

(d) Tract:

super Missus.

(e) Lib. 10.

de laud. B. V.

(f) Orat: de

praesent: B. V.

(g) In Li-

can: Lant:

- cem, quæ mæiores sedat, oppressorum molestias lenit, aufert oppressiones : S. Bonaventura eam suspicit, quòd illius tactu lenissimo sanentur infirmi, ejus odore roseo mortui reviviscant : (a) S. Amadæus agnoscit Medicam, quæ non solum animarum saluti, verum etiam humanorum corporum sanitati piâ diligentia providet, & medetur : (b) Eruditissimus Cæsarius (c) apud ipsam, quæ hortus est aromatum, habet electuaria confortativa, unguenta sanativa, herbas & radices saluberrimas : alij cum S. Mèthodo (d) passis anhelantibusque faucibus concurrunt ad eam, veluti ad Bethleemiticam cisternam, quam vitæ refocillatricem desideravit David ; ex qua sitientibus manavit poculum immortalitatis ; non illud quidem Helenæ, quo desperatis prope corporibus sanitatem ac vitam Superstitiosa propinavit antiquitas ; sed in quod expressus Botrus Cypri omnibus prostat ad salutem, imò, cum nonnulli liberaliore sanentur, haustu, ad insignem ebrietatem. O igitur Archiatram inter omnes Excellentissimam ! O dexteram morborum

(a) S. Bonaventura in Psal. 13.

(b) Hom. 8. de laud. B. V.

(c) Lib. 7. Mirac. c. 1.

(d) Orat. in Hypapan.

borum ac vulnerum nostrorum curatricem ! O misericordem ægrotantium Patronam ! O ingens afflictorum solatium ! O fecundam vitæ parentem ! O denique totius generis humani *Publicam Salutem* ! Qualem dum ego hodie veneror , talem quoque animis vestris propositam volo, Peritissimi Sanitatis Vindices, ut eam non tantum Excellentissimæ Facultatis vestræ honoretis Magistram, soli Filio secundam ; sed insuper in hac sola futuris sæculis gloriæ vestræ ponatis præsidium. Primum à vobis jure quodam exigit ejus medendi singularis scientia, curandiq; dexteritas ; secundum rependi postulant collata in vos beneficia , & toties porrectum *Immortalitatis pharmacum* ,

(a) quod de carne, suoque sanguine, (a) *In Litani: de Venerab.*
 ipsa confecit, & quo, teste S. Antonio, (b) *in anima & corpore sanati sumus.* (b) *4. par. tit: 15. c. 19.*
 Magna profectò ingrati animi foret

nota ; si qua referendi facultate pollemus , non referremus conferenti. Suâ mercede non volunt destitui Medici ; suâ gloriâ privari non

debet eorum Magistra. Agnoscimus, amplissimis honoribus, largissimis stipendijs, opimis muneribus ex æquo donatos esse celeberrimos inferioris hominis curatores; de facunda commendationis mercede, Supremæ in utroque homine Sospiatrici deferendâ, non hæsitamus. Permittimus illos quandoque suscipi, quos discere ex periculis nostris, & experimenta per mortes agere, ait Plinius; ditamus, quos, quia sol eorum successus intuetur, errores autem tellus operit, felices appellat Nicocles; sustentamus, quos, cum non sinant infirmos computrescere, sed statim è vita liberent, optimos censet Pausanias: de debito Principis Medicorum titulo, quo compellari meretur providentissima, & nulli errori obnoxia malorum Curatrix MARIA, non deliberemus. Pergite proinde Excellentissimi Domini Medici, afflictorum solatia, salutis nostræ fulcra, & totius generis humani vigilantissimi conservatores; pergite, inquam, Magistram Vestram, quanto

quanto potestis devenerari affectu;
 & si ad gloriam ac dignitatem Col-
 legij vestri putatis aliquando fuisse
 Beatissimos Ecclesiæ Patres Christi-
 que Vicarios, potentes provinciarum
 principes, serenissimos terrarum re-
 ges, augustissimos gentium ac natio-
 num Monarchas, eò quòd medendi
 facultatem præclare tenuerint, ac
 exercuerint; dicite disertissimè, ja-
 ctate fusissimè, vos summum gloriæ
 verticem attigisse in hac Magistra,
 quæ principum, regum, cæsarum,
 ipsiusque Dei Mater est; aut ego di-
 cam brevissimè: *Gloria vestra nihil est.*

—✠—✠—✠—✠—✠—✠—✠—✠—✠—✠—✠—✠—

PRÆCONIUM.

ADvocati, gloriosa vocis
 confisi munimine, lapsa
 erigunt, fatigata reparant, non
 minus provident humano ge-
 neri, quàm si clypeis & thora-
 cibus se se, patriamque defen-
 dant.

dant. B. Petr. Dam. ser: de
Resur. D.

ORATIO. IX.

*MARIA, justi & iniqui
scientiâ Clarissima, generisq̃ue
humani Advocata,
ideòque*

Magistra Jurisprudentiæ.

Etsi Clarissima Jurisperitorum
Collegia divos Germanum Pa-
risiensem, & Lipardum Leonardi
fratrem; Juonem Britannum, & Am-
brosium Mediolani Praesulem facul-
tatis suæ Magistros pridem delege-
rint, singularique Sacrorum celebri-
tate ideo coluerint, quòd in eo per-
fectionis apice aliquando constitis-
sent, unde altissimam juris scientiam
cum eximia virtute, litigia cum mi-
titate, dignitates cum modestia,
summos honores cum Sanctitate,
divitias cum liberalitate puschrâ
conjungerent unione: quia tamen
etiam dubitari vix potest, illa magna
juris

juris miracula, & pauperum defensores ab ijs ita honorari, ut alium Magistrum, Magistrámve venerentur impensius, cujus transfusæ in discipulos artes longè majorem æstimationem fortiantur; exinde confido, futurum, ut apud illos perorem facilius in ea causa, qua Deiparentem supra vertices aliorum collorare intendo, eamque Consultorum Consultissimam prædicare. Dabitis proinde veniam integerrimæ Vindices æquitatis, ut dum vos Divos Tutelares, aut Parentes vestros dicitis provinciarum columnas; ego Mariam audeam appellare basim, cui tota molis pulchritudo superincumbit: dum vos consiliorum vitam in illis agnoscitis; ego hanc propugnem esse animam, à qua non tantum privatorum animantur consilia, verum etiam *Corpus juris* universum: dum illos Scientiarum vocatis nucleos; ego hanc asseram esse saporem, quo imbuti & palatis Judicium gustum acuant, & causis clientum condimentum faciant: dum in illos

Q5

tan-

tanquam in tribunalium lumina intenditis, ego in Maria, luminum illorum parente, oculos meos penitus consumam: dum illos constituitis vigiles aularum curiarumque oculos; ego pupillam observem Mariam, sine qua etiam apertis cæteris quin oculis cæcutirent.

Enim verò si magnificas illas titulorum voces ideo Magistris vestris attribuitis, quia tanta Jurisprudentiæ laude claruerunt, ut non solum mortales è litigijs ad trāquillitatem dexterrimè reduxerint; verum etiam integra regna & provincias ita exornârint, ut in curijs haberent Senatores, in aulis ministros, in consilijs oracula in tribunalibus præfides, in foris judices, & judices quidem instructissimos; cur non majoribus compellaretur nominibus Maria, quæ in Jurium scientia tanto fuit præstantior, quanto diviniore regulâ illa novit conformare? Adeste animis, AA, quos expertus sum benevolentissimos, & quid ponderis adferam ad causæ hujus momētum, quid

quid gravitatis ad dignitatem, quid
luminis ad veritatem, excipite, pon-
derate. Existimo quidem necesse,
non esse, ad defendendam extollen-
dâque Mariæ præstantiam eos pro-
vocare, qui Sanctissima voluntatum
promptitudine Advocatæ nostræ
semper sunt Advocati; quia tamen
etiam ultro currentes, certantésque
in stadio Stadiodromi amicos ad-
mittunt stimulos, amântque pro-
pelli tanto fortius, quanto arden-
tius ad desideriorum metam pro-
volant; idcirco placuit animos ve-
stros, in sententiam meam alias pro-
nissimos, amplius animare, ut & de-
siderijs vestris obtemperem, & affe-
ctui meo faciam satis. Exurge igitur
anime, ac in hac materiæ maje-
state, vires tuas eò potentius exere,
quo magis illa te percellere, terroré-
que percussum in verborum angus-
tias compingere velle videtur. Exur-
ge anime! & Marianis succendere
ignibus, ut corde succenso sufflam-
mentur affectus, ex affectibus inca-
lescat lingua, calente linguâ prorum-
pant

pant verba , prorumpentibus verbis
 Justitiæ Magistræ , Matrem & Vir-
 ginem , sive veram Astræam , si non
 ad vivum exprimere , saltem conatu
 aliquo possim adumbrare. Tu verò
 O Diva, inter divos Justinianos Cla-
 rissima , da mihi radium aliquem de
 Splendoribus tuis , quibus induta
 speciosissimum tui facis aspectum ; &
 ego cum Viris Clarissimis agendo,
 nihil de te loquar obscure , sed cla-
 rissimè felicissimèque perorabo.

Primus mortalium parens , & ju-
 rium arbiter Adamus, ea quidem re-
 rum omnium cognitione fuerat il-
 lustratus , ut quidquid bonitatis
 continebatur in singulis, perspicaci
 mentè complecteretur , quamdiu a-
 manissimæ regionis Dominus, in ab-
 stinentia unius arboris, Supremi Le-
 gislatoris auctoritatem veneraba-
 tur : quia tamen divinæ legis imme-
 mor , nec contentus scientiâ boni,
 ex deliberatæ voluntatis libidine
 malum cum bono miscere, ac utrûm-
 que nefanda curiositate cognoscere
 præsumpsit, suam non tantum po-
 stero-

sterorúmque animas in vetitæ arboris fructu crudeliter sauciavit ; verum etiam in deflendas insipientiæ tenebras , quæ atratorum dierum & ærumnosarum horarum genitrices , fuere , infeliciter deturbavit. Vileſcebat exinde , malo unius exemplo , divinæ legis reverentia ; exulabat vindicis iuſtitie metus ; tumultuabatur privatorum dominiorum iniquitas ; prostituēbatur fidei contractæ integritas ; omnis rerum creatarum harmonia & æquitas ex paradiso pariter & orbe universo in cælum viſa eſt abiſſe. O quanta , quàmque miſerabilis tunc confuſio , uno Juſtitie tenore non amplius ſonante , vel diſſonante ! Quantus animorum tremor , & ipſius etiam capitis noſtri horripilatio , uno Juſtitie lumine ſublato ! Palpabamus in condensa cæcæ mentis caligine , candidæque veritatis face deſtituti ubique impingebamus , quia blandientis primævæ matris palpo nimis incautè ſeduci amabamus. Sedentes in tenebris , & umbra mortis , nullum

- (a) *Luc. c. i.* lum vitæ prodebamus colorem, (a) quia Dei viventis, perque paradysum deambulantis, meridianum lumen cum protoparente fugeramus. *Que-*
rebamur plenis sæculorum periodis: *Justitie lumen non lucet nobis, & sol intelli-*
 (b) *Sap. c. 5.* *gentie nondum ortus est nobis.* (b) Turbati
 continuò cum Jerusalem, magna vo-
 torum sollicitudine præstolabamur,
donec egrederetur, ut Splendor justus ejus;
& salvator ejus, ut lampas, accenderetur, &
 (c) *Isa. c. 26.* *viderent gentes Justum suum;* (c) Sed
 veluti ferratis vectibus clausum,
 clausisque surdum auribus fuerat,
 cælum ad querelas & gemitus no-
 stros; quia dilexeramus *magis tene-*
 (d) *Ioan. c. 3.* *bras, quàm lucem.* (d) Donec tandem,
 O inexplicabilem Numinis benigni-
 tatem! discussis nubibus, refferatis-
 que cæli cardinibus *Sol Justitie* de cæ-
 (e) *Pf. 84.* lo prospexit, (e) & radios suos qua-
 quaversum diffundens, non solum
 potestates tenebrarum, sed multo-
 rum etiam latebras amantium ocu-
 los incredibiliter perstrinxit. Vix
 erat, qui tantos fulgores sustineret,
 nisi afflicto orbis nitidissimum illico
 spe-

speculum objecisset, in quod omnes
 Solis hujus radij excepti reflecterent
 super justos æquè ac injustos. Ec-
 quod Speculum fuisse arbitramini,
 AA? Fuit *Speculum Justitiæ Maria*. Er-
 go in Tenore Justitiæ canite, quot-
 quot estis vocalissimi Mariæ Canto-
 res: *Speculum Justitiæ Maria!* In hanc,
 utpote innocentissimam & ab omni,
 etiam originali, nævo immunem,
 Virginem recipi voluit, virginæque
 carnis nube circumdari, ut vel Con-
 sultissimi quique haberent *Corpus juris*,
 cui par non viderat orbis; vel ut
 hujus Speculi usu inauranda, non
 laudanda studia sua, quibus non-
 nulli distrahuntur, reformarent; vel
 denique nè volentium in illud sine-
 rè intendere ingeniorum acies hebe-
 taretur. Quod dum creditis AA. hu-
 manissimi, Mariam Jurisperitorum
 Magistræ obsequiosius honorate.
 Si enim Tribonianum doctissimum
 æquissimūque aulæ suæ moderato-
 rem Magisterij titulo condecoravit,
 Justinianus, quod adjunctâ Jurispe-
 ritorum operâ quoddam Juris cor-
 pus

pus condiderit, in magnum Rerum-
 pub: emolumentum; Si Æmilium
 Pampinianum, Domitium Vlpia-
 num, & Julium Paulum magistros
 veneratus est Alexander Severus Im-
 perator, quòd viderentur esse pleni
 oculis consiliorum, & Justitiæ ora-
 culis; si Superstitiosa antiquitas deo-
 rum instar eos coluit, qui vel leges
 tulissent; vel legum ænigmata dissol-
 vissent, vel jurium tricas extricâs-
 sent; cur non prudentissima Deipa-
 rens Jurisperitorum audiret Magi-
 stra, quæ divinæ Justitiæ corpus in
 tam pulchra distribuit membra; tam
 castis complexa est visceribus; tam
 capaci concepit intellectu; & quæ
 Apostolicum Christianæ Reipub: se-
 natum, primosque Legislatores in-
 structura erat in dubijs illustrandis,
 in Canonibus sanciendis, in difficul-
 tatibus enodandis? Dic age, O San-
 ctissime Apostolici Concilij Prin-
 ceps, & Canonum, ac legum omni-
 um in terris pro Christo Interpres,
 Petre, nunquid sæpius apud hanc
 dubiorum arbitram, velut à divinio-
 ris

ris Phæbi cortina oracula postulâsti,
quando pro majori claritate veteres
Decalogi leges ad Ecclesiæ novæ sta-
bilimentum erant explicandæ ; vel
ad novarum plantarum incremen-
tum condendæ *Novellæ* ; vel Judæo-
rum reprobatorum blasphemix, ac
insani Christianam veritatem impu-
gnantium tumultus retundendi ? (a) *(a) B. Ru-*
Nunquid etiam vos Incarnatæ Dei-
tatis præcones Joannes & Jacobus, *pert. in illud*
Andrea & Matthæe, Philippe & Par-
tholomæe, hoc veritatis ostium pul-
sâstis sæpius, hoc oraculum *Spiritus San-*
cti (b) in rebus dubijs consuluistis fre-
quentius ? *Quis dubitat ? Et nun-*
quid meliores (quia sacratiores)
vitæ rationes, agendorumque de-
creta excepistis, quàm quicunque,
sacrarum legum avidus, ab integer-
rimo legum conditore, nolo dicere,
quàm Numa Pompilius ab Egeria,
Zamolxis à Vesta, Solon à Miner-
va ? Ita mihi penitus persvadeo ; ita
ex SS. Patribus me docent Interpre-
tes ; ita pars mundi melior affirmat ;
ita nos sentire oportet omnes, nisi

R dege-

(a) B. Ru-
pert. in illud
Cant: Qua-
lis est dis-
cus suus.

(b) Idem
ibid.

degeneres à Mariana pietate animos
 velimus exhibere. Non enim potue-
 runt non leges, legumque interpre-
 tationes optimæ ab ea fieri, quæ à le-
 ge æterna, ab illa Sapientissima men-
 te Dei, omnia jubentis, aut vetantis
 gratiolè formata, vitio primorum
 parentum nunquam deformata, ni-
 tore primigeniæ Justitiæ nunquam
 destituta intelligentiæ lumen ad il-
 lustrandas leges humanas semper
 habuit meridianum; quæq; in Sacro-
 rum voluminum litteris versata,
 consilia ex Salomone, æquitatem ex
 Judicibus, gubernandi rationes ex
 Regibus, præceptionum interpreta-
 tiones ex Devteronomio & Exodo
 copiosè hausit. Nec de ea formari de-
 inceps poterant cogitationes aliæ,
 quàm quæ perfectissimam jurium
 tractandorum Magistram confice-
 rent, utpote quæ novarum legum
 ac universi juris Regulam, Christum,
 tanto tempore, tantæque attento-
 ne tractavit, veramque Justitiam,
 humana carne vestitam, diuturnum
 habuit Professore. Ab hoc, tan-
 quam

quam *magni consilij* angelo (a), didi- (a) *Isa. c. 9.*
cit communicare consilia; ab *Advo-*
cato (b) terminare litigia; â *Judice* (b) *1. Ioan.*
vivorum & mortuorum (c) dicere sen- *c. 2.*
tentiam; â contrahente, ac semet- (c) *Athor.*
ipsum pro nobis dante (d) ligare (d) *S. Paul.*
contractus; â consignante novum *ad Gal. c. 1.*
testamentum suo sanguine (e) con- (e) *S. Paul.*
dere testamenta; ab eo, cui in hæ- *1. ad Cor.*
reditatem datæ sunt omnes gentes, *c. 11.*
(f) tueri hæredes; â Filio denique, (f) *Pf. 2.*
quem Pater constituit *Dominum uni-*
versorum, (g) explicare *Dominium*. (g) *2. Mach.*
Ut nihil dicam de altero Legum Do- *c. 14.*
ctore, quem post gloriosum in cœlos
regressum generis humani Vindex
Matri copiosissimè erudiendæ substi-
tuit. Quis enim credat divinissimum
Spiritus, illum æterni consilij hali-
tum, â Potentia Patris afflatum, â
Sapientia Filij derivatum, dum rigi-
dam Mosaicarum sanctionum mul-
titudinem abrogaret, novâsque le-
ges non stylo ferreo, sed clementiæ
notis, (quæ benigni ac Sapientis Ma-
gistri est indoles) cordibus inureret
in flammis, evulgaret in sono, expli-

caret in linguis ; earundem legum perfectas cognitiones non communicâsse dilectissimæ suæ Sponsæ, quibus illustrata illustrare potuit alios, diciq̃ue doctissima ac celeberrima legum Interpres ? Quare mirandum jam non est, quòd facundissimi encomiastæ, cum religiosissimo Rupertò conspirantes, in censum Marianorum elogiorum referant illud :

(a) *Rup. Abb. l. 1. in Cant.*

MARIA *Legis magistra* ; (a) quòdque Joannes, verè Marianus Geometra, illam ex mensurâ æquitatis, & aureâ, ut quidam putant, eloquentiâ salu-

(b) *Hym. 4. de B. V.*

tet, *Jus civile dirimens lites* ; (b) Andreas

(c) *An. Cr. de Dorm. B. V.*

Cretensis (c) *Commune in terris & cælo propitiatorium* ; Seraphicus Doctor (d)

(d) *S. Bo. nav. in spec. Virg. c. 7.*

Consistorium & causarum Domum ; Jacobus

(e) *In Liturgia.*

Apostolus (e) *Justitiæ propugnaculum*. Illud mirarer potius, siqui devotissimo affectu Deiparam Virginem venerarentur Patronam, in

commune nostrum auxilium adeo semper inclinatam, ut liberaverit hostibus provincias, pepererit ducibus victorias, exemerit vinculis innocentes, extricaverit litibus intricatos ;

catos; æquitatis tamen scientiam in ea non adorarent. An potest de universo jurisperitorum collegio reperiri justissimus aliquis, qui gravissimis hisce diffidijs ad incorruptum justi Judicis tribunal accedat, causam clientis proponat, justitiæ sententiam imploret, ac impetret; causa interim æquitatem non penetret mente, non discernat judicio? An putabis eò erroris prolapsam fuisse causidicam nostram, ut ignoraret, coram quo iudice causam diceret, siquando clientum suorum defensionem suscepisset? An cum injuria extorquere voluit, quod ab adversa parte cum dominio possidebatur? An, quod hoc sæculo fit frequentius, vocibus sanguinis, pro tribunali litigantis, obtemperare magis voluit Judicem Filium, quàm causæ æquitati? An maternis precibus, & impetrare doctis lacrymis, contra jura jus aliquod arrogare præsumpsit apud eum, penes quem, teste Chrysologo, (a) *neque pietas sine* (a) *S. Chry-*
justitia est, neque sine pietate Justitia? *solog. serm.*
145.

(a) Lib. 1.
Strom:

Exeste impiæ sacrilegæ , blasphemæ mentium fœdissimarum cogitationes ! *Sancta Sanctorum* tam execrandis probris obnoxia non fuerunt : *Speculum Justitiæ* tantam maculam nunquam potuit recipere : *Templum DEI* nulli præbuit asylum iniquitati : Matrum felicissima nequijt abortivum proferre monstrum ; sed solum parere Christum , qui apud Clementem Alexandrinum (a) *Vivum quoddam , & animatum jus Cæsareum ac Canonicum celebratur*. Sanctissima igitur concipere oportet de Matre Justitiæ , neq; ausu aliquo impietatis Marianorum titulorum splendorem obfuscare , taceo , nefariâ quidvis sentiendi licentiâ corrumpere , vel abrogare . Unde si nos vel testes temporum historię docuerint , vel ipsi probabiliore ratione conjecerimus , magnam Patronam , etiam dum adhuc in terris versaretur , clientum suorum litigia sic terminasse , ut causâ ceciderint potentes contra imbelles ; evaserint , iudicibus captivi , triumphaverint in bellis principes , ereptæ sint regibus urbes ,

urbes, elusæ tentantibus machinæ; cogitemus eam sine ullius injuria cui-libet jus suum dixisse, proindeque raram Jurisprudentiæ Magistram se comprobasse. Qualem dum ego vobis hodie propono, & vos profiteri, animadvertere simul vos velim, qua ratione fructuque, publicè an privatim docuerit; quos in Collegio suo habuerit discipulos, & quas jurium materias præsertim explanaverit; Deprehendetis autem non obscuris indicijs, eam jura ita dictasse alijs, ut ipsa fecerit; ita citasse leges, ut exactius impleverit; ita monstrasse tabularum notas, ut diligentius observaret. Cum enim is doctores inter emineat, qui & agendo docet, & docendo agit, talem se exhibuit magistram, quam discipuli non tantum docentem audirent, sed imitatione quoque factorum sequerentur. In privato templi Hierosolymitani Collegio se prius conformavit *Institutionibus*, & convictrices discipulas informavit: (a) ibidem docuit ex *Pandectis*, mundi illecebras pro

(a) *Dion.
Richel: in
1. Sentent:
diff. 16. q. 2.*

cælo, se suamque vitam pro Deo, divinæque vitæ commutare, & commutavit, dum amantem Deum ita redamavit, ut mira subtilitate altera transiret in alterum, & uterque traderetur utrique : ibidem explicuit nominatos æquè ac innominatos contractus Deo se transcribendi, & integerrimè transcripsit ; ibidem Decalogum, sive, *Jus infortiatum*, à fortioribus legibus inter consultos juris sic solitum nominari, modestissime inculcavit, & in ejusdem observantiam auditrices suas non tam verbis, quàm exemplo pertraxit : ibidem selectas cum Deo transigendi, eidemque se donandi, vendendi, depoenendi, & oppignorandi rationes dictavit, & gratiosè inivit : donec tandem decreto non Justiniani, sed summi æternique Imperatoris jura universa in volumen unum (*Volumen Christus est*) coegisset, intra uteri sui angustias coëgisset, ut haberet, *Codicem*, (a) *Æg. in* (à cogendo dictum (a)) quem in planitie campi Bethleemitici proponeret, & explicaret. Et verò publicam illam,

(a) *Æg. in*
Summa.

illam , sed vimineam scholam vix
 est ingressa Magistra ; cum adeo fe-
 liciter nocturnam ad cœli faces lu-
 cubrationem inchoavit , ut quamvis
 boves & asinos , jurisprudentiæ in-
 capaces, primùm haberet discipulos,
 nacta tamen sit paulò post reges &
 principes, qui per ingentes terrarum
 tractus & anfractus , per innumera
 periclitantis vitæ discrimina ex Ori-
 ente advolârunt, diademata substra-
 verunt, & incurvas patrij juris virgas
 legum Authori & dictatrici inclinâ-
 runt , ut sanctiora gubernandi con-
 silia , & regulas infallibiles excipe-
 rent. O quàm verè ! quàm ingenuè
 gloriari tunc poterat M A R I A : *Per*
me (publicam juris Magistram) *re-*
ges regnant , & legum conditores justa de-
cernunt : per me principes imperant , & po-
tentes decernunt justitiam ! (a) O quàm (a) *Prov.*
 verè , quàm justè dixisset : *Meum est* ^{a. 2.}
consilium & equitas , (b) quâ regnorum (b) *Ibidem.*
 moderatio, magistratuum imperia,
 urbium fortunæ, curiarum majestas,
 templorum sanctitas, populi subje-
 ctio, fœderum integritas, bellorum

ardor, pacis otium, omnis denique ordo, conditio, studium, disciplina, gens, natio, mundus totus regi debet & animari! O quàm verè, quamque congruè addidisset: *Mea est pru-*

(a) *Ibidem.* *dentia & fortitudo*, (a) quibus rerum arduarum moles construuntur & conservantur; pulcherrima virtutum soboles intra cardines suos continentur; ad obtemperandum legibus subditorum animi coguntur; nimia in Magistratibus dominandi libido expugnatur; armata impiorum audacia retunditur, sanctæ religionis autoritas roboratur, Deus defenditur; ipsum etiam universum intra officij sui terminos multo fortiùs meliùsque constringitur, quàm fabulosâ Homeri catenâ fuerit coarctatum.

Verùm noluit Dei Mater gloriari, sui que proferre panegyrim; cùm æternæ Justitiæ Verbum infans pro ea facundissimè satis perorârît, & ipsa de secutorum clientum gratitudine dubitare non voluerit, qui ut in cælo, apud sedentem pro tribunali Judicem Filium habeant patronam.

Ma-

Matrem, ejusdem causam excellenter acturi sunt in terris, honorésque defensuri. Quod munus dum vobis promptissimis animis arrogatis, Jurium Antistites, ita studium omne in id, velim, impendite, ut alios quóque Collegas in idem obsequium provocetis. Laudabilis enim ille conatus est, cæloque gratissimus, qui in magnarum rerum commendatione sic desudat, ut ubi viribus suis succubuerit, subsidiarias habeat copias æmulorum. Illud præterea vos obsecro, obtestorque, ut postquam Magistram prædicaveritis à consilio & æquitate, à prudentia & fortitudine, à jurium peritia & docendi svavitate; divinam quóque legum ferendarum scientiam, quæ jurium peritis, summisque justitiæ Magistris convenit, in ea exaggeretis. Exaggerabitis autem, si extuleritis illā supra Solonem, qui Atheniensibus; Lycurgum, qui Lacedæmonibus; Apollinem, qui Arcadibus; Philolaum, qui Thebanis; Minoem, qui Cretensis; Phoronium, qui Græcis;

Græcis; Zoroastrem, qui Bactrianis; Platonem, qui Magnesijs; Romulum qui Romanis leges tulerunt: quosque vagæ Religionis cultrix antiquitas non absque singulari veneratione compellavit. Fuerit enim, verò celebris Minos, quod famosissimum à Jovis incunabulo Dictæum montem ingressus se Numinis alloquio frui, & ab eo dictandas alijs leges accipere jactitaret; glorioso certè mendacio Cretensisibus imposuit: fuerit admirationi Lycurgus, qui ad Delphici oraculi cortinas profectus, ab Apolline se condoceseri, & quidquid salubrium statutorum Spartanis tradidisset, ex eodem haurire dicebat; sub speciosa certè sanctitatis larva nimium credulis illudit: vixerit etiam sanctioris gloriæ famâ locuples Pompilius, qui Aricino in luco delitescens agendorum articulos, velut in Minervæ garrientis ore collectos, Reipub. promulgavit; fallacibus item decipulis priscam, temporum simplicitatem implicavit. Vna interim Magistra nostra, patrona

na nostra, Immaculata nostra veritate mendacia, religione superstitionem, humilitate jactantiam, sinceritate fucum proſcripſit, quando non dictum montem, non Apollinis, delubrum, non Minervæ lucum; ſed lacerum Bethleemiticæ urbis ſtabulum, celeberrimam tunc orbis ſcholam, inhabitans, nitidiſſimum *Juris Corpus* Angelis & hominibus, regibus & ruriculis, rudibus & peritis expoſuit, itaque evolvit, ut concinnè noſſet iterum convolvere, faſciſque illicigare, quas nonniſi jurium perita poterat tractare; cùm teſte perſpicaciſſimo Prophetâ: (a) *Juſtitia ſit cingulum lumborum ejus*. Medullitus proinde gaudeo meliores mundi partes, ſeu litigantis Eccleſiæ militiam univerſam in hoc conſpirâſſe, quòd in cauſis graviffimis, & deſperata mortalium ſalute vix alium ex toto Advocatorum cætu elegerit advocatum, qui apud divinæ Juſtitie tribunal pro ſontibus interpellaret, quàm Auguſtiſſimam Dei Matrem. Agnoſcit, non dubito, eam præcellentiſſam ſuam

(a) *Iſa: c. II.*
v. 5.

suâ nemini esse secundam, ut quæ
 allegatione jurium, præsertim natu-
 ralis & materni, supremum tremen-
 dūque Judicem â rigore ad pieta-
 tem, â severitate ad clementiam, â
 supplicijs ad gratiam posset decli-
 nare. Reflectamus enim denuo me-
 moriam nostram, si lubet, & in præ-
 teritorum sæculorum tempora re-
 vertamur: nunquid miserandum ac
 infelix mortalium genus eò prola-
 psus erat, ut â primo per plura sce-
 lera graderentur plerique omnes, &
 in altissimis gradibus constituti hor-
 rendo casu provolverentur in pro-
 fundum horribilium tenebrarum?
 nunquid in sempiternæ captivitatis
 squalore genuissent, nisi dilectionis
 & infinitæ clementiæ Deus pro
 nobis misisset litrum, credidisset de-
 positum, solvisset debitum, filium
 proprium oppignorâisset? Et quo-
 modo nobile litrum, immortale de-
 positum, liberale debitum, pretio-
 sum pignus tractavimus? Dissipa-
 vimus, prodegimus, prostituimus:
 Dominum insuper universorum ju-
 stissimo

stiffimo dominio per in signem audaciam exuere conati sumus. O turpitudinem nullo lacrymarum torrente sat eluendam ! O impudentem injuriam , & injuriosam impudentiam , nulla pœnitundine sat castigandam ! Ei, cujus erant omnia, dedimus pro regia stabulum , pro cunis præsepe, pro culcitra fœnum, pro peristromate telas araneas , pro servis bruta , pro odoribus fœtores , pro corona spinas , pro sceptro arundinem , pro throno trabalem furcam. O iniquitatem , nullo severissimo Judice satis plectendam ! Nec stitit hic insana rapiendi libido ; ut repereamus omnia , per exquisita crudelitatis tormenta vitam eripuimus. O scelus nullis pœnarum acerbitatibus expiandum ! O reatum, æternis flammarum incendijs vindicandum !

Abijt ergo è terris in cælum Deus, universorum non tantum dominus, sed & arbiter. Abijt ; & severam Judicis indutus formam contra indurata cervicis homines pro tribunali consedit, dexteramque flagris,

gris, rotis, flammis, fulmine, catenisque severissimè Judicantis terroribus armavit, ut in reorum vertices supplicia intorqueret. Quo se verteret scelerum depresso pondere, & pro suorum salute sollicitus orbis? Dixi, oblegatam fuisse non tam materni cordis intentam officio Patronam, quàm præstantissimam omnium advocatam M A R I A M, ut deploratam mortalium causam continuo ageret, tremendumque Judicem à sententia revocaret. Hæc enim cœli suscepta triumphis adeo instructam se stitit Tribunali, ut discurreret peritè, allegaret gratiosè, impugnaret fortiter, responderet solidè, oraret blandè, evinceret felicissimè. Non sic profectò regum sapientissimi mater apud fratrem pro Adonia fratre, adolescentum tunc pulcherrimo: (a) non sic prudentissima mulier Thecuitis apud patrem in causa Absolonis, vanitate inflati, superbiâ tumidi, fratris sanguine inquinati: (b) non tam dextrè Veturia Mater apud Coriolanum filium, quando facta patriæ advo-

(a) *Lib. 3.*
Reg. c. 2.

(b) *Lib. 3.*
c. 14.

advocata, se se intrepidè stitit irato
vultui, & disertâ jurium maternorum
allegatione de corde furorem, ex
vultu iram, ex manibus ferrum ex-
torfit, civésque fortunásque ædésque
arásq; miserabili ruinâ jam jam tu-
mulanda liberavit. Quare dulcissimis
iterum abripior affectibus, dum ad-
dictum Christo populum sæpius mo-
dulantem audio: *Eia ergo Advocata no-*
stra! dúmque in fastis historiarum
lego, hâc Patronâ neminem clien-
tum causâ cecidisse unquam, statim
fatigatum injuriarum pondere ani-
mum in fiduciam erigo; nec me
contineo, quin eam tremulis con-
triti cordis delassique oris vocibus
talem celebrem, præcinentibus præ-
sertim Sanctis Irenæo, (a) Bernardo,
(b) Ephremo, (c) Anselmo, (d) Bo-
naventura, (e) Antonino, (f) ho-
rúmque Seraphico Patre Francisco,
(g) qui ut suorum Matrem coleret
impensius, devinciret fortius, in ho-
norem ejusdem, â solennitate Prin-
cipis Apostolorum, usque ad diem,
quo advocatura in cœlos abiit, de-
votissimè

(a) l. 5. con-
tra hæres. 19.

(b) Ser. 1.
de Assum.

(c) Orat. de
Laud. B. V.

(d) Apud
D. Antonin.

(e) In hy-
mno: Te

Matrem &
in Epist.

Memor:

(f) p. 4. r.
15. c. 14. §. 9.

(g) S. Bo-
nav. in vita
c. 9.

(a) *Plato.*(b) *Isai:*
c. 64. &
Psal. 93o.

votissimè jejunabant. *Eia ergo Advocata nostra!* Patrona, Domina, Interventrix, Mater nostra! Illos tuos misericordes oculos, *amoris fontes* (a) dulcissimos, ad nos converte! Ecce gemimus in hac profunda lacrymarum valle; atque amaræ calamitatis temperatricem imploramus! Ecce, rei agimur non unius, sed multiplicis in DEUM injuriæ, & quæ præveniat ultionem, inquirimus! Ecce, juratum generis humani hostem, accusatorem fratrum, divinæ Justitiæ tribunal jam jam admisit; & advocatam, nostræque causæ (si tamen habemus aliquam) patronam non habemus; *Non est, qui consurgat, & teneat ultionum Dominum!* (b) *Eia ergo Advocata nostra!* fer opem! impende patrocinium! advoca, pete, repete, excipe pro clientibus tuis; & quâ polles apud Judicem autoritate, quâque jurium scientiâ inter Advocatos emines, accusatorem nostrum, improborum ducem Causidicorum retunde, confunde; ut intelligant omnes, sapientissimè actum esse, quando

quando te Advocatam reus elegit orbis, & eminentissimam, clarissimamque Jurisprudentiæ Magistram est veneratus. Vos verò Sanctissimi æquitatis arbitri, jurium Magistri, legum divinarum Interpretes ac propugnatores, pergite, ut fecistis hactenus, Mariana sequi dictamina, & doctrinas; pergite hoc *Justitiæ speculum*, seu *visibilem justitiæ solis imaginem* cum Sapientissimo Idiota intueri, atque ad illud sententias actionesque conformare; & si quando legum obscuritas, litium implexio, adversariorum astutia, causæ subtilitas negotium faceffiverit, subite hanc *Causarum domum*, (a) discutite dubia, expetite consilia; confido futurum, ut de adversarijs vestris non solum triumphum, sed ab alijs quoque æternam nominis commendationem, quâ dignissimi estis, reportetis. Celebrabimini veræ Astrææ duces, regum magistri, fulcra regnorum, fori lumina, Senatus decora, consiliorum faces, & Rerumpub. bases ac clypei; quoniam *Advocati* (verba sunt Leonis

(a) S. Bonavent. *supra citatus.*

(a) Cod. l. 2.
tit. 7. de ad-
vocat. divers.
Indic. 14.

& Anthemij Imperatorum) non minus provident humano generi, quàm si praelijs atque vulneribus patriam, parentésque servarent; Neque enim solos nostro imperio militare credimus, qui gladijs, clypeis, & thoracibus nituntur, sed etiam Advocatis: militant namque causarum patroni, qui gloriosa vocis confisi munimine, laborantium spem, vitam, & posteros defendunt. (a) Illi verò, qui Clarissimum nomen & gloriosam professionem vestram lucri desiderio, turpique venalitate commaculant; quique causas æquissimas condensâ legum nebulâ obscurant, exceptionibus illudunt, limitationibus protrahunt, duplicis triplicisque (sic loqui liceat) procrastinant; parcent, suæque vilitati adscribent, si non tantum â Ludovico XII. regum gloriosissimo, verum etiam â vobis in tribum cerdonum fuerint transcripti, cùm, ut isti corium dentibus, ita illi astutis disceptationum tractibus lites amplient,
& distendant.

Dixi.

P R Æ -

PRÆCONIUM.

Nihil conferendum censeo cum certa cognitione, & exacta, ac subtili contemplatione Dei. Maximum enim est, & perfectissimum bonum, omninoque beata vita : hac existere in contemplatione ostenditur, contemplatioque in cognitione optimorum : Deus jam, confessione omnium, Optimus est. Hac igitur cum ita se habeant, utique in cognitione divinorum beatitudo sita erit. S. Cyrillus 5. in Julian: ad textum ex eodem secundum.

ORATIO X.

MARIA, ad apicem Scientiarum, Theologiam, erecta, ideoque beatissima

Magistra Theologia.

Scientiarum apicem tandem attingimus, AA, & ab artium ac Facultatum omnium principe Theologia, non tantum pronis excipimur affectibus; verum etiam in laudes Augustæ Virginis, cujus pectus ipsa jam pridem deliciosè occupaverat, serenâ frontis majestate, gravium oculorum nutu, oris blandioris arrisu, suaviter animamur, salubriter incitamus. Quæ res non modica quidem voluptate animum meum perfundit; assequi tamen necdum possum, quæ tam profusæ humanitatis causa, quod beneficii hujus illicitum, quis tam insoliti favoris stimulus subesse queat. An fortassis sapientissimâ mente providet, hîc dicere meditantem roborari oportere, nè argumenti sublimitas, & sublimis-

ma-

materiae majestas in ipso dictionis limine percellat oratorem, qui levibus eloquentiae praesidijs instructus potiores habet causas tacendi, quam loquendi? An pro merita laudis silentio pertaesa commendari vult in ea, in qua una mirabiliter refulgens reliquos discipulos suos, quamvis illustres litterarum praesides, in Sapientiae caelo fecit astra minora? Utrumque certè non exigui videtur esse ponderis; cum ego in hac causa & viribus egeam ad dicendum, & turpe ac iniquum sit silentium, quod gloriosi nominis eripit memoriam, ibique commendationis pretium suffuratur, ubi ad conciliandam aestimationem ut plurimum debet explicari. Enim verò sit ita, res magnas innata pulchritudine non rarò perorare disertius, quam si precario exquisitae facundiae subsidio roboretur: illud tamen etiam negari non potest, silentio flaccescere quam plurima, quae pulchro alioquin encomio vegetarentur. Ut proinde jure optimo in sui laudem me pertrahat Faculta-

tum Imperatrix Theologia, quando se totam mihi offert in Marianæ prædicationis apparatus, sine qua hic nequit assurgere; & ego injuriam facturus videar argumento, quod aviditate dulcissima tractandum suscepì, si gratiosè oblatam provinciam detrectâro. Cùm enim non levis detractionis species sit, id sepelire silentio, per quod quis altiùs evectus in tanta sublimitate conspicitur, quantam cogitationes multorum necdum attigerunt; justissimè sanè præconem deposcit Theologia, qui gloriam illius inde sublimius extollat, unde in MARIA, quam plenissimæ altissimæ sapientiæ fulgoribus illustravit, suæ magnitudinis accepit incrementum. Et si cæteræ rerum scientiæ non mediocri pretium suiq; comendationem obtinuerunt, quòd in Deiparente ad insigne ornamentum eluxerint; majorem encomiorum messem intrabit scientiarum omnium Regina, quoniam non minora, sed paria, sed excedentia decora in eam prodigè magis, quàm libe-

liberaliter congeffit. An iniquior
 conditio eft Supremæ Principis,
 quàm inferiorum dominarum, vel
 etiam ancillarum? Nunquid Theo-
 logia illa eft, cujus ductu disciplinæ
 omnes diriguntur ad pietatem, réſq;
 publicæ conformantur ad religio-
 nem? Nunquid illa, cujus magifte-
 rium tam manifestis divinæ rationis
 vestiſijs inſiſtit, ut cum doctrinæ aliæ
 obnoxia ſint erroribus, hæc una,
 teſte Doctorem Angelo, (a) errare (a) S. Th.
p. 1. q. 1.
ar. 5.
 neſciens per anfractus & præcipitia
 ducant neminem? Nunquid illa,
 cujus certitudo tanta perſpicuitate
 ubique transparet, ut niſi Deus ipſe,
 omnia in veritate docens, (b) vel fal- (b) Mar.
c. 12.
 lat, vel falſitate implicari ac perdi
 velit alios; fallere non poſſit ullum?
 Nunquid illa, cujus utilitas tantam
 complectitur amplitudinem, ut ne-
 que Logica in diſſerendo, conclu-
 dendoque ſit ſagacior; neque Phy-
 ſica in demonſtrandis rerum cauſis
 perſpicacior; neque Medica in cu-
 randis mortalium morbis, ut illa in
 paſſionibus animi componendis fe-
 licior;

licior; neque Jurisprudentia in Supremi Numinis explicanda lege peritior; neque Ethica in formandis moribus notandâque beatitudine præstantior; neque Astronomia in examinando sole, luna, cæterisque cœli sideribus illustrior? Non est igitur AA. cur quis existimet, ornamenta laudis ambitiosius ab ea prensari, dum in Deiparente celsius evecta, cupit suspici & prædicari. Tributum exigit Regina, quod meritis ac privilegijs ejus debetur amplissimum. Et cum altera sine ista nequeat hic celebrari, quanto magis Marianæ majestatis splendor ab hac irradiabitur, tanto amplius encomium altera consequetur.

Sed age, O divinissima scientiarum Magistra, ingeniorum fidus, columen fidei, gloriæ mater, flammarum ad beatissimos Numinis amores administra, Sacrosancta Theologia! age, inquam, dic nobis, quo eminentiæ loco collocasti Mariam? in cône honoris fastigio constitit, unde splendore refulsit supra reliquos,

quos, & quò aliorum ingenia Theologorum ausa non sunt aspirare? Audite, quid reponat sciscitanti: Ego, inquit, *vapor virtutis Dei, emanatio quædam claritatis Omnipotentie DEI, imago bonitatis illius* (a) in altissimis habito; (a) *Sap. c. 3.* ideóque thronum, sive cathedram Virginis in columna nubis collocavi, supra omnium Doctorum vertices. Inde inde in supremum illud Numen, cui pro domicilio *splendor inaccessus*, (b) pro amictu circumfusus (b) *1. ad Tim. c. 6.* lumen, (c) citra gravem reverberationem, mentis intendit aciem; viditque Deum trinum in personis, unum in natura; non factum, non creatum, non genitum; Principium principio carens; fontem non solum rerum omnium, quæ illius imperio extiterunt in tempore, verum etiam Filij & Spiritus Sancti ab omni æternitate. Vidit Filium, à Patre, acerrimo mentis oculo se ipsum perfectè intelligente, ac quasi in flagrantissimi nitoris speculo suam ipsius faciem contemplante generatum, Deum de DEO, lumen de Lumine: vidit

vidit divinissimum illum Spiritum, sempiternam amoris flammam, ab utroque adeo mirabiliter procedere, ut quamvis cum utroque ejusdem prorsus naturæ communione copulatus, alius tamen esset ab utroque. Tres personæ, & tamen mens una, voluntas una, sapientia una, bonitas una, æternitas una, immensitas una, vis & potestas una. Totus in Filio Pater; totus in Patre Filius; totus in utroque Spiritus Sanctus. Filius à Patre natus, & tamen coævus Patri; distinctus à Patre, & tamen etiam idem cum Patre; imago Patris, & tamen non aliud quam Pater. O admirandam Personarum distinctionem! O stupefendam cum tanta distinctione unitatem, & rerum omnium communionem! O altitudinem divitiarum DEI! Quæ mens te capare, quod ingenium concipere, quæ ratio hominis poterit declarare? Concidit profectò naturæ nostræ conatus, hebetantur acutissima Doctorum ingenia, absorbentur vivacissimi sensus, obmutescunt ora,

difer-

disertissimorum Rhetorum. Aman-
tissimæ nihilominus Matri copiosam
sui videndi fecisse copiam; quando
mentem illius ita illustravit, ut luci-
dissimos obtutus in ipsam Divinita-
tis substantiam non semel defigeret,
testes sunt, seu potius authores gra-
vissimi, de Sanctorum Patrum nume-
ro Divus Hieronymus, (a) Petrus
Damiani, (b) Antoninus, (c) & Bern-
ardinus; (d) testes de lycæis Theo-
logorum, Franciscus Suarius, (e) Ga-
briel Vasquez, (f) Ægydius Lusita-
nus, (g) Petrus Canisius, (h) & San-
ctorum honoribus nuper decoratus
Thomas de Villa nova, (i) qui gra-
vissimo suo iudicio par esse censuit,
ut quæ tormentorum acerbiteriam
sustinuerat in patiente Filio, Dei sui
deliciarum omnium visionem adhuc
in terris haberet pro præmio; & mea
quidem opinione, longè illustrio-
rem, quàm habuerit Moyses in mon-
te, Isaias in templo, Ezechiel ad flu-
minis ripam, Paulus & Joannes in
ipsum cælum abrepti. Eò igitur
animos, eò affectus vestros intendite

AA,

(a) *De Nat;*
Mar:(b) *Ser. 1.*
de Nat B.V.
apud Men-
dozam.(c) *4. part.*
tir. 15. c. 1.
q. 5. 1.(d) *tir. 4.*
f. 36.(e) *Tom. 2.*
Incarn. disp.
19.(f) *1. part.*
d. 55. & 56.(g) *De beat.*
tom. 2. l. 12.
q. 9. a. 4. §. 1.(h) *l. 5. de*
Deip. c. 17.(i) *Serm. de*
Resur:

AA , & admirandam Mariæ celsitudinem , infra quam reliquorum doctorum eminentiam Theologia reliquit , quantâ potestis propensione suspicite , speculemini. Ecce , ut divinissimarum cogitationum splendoribus refulgens , intra cubilis sui perietes absorbetur ! ut fixis in cælum oculis â semetipsa peregrinatur ! ut abripitur intellectu , tenetur memoriâ , trahitur voluntate ! ut tota in Deum mergitur , tota in Vnitatis essentiam , & personarum Trinitatem immergitur ! Repleri nimirum eam decuit arcanorum notitiâ , quâ supra creaturarum scientias evecta emineret , humani tamen generis salutis promptissimè simul cooperaretur. Mentem enim verò reducamus in prima felicitatis nostræ tempora , disquirentes quomodo Illustrissimus ille è cælesti nobilitate Legatus gravissimi negotij rationem prudenter exposuisset , causâmq; mortalium feliciter perorâset , si myste-rijs divinis plenissima illius oratio â Virgine percepta non fuisset ? Sta-
bat

bat hinc adorabundo flexus poplite Gabriel, & impositum sibi à Suprema Numinis majestate proponebat imperium; stupebat illinc suffusa rubore ad honorificam Legati vocem MARIA: nuntiabatur hinc in vicem munerum, à principibus mitti solitorum, gratiarum plenitudo, & benedicta dicebatur inter mulieres; demittebat se illinc Virgo pudibunda vultus demissione, & vilem ancillæ conditionem præseferibat: petebatur hinc in augustissimas cum Deo nuptias consensus, & præsentate angelorum multitudine, festivi parabantur hymenæi; turbabatur illinc castissima Sponsa, & virginitatem suam sollicitè propugnatura tremulam spirabat vocem: *Quomodo fiet istud?* (a) Vix erat sortitura successum legatio, nisi mentem reflectens angelus, se loqui cum perfectissima Theologorum Magistra (ut erat ad omnem discursum instructissimus) ex reconditis ipsius Theologiæ mysterijs pudori attulisset securitatem: *Spiritus Sanctus* superveniet in te,

(a) Luc. c. l.

te, & *virtus Altissimi* obumbrabit tibi, ideoque quod ex te nascetur, Sanctum vocabitur *Filius Dei*. Cui responso MARIA placide acquiescens, & divinæ Incarnationis possibilitatem ex una Trium potentia devotissimâ cognitione dispiciens, libenter aſſuit: *Fiat mihi secundum Verbum tuum*. Quid putatis hîc, AA. quæ admurmurationes, quæ tripudia, qui applausus, quæ audientium angelorum aggratulationes subsecutæ sint hanc non contentiosam, difficultatibus tamen plenissimam disputationem? An potuit vel in Romano Sapientiæ Sacrario, vel in Salmantico augustali, vel intra Sorbonicos cancellos meliori agnitæ veritatis responso terminari negotium? Profectò vix potuit. Et tamen nullo evanescentis gloriæ fumo propter tam sublimem cum angelo discursum tangebatur Maria. Imò nunquam de Deo pulchrius, nunquam cum eodem humilius, ideoque subtilius, quàm cum haberet intimè præsentem, locuta est, non jam tantum.

Theo-

Theologa, sed & Theophora. Quanto enim profundius de cælorum altitudine DEUS in eam descendit; tanto illa ex humilitatis suæ abyſſo ascendit in Deum altiùs, ibique inclarissima naturæ simplicitate pulchram attributorum varietatem inter cætera est speculata. Adorabat profundissimâ reverentiâ supremam *Majestatem*; & magnificum animæ suæ dominum suspiciebat ancilla. Venerabatur relucens tum in se tum in existentium, ac possibilium rerum multitudine *Omnipotentiam*; & quia etiam illi magna fecit, qui potens est, hominem assumendo in Deum, beneficij magnitudinem recolebat. Celebrabat infinitam illam *Bonitatem*, quæ totâ sui emanatione ita se communicat personis, ut deinde inexplicabili liberalitate in hanc nostram mortalitatem se se diffundat; & divitiarum ejus evasit avarissima. Expendebat genuinam bonitatis sobolem *Misericordiam*, quam à progenie in progenies, hoc est, à primis mundi incunabulis in pœnitentium pre-

T

ces

ces exhibuit facilem, in egentium necessitates velocem, in imbecillium sustentationem pronam; in afflictorum solatia propensam, in omne denique auxilium ac amorem incitatum; & amabili gratissimæ mentis dulcedine absorbebatur. Considerabat divinæ majestatis honorilque vindicem *Justitiam*, quâ in reos æquissimis supplicijs animadvertit, insolentes coërcet, improbos emendat, probos retinet, potentes deponit, humiles exaltat; & pulchrâ voluntatis conformatione abibat in divinorum abyssum judiciorum. Admirabatur altissimam *Sapientiam*, quæ se ipsum per se, & omnia à se orta intelligit, cujus gloria in amplissimis cœli terræque theatris, in rerum generibus, in generum speciebus, in specierum numeris, in numerorum ornatu ac Symmetria relucet; & sicuti cum eo delectabatur per singulos dies ludens in orbe terrarum, ita tunc ubertate voluptatis illius non poterat satiari. Speculabatur denique seu absoluta, seu conditionibus

nibus obnoxia, & è facerrimo Trinitatis Senatu emanantia decreta, & ibi, quæ sit inter actus & objecta connexio, quæ futurorum infallibilitas, quæ infallibilitatis præambula vel libertas, vel necessitas, haud dubiè discernebat. Hinc fit, ut tantopere jam non mirer & vitæ sanctitate, & eloquentiæ torrente, & scriptorum majestatem, & mortis gloriâ incomparabilem Dionysium, quod magnifico in Deiparentem affectu, inter attonitos animi sensus abreptus eam voluisset asserere Deam (a), nisi (a) *Epistol. ad D. Paulum.* magistrâ fide cognovisset esse creaturam. Si enim etiam teste doctissimo Origene (b) nemo speculatrice (b) *Hom: 1. in Ioan:* mentis indagine ascendere potest in Deum, nisi ipse quodammodo fiat Deus; non debet nimiam exerrantis pietatis notâ tantus notari doctor, qui à Mariano discipulo, Joanne, in Magistræ musæum introductus, & splendoribus divinis undique fulgentem conspicatus, (c) non potuit, præ stupore, aliquid quasi mortali altius non suspicari, & devenire (c) *Carthufian: in 1. Sent. dist. 16. q. 2.*

rari. Tunc enim, opinor, Dei formis Virgo totam intellectus sui aciem in cœlestium rerum contemplationem pro more intenderit, atque in ipsum *Lumen gloriæ* adeo prope abierit, ut illius radijs collustrata adhuc in vita, tanquam fulgentissimum inter Doctores sidus refulgeret; siquidem alij primùm â morte fulgebunt, *quasi stelle in perpetuas æternitates.* (a) Sed nunquid & ego insolentiori subintrans cothurno, vestigijs vacillantis nonnihil Areopagitæ videbor insistere? Nunquid erroneo, aut fulgoribus nimijs perstricto pietatis oculo feror in amatam? Nunquid totus in eo sum, ut humanis majores, & transcendentes, divinisque pares Deiparæ coacervem honores? Absit â me fidei tam rudis affectus, fanatica temeritas, audacia nunquam toleranda. Absit, ut sentiam, dicamve aliquid, sanctissimâ Censuræ virgâ castigandum. Nolo Lavernionibus de Lutheri aut Calvinii Schola, contra Matrem Dei latrantibus, ac jam hirrientibus obijcere materiam, quâ
in

(a) Dan.
c. 12.

in rabie sua magis effervescent; qui quia veritatis lucem intueri non volunt, condensos *MARIÆ* splendores execrantur. Illud solum evincere contendo, Deiparentem, mortales inter, eminentissimam fuisse Speculatricem, ut quæ objectum de cælo Deum tam profundè speculari visa est à Theologis, quæque rarissimos sapientiæ ac scientiæ thesauros excipisse creditur, pietate adhuc hodie perdurante. Quæ si vestris quoque cordibus inest, pulchrè sanè honori Dei consulitis, qui ut à filiis alijs iustissimam semper erga parentes exigit observantiam, ita observantissimi optimiq; filij partes explevit omnes. Quis autem nescit, optimorum filiorum animos in matrem adeo esse, gratos, voluntates adeo inclinatas, affectus adeo profusos, indoles adeo candidas, & sinceras, ut etiam secretissima pectorum suorum recludent? Deus Mariæ filius fuerit; & naturæ suæ arcana, hoc est, subtilis Theologiæ mysteria, quæ ad ornandam evēhendāque Matrem valebant multum,

tum , ad contestandos filij amores faciebant non parum , reticuerit , & omnino celaverit ? Non sustineo , ut persuadear. Deus in mundum venerit , ut , quâ constabat scientiarum plenitudine , doceret omnem veritatem ; & amantissimam sui Genitricem eâdem destituerit , non locupletârit ? Non inducor , ut credam. Deus clarissima æternæ veritatis lux de regalibus sedibus se se in has mundi regiones infuderit , ut illuminaret omnem hominem ; & in pulcherrimo Matris intellectu notabilis ignorantia tenebras reliquerit , non prorsus discussit ? Non flector , ut consentiam. Contrarium siquidem exigebat Dei , sapientia sedem sibi construens , majestas ; contrarium filij in parentem amor & observantia ; contrarium divinæ Matris dignitas , & excellentia , nullo verborum ambitu satis explicanda. Quare si quis hanc Augustissimam Matrem cogitat , volo , ut Theologorum omnium principem concipiat ; neq; alibi , quàm in altissimis supereminentis

mentis Sapientiæ stationibus investi-
get. Eò enim princeps Theologiæ
facultas illam extulit, unde dilectum
discipulum Joannem, Doctorem gen-
tium Paulum, ingeniosum Augusti-
num, laboriosum Gregorium, sua-
vissimum Ambrosium, purpuratum
Hieronymum, sedulos Lombardos,
angelicos doctores, subtiles Scotos,
claros Suarezios, acutos Vasque-
zios, omnes denique ingeniorum
phanices, & academiæ lumina
longo post se intervallo despectavit.
Vult quis scire, quàm altè se se ma-
gnarum alarum aquila Joannes in-
finitam divini solis lucem librave-
rit? Damianum audiat: *In speculanda
summa Divinitatis essentia præcedit Prophe-
tas, supergreditur Patriarchas, Apostolos su-
perat, & illuc usque mentis aciem intendit,
quò vix & angelica valet pertingere creatu-
ra:* (a) & tamen expirans in cruce, (a) S. P. Da-
Christus discipulum commendat, *mian: ser. 2o*
Matri, ut etiam absente Magistro
haberet, à qua disceret. Vult quis
scire, in quam sublimitatem abierit
Paulus, quòsque divinatorum secreto-

(a) 2. ad
Cor: c. 12.

rum recessus penetrarit? Scripturæ ausculetur oraculis: Raptus est in paradysum, & audivit dictantis Sapientiæ arcana verba, quæ non licet homini loqui; (a) viditque, si Augustino hîc credimus, quomodo Trinitas in Unitate, Unitas esset in Trinitate: & tamen Verbi Theologum, Deiparæque Discipulum non æquavit; siquidem illi non tantum concessum fuit, grande illud mysterium irreverberatis luminibus intueri, verum etiam facundissimè loqui, quando à Triade incipit, & Verbum, quod in principio erat apud Deum, subtiliter manifestat. *In tertium cælum raptus* (exclamat Adamantius) *O vas electionis, & Magister gentium, audisti verba, quæ non licet homini loqui: Joannes intimæ veritatis inspector ultra omne cælum, in paradiso paradysorum, hoc est, in causa omnium, audivit unum Verbum, per quod facta sunt omnia, & licuit ei illud verbum dicere, hominibusque predicare.* (b) Vult quis scire, quo loco apud disertissimos Encomiastas sit Augustinus? Codices evolvat: Possidio est Pater Patrum,

(b) Orig.
horn. 2. in
div.

Patrum, Doctor Doctorum, abyssus
Sapientiae, praeo veritatis, par an-
gelis in fervore, par Prophetis in
absconditorum mysteriorum reve-
latione; (a) Remigio est inter do-
ctores, quod sol inter planetas; (b)
Ruperto (c) *Columna nubis, in qua thro-
num suum posuit Sapientia Dei: & tamen*
ex melioris mundi felicissima sorte,
nullus, opinor, dubitat, Deum in
nemine veriùs thronum suum fixisse,
quàm in M A R I A, quæ testimonio
ipsius Præsulis Augustini, *totius Divi-*
nitatis est Vivum tabernaculum, (d) *Aula*
Regis æterni (e), *Thronus* (f) & *Templum*
Dei; (g) ex oraculis Sanctorum Pa-
trum, est *Altare Thimiatis,* (h) *Cathedra*
Cherubina Dei, (i) *Habitaculum illius, qui*
nusquam capitur amplissimum, (k) Dei
thalamus, arca, Sacrarium, cœlum,
Propitiatorium, & quæ non talia?
Vult quis scire, quàm bene in Sapi-
entiae certamine volaverit Ecclesiae
Sanctæ Doctor, & Pontifex Gregori-
us? Ex Ildephonso intelligat, eum
ita cunctorum meritorum claruisse
perfectione sublimem, ut exclusis

(a) *In Epist.
ad Maced.*

(b) *Remig.
Antisiod. in
2. ad Cor.*

(c) *Rup. l. 7.
de oper. Sp. S.
c. 19.*

(d) *Apud
Carthagen. in
tit. secun-
dum Al-
phabet.*

(e) *S. Aug.
init. ser. 1.
de Assi;*

(f) *Idem in
præfat. l. 1.
de Assum;
tom. 9.*

(g) *Idem
ser. 2. de
Assum.*

(h) *S. Am-
brof. l. 2. de
Virg.*

(i) *Esichius
ser. 2. de S.
Deip.*

(k) *Andr.
Hierosol. in
Salut. Aug.*

T 5

omni-

(a) *Idelph.*
Tolet. de vi-
vis illustr:

(b) *Ipan.*
Trithem. ci-
tatus initio
operum S.
Greg:

(c) *S. Greg.*
in 1. lib.
Reg. expos.
l. 1.

(d) *S. Da-*
mas. or: 3. de
Nat. B. V.

(e) *D. Proff.*
lib. de ingra-
vis.

(f) *Cass.*
contra Nest.
de Verbi In-
carn. l. 7.

omnium virorum illustrium compara-
tionibus, nihil simile demonstra-
ret antiquitas; cum fuerit Sanctita-
te Antonius, eloquentiâ Cyprianus,
Sapientiâ Augustinus. (a) Ecce con-
fertur Augustino lumen Rhetorum,
Philosophorum splendor, Theolo-
gorum princeps Gregorius; (b) &
tamen ille ad MARIE celsitudinem
nunquam aspiravit. Quomodo igitur
iste in comparisonem veniat, cum
præsertim spontaneus excellen-
tiæ Marianæ Panegyrista illam vocet
preparatum montem in vertice montium;
montem scilicet, qui significatione he-
bræâ *Ramatha Sophim*, latinè *Specula*,
nuncupatur, unde perfectissimis Dei
cognitionibus prospicitur; (c) *mon-*
tem, qui contestante Damasceno (d)
collem omnem, ac montem, id est, angelorum,
ac hominum sublimitatem exuperat? Vult
quis scire, quo scientiarum subnixus
præsidio extulerit se se Hieronymus?
Trium attendat encomijs. D. Pro-
speri, cui est mundi Magister; (e)
Cassiani, cui scripta illius, quasi di-
vinæ lampades rutilant; (f) Augu-
stini,

stini, cui homo est doctissimus, qualem in divinarum scripturarum scientia nec esse, nec posse esse videbat:

(a) & tamen ipse purpuratus hic Dalmata, venerabundo affectu Deiparam evecturus, eam celebrat Do-

(a) *Lib. 18. de Civit. c. 43.*

mum Sapientiæ (b) Sedem ac Sacrum Spiritus Sancti. c) Vult quis-

(b) *S. Hier. l. 30. in Isa. c. 7.*

scire, quam Sapientiæ laudem indutus sit nectare, ambrosiâque innutritus Ambrosius? Orbem consulat

(c) *Idem ad. versus Helvidium.*

universum. Eo siquidem teste, præterlapsa Salomonis tempora retraxisse videri poterat, quando potentissimi sapientissimi que viri difficillima itinerum spatia emensi, ex ultimis Persiæ oris advenerunt, ut à mellitissimo Ambrosij ore delitiosè penderent, quemadmodum regina Saba, ex procul rejectis terræ finibus excita, ab ore Sapientissimi regis admirabunda penderat. (d) Quam-

(d) *Paulin. invita Ambr.*

vis quid opus fuit, ut tanti viri doctrinam humani sensûs arbitria commendarent, cum ostenti divini prodigio in ignea sphæra, super caput illius flammicante, splendissimum laudis

(a) Baron.

ad ann. Xxi.
397.(b) S. Ambrosius.
lib. 2.
de Virg.(c) Idem
c. 7. de In-
stit. Virg.(d) S. Gregorius.
hom. in
Evang.

laudis acceperit testimonium? (a)

Nihilominus tamen, *quid splendidius eâ,*
quam splendor elegit, inquit de Magna

Virgine Ambrosius. (b) Imò, ut eam

supra omnium Theologorum verti-

cem collocet, mirari non vult, Joan-

nem præ cæteris locutum fuisse my-

steria divina, cui *præstò erat aula celesti-*

um Sacramentorum, (c) hoc est, MARIA.

Vera nimirum manent præconia

D. Gregorij (d), Idiotæ, & Antonini,

qui MARIAM magistram Evangelista-

rum, Apostolorum, & omnium sapi-

entissimorum Doctorum prædicâ-

runt. Pulchra profectò tituli hujus

amplitudo ! Nervosum multarum

laudum compendium ! Præcelsa Vir-

ginis unius dignitas ! Fausta Docto-

rum felicitas ! Illustris Theologicæ

gloria Facultatis !

Sed perge porro Eximia Facultas;

perge magnorum virorum capita re-

censere, quæ mirabili divinæ scientiæ

fecunditate repleverunt orbem ;

Marianæ tamen excellentiæ vix um-

bram exceperunt. Adduces sine

dubio Thomam de Aquino, quem

facun-

facundissimi Oratores celebrant,
Theologiæ Oceanum, Academiarum
solem, Ecclesiæ athletam, divinita-
tis interpretem; virum, inter Do-
ctores prodigium, inter homines an-
gelum, inter angelos Cherubinum,
inter Cherubinos quoddam quasi
Numen scientiarum: Sed suspicor,
quod tametsi cum Maria volaverit

altissimè, adeo, ut ipsum Solem ca-

pacissimo pectore excepisse credi
possit; Magistræ suæ nihilominus
cum S. Anselmo acclamaturus sit:

Maria excedit omnem altitudinem, quæ post

Deum dici vel cogitari potest. (a) Sistes,

opinor, Joannem Scotum, proh

quantum virum! quantum Mariani

honoris vindicem! qui sicut aquila

fixam oculorum aciem, ita mentis

acutæ pupillam in solem Divinitatis

ipse contorsit, radios excepit, eos-

que tam subtiliter per celeberrimas

orbis Universitates vibravit, ut

Theologicæ subtilitatis Magister,

summarum difficultatum disquisi-

tor, reconditorum arcanorum altis-

simus perscrutator dici meruerit:

Sed

(a) S. Ansel.
de Excell.
Virg. 2, 2.

Sed certò mihi persvadeo, quòd is, per quem Immaculatæ Virginis honor, frementibus licet adversarijs, feliciter propugnari ceptus est, quémque Gloriossima cæli Regina hebetem fortè ac rudem ingenio, illâ, quam visceribus portavit, Sapientiâ plenissimè recreavit, acclamaturus sit Benefactri i: *Maria excedit omnem altitudinem.* Evocabis Franciscum Suarezium, communem omnium Magistrum, (a) Doctorem eximium, (b) alterum ætatis suæ Augustinum, (c) Theologorum Coryphæum, & antesignanum, sæculique sui in Scholasticis Gygantem: (d) Sed scio, quòd discipulus Magistræ, quam in altissima subtilium rerum speculatione consulere consuevit, acclamaturus sit: *Maria excedit omnem altitudinem.* Attolles magnorum virorum testimonijs (e) Gabrielem Vasquez; & Solem Theologiæ, Magistrum magistrorum, hominem admirabilem, Angelum vitæ & intelligentiâ, temporum suorum decus, lumen, & oraculum jactabis: Sed dubitari non potest,

(a) In Bibl. Script. P.

Alegambe.

(b) Paulus

Vi in litt.

apostolicis
ad eum da-
tis.

(c) Episco-
pus Conim-
bricensis.

(d) Varij a-
pud citatum

Alegambe.

(e) Apud
citatum A-
legambe.

potest, quin illico exclamaturus sit :
Maria excedit omnem altitudinem. Adeo
 sublimi fastigio Æterna Sapiencia
 Matrem excepit, ut nullum hominis
 ingenium eo debeat anhelare ; adeo
 liberaliter se se in eam infudit, ut ex
 omnibus Theologiæ materijs vix ali-
 quid ignorâsse videatur ! Nisi fortè
Actus humanos, cum tota impendere-
 tur divinis ; & *Tractatum de vitijs ac pec-*
catis, cum constet, illam non solum
 nullum unquam contrectasse pecca-
 tum vel morte vel veniâ dignum ; sed
 insuper præditâ fuisse necessitate, ut
 minimum morali, operandi semper
 honestè, ideoque ante singulos actus
 liberos, uberioribus divinæ gratiæ
 auxilijs vixisse præmunitam. Quan-
 quam néque peccata ignorâsse dici
 possit, cum non minus laudabilis sit
 scientia fugiendorum, quàm agen-
 dorum.

Cæterum libenter credo, de An-
 gelis eorûmque loquela quàm vera-
 cissimè agere potuisse, utpote, quæ
 teste Athanasio (a), æternas illas
 mentes, ab omni materiæ concretio-
 ne

(a) S. A-
 than. lib.
 question. ad
 Antioch.

ne sejunctas, purissimo animi oculo
dispexit, & quæ doctore Hieronymo,

(a) S. Hieron.
de nat.
Mar:

(a) quotidie ad dulcissimam conversationem undique cingebatur ab illis, non tantum cum ea, sed dubio procul etiam inter se colloquentibus. Ut nihil dicam de tenerrimo mysterio *Incarnationis*, quod nulli magis perspectum oportuit esse in hac mortalium peregrinatione, quam illi, quæ de sanguine suo communicavit Verbo: nihil dicam de gratiosis materijs *Gratiæ*, quam non solum discipulis, sed & indigentibus quibuscunque liberaliter explicuit, siquidem juxta cælestis paranymphe eloquium gratiæ possedit plenitudinem: nihil dicam de Sacramento-
rum necessitate, quam ita inculcavit, ut multi egerint dignos *Pœnitentiæ* fructus; placida enim & officiosa fuit *magistra pœnitentiæ*: (b) nihil dicam de *Eucharistia*, augustissimo divini convivij epulo, quo corpus mentemque nutritivius, & auditoribus suis exposuit ad gustum sapidi-
us, quia probè noverat, quam bene car-

(b) S. Ign.
Mar. apud
Carthagen.

carnem Filij Hominis præparaverit;
 nihil dicam de *Fide Spe & Charitate*,
 quarum professione nemo ita excel-
 luerit; cum amplissimo beneficio
 beatitudinis, quæ gravissimo Theo-
 logorum calculo, actibus fidei, in-
 via exercitis, respondet, excedat,
 beatitudines omnium Beatorum.
 Sed quorsum ista? quorsum quæsitæ
 prolixitas, plerumque tædij mater,
 non infœcunda? Nimirum ut fusiùs
 intelligamus, MARIAM fuisse sub-
 tilissimam, clarissimam, acutissimam,
 eminentissimam Theologam, cui pa-
 rem, Filio excepto, qua latè tendi-
 tur orbis, non habuit unquam.
 Quam veritatem ut omissis verbo-
 rum ac commentorum ambagibus
 coronemus, liceat priùs sanctâ qua-
 dam audaciâ evocare universam
 Doctorum multitudinem, & eos
 cum vetustæ memoriæ Radulpho,
 (a) superexcellentem, semperque, (a) Radul.
 aliàs altissimam, Dei Sapientiam, in *Ardens Pi-*
 Maria tamen exaltatam, quasi Cy- *avus in*
 pressum in Monte Sion, stupefescen- *c. 24. Eccl:*
 te, laconicè interrogare: *hom. de Aff.*
 Quis ve- *B. V. apud*
 strum *Sutrium.*

(a) *Serm:*
Signum
Magnum.

strum fuit sic Sion, id est, *speculativus*, ut Maria? Et quia Marianæ scientiæ radios sustinere non valebunt, subscribamus tandem mellifluo Bernardo (a) qui Deiparam ideo amictam Sole perhibet, quia *profundissimam divinæ Sapientiæ, ultra quàm credi potest, penetravit abyssum, ut quantum sine personali unione creaturæ conditio patitur, luci illi inaccessibili videatur immersa.*

O igitur illustres Christianæ Sapientiæ duces Theologos, qui tantam tamque admirandam nacti estis Magistram! illustres dico; non enim nisi tales evadere potuistis sub Doctrice, quæ sole amicta, cujus pedibus luna substrata, cujus capiti corona Stellarum duodecim circumdata. Felices! quia per vos tanquam minora sidera supremæ Sapientiæ radios, sub umbra Spiritûs Sancti (nè percellerent) exceptos universo dispersit orbi, ut populus, incitiæ nocte ac ignorantia tenebris occæcatus acciperet lumen, lumen ad revelationem abditorum mysteriorum. Felicissimi! quia in
cælum

cælum sublatis, & stellarum numero
 ac magnitudine pro meritis vestris
 coronati, fulgebitis in perpetuas
 æternitates. Ita vaticinor, ita vo-
 bis promitto, qui densas errorum
 tenebras ingenij luce dissipatis, &
 prostratis generis humani belluis,
 Ecclesiæ furijs, patriæ incendiarijs,
 religionis hostibus, Sacrorum præ-
 donibus, profligatis scelera, confor-
 matis Respub: stabilitis fidem, in-
 flammatis probitatem, animatis san-
 ctitatem, omnium denique virtutum
 semina, in mortalium animos pro-
 jecta, confovetis. O quàm pulchrum
 tunc erit firmamentum, in quo tot
 sidera sideribus addita, quasi gem-
 mæ gemmis appositæ collucebunt!
 O quàm nitidum tunc erit cælum,
 in cujus Zodiaco super omnes jam
 jam plenissimè coruscat *Virgo*, Magi-
 stra vestra; flammescit, qui divinum
 pectus in amorem sui vulneravit, Jo-
 annes *Sagittarius*; rutilat doctrina-
 rum firmitate robustus *Augustinus*.
Leo; irradiat diu mutus, sed tandem
 fortissimè immugiens *Taurus* de
 V 2 Aquino;

Aquino; micant, ut spes est, *Gemini* de
 Societate Suarezius & Vasquezius!
 Inardescitisne, AA. amore tantæ
 pulchritudinis; & in regionem tot,
 stellarum flammis illustrem, tot fide-
 reis pyropis interstinctam, desideria
 vestra ablegatis? Imò verò jam ab-
 legastis. Et quia renuitis esse ignes,
 fanatici dicā? an erratici, solidissimè
 insuper fixistis. Vnum tamen ad-
 huc superesse video; ut scilicet om-
 nes omnium Scientiarum & artium,
 seu discipulos seu Magistros, ad
 scandendum Theologiæ verticem,
 humanissimè invitem, opportunè-
 que præmoneam, cælum hoc nemini
 referandum esse, nisi solis Theologis
 & Cantoribus. Cùm enim ibi, sin-
 gulis omnia, sive DEUM suum, pos-
 sidentibus, nulla de meo aut tuo
 dentur litigantium jurgia, nullæ ju-
 ris dicundi occasiones; & beatissimus
 illius vitæ status non admittat ullum
 corruptionis, aut morborum peri-
 culum! nec aliarum artium exerci-
 tia beatis subserviant: non videntur
 habituri cælum Medici, Causidici,
 cate-

cæteriꝑue, artifices; sed soli Theologi & Cantores, qui Deum, ejusꝑue misericordias vel cantent, vel loquantur in æternum. Dixi.

—§§§— §§§§ —§§§§ —§§§§ —§§§§ —§§§§ —

PRÆCONIUM.

QUoniam ex Salomonis sententia, cogitationes iustorum iudicia sunt viro Sapienti, omnino satagendum erit, intra cordis arcana tribunal constituere, rectaꝑue facere iudicia; mentem quoque velut in trutina suspendere, ad ea, quæ conveniunt, & ad quodlibet agendum æquâ lance librare. S. Basil. hom. 12. ad popul:

V 3 O R A -

ORATIO XI.

*MARIA, de actionibus**Christianorum licitis, vel illi-**citis edocta, ideoque**prudens**Magistra Theologiae Moralis.*

Quemadmodum hominibus, cœli terræque amœnitate excitis, contingere solet, ut ubi in circumjacentem patriæ viciniam oculos infuderint, acies eorum ita statim abripiantur, ut in liberrimis amplissimisque terrarum quasi theatris, vel unico tantum intuitu videant omnia, vel in diversa paulatim distractæ cernant cum montibus valles, cum vallibus fontes, cum fontibus prata, cum pratis flores; nullum tamen eorum videri desinat prius, quam se ad hilarem oblectationem inferat alterum: ita dum oculos mentis in amplissimam Theologicæ Scientiæ regionem, quam Dei Mater complexa est universam, coniicio; videre mihi videor jam uno quasi aciei jactu

jactu divinarum rerum scientias in
 ea simul omnes, jam multiplici ad
 singulas deflexione, hinc Divinita-
 tis, ejusdemque præconiorum pro-
 fundam speculatricem, inde vitio-
 rum, virtutum, Sacramentorumque
 arbitram; ibi controversiarum ju-
 dicem, & fidei Magistram; alibi sa-
 crarum litterarum Interpretem, &
 mysteriorum inibi latentium revela-
 tricem. Quomodo enim obsecro,
 AA. cogitanti illam non illico sub-
 iicerentur istæ, cum sint illius præ-
 cipuæ partes, quibus constituitur,
 & hac sola decorum varietate ad
 eam assurgat dignitatem, unde sci-
 entiarum omnium princeps audiat,
 easque tanto despiciat intervallo,
 quanto distare novimus ab humanis
 divina, ab immortalibus mortalia,
 ab infinitis finita, æterna ab interi-
 turis? Licet proinde vos quoque
 non sine ingenti animorum jucundi-
 tate MARIAM, alibi opinionum
 varietate fluctuantes dirigere; alibi
 in fidei articulis nutantes solidare;
 alibi Scripturarum mysteria, sensu

cogitationeque superiora, illustrare, unà mecum videritis, quando scilicet eam super omnes Theologiæ aquilas sublatam, & immensum Divinitatis jubar propiùs intuentem paulò ante conspeximus: quia tamen oculorum nostrorum acies in pluribus divisa, ideóq; debilior fuit, placet illos paulatim deflectere ad singula, & in unam conscientiarum morúmque conformatricem defigere fortiùs, ut eã veneremur affectuosius.

Sed ecce, dum plerósque vestrùm à laudata conscientiarum Arbitra in sui obtutum trahi video, ac ingentem tum auribus tum oculis obijci voluptatem, animadverto simul superesse nonnullos tenebriones, qui, ex nescio qua mentis caligine nondum evoluti, adduci non possunt, ut sibi demum persuadeant, verècundam Virginem, pudicamque Matronam excelluisse in ea scientia, quæ necesse habet quærere nonnunquam de materijs, quæ integro verècundia statu, in castissimi hominis mentem se se insinuare, aut in aliquam

quam imaginationem transire, aut longiori temporis momento cogitationem attinere difficulter possunt. Negant laudari hoc in Virgine à virginum Magistro, Hieronymo dicente : angelicæ puritatis æmulas in corpore velut extra corpus oportere vivere ; decere cogitare cœlestia, non terrena, spiritualia non carnalia, cum picem viscumque tractantes facile inquinantur. Præclara sanè argumenta ! Quasi verò illustrissimus mundi oculus radijs suis cœnum subintrans continuò macularetur ; quasi verò Luna, moderatrix Oceani, profundissimis aquis se se immergens non posset non immadescere ; quasi verò Salamandra transire per ignes sine adustione nequiret, aut speculum objectas rerum turpitudines recipere sine infectione. O quid agimus mortales ! Adeone pingui somniamus phantasmate, Deiparentem fuisse aliquam de plebe mulierum, quæ ex primigeniæ labis fomite contrahendis noxis sunt obnoxiz ? Ergone fugiendarum scien-

tia rerum periculosa est ijs , qui peccare non possunt? An ignoramus Marianarum plenitudinem gratiarum, quæ in MARIA omnem (moralem saltem) confregit potentiam, radendi peccatorum viam, & vel leviter cespitandi? Si castissimam Virginis teneritudinem ad carnalia deflecta sauciat cogitatio, cur disertissima Patrum ora tantopere celebrant integerrimam illam attonitæ mentis quæstionem: *Quomodo fiet istud, quoni-*

(a) *Luc. 6. 2. am virum non cognosco?* (a) Ah credite, A.A. credite, non suo; sed intellectus nostri vitio maculari posse M A R I-

(b) *Cantic. c. 6. A M, quæ sive electa ut sol* (b) *sive pulchra ut luna* ecclypsin subinde patitur, non sui splendoris aut luminis defectu, sed umbrosi hebetiorisque corporis oppositione. Non ego tam impudens sum, ut sentiam, adolescentem Virginem materijs illis animo frequentius inhæsisse, easdémque ab adulta jam Matrona curiosius fuisse discussas, quod studium pauculos fortasse incautos adusserit; hoc solum assero, & contendo, implicatas

Theo-

Theologiæ quæstiones, quæ mores
vitamque concernunt, ab ea felici-
ter explicari potuisse, nec ignorata,
quæ ad illustrandam verecundam
modestiam, ad cogendum in obse-
quia temperantiæ appetitum, ad im-
plendas etiam justitiæ conjugalis le-
ges plurimum conducebant. Quam
in sententiam, etsi alia me destituis-
sent argumenta, id unum sanè per-
traxisset, quòd sciam, tantam scien-
tiæ hujus esse præstantiam, ut eam
Deus amantissimæ Matri suæ negare
non voluerit, quia sexcentas alias
nobilium ornamentorum raritates,
ad orbis totius stuporem, ideo libe-
raliter in eam congeffit, ut dignita-
tum accessione, illius quoque digni-
tas ultra mensuram cumularetur.
Enim verò non ibi de bullis, ampul-
lisque litigantium Grammaticorum;
non de fabulosis mercibus Poëtarum,
supervacaneis parergis Rhetorum,
inanibus argutandi formulis Philo-
sophorum; non de ductis ab Archi-
mede in pulvere lineis, dolio Dioge-
nis, hastili Palladis, cythara Apolli-
nis,

nis, & imaginaria Platonis Republica: sed expenduntur suo pondere, mortalium cogitationes omnes, affectus omnes, amores omnes, motus omnes, actus omnes; num odio an favore, pœnâ an præmio, cœlo an styge digni sint, quique nos in hæreditariam possessionem regni cœlestis introducant. Suspiciamus quândoque, ac principibus, vel eorum ministris dignissimam judicamus scientiam extendendi dominationis limites, capiendi provincias & regna, diffundendi in novam amplitudinem imperia, ipsosque subditos ad augustiorem dominorum suorum maiestatem beandi: & tamen quis nescit, quàm in re caduca torqueant ingenia, exacuent curas, exhauriant vires; & sæpe, dum novarum ditiorum adëunt dominia, è numero vivorum abeunt, simul terrarum domini, & mancipia Libitinæ. Non hoc intendit, quam in Dei-parente propugnamus, scientia; non est mortale, quod optat, Convenientibus rectarum actionum medijs adire docet

docet perennatura cœlorum regna,
 ubi & supremæ felicitatis gloriæque
 fastigium, & divitiarum immensitas,
 & deliciarum æternitas, in præmium
 cedunt ijs, qui media illa edocti vivis
 vitæ coloribus imaginem Christi ex-
 primere sunt conati. Neque enim
 Christianus esse, neque salutem con-
 sequi, neque civilem societatem, &
 quotidianam cum mortalibus con-
 suetudinem tueri potest, qui harum
 institutionum laborat ignorantia.
 Quare iterum iterumque concludo,
 ex moralis Theologiæ scientia non
 tantum relucere præcellentem di-
 gnitatem, sed summam insuper ema-
 nare utilitatem, imò evidentem
 emergere sui necessitatem. Ut nemi-
 ni prorsus negare fas sit, hinc causæ
 meæ tantum ponderis addi, quan-
 tum abundare videtur ad pertrahen-
 dos auditorum meorum animos in-
 annutum. De communi tamen Do-
 ctorum collegio non reputo MARI-
 AM; quoniam eo loci subvectam
 arbitror, ubi Magistros reliquos, qui
 facultatis hujus supremos tenent,
 numeros,

numeros, adæquat, & excedit. Enim verò confixerint alij acutissimis sententijs diffidentium opinionum monstra; MARIA contrivit caput illius monstri, & monstruissimi serpentis, cujus prima dissensionum semina in exitialem posteris sementem excreverunt. Erudiverint alij ad illiciti, licitiq̃ue regulam mortales feliciter; Maria felicitatem hanc suâ supregressa est, ut quæ regulam vitæ nostræ Christum castissimis ulnis toties mensa est, & remensa. Evolverint alij convoluta, referârint clausa, illustrârint obscura; Maria *sublimis puerpera* (a) Veritatem æternam utero suo involutam, evolvit; *Clavis regia Christi* (b) mysteria salutis referavit; *Mater luminis* (c) palpabiles non tantum dubitantium animorum tenebras, sed umbras insuper minimasq; nebulas dissipavit. Profuderint alij sitientib9 divinæ Sapientiæ torrentem, detexerint hæsitantib9 salubria, ruminantibus profunda ordinadæ consciëntiæ consilia; Maria, & superavit illum torrentem, unicam

(a) S. Aug.
ser. 2. de
Assum.

(b) Buteo in
hym: grac:
126.

(c) S. Io:
Damasc: in
hym. de Ass.
sump.

unicam divini Roris stillam, è sinu æterni Patris demissam, in animas fidelium derivando; & saluberrima, profundissimâque consilia suggestit, ut quæ *Universalis Consiliatrix est*, (a) *S. Albertus Magnus.* quæque teste Ruperto (b) *velut Summi consilij princeps omnem novit dissolvere questionem.* (b) *Lib. 6. in Cant.* Ecquidni princeps fuisset consiliorum, quæ pacis principem, & magni consilij Angelum mundo dedit? Quidni responsa illius videri dicique debuerint oracula, quæ ante te sæcula in consilio habitavit, & *eruditis interfuit cogitationibus?* (c) Tunc nimirum, quando tres divinitatis Personæ consilium ineuntes divinisimè concluderunt: *Faciamus hominem ad imaginem & Similitudinem nostram.* (d) Quis ille homo? *Primogenita* ante omnem creaturam Maria. Quod illud prototypon? Dei viventis, & omnia intuentis uberrimus intellectus, ad cujus imitationem uberrius quôq; voluit intelligere Mariam. Dum enim magnus iste rerum omnium opifex vastissimam hanc cælorum terrarumque machinam fœcundâ

dâ intellectûs ubertate conciperet,
 & cælis Solem, Lunam, aliâque de-
 super micantes faculas; in terris verò
 divitem florulentia ac fructuum va-
 rietatem in ornatum designaret; jam
 tunc felicissima Virgo in vivacissimis
 divinæ mentis idæis versabatur; jam
 tunc deliciabatur Dominus cum *an-*
cilla Domini, miraculo cunctorum filiorum,
& filiarum hominum. (a) Et quia cæte-
 ras eminentis naturæ gratias in se
 contraxit, credibile videtur, naſtam
 simul fuiſſe intellectum, ad forman-
 da conſilia perſpicaciſſimum. Atque
 hinc, opinor, Hipponenſium Anti-
 ſtes Auguſtinus *dignam* judicavit, *que*
appellaretur Dei forma; hinc ſine facun-
 diæ popyſm̃is â diſertiſſimis Orato-
 ribus audit ſupremus, inter homi-
 nes, divinæ Sapientiæ partus; eru-
 ditarum præſes cogitationum; *Myſtic*
arcani conſilij; (b) *turris David, ædificata*
cum propugnaculis; (c) vel, ut legit Vata-
 blus: *ædificata, ad uſum dirigendi homines.*
 Quæ omnia non vulgare conficiunt
 argumentum, pretioſiſſimos mora-
 lis Theologiæ theſauros Dei-Parenti
 tunc

(a) B. Rup.
 Abb. l. 2. in
 Cant.

(b) Hym.
 grac. apud
 Raynaud. in
 Nom:
 (c) Cant.
 9. 4.

tunc esse collatos, adeoque in ijs, quæ ad conformem vitæ rationem pertinent, eruditissimam fuisse Magistræ, & Christianæ conscientiæ ducem præstantissimam. Néque discedunt ab hac nostra sententia complures alij, humanâ divinâque sapientiâ conspicui per orbem Doctores. Si enim eorum mentes curiosius disquiram, respondebunt apud Joannem Carthagenam: (a) *Maria illuminatrix est mortalium.* Si interrogem Richardum à S. Laurentio, (b) *reponet: Maria os est Ecclesiæ.* Si percontor Andream Cretensem, juratum Virginis Encomiasten, (c) *dicet: Maria divinarum revelationum fons est, qui exhausti non potest.* Si scisciter ex Methodio fortissimo Christi Martyre, libenter asseret: *Maria fax est fidelium.* (d) Si denique attendam Seraphicæ familiæ jubar Bernardinum, propugnabit ardentem, fieri non potuisse, ut omne omnino etiam levissimum peccatum Maria vitârit, nisi maximam Sapientiam acceperit omnium, & agendorum, & vitandorum, & amandorum, & odiendorum.

X

rum

(a) Tom. 2.
l. 2. hom. 8.

(b) Lib. 12.
p. 1828.

(c) Serm. de
Assum.

(d) In orat.
ad Hypa.
Domini.

rum, & credendorum, & non credendorum.

(a) S. Ber-
nardin: tom.
3. tract. de
B. V. ferm: 7.
4. 3. c. 4.

(a) Ecce causæ meæ patrōnos, argu-
menti præcones, veritatis tubas, &
Marianarum propugnatores scien-
tiarum! Quid ultra exspectatis Audi-
tores? Vultis, addam meridiano di-
ei Solem, Soli lucem, luci radios?
Non eget dies sole, sol luce, néque
sententiæ meæ veritas exaggeratio-
ne. Procurata superflua facundiæ
verba fuci sunt, lumen veritatis ob-
errantes, & non leviter impingentes.
Hæc, ad ipsam pene nuditatem ex-
posita, renuit adscititio sermonis
amictu indui, vel sinuosis perjodo-
rum involucris involvi. Nuda vi-
deri gaudet, amatque semper. Agam
proinde silentiosum quodammodo
Harpocratem, ac torquendis ultro,
fuséque premendis rationibus absti-
nebo, quamvis non una se se mihi of-
ferat in obsequium. Silebo exorna-
tam fuisse Philosophiæ institutioni-
bus, dicere debebam pretiosis unio-
nibus, quibus humanus animus par-
tim ad rerum executionem vehe-
menter illustratur, & sine quibus fun-
ctionum

ctionum nostrarum progressus , tan-
 quam in nocte, dubij trepidique ob-
 errarent. Nihil dicam de præcellenti,
 qua pollebat , tum divinarum , tum
 civilium legum peritiâ , quam soror-
 io quodam vinculo cum morali
 Theologia connexam prudentiores
 agnoscunt, & cujus præsidio non mi-
 nus , quàm Philosophiæ , practicas
 veritates doceri asserit non ignobilis
 Professor Salmanticæ. (a) Non blan-
 diar causæ meæ , quòd sciam ex glo-
 rioso athleta Ignatio , populum co-
 piose avidoque trivisse pede humile
 M A R I Æ limen, & ab ore illius su-
 spensos pependisse , deque Christia-
 ni hominis erudiendis moribus aure
 ac mente sententias excepisse. Præ-
 teribo insignem , & nonnisi magnâ
 gratiæ copiâ comparabilem dexteri-
 tatem absolvendi delinquentes , quâ
 cum pluribus mortalium , quorum
 Absolutio fuit (b), suo modo excelluit;
 præsertim cum Magno Joanne, quem
 non tantum utero clausum , sed insu-
 per originalis peccati nexu constri-
 ctum, & Davidicum illud gementem ;

(a) Hen-
 Henriquez
 in proam:
 summa
 Theol: Mo-
 ral.

(b) S. Ansel:
 alloqui cæli.
 24 & hym:
 gr. apud
 Buteo:

In peccatis concepit me mater mea, felicissimè absolvit. Quid igitur aliud agam, Auditores? Loquar nihilominus, an tacebo? Nè vestrâ abutar audiendi benevolentia, tacebo, & ampliore eloquentiâ dignissima, fixis demum, velut in præsentia mentis oculis, contemplabor. Considerabo serenâ vultûs majestatem venerabilem Matronam, ab ascensu in cælum Filij domesticas inter tenuissimi laris angustias, pro temporum divisione, jam orationi, lectioni, aut manuum laboribus intentam; jam ad explicandos veritatis aphorismos modestissimè confidentem: videbo jam virorum fæminarumque infimos, jam abeuntibus istis adesse medios, quandóque etiam summos consilij capiendi causâ adproperare: observabo alios ad stare mente attonitos, & quasi perplexos urgere dubia, notare responsa; alios abire hilares, laudare documenta, probare confilia, & in eorum amplexum gestiente quadam voluntate proruere: intuebor subinde Virgineam manum, calamo

lamo implicatam, & nec Ignatio solùm, aut Messanensibus, aut Florentinis; sed alijs quoque exarare literas, colligere opinionum varietate distractos, solidare dubios, exonerare scrupulis onustos, adferre conscientijs afflictis solatia, suggerere disciplinam rudibus, directionem errantibus, salutem desperatis: auscultabo denique cum angelis & amicis ejus, quid eruditionis, aut consilij det Filij sui discipulis; *nam etsi Apostoli per revelationem Spiritus Sancti edocti fuerint in omnem veritatem; incomparabiliter tamen eminentius, ac manifestius ipsa Virgo Beata per eundem Spiritum Sanctum veritatis profunditatem intelligebat.* (a) Et ubi tandem ex taciturnis his seu cogitationibus, seu contemplationibus emergero, tum demum, quo licet affectu, qua potero voce exclamabo: O MARIA! *Declaratio sermonum tuorum illuminat, & intellectum dat parvulis,* (b) dat divinorum rudibus, dat vitæ (b) ps. III. melioris imperitis. Tunc demum celebrabo Dei Matrem eruditissimam, humanarum actionum Magistram,

(a) S. Ansel.
lib. de Ex-
cell: Virg:

(a) *Judic.*
c. 4.

virtutum præconem , vitiorum exagitatricem, falsarum aut dubiarum, sententiarum arbitram , errantium, animorum cynosuram , nostræ animam religionis. Favebo posteritati novam Deboram , solertissimam populi judicem , (a) qualem vetus religio non sine veneratione adamavit ; nam quemadmodum illa sublimi pollens ingenio, Numinis afflata Spiritu , cœlestium arcanorum interpretes, multorum triumphatrix hostium, hebræam gentem moderabatur in dubijs, & acri judicio regebat ; ita, imò longè sapientiùs, Maxime Optimi Dei Parens sacerrimis veritatibus plena , solertiâ vivax , providentiâ obarmata , circumspeditione cauta , novellum Christi populum dirigebat, æquitate momentarum ponderando , gerendorum media celeritate mentis suggerendo, notatos futurorum exitus sollicitè denuntiando , & superare difficultates , antevertere hostium machinas, sedare intestinos animorum tumultus, dexterrimè perdocendo. Gratulabor

tulabor illi novam, & fulgentissimam
Columnam ignis, in hoc vastissimo mun-
 di deserto succensam; (a) nam quem- (a) Buses
hym: gr.
p. 122.
 admodum vetus illa judæis, conden-
 sa Canopi nocte circumfusus, illuxit,
 & per itinerum errores, errorumque
 molestias dux fuit in jucundissimæ
 Palæstinæ regionem, lacte & melle
 manantem; ita gloriosissima mulie-
 rum M A R I A, staturæ proceritate
 pulchra, & opulentissimo sole unde-
 quaque amicta, errantibus, ignoran-
 tibusque affulsit, & non tam redivi-
 vas, quàm nunquam plenè mortuas
 Ægypti tenebras in multorum ani-
 mis sua luce disijciens, viam ostendit
 in regionem dulcissimæ ac æternæ
 felicitatis. Prædicabo illi non fabu-
 losam, seu splendidis Poëtarum
 commentis vestitam, sed lucidissimæ
 veritatis candore circumdatam Ari-
 adnam novam, quæ ab amantissimo
 sui, non Dædalo, sed Christo instru-
 cta, per mundanarum fallaciarum
 ambages planissimè direxit multos,
 & deviantes ex errorum aut diversa
 sententium Labyrintho reduxit, tra-
 hens

(a) *Osea*
c. 11.

hens omnes in funiculis novi Adam
(a) sive in filo, non Ariadneæ, sed
Christianissimæ charitatis. Sic enim
loqui ut audeam, facit Hierosolymo-
rum Episcopus Andreas, qui com-
menta veterum veritate correcturus,
errantium ducem celebrat D E I Ma-
trem. *Elegit, inquit, & praelegit eam*
Deus, quæ ab eterno ordinata dicitur, ut
humanum genus ab errorum ambagibus, cri-
minumque cæcis anfractibus liberatum, æter-
nitati, donante Filio, redonaret. (b)

(b) *Apud*
nostrum Le-
on. Sancti-
um præf. 13.
de B. V.

Estne igitur aliquis, qui in via
mandatorum Dei ab aliquo Mino-
tauro, seu informi vitiorum monstro
obsidetur, timétque nè in tyranni-
cam deveniat potestatem? Vix du-
bito. Quotidiani casus, & occasus
clandestinas arguunt inferorum insi-
dias, in quas incauti præcipitamus.
Estne aliquis, quem in arduo ac diu-
turno constitutum itinere deficiunt
vires? Nemo ambigat. Quàm diu

(c) 2. ad Cor.
c. 5.

à Domino peregrinamur, (c) fatigamur,
tanto majore lassitudine, quanto
major est error viæ: & viatores in-
ter sunt non pauci, qui ex hebetē
mentis

mentis perplexitate non progrediuntur ad Dominum; sed stant attoniti, surdiq̃ue canentibus illud: *Non progredi est regredi.* Estne aliquis, cui Labyrinthus intricatis erroribus fa-cessit negotium? nullus interroget. Conscientiæ *labor intus* omnis est; toto nonnunquam conatum, curarúmque impendio exhauriendus. Estne aliquis, qui sine duce hunc vitæ cursum emetiri præsumet, neque suscipiet comitem, cujus fideli ductu in termino laborum, summæque felicitatis apice constituatur? Vix mihi persuadeo. Nam perplexæ sunt plerúmque veræ felicitatis viæ, quas ideo periculosè viator graditur, quia *dux itineris in conspectu non est.* (a) Multum (a) *Psal. 79.* insuper refert, quo duce quis viarum premat ardua. Omne, quamvis liberalissimum, viatici pretium excedit fidelis per infesta locorum ductor; cum præterea verum sit illud: *Væ soli!* Existimo proinde, neminem vestrum esse, Auditores, qui (cùm viatores simus, quotquot sumus) Ducatum respuat; illum præsertim, cui preti-

X 5 um

um fecit sollicita pro nobis MARIA.
 Hæc enim sive Ariadna nobis fuerit
 vera ; per implexos dubiorum mæ-
 andros, ancipites consiliorum flexus,
 sinuosas rerum agendarum ambages
 felicissimè ducet : sive columna ignis
 in hoc deserto illuxerit ; dissolvēt
 cordium nostrorum frigus , exuret
 vitiorum radices , succendet virtu-
 tum flammās , illustrabit intellectu-
 um recessus , deque flammeo suo ca-
 lore, quo velut torpentia corpora in
 diviniorem vitam animemur, libera-
 liter communicabit : sive demum
 habere voluerimus Deboram , con-
 scientiarum nostrarum ducem ; præ-
 muniet nos contra vaferrimos gene-
 ris humani hostes ; succinget verita-
 tis cingulo , teget salutis galeā , ar-
 mabit gladio Spiritûs , cooperiet
 scuto fidei , vel aliquo Persei clypeo,
 crystallino quidem , sed non fragili ;
 ut & vim hostium soliditate materiæ
 sustineamus , & subobscuras eorum
 insidias in forma pellucida dispicia-
 mus, caveamus. Atque ita seu ducti,
 seu illuminati , seu animati ab ea ,
 quæ

quæ est *Dux, Lux, & vita*; (a) terminum promissæ beatitudinis assequemur feliciter, quâ si excideremus, proquantum, quàmque miserabiles essemus *Casuisse. Dixi.*

(a) *S. Io: Damasc. apud Nadasin Ann: Marian:*

—§§§— —§§§— —§§§— —§§§— —§§§— —§§§—

PRÆCONIUM.

Sapientia edificavit Domum suam (*MARIAM*) supra petram, & descendit pluvia, & venerunt flumina, & flaverunt venti (*buccinatores hæretici*) & irruerunt in Domum illam, & non cecidit: fundata enim erat supra petram. Ex *Matth: c. 7.*

ORATIO XII.

MARIA, hæresum, & falsarum opinionum interemptrix, ideoque gloriosa

Magistra Controversiarum.

MA-

MARIA in explicandis fidei
 mysterijs , illiúsque hostibus
 seu gratosè capiendis , seu fortiter
 profligandis locuta est victorias; nos
 ejusdem loquemur gloriam & trium-
 phos , Auditores humanissimi. De-
 cet enim , ut illi debitos tribuamus
 honores , & imortalia, si fieri potest,
 laudum monumenta ponamus , cui
 mortalitas ipsa cessisse jam videtur,
 in trophæum , cùm illam virtute vi-
 vâ, vivisque meritis loquatur adhuc,
 & locutura sit sæculis omni facundiâ
 facundior. Injurius sit, malèque in-
 vidus, aut turpiter ingratus, qui hanc
 honoris speciem Dei-Parenti vel ne-
 get , vel non ferat , vel si felicior ar-
 ridet fortuna , non augeat , non ma-
 gis exornet. Ad nominis propa-
 gandi gloriam annalibus inscripti
 sunt hostium victores Macædones ;
 Poëtarum versibus cantati Agame-
 mnones ; oblivioni subtracti Han-
 nibales ; panegyricis celebrati Sci-
 piones ; marmoreis molibus hono-
 rati Cæsares , profana Nomina ! Sa-
 cratissima igitur majorum hostium.
 tri-

triumphatrix Maria, ipsâ æternitatis animâ animata, necesse habet, ut perennet. Illi præsidium erant suæ nationis aut patriæ; hæc propugnaculum est totius Ecclesiæ: illi ducebant legiones hominum impiorum; hæc aciem ordinabat fidelium populorum: illi contra infestos Reipub. cuneos stabant velut muri aenei; hæc contra hostes fidei velut Turris David, ex qua mille pendent clypei: pugnabant illi bellicarum machinarum robore, ensium acie, sagittarum cuspidē; certavit ista svavissimo verborum pondere, modestissimóque rationum acumine: propulsabant illi avidos provinciarum prædones, invasores, & eversores; hæc ipsa cæli odia, animarum latrones, generis humani probra, inferni monstra triumphavit. Repto proinde: si adeo laboravit antiquitas, ut suorum heroum nomina sœra celebraret posteritas; majori sollicitudine sollicitos nos esse oportebit, ut augustissimam Viraginem, & ingeniosam propugnandæ fidei nostræ

nostræ Magistræ, immortalî loquamur memoriâ, & nunquam interituro honoris monumento honoremus. Verum hîc labor, hoc opus est. Nani si peritam in condendis obeliscis provocemus Ægyptum, ut Marianî nominis celsitudini suam; suorumque addicat operam, & aliquem non tam manibus, quàm ingenio elaboratum erigat obeliscum; frustra videbimur agere: mortalium siquidem opera mortalia sunt, suoque tandem amittunt in interitu. Si cælo æmulam, & historiarum imaginibus insignitam construamus pyramidem; pulchrum etiam opus posuerimus; sed quod unius alteriusve sæculi evolutum tempus lapsu involvet adeo gravi, ut de ruderibus amplius nunquam se se colligat. Si qualia virtus de hostium exuvijs spoliisque comparavit heroibus olim trophæa, talia quoque erigamus hodie Mariæ; necdum meritis ejus, utpote immortalibus, respondebimus, quia etiam ista honoris ornamenta in floccidam abeunt vetustatem, tandemque

demque ab ipsa oblivione trahuntur in spolia. Si denique (quamvis vix aliquid possimus) Romanorum more in triumphales arcus paremus plures de marmore portas , & pensiles in victoriæ laurum suspendamus de floribus hortos ; necdum satisfaciemus contestando Virginis honori , quia & marmora fatiscunt , & flores inter ipsa odorantium oscula flaccescunt , expirantque , dum adhuc spirant. Quid igitur agendum , ubi tentatus honor impar est honorandæ ? Num in magnis voluisse satis est , quando rei apparandæ par nullus est conatus ? Ita quidem videri posset , si hæc ipsa voluntas alia non abundet facultate. Sed voluisse satis non est ; si , quod nequis in ære , marmore , aut metallo honoris trophæum erigere , non erigas in animo , neque insculpas. Simulachra cordium , & voces , plausuum internorum indices , depromendæ sunt , quando exterioris pompæ deest majestas , & sumptuosa structurarum non suppetit magnificentia. Simi-
liter

liter proinde nos agere oportet, AA. vestrosque non oculos, sed animos invitare, quibus erecta in cordibus priorum spectetis trophæa, quæ vel divina Sapientia Dilectæ Matri, vel sacratiores virgines contubernali, vel Sabæi reges Reginæ, vel Apostoli Magistræ, vel Theologi Theophoræ, vel clientes Patronæ, vel universa Ecclesia potentissimæ, atque invictissimæ suæ Protectrici concinnarunt; ut mecum tandem unanimiter concludatis, MARIAM & æquisimam Controversiarum fuisse arbitram, & eximiam docendæ propugnandæque fidei Magistram.

Trophæum primum, primamque gloriæ pyramidem Virgini, seu potius Viragini erectura Divina Sapientia, necesse habuit substernere basim tanto solidiorem, quanto sublimiori fastigio illam erat coronatura, quantoque plura clientum aliorum trophæa eidem erant innixura. Substravisse autem omni ex parte solidissimam, eamque pulcherrimè jecisse, dubitaverit ille, qui nescit, quan-

quantas impenderit vires in forman-
da hac Terra Virgine , ex qua (verba
sunt Andreæ Hierosolymitani) *novus*
Adam , *fictione ineffabili á D E O formatus* ,
et appellatus est , ut veteri Adamo salutem
recuperaret. (a) Nam cum tellurem

(a) *Apud*
Iac. Pontan:
in sermo nono
Deip:

alteram tanta ornamentorum varie-
tate reddiderit formosam , ut huic
parti vernantiam , illi florulentiam ;
huic montium culmina , illi fontium
flumina ; huic auri argentiq̃ue co-
piam , illi fulgentium lapidum pre-
tia ; huic fructuum opulentiam , illi
formosarum arborum nemora con-
tulerit : tum vel maximè censendum
est, terram istam, terram Virginem,

Terram Domini benedictam (b), Terram, de
qua veritas orta est, (c) omni pulchritu-
dinis , ac præstantiæ genere exornâs-
se. Exaltata est, quasi cedrus in Liba-
no, quasi Cypressus in monte Sion, qua-
si palma in Cades , quasi oliva in cam-
pis, quasi platanus juxta aquam in pla-
teis ; ecce viridaria ! Ipsa fuit mons in
vertice montium, exaltatus super colles ; (d)
ecce montium altitudinem ! In me-
dio castissimi pectoris præparabatur

(b) *Arnob.*
in Ps. 84.
(c) *S. Bern.*
serm. de a-
qua ductu, in
Nat. B. V.
S. Aug. in
Psalm. 84.

(d) *S. Greg.*
l. 1. in l. 1.
Reg. init.

Y

ge-

(a) *Cantic.*

c. 7.

(b) *Cartha-**gen: ex Je-**rém. c. 18.**de S. Fulb.**ser. 2. de**B. V.*(c) *Cantic.*

c. 2.

(d) *Cantic.*

c. 1.

gemellus fons lactis virginei ; ecce fontium salubritatem ! *Poma nova & vetera dilecte mi servavi tibi !* (a) ecce fructuum abundantiam ! *Maria vas auri solidum , ornatum omni lapide pretioso ;* (b) ecce lapidum pretiosorum raritatem ! *Flores apparuerunt in terra nostra ,* (c) in qua divinus Sponsus ita sibi complacuit , ut diceret : *Lectulus noster floridus est ;* (d) ecce amœnam florulentiam ! Quid plura ? Denique omnium , quæ Matrem DEI decebant , gratiarum opulentiam , omnium decorum compendium , omnium nominum insignia in se contraxit Maria ; ut dubitandum non sit , eam in solidissimam nitidissimamque basim evasisse plurimorum trophæorum , quibus irrefragabilis credendorum Magistra , & fortissima hæresum interemprix agnosceretur. Si proinde divina Sapiencia omni lapide pretioso sic condecoravit vas electionis MARIAM ; quis non videt , eam non tantum in Sapphiris , sed & in Jaspede fundatam fuisse , adeoque , contra Sanctissimæ Religionis incantatores eni-

enituisse virtute non minore, quàm ipse Jaspis, qui probatâ multorum experientiâ contra quascunque incantationes præpollet? Et nunquid audivimus sæpius Isaiam (a) seu latine dicentem: *Ponam Jaspidem propugnacula tua*; seu hebraicè canentem: *Ponam Jaspidem soles tuos*? Cur Christianæ fidei Doctores, sive Soles & propugnacula, cognomento Jaspidis compellasset, nisi quia vim & robur habent exitiale hæreseos venenum enervandi, & incantantium hæreticorum blandimenta confundendi? Dicamus proinde bona verba Magistræ: *M A R I A fundamentum primum Jaspis*, (b) & singulariter elaborata basis etiam mille pyramidum gloriosarum.

(a) Isa: v. 14.

(b) Apoc. 21. v. 19.

Sed & *lectulus floridus* est *M A R I A*, quem sexaginta viri fortissimi, & in bella promptissimi circumstant, ac obvallant, Res sanè insolens, & facies cubilis regij admiranda. Quid enim in necem paratis cum geniali toro? quid militum tumultus cum loco quietis? quid ferratis pectoribus

bus cum plumularum mollitie ? quid armorum horror cum florum delictijs ? Dicamus iterum bona verba Magistræ. Domum, septem substructam columnis, absolverat Sapientia; huic nè deessent amænitarum illecebræ, florentissimos adjunxit hortos, in quibus lectissimi cæterarum scientiarum crescebant flores : exinde copiosam florulentiam congeffit in lectulum, in quo novem mensium spatio erat cubitura. Et quia satis non est abundare scientiarum floribus, quorum odore mortales trahantur, nisi adsint & arma, quibus hostes veritatis vel retundantur, vel eorum animi configantur ; addidit virorum gladios & enses ; sive, instruxit Matrem suam argumentorum robore, & sententiarum acumine, ut quemadmodum amænissimo teste

Mendoza (a), reliqui in Ecclesia Doctores flores gerunt, Christianorum naribus applicandos, & gladios hereticorum animis insigendos ; ita Doctorum Magistra Christianæ scientiæ flores avidis audientium animis loqueretur ; &, si quando

(a) Fran:
Mendoza in
Viridario
suo.

quando daret occasio, temerarias in fide opiniones rationum puncti-
onibus confingeret. Hoc autem ut
faceret Filius D E I, exigebat ejus in
Matrem oculatissima providentia,
geniúsque filialis; hoc ut mereretur
Mater D E I, fecerunt præstantissimi
elicitæ actus fidei: decet siquidem,
ut quæ præcelluit credendo, creden-
dorum præstaret scientiâ, & dexteri-
tate eadem propugnando.

Constitutâ sic basi tum gloriæ Ma-
rianæ, tum meæ dictionis, aliud non
est reliquum, quàm ut debitas pro-
missâsque moles superstruamus, &
hebrææ Puellulæ, sed maximæ Virgi-
num, fidelissimæ semper credentium
heroinæ, controversiarum dein arbi-
træ, fidei Magistræ, hæresum trium-
phatrici, animarum in libertatem af-
fertrici, multarum victoriarum pa-
renti, trophæa sustollamus.

Age igitur, O Maxima, Augustis-
simâque divinæ mentis soboles, Sa-
pientia; erige unicum, & erit mille-
norû compendium. Extrue primum,
quod in Dei mente solùm concepta

promeruit, & excedet aliorum omnium, quæ evanida veterum heroum arrogantia expetere potuit, pretia & æstimationem. Advertite mentis oculos, AA. Ecce producuntur in altum exanimes, flaccidæq; virulentissimi Reguli cristæ: suffigitur truncum horrendi draconis corpus: suspenduntur, lorice instar, exuvia squamvis asperæ serpentis: extenditur sibilis exercita, sed exarmata incantantis blandumque loquentis viperæ lingua: subnectuntur acuti in lethalem morsum multiplices gulosæ bestię dentes, qualibus etiam dentati nostri parentes vetitum invaserunt fructum: exhibentur seu noctibus seu ictibus infames semi-hominis Basilisci oculi, qui eorundem corda statim ac tacta sunt, everberarunt: apponitur obscurum turbulenti ac seditiosi cerebri latibulum, caput: compingitur inferna structuræ parte, manibus post terga revinctis Insipientia, Ignorantia, Hæresis, Superbia, Inobedientia, Gula, & tota Iniquitatis progenies: loquitur demum

demum basis ipsa inscriptam à Sapi-
 entia epigraphen : *Super aspidem & ba-
 filiscum ambulavit , & conculcavit leonem
 & draconem.* (a) Quid luculentius ad (a) *Ps. 90.*
 causæ meæ veritatem ? quid solidius
 ad suscepti argumenti robur ? quid
 illustrius ad Marianæ laudationis
 splendorem ? Ista perfectò relatæ vi-
 ctoriæ insignia, virtutis decora, æter-
 næ gloriæ monumenta jure quodam
 optimo debebantur Dei Matri ; si-
 quidem ipsa callidum illud , & versi-
 pelle caput , unde omnium hæresum
 malitia in humanum genus diman-
 avit , non tantùm innoxie inambula-
 vit ; verùm etiam ijs ipsis innoxijs
 pedibus prorsus contrivit, nullo un-
 quam errore decepta ; sed ad con-
 fundendos errores ingeniosissimè
 concepta. Vive ergo ! sic vive in
 Deimente ! sic demum vive nobis
 felicissima viventium MARIA ! Vive
 ab omni posthac errandi periculo
 eximia ; cùm contra summum hæ-
 resiarcham , legem Dei vaferrimè
 controvertentem adeo gloriosè sub-
 stiteris ! Vive erronum impugnatrix

fortissima, contra sciolos doctissima, contra robustos dexterrima ! & quia etiam nata in multorum mentibus inertes errorum tenebras copiosis doctrinarum tuarum radijs dispulisti; admitte tibi referri debitæ gratitudinis & venerationis affectus, quibus te mortales alij sunt prosecuti.

Intra Sanctissimos templi Hierosolymitani parietes habitaverat tennerrima hæc Virgo, ut â mundi tumultibus abstracta, Deo, quo nihil sibi voluit esse præsentius, quodammodo foret vicinior, & formatis ad omnem sanctitatem vitæ actionibus, ipsius Divinitatis tandem evaderet Sacrarium. Cupidissimis amplexibus ibi prensabat virtutes omnes; & virtutum quælibet pro ea, & in ea concurrebat, quælibet eminebat. Magna in moribus gravitas; sed non minor in animo humilitas: explicata in conversatione humanitas; sed non contractior in gestibus maturitas: amabilis in aliarum virginum contubernio taciturnitas; sed non minus

minus grata in eodem affabilitas;
ardentissimus in Deum amor; sed
non remissa in proximum charitas,
& Zelus animarum; *erant* siquidem,
teste D. Hieronymo, *ei curæ Sodales;*

quibuscum vivebat. (a) Unde factum, (a) *S. Hier:*
ut siquando eas inter (quod fieri *tom. 4. ci-*
pronissimum est) sinistrarum opinio- *tatus à Ri-*
num pullularent herbæ, ipsa convel- *bad. in festo*
leret; si proderetur in tractandis fi- *Præsent:*
dei mysterijs ariditas, ipsa credendo-
rum articulorum instillaret succum;
si adverteretur in nondum bene in-
structis puellis Religionis ignoran-
tia, ipsa subigeret, sicq; â florente æ-
tate floridas reportaret corollas Ma-
gisterij. Et quid aliud referret Vir-
go â virginibus? Etiam Romanis vi-
ctoribus laureæ dabantur & coronæ.
Etiam florido apparatu illustrium
insignia, vel facta exprimi possunt,
aut celebrari. (b) Ille demum trium-
phus gloriosior est, quem sinceri *(b) P. Bapt.*
suorum affectus & facultas extruunt. *Ferr: in Flo-*
ra l. 4. c. 2.

Floream proinde pompam effin-
xerunt, & in animis suis spectandam
proposuerunt virgines, quâ ostende-

rent, non tam de ignorantia mentium, quàm in floribus cordium suorum triumphasse M A R I A M, sibi-
 que totas devicisse, ac devinxisse. Structuram advertite. Fundum latè tenebant semper aliàs in demissione crescentes, & sublimitatum nesciæ, multiplices violæ, viva doctæ humilitatis simulachra: ab his erigebant se se nativo in murice ardentes, hor-
 torum principes, rosæ, luculenta exercitæ charitatis symbola: medium conficiebat multicolor, & in altum vergens florum concinnè ligatorum Sylvula, quæ Fidem & Pietatem, Modestiam & Temperantiam, Spem & Prudentiam, similésque Nazareæ Virginis virtutes insinuabat: inde cum hyacinthis porrigebantur sursum candidissimis folijs formosa lilia, integerrimarum virginum insignia: in cuspidem abibant amænæ florum sorores, irides, quæ quia pulchra proceritate virides foliorum suorum mucrones solent transcendere, Fortitudinis & Patientiæ fuerunt indices: fastigium deniq; ipsum
 coro-

coronabat insolitæ magnitudinis Rosa, supra horridulos, & corollarum undiq; baiulos ramos eminens, nec aliud loquens, quàm victorias, quas virginum Virgo tunc sibi peperit, quando contubernales suas odore scientiæ traxit, & fidei ignorantias, hinc inde pullulâtes, doctrinarum aculeis ingeniosè confixit. Totam hanc florum machinam instar trophæi positam, similem fuisse illi floreæ pompæ ferculo, quod in Flora sua exhibet Ferrarius noster, (a) mihi liceat imaginari, simulque credere, vehementer placuisse Virgineo cordi, cùm etiam in gratissimis puellarum cordibus fabricata fuerit, & Marianum fidei magisterium non obscure comprobârit.

Sed & aliorum conatus apud Matrem gratiæ fuisse gratiosos, omnino persuasum habeo. Plausum proinde tulerint, quæ Serenissima Orientalium regum trias pro affectûs amplitudine honori Magistræ suæ concinnârunt; plausum, quæ felicissima Dei - Hominis soboles, & Chri-

Christiana fidei præcones Apostoli;
 plausum, quæ adultior, & â devotio-
 ne celebrior mulierum sexus; plu-
 sum, quæ mortales alij, quos ipsa
 vel averfos â fide studiosissimè con-
 vertebat, vel roboratos magis cor-
 roborabat, (a) in grati animi signi-
 ficationem adornarunt. Ego enim
 sic existimo, Regios illos hospites,
 qui ab extremis mundi partibus ob-
 lequiosi advenerant, non prius in
 sua dimissos regna, quàm arcanis fi-
 dei fuissent eruditi, & argumentor-
 um robore ad confundendam gen-
 tilem stoliditatem, convellendam
 Deorum multitudinem, propugnandam
 unius Numinis augustissimam
 Triadem solidissimè obarmati. Hoc
 autem â Sanctissima Matre præstari
 potuisse faciliùs, quàm alia ratione
 insolita, ideoque præstitum, enuntio
 perlibenter; tum quia suspicor sic
 voluisse DEUM, cui doctissima
 scholarum Lycæa id, quod in hu-
 manis faciliùs est, censent plerùm-
 que tribuendum; tum quia profusi
 in Mariana encomia Patres eam vo-
 cant

(a) *P. Ribad.*
in vita B. V.

cant *Magistram gentium* ; (a) tum quia ^{(a) S. Aug.}
 decebat , ut qui *apertis Theſauris ſuis*, ^{ſer. 6. de}
 etiam Matri DEI, *obtulerunt munera*, ^{Nat. B. V.}
 theſaurum neceſſariæ Scientiæ ab ea
 referrent ; quique *in lumine fidei &*
ſplendore ortus ejus accurrerant , in lu-
 mine fidei ad propria reverterentur.
 Sed quod demum trophæi genus de
 diſcuſſis gentilitatis tenebris , deque
 ſubacta unius Numinis ignorantia
 reduces apparârunt ? Cogitari po-
 teſt, Auditores, oratione exprimi vix
 poteſt. Suſpicor tamen ad celebran-
 dam Mariæ ſapientiam , auro alias
 â Sapiente comparari ſolitam (b) ^{(b) Prov.}
 erexiſſe trophæum aureum, quale Q. ^{c. 8.}
 Cæcilio Metello adſtruunt hitoriæ ;
 (c) ad declarandam verò , quam un- ^{(c) Alex. ab}
 dique ſummam ſpirabat , devotio- ^{Alex. l. 1.}
 nem, venuſtè interpoſuiſſe thuris co- ^{c. 22.}
 piam, quia *odor veſtimentorum* ejus ſicut
odor thuris ; (d) ad conteſtandâ tener- ^{(d) Cant:}
 rimam dilectionem , quâ in Deum. ^{c. 4. v. 14.}
 Filium ferebatur Mater, addidiſſe fa-
 ſciculos mirrhæ , quia ipſa de irrigui
 pectoris ſui ſarcinula dicit alicubi :
Faſciculus mirrhæ dilectus meus mihi. (e) ^{(e) Cant:}
 Sed ^{c. 1. v. 13.}

Sed etiam hæc loqui possumus , non eloqui ; premere , non exprimere ; ornare facundiæ nitore , non exornare. Quid igitur agendum est ? Pridem dixi. Cogitari possunt à fœcundis magnarum cogitationū hominibus, ut eorū magnitudini detrahatur nihil ; de causæ tamen veritate nemo debet dubitare. Quod dum vos facitis , ego dictionis meæ cursum eò dirigo , unde novum Mariani magisterij argumentum eruamus , novūque gloriæ trophæum. fidei Assertrici gratulemur , prædicemus.

Apostolos, & Christianæ historiæ Scriptores in Religionis nostræ mysterijs, post ascensum in cælos Magistri, fuisse à magna Matre institutos, & non rarò ingentes difficultates ab ea subactas , sive in primo illo , cui saltem non procul abfuit, adolescentis Ecclesiæ Concilio ; sive in privatis contra hæreticam pravitatem consultationibus ; sive in alijs explicandarum tricarum occasionibus, testantur Sanctissimi juxta ac facundissimi

diffimi Oratores, Hieronymus (a) (a) Serm. qui de Aff: b) De Ex- cell: V. c. 7. (c) Pat. tit: 15. c. 19. (d) Serm. 5. de Assum: (e) In Con- templ. B. V. c. 3. (f) Traff. 2. in Ma- gnif: (g) Lib. 11. in Cant: 1. (h) Ser. 2. de Nat. Do- mini. (i) In S. D. 16. c. 2. (k) Lib. 2. de laud: B. V. (l) Lib. 2. de Emman: p. 2.
 Anselmus (b) Antonino (c) Ildephon-
 sus (d) Idiota (e) Gerson (f) Ruper-
 tus (g) Evsebius Emiffenus (h) Dio-
 nyfius Carthusianus (i) & utérque
 Richardus à SS. Laurentio (k) & Vi-
 ctore. (l) *Licet enim Apostoli per Spiri-*
tum Sanctum omnia cognoverint, & in
omnem edocti pervenerint veritatem, ut lo-
quitur purpuratus Pater; existimat
nihilominus cum laudatis etiamnum
Authoribus, ac præsertim cum Ilde-
phonso, eosdem Apostolos cum Ma-
ria, de mysterio Incarnationis, in-
fantia Christi, similibusque doctrinæ
nostræ articulis contulisse frequen-
tius, ac velut discipulos Magistræ
consuluisse; ut, quæ posteritati con-
signaturi erant, luculentè testata, &
quæ in terrarum angulis prædicatu-
ri, autoritate Sedis Sapientiæ ha-
berent roborata. Verùm quod Mi-
nerval, quæ merces, quis magisterij
honor tantæ cessit Magistræ, quodve
memoris sempérque durantis officij
argumentum posuerunt discipuli?
Num pro floribus doctrinarum, flo-
res

- res animorum suorum regesserunt in sinum ejus, vel eosdem ligaverunt, in ferta, vel se ipsos coëgerunt in laurum, Sacro Virginis vertici impli-
candam? Ita quidem: Corona Magistræ discipuli, quemadmodum *Corona senum Fili*; (a) non stitit tamen, hic promptissimus eorum animus; non corona solùm esse voluerunt, sed insuper insigne trophæum, quale Romanis olim Græcisque victoribus sollicita patriæ gratitudo statuit, quando deficiente auro, marmore, vel ære, in proceris arboribus, frequenti ramo truncatis, victoriæ insignia suspendere, vel inscripsere. (b)
- (a) *Prov.*
c. 17. *Alex: ab Alex:* *Verbo fidei* (ait S. Gregorius Nyssenus) *plantavit paradisum malorum puniceorum, cedrorum, reliquarumque arborum Maria,*
- (b) *Apud Laur. Chrysost. p. 1. Mundi Mar:*
D. 17. (c) dum fidei nostræ apices explicando, implexosque difficultatum nodos docta facilitate dirimendo, Apostolos adeo immutavit, ut non nemo dicere fortasse potuerit: *Video homines, velut arbores, ambulantes.* (d) Et quorsum ista tam mirabilis Metamorphosis? Nimirum, ut in his arboribus, cedris,
- (d) *Marc.*
c. 8.

cedris, & malis, à tyrannide variè truncatis, concisis, sectis, & confixis, gloriosa doctæ defensæque fidei trophæa statuerentur, feris locutura posteris; imò æternùm duratura, quia in cælestem paradisum translata arbores, suo nunquam deficient vigore. Vivet igitur etiam æternùm gloriosissima fidei, & controversiarum arbitra Maria! Vivet in discipulis Magistra, in victoribus victrix, in triumphantibus triumphatrix! Vivet denique in sui præconibus talis, qualem hodie imbecillis eloquentiæ conatu exhibere contendo, & vos pronissima cordium inclinatione jam creditis, ac veneramini. Et verò laudabiliter. Quis enim in hoc non consentiret magnificè, in quod nobilissima totius orbis Ecclesiæque pars magnificentissimè conspirat, & non nominibus tantùm condecorat, verùm etiam exquisitis trophæis contestatur? Certè gravissimus Patrum & Theologorum Senatus, Marianam primipilorum Ecclesiæ pietatem æmulaturus, cùm adverteret,

Z

teret, adeo validum fidei munimentum esse Mariam, ut omnes hæreticorum insultus in eo fracti conciderent ! viderétque ex veterum figurarum umbris prodire tandem in veritatis lucem Davidicam illam turrim, ædificatam cum propugnaculis, & mille clypeis, ex ea pendentibus, ornatam ; (a) illico arripuit calamos, & inscribenda singulis elogia concinnavit. Et primus quidem (si opinari sic licet) fuit magnum illud Areopagi fidus, & domesticum Athenarum lumen, Dionysius, qui divinæ Maternitatis excellentiâ percussus cum non posset salva fide scribere : M A R I A D E A, saltem scripsit : *Maria Dei Mater*. Hunc prope secutus, fortis pro Christiana Religione pugil, Ignatius, Matris & Filij discipulus, expressit sequentia : *Nostre Religionis Magistra*. (b) Utrumque Patres alij unanimi, religiosâque pietate imitaturi, & Marianorum titulorum seriem ordinaturi, reliqua consignârunt oracula, quibus orationis meæ veritas tum spectanda, tum

(a) *Cant.*
6. 4.

(b) *S. Ign.*
Mart. Epist.
1.

tum legenda non obscurè proponitur. Legite, quæ quondam in Ecclesiæ luce calamo exarata reliquerint singuli. S. Athanasius: *Interemptrix hæresum*; (a) S. Ildephonsus: *Signaculum fidei*; (b) Gregorius Thaumaturgus: *Fidelium stabilimentum*; (c) Andreas Cretensis: *Vivum fluentum fidei nostræ*; (d) Cyrillus Alexandrinus: *Sceptrum, & norma Orthodoxæ fidei*; (e) S. Epiphanius: *Virgo, quæ fidem ter optatam orbi prædicasti*; (f) Guilielmus Abbas: *Virgo, quæ cum novitijs fidei sacra miscebat colloquia*; (g) S. Rupertus: *Magistra necessaria, quæ viva voce omnem necessariò tenendam demonstraret regulam fidei*; (h) S. Antoninus: *Virgo, quæ cunctas hæreses profligat non secus, ac Scriptura refellit*; (i) Angelus S. Brigittæ: *Omnium in fide catholica Perfectissima roboratrix*. (k)

Spiritus dicendi me deficeret, vósque audiendi promptitudo, si reliquorum texerem catalogum, & pro causa referrem elogia, quorum fundamenta Dei-parentem non leviter tunc informaverint, quando Sapien-

(a) Ser. de
Deipara an-
te 1300. an-
nos

(b) Ser: 4.
de Assum:

(c) Apud
Ioan: Car-
thag:

(d) Ibidem.

(e) Hom. 6.
contra Ne-
stor.

(f) S Epiph.
orat: de laud.
3. V.

(g) Apud
Delrio in
Cant.

(h) Lib. 5. in
Cant.

(i) Par. 4.
tit. 18. c. 12.
§. 9.

(k) In serm:
quem S. Bri-
gitta dicta-
vit.

tia æterna, universos scientiæ Dei thesauros secum ferens, virginei locum uteri occupavit. Verumtamen imperare mihi non possum, ut mellissimæ Patrem eloquentiæ, Virginis-que lactentem Bernardum penitus omittam, qui cum Authorum torrente, potissimum quidem de triumphantis MARIE contra hæreses suffragationibus; non obscure tamen etiam de fidei scientia, quæ Viatrici ab ascensu Filij Magistræ inerat (a) eruditè differens, facundo testimonio adstipulatur. Animadvertite, quâ verborum soliditate nostram sustineat veritatem: MARIA, inquit, sola contrivit universam hereticam pravitatem. Alius enim, de substantia carnis sue Christum non edidisse, dogmatizabat; alius, non parvulum peperisse, sed reperisse, sibilabat; alius, vel post partum viro cognitam blasphemabat; alius, Dei Matrem audire non sustinens, magnum illud nomen Θεοτόκου sugillabat: sed contriti sunt insidiatores, conculcati supplantatores, confutati derogatores, & beatam eam dicunt omnes generationes.

(a) Theoph.
Rayn: in
Glossario No-
menclatoris.

(b) S. Ber:
serm: Sign.
Magnum.

(b) Ita, ita, O Melliflue Bernarde!
jacent

jacent etiamnum illa cœli odia, terræ
 probra, orci rabulæ, Marcionitæ,
 Carpocratiani, Ebionitæ, Helvidia-
 ni, Apollinaristæ, Joviniani, & simi-
 lia Ecclesiæ monstra; jacent convi-
 cti, prostrati, â *forti Bellatrice* (a) pe- (a) *Apud*
 nitus contriti; & superest aliud ni- *Theoph.*
 hil, quàm probrosa eorum nomina, *Rayn. in*
 pudoris victimæ, putida, fatidâque *Glossario.*
 memoria: sola interim Virgo cani-
 tur triumphis, cumulatur palmis,
 coronatur laureis, & sumptuosissi-
 mis per orbem trophæis honoratur.
 Dicite enim, amabo, quid sunt nu-
 mero quasi innumera, magnitudine
 augusta, vastitate capacia, artificio
 stupenda, divitijs ditissima templa,
 Deo, in honorem Matris, constru-
 cta, quorum in solo mundi centro,
 Roma, quadringenta numeravit An-
 dreas Fulvius; (b) ab uno Hispaniæ (b) *Lib. de*
 Rege duo millia Mariæ dicata, scri- *Antiq. Vr-*
 psit Hieronymus Blanca? (c) Dicam *bis.*
 pro vobis breviter: Sunt fidei & (c) *In Com-*
 Marianæ virtutis trophæa. Quid sunt *ment, rerum*
 templorum sacella, sacellorum aræ, *Arragon. ad*
ann. 1235.

ararum statuarum anathemata, à Monarchis, Regibus, Sacris Præsulibus, Toparchis, Civibus, & omni hominum genere religiosa liberalitate oblata, & appensa? Sunt fidei, & Marianæ virtutis trophæa. Quid sunt in amplissimis urbium foris erecti colossi, eductæ pyramides, excisi obelisci, expositæ pro ædium, tum sacrarum, tum profanarum foribus imagines, aut lapidea Virginis simulachra? Sunt fidei, & Marianæ virtutis trophæa, quæ parthenia opulentorum hominum pietas ideo in publicum extulit, ut si pronæ in laudes linguæ aliquando deficerent, ipsi lapides loquerentur encomia, quæ populorum Regina, regnorum Præsidi, & fidei ac totius Ecclesiæ Fundatrici

(a) S. Cyrill.

hæm: 6. cont:

Nestor.

(a) jure debentur irrevocabili.

Quanquam quid ab ingrato timeamus silentio, cum Ecclesiæ militantis ea sit felicitas, quâ omnem sui interitum exclusura sub excidium orbis abibit è terrestri militia in triumphos

phos cœlestes, & tota æternitate Deiparæ accinet, quod in ejus templis sub suavissima instrumentorum Symphonia, non sine pia voluptate auditur frequentius : *Gaude Virgo; cunctas hæreses sola interemisti in universo mundo !* Magis fortasse increpandæ sunt officij nostri moræ, quòd in tanta Marianæ gloriæ studentium frequentia segnes simus adhuc, nec præeuntium vestigia simili legamus affectu; cùm tamen in ea vivamus fidei serenitate, quam post bellorum nubila, & hæreseon tenebras explicuit Dei Mater.

Verùm quis segnitatis nos arguat, qui pleno virium impendio in id unum hodie connitimur, ut gloriosissimæ hujus Matris & Magistræ triumphos exponamus & cumulemus. Erigite oculos, mentémque Auditores, dum nos trophæum erigimus, quo vestram, & posterorum imitationem provocamus, facti quoque imitatores veterum, qui non tantum

hostium exuvias; sed ipsa etiam heroum suorum arma, memoriæ alendæ monumentum, proponebant. Ecce igitur *Scutum* robustissimum.

(a) S. Paul.
ad Ephes. c. 6.

(*Scuto fidei* (a) Christianos obtegi oportet) in quo hæreticorum sagittæ innoxie sunt exceptæ, ac vel confractæ, vel dissipatæ, vel in capita impetentium retortæ! Ecce *Loricam*, impenetrabilem, quâ contra fidei hostes Matrem suam Deus induit, ut â timoribus domesticis semper esset liberrima, & ab insultibus externis penitus immunis! Ecce *Galeam salutis*, sub

(b) S. Greg.
ser. 7. l. 8.
Ep. 21.

qua *Caput omnium bonorum* (b) modestissimè certavit cogitationum subtilitate, conceptuum acumine, & pondere sententiarum! Ecce *Gladium Spiritus* acutissimum (quid enim DEI Verbo ingeniosius?) cuius acie ingeniosos difficultatum nodos expedit, cuius cuspide plures abiecti, & errorum pœnitentes! Ecce *Lampadem* lucidissimam, honori Virginis æternum arsuram; nam & illa in fidei tenebris *Lampas splendida*

(a)

(a) mundo fuit, eritque nobis *Lampas inextinguibilis* (b), quia non solum semper durabit, illo subministrante oleum, cujus nomen *Oleum effusum*, Filius DEI; sed insuper Filio Mater condurabit æternum, cujus nomen idem significat, quod *Illuminata*, seu *Illuminatrix* MARIA. (c)

Adeste proinde, quotquot stertitis errorum nocte involuti hæretici; adeste, quotquot gemitis dubiorum multitudine perplexi Catholici; adeste, quotquot estis sinceræ fidei, & æternæ salutis studiosi; adeste, quotquot cupitis in controversis Religionis nostræ mysterijs amplius erudiri discipuli: hæc *Lampas*, sive *Luminare*, minus vult præesse hæreseos nocti, ut errore captos abstrahat potestatibus, & rectoribus tenebrarum; hæc *Lampas* liberale promittit oleum, quo in fortissimos fidei athletas ungantur quàm plurimi, & nulli unquam succumbant luctatori; hæc *Lampas* copiosam studentibus diffundet lucem, ad elucubrandos credendorum articulos, & illustrandas

Z 5 arcanor

(a) *Buteo hym. gr. p. 132.*

(b) *S. Cyril. Alex: l. 6. c. 6. cons. Nest.*

(c) *SS. Patres apud Carthagen: tom. 2. l. 2. hom. 8.*

(a) *Albero.*
Mag. in
cap. 7. Com-
ment. in
Lucam.

arcanorum obscuritates; hæc denique Lampas, seu *Illuminatrix* MARIA communicabit discipulis suis de amplissimo illo lumine, quod, teste Alberto Magno, vel rationis studio, vel contemplationis oculo, vel angelorum apparitionibus, vel cœlestis Legati discursu, vel Dei revelationibus, vel virtute Spiritûs Sancti, vel inhabitatione ipsius Incarnatæ Deitatis sibi comparavit, ut non tantum in cœlis exuta mortalitate, verum etiam in terris vitalitate vegetâ, inter applausus, in Magistram redundantes, magnificè celebrentur *Doctores Illuminati*. Dixi.

—£££—£££—£££—£££—£££—£££—

PRÆCONIUM.

Omnis Scriptura, divinitus inspirata, utilis est ad docendum, vel arguendum; ad corripiendum, ad erudiendum in Justitia, ut perfectus sit

*sit homo DE I, ad omne opus
bonum instructus. S. Paulus 2.
ad Timoth. c. 3.*

ORATIO XIII.

*MARIA vas electionis, vero
Sacrarum litterarum sensu abun-
dans, ideòque*

Magistra Sacra scriptura.

SIquam fulminatus è cælo Paulus
Stituli magnitudinem ab increati
Verbi desuper insonantis, facundiâ
olim accepit, ejusdem eloquentissimi
Verbi Parenti hodie tribuero, eam-
que obsequioso dicendi conatu cum
D. Cypriano (a) *Vas electionis* compel- (a) *Serm. de*
laverò; nihil contra honoris alieni *Nativ. Chri-*
prærogativam, nihil infra augustam *sti.*
tantæ Matris dignitatem, nihil su-
pra rerum credibilium fidem, nihil
extra obligationis meæ limites vide-
bor pronuntiare, Auditores huma-
nissimi. Etenim si geminus ille Apo-
stolorum princeps, & gentium Do-
ctor

etor elogij hujus eminentiā ideo pro-
meruit, quia portaturus erat sacra-
tissimum solummodò Nomen coram
gentibus; vel quia ex mente D. Hie-
ronymi, *legis ac Scripturarum Sanctarum*

(a) *Epist. ad
Paulinum.*

erat *armarium* (a); cur non eādē com-
pellatione ausim prædicare Mariam,
quæ non tantum Nomen, sed ipsum
etiam Nominis gerulum, JESUM,
ulnis sinuque gestavit coram genti-
bus & Judæis; quàmque *armarium*

(b) *Chrysipp.
orat. de Desp.*

(c) *Rupert.*

l. 4. in Cant.

(d) *Adam*

de S. Viator.

in prosa de

Assump.

(e) *Greg.*

Neocæs. orat.

2. de An-

nunt.

(f) *B. Laur.*

Justin. ser. de

Nat. B. V.

vite (b) seu vivæ Legis; & *Sacrarium*

Scripturarum sanctarum, (c) & *excisum*

manu Sapientiæ (d) *Vas mysteriorum omni-*

um, (e) & *arcam testamenti* tum novi tum

veteris (f) in illustrium nominum

congerie sacri vocitant Encomia-

stæ? Non derogatur commendan-

dæ rei præstantiæ per titulos pluri-

bus communes; nec irrogatur com-

mendato injuria, si quam indeptus

est laudem, eandem facinorum socijs

finat communicari. Communia

fortiuntur encomia, qui communia

concinnandis encomijs submini-

strant argumenta.

Verum

Verum satis non est obsequi paratissimo animo, ad Mariani Nominis propagandam gloriam illustre aliquid, sed commune ac vulgare excogitasse; nisi etiam ejusdem, quæ cæteris præferenda est, dignitati singulare, augustum, & eximium quid proferas ad venerationem. Turpe est, ab alijs mendicare, dum in proprijs eloquentiæ campis fodere valens orationis tuæ habere potes nutrimentum. Attolle supra cætera vasa gentium Apostolum; & supra Apostolum facile emerget illa, quæ una creaturarum excellentiam & comprehendit, & excedit. Quid est igitur, quod purpuratus Doctor eum *Scripturarum* vocet *armarium*, indèque apud Paulinum non vulgariter insigniat? Nunquid etiam reliquos Apostolos, universi terrarum orbis magistros (a) plenos esse oportuit, divinis Spiritûs Sancti oraculis, & vetus ac novum testamentum *in luce Domini illuminare*, (b) seu interpretari? Nunquid Philippus magnus, (c) vel potius animorum magnes, & Apostolici

(a) S. Chrysostomus in Matth. c. 23

(b) Idem. hom. in Ps. 37.

(c) Metaphrastes.

(a) *Carth-*
fian. apud
Anton. de
Escobar.

(b) *Aster.*
c. 2.

stolici collegij *Primogenitus*, (a) reconditos habuit sacrorum voluminum sensus, quos & potenti Evnucho reginæ Candacis, & rudibus Samariæ populis exponeret, ac enodaret? (b) Nunquid Petrus & Joannes, ille ad abditissimarum rerum claves, iste ad intimos Ecclesiæ cancellos præpositus, necesse habuerunt Christianorum dogmatum fontes referare, si sacris undis lavare voluerunt aterimas infidelium turbas? Quomodo ergo demirabimur Paulum, quasi augustiore titulo supra cæteros eventum, dum ob insignem legis ac Scripturarum intelligentiam, *Vas electionis* meruit appellari? Audite plurimum sensa animorum. Gentium Doctor, qui non unius, aut alterius regionis errores confutaturus erat, nec in una, aut altera mundi, diversa credentis, plaga populis & Regibus Christiani nominis mysteria explicaturus, tanto debuit ampliori scriptæ veritatis scientiâ repleti, quanto plus ad complanandas æternæ salutis vias erat deprompturus. Pro-

batis

batis argumentum Auditores ? Hæ-
 sitandi certè , ac judicij suffragium
 suspendendi causam vix habetis. Ni-
 si fortè Petri reverentia pectus ve-
 strum adeo occupâsset , ut quia eum
 Ecclesiæ caput , Apostolorum verti-
 cem , commune Spiritûs Sancti ora-
 culum , potestatis divinæ arbitrum ,
 sumum in terris Sacerdotem vene-
 ramini , sacras quóque diphtheras
 profundius cæteris inspexisse , ac ful-
 gentissima arcanorum lumina exin-
 de hausisse , propugnetis. Sed ani-
 madvertere oportet , quid hîc vete-
 rum etiam monumenta Patrum , nul-
 lo in Ecclesia DE I censorio notata
 calculo , loquantur posteritati. O-
 rigenes , antiquissimus juxta , ac do-
 ctissimus author , litteraturam Petri
 cum Joannis conferens , properâ-
 runt , ait , utérque , inspecturi monu-
 mentum Christi , seu (ut explicat) divi-
 nam Scripturam ; in qua divinitatis & hu-
 manitatis ejus mysteria densitate littera , ve-
 luti quadam petrâ muniuntur ; sed Joannes
 præcucurrit citius Petro : acutiùs namque
 atque velociùs intima divinarum apicem
 secreta

(a) Orig.
hom. 2, in
div:

Secreta penetravit. (a) Si Petrum aliquo post se reliquit intervallo Joannes; si Joannem explicandi saltem claritudine vehementiâque superavit, Paulus; cur non Paulum & perspicuitate interpretandi, & profunditate intelligendi dicamus inferiorem illâ, quæ ipsius Spiritus Sancti fuit Sponsa, sapientissimâ Dei mente ab æterno ordinata? Non audiar, AA. sed ad severissimû Marianæ pietatis judicium postuler, si hodie omnium Interpretum Ducem coluerim alium, quàm M A R I A M.

Frequentare celeberrimam artium scholam, nec tamen ad insigne incrementum proficere; in Sacerdotalium disciplinarum penetralibus ingeniosam ætatem consumere totam, & ad orbis stuporem non erudiri; donari amplissimis scientiarum thesauris, nec ditescere; potari vino, quod ipsa Sapientia proritando suorum discipulorum palato, liquidissimâ dulcedine miscet, copiosèque propinat, nec ad plenitudinem aut sanctam ebrietatem repleri; vel
nau-

nauseantis, vel desidiosæ, vel hebetis indolis est argumentum. Quare non infrequenter indignor, quod in publicis scientiarum Athenæis videre subinde cogar juvenes non paucos, ingenij acie instructos, & nobilibus naturæ gratijs donatos adeo langvere, ac torperê, ut, quemadmodum lignum carie, rubigine ferum, pigrior aqua mephyti, non aliter ipsi, quodam studiorum neglectu corrupti, maturè dicam? an immaturè nimium sordescant, & adhuc vivi turpi desidix tumulo sepeliantur. Singularem tamen etiam voluptatem non rarè ex ijs adolefcëtibus capio; qui frugis optimæ indolem nacti, nobilioris animi scintillas, ab Authore naturæ liberaliter immixtas, & suprema humani corporis arce, capite nimirum, reclusas, adeo non extinguunt inertiam, vel morum pravitate suffocant, ut potius assiduo in litterarum studia connisu, & quotidiana librorum tractatione, ex scintillis flammæ, ex flammis incendia, ex incendijs lumen amplissimum excitent,

A a

suscitant , quo sibi ad ipsa demum
 supremæ Sapientiæ adita , quasi
 splendidissimis facibus præluceant .
 Habent hoc constanter impensi la-
 bores , ut neminem , etiam medio-
 critate ingenij pollentem , suis desti-
 tuant fructibus ; qui tanto solent
 esse copiosiores , & præstantiores ,
 quanto ingenium , ingenijque ac lit-
 terarum cultura est nobilior . Sed
 quorsum ista ? Ideone MARIA do-
 ctissima Scripturarum evadet Inter-
 pres , quia studiosi adolescentes so-
 lertissimam naturam cum labore ,
 conjungentes , studijs assiduè infi-
 stunt , librosque attentione sedulâ
 volvunt , & revolvunt ? Omnino e-
 vadet . Si enim illorum diligentia ,
 ac sedulitati tribuimus , quod ma-
 gnos in litteris faciant progressus ad
 insignem præ alijs eminentiam ; cur
 non dicamus diligentissimam Virgi-
 nem in evolvendis sacris mysterijs ,
 enodandis quæstionum difficultati-
 bus , illustrandis locorum obscurita-
 tibus , combinandis sententiarum dis-
 crepantijs profecisse supra omnes ,
 quos

quos continuâ Scripturarum lectione, rerumque divinarum commentatione vel penitus æquavit, vel longissimè superavit? Nisi fortè hoc ipsum vobis non satis foret perspicuum; ideoque necesse haberem assentiendi difficultatem aliquâ sive rationis perspicuitate, sive SS. Patrum autoritate dissipare: tunc enim verò Marianorum clientum juratos tentarem amores, disertissimorum provocarem ora, testium implorarem auxilia, sacrarum historiarum fidem obtestarer. Adesset profectò sua ex Hippone Augustinus, teneramque Virginem, lectioni intentam, denuo animaret: *Recole, inquit, MARIA propheticam lectionem; neque enim te scientia potest divinatorum præterire librorum, quæ ipsam plenitudinem paritura es Prophetarum.* (a) Adesset ex eloquentiæ suæ alveari nectare plenus Ambrosius, & publicè profiteretur orbi: nunquam minus solam fuisse visam, quàm cum sola; *Nam quomodo sola, cum tot libri adessent, tot Archangeli, tot Prophetae?* (b) Adesset ex

(a) *Serm. 21. de Nat. B. V.*

(b) *Lib. 2. de Virg.*

religiosissimo Carthusiæ asceteriò
Dionysius, & MARIAM in contempla-
tione divinarum & Deiformium sinceritate
speculationum summè fuisse defixam pro-
nuntiaret. (a) Adesset ex Odæo suo
studiosissimus Virginis Cultor Ilde-
phonfus, & perlibenter assereret, eam à nonâ diei horâ ad primam facem quo-
tidie divinos libros lectitasse: profuisseque
plus uni Virguncula singularem lectionem ad
beatitatem & decus, quàm omnibus Sapien-
tibus omnes bibliothecas. (b) Adesset è Par-
nassi sui delicijs Mantuanus Poëta,
eidemque non indecorè caneretur
M A R I A

*Affiduis veterum studijs oracula Divûm
Pervigiliq; legens cura Mosemq; piûmq;
Esaïam, mæstiûq; virum qui versibus orbem
Plorat.*

Adescent denique ex Musæis suis An-
dreas Cretensis, (c) & Bernardinus
Senensis, (d) Origenes (e) & Gerson,
(f) Cedrenus & Cassianus, (g) qui
desponsam Deo Virginem, Sanctissi-
mo, cum Sponso suo, commercio per
sacras, & in altam noctem protractas
lectiones, frequentissimè occupatam
fuisse

(a) Lib. 2.
de pracon.
B. V. c. 12.

(b) Apud
P. Drexel, de
ros: Virg. p. 2.
s. 2.

(c) Apud
eund: ibid.
(d) Tom. 4.
serm. 13.
(e) Hom. 6.
in Luc.
(f) Traß.
6. in Ma-
gnif:
(g) Apud
citatum. P.
Drexel:

fuisse asseverarent. Verùm quia cogitare non audeo, vos in Patronæ vestræ laudatissima vita, in quotidianis functionibus, in transcriptis posteritati facinoribus, & SS. Patrum voluminibus adeo esse peregrinos, ut hæc nesciatis; ideo supervacaneum esse censeo tam gravium virorum ponderare auctoritatem, facileque pronam vestram voluntatem & assensum mihi adpromitto. Cui enim obsecro vel dubitare subveniat, qui legerit illud Virgini nostræ accomodatam oraculum: *MARIA optimam partem elegit*; (a) & doctissimis (a) *Luc. c. 10.*
 (b) ejuldem Interpretibus crediderit, partem illam, esse vitam divino- (b) *Apud P. Suarez tom. 2. in 3. p. Diss. 19. scilicet. 2.*
 rum contemplatricem, cujus Spiritus, veluti duabus alis, rerum scilicet sacrarum revolutione, ac meditatione, librare se solet in cælum, & in Deum ipsum quodammodo avolare? Credemus sedulæ Virginis mentem suavissima peregrinatione, iter cælo continuò intendisse, ac præcipua peregrinationis media non assumpsisse? Admittemus tandem:

etiã; in scripturis sacris fuisse verfatam, velut institorem in Oceano, piscatorem in aureo fluvio, messorum in agro, apem in floribus, hortulanum in pomario; & hæsitabimus, an ex Oceano gemmas, ex fluvio aurum, ex agro messem, ex floribus nectar, ex pomario poma copiosissimè præ cæteris collegerit; cum omnes & naturæ docilitate, & ingenij acumine, & diligentia operæque impendio superârit? Ah credite, Auditores, credite, sanctè gloriari potuisse MARIAM, & verè coram quocunque discipulo suo collectos fructus jactare: *Poma nova, & vetera,* (a) *Cantic. 7. dilecte mi, servavi tibi.* (a) *Vetera* nimirum, quæ ex veteris Testamenti hortis cultrix avida congregâram; *Nova*, quibus & ipsamet Mater, & Matris Filius, & Filij sequaces Apostoli, vel lacte, vel sudore, vel sanguine succum indideramus dulcissimæ veritatis, & pietatis.

Sed in humili nimis serpo argumento. A reliquis enim secernere, velle augustam Virginem, ac constituere

tuere Interpretum omnium antefi-
 gnanam, nec tamen, nisi viâ pluri-
 bus communi, in hunc eminentiæ
 apicem elevare, num aliud est, quàm
 injuriæ umbram extollendæ insper-
 gere, fulgentemque Mariani encomij
 splendorem obfuscare? Sublimitas
 profectò Magistræ tantæ sublimio-
 rem exigit arguendi rationem. Non
 sentio, solùm diurna nocturnaque
 lectionis pertinaciâ sibi conciliasse,
 quam suspicimus, interpretandi fa-
 cilitatem, & excellentiam. Alijs la-
 bore venerint pretiosa: Mariæ ultro
 etiam occurrisse, mihi persuadeo.
 Alij per elicitum sudoris destillatio-
 nem, & anhelantis simul præ lassitu-
 dine spiritûs calorem, scientiarum
 foverint viridaria, non sine divite
 fructuum censu: M A R I Æ autumo
 è prægnantibus divinarum gratia-
 rum nubibus, spontaneâ liberalitate
 derivatas esse pluvias, & Spiritûs
 Sancti superincumbentis calore u-
 berrimam illam Scripturarum intel-
 ligentiâ maturuisse. Ad hoc enim ra-
 tiocinium me inducit ingenio men-

téque gravis Augustinus, dum de divinis *condensorum* revelationibus enucleatius disputat ex Davide. (a) Si

(a) *Tf. 28.* namque alijs *Vox Domini revelabit opacitates divinatorum librorum, & umbracula, mysteriorum, ubi cum libertate pascantur;*

(b) *S. Aug. enarrat: in Psal. 28.* (b) eandem etiam in interioribus **MARIÆ** auribus ad uberem oblationem insonuisse, non violenta deduco cōsecutione. Cum præsertim me etiam sic loqui doceat Doctissim⁹ ac Clarissimus Franciscus Suarezius, qui pro Marianorū decorū auctario cum alijs vero-similiter asserit, *infusam illi fuisse per accidens cognitionem rerum naturalium, vel moralium, quæ ad perfectam Scripturarum intelligentiam, ad perfectionem Theologicæ doctrinæ, ad penetranda, explicanda, ac suadenda fidei mysteria; ad consummatam denique prudentiam, & cognitionem rerum agendorum illi fuit expedi-*

(c) *P. Suarez* *ens, aut necessaria.* (c)

*supra cita
tus sect. 5.*

Ecce infusam sacrorum mysteriorum scientiam prædicat Suarezius; quamvis non ignoret, complures præterea veritates ab ea fuisse cognitatas, sive dum Sacerdotibus in Synagogis

gogis Ægypti, Galilææ, & Judææ au-
 scultaret; five cum prædicantis Fi-
 lij penderet ab ore; five cum Simeo-
 nis & Annæ audiret oracula; five,
 cum pastorum, Angelorum, Mago-
 rumque penetraret voces; five cum
Legendi Studiosior (a) explorandis scri-
 pturarum apicibus intellectum suum
 profundius attenderet. Non enim
 ita effusos nos esse oportet in susce-
 ptam panegyrim, ut, quod soli Chri-
 sto competiisse testatur Doctorum
 Angelus, (b) Matri quoque attribua-
 mus, quam Epiphanius, (c) Ansel-
 mus, (d) Cedrenus, (e) & Joannes
 Major, (f) discendi studio intentam,
 ac quàm plurima feliciori mentis
 indagine assecutam fuisse, contestan-
 tur.

(a) *S. Am-
 brof. 2. de
 Virgin.*

(b) *D. Thom.
 3. P. 9. 12.
 ar. 3. & 4.*
 (c) *In orat.
 de laud. B. V.*
 (d) *S. Ansel.
 in fine ope-
 rum.*
 (e) *Cedren.
 in Compend.*
 (f) *In 2. c.
 Luca.*

Sed quando, amabo, aut ubi doci-
 lem, ac sacrarum doctrinarum avidè
 bibulam Matrem adeo liberali infu-
 su D E U S replevit, aut potavit, ut
 præ alijs omnibus Interpretibus lar-
 giùs immaduerit? An tunc, quando
Botrum Cypri, Dilectum suum, mater-
 nis manibus Virgineo pectori ap-

pressit, & ad lapidissimam dulcedinem compressit? An tunc, quando in crucis cathedram elatus universæ scientiæ Magister, cum ore nequiret amplius docere, mamillam aperuit, cordis, & arcanorum inibi latentium rivis Matrem potavit & Discipulum? An tunc, quando post longam, molestamque sitim demum cælestem obtinuit pluviam, & decidentem

(a) S. Bern.

apud no-

strum Men-

dox. Florid.

l. I. Peror-

gil. I.

(b) S. Chry-

sol. apud ci-

tatum Men-

doxam.

tanquam in Gedeonis vellus (a) divinissimi roris stillam sitibunda hausit; quo in haustu *tota Divinitatis umbra* (verba sunt D. Chrysologi) *bibulo se nostræ carnis celavit in vellere?* (b)

Ita quidem, ubique bene potam fuisse Beatissimam Virginem existimo; abundantissimè tamen sitibundum illius ingenium irrigatum esse tunc, quando Deus incredibili amore saucius teneram suam Sponsam, *Vas electionis* mundissimum, introduxit in

(c) Cantic.

α I.

ea, quò spectabat, *cellaria sua* (c); sive, ut vult Chaldæus, *in Domum Gymnasti & doctrine*, firmissimè mihi persvadeo? Tunc, tunc, teste Ruperto,

(d) Lib. I.

in Sam.

(d) *in sacra mysteria, quæ Scripturis Sanctis*

conti-

continentur; avidissimâ mente ingressa est; tunc, teste Dionysio Richelio, (a) *in secreta & abdita Sapientiae, in mansiones celestes, in occultissimas, & profundissimas theorias est intromissa, cui utiq; secretiora Sponsus aperuit.* Nec solum aperuit; sed insuper potavit, atque in ipsum vinum (sic loquitur alibi) totaliter intinxit; quia in abyssum divitiarum ac deliciarum suarum eam prorsus immerfit, benedictione implevit, jucunditabibus inebriavit. (b) O igitur felicem animam Dei Matris! O mentem verè capacem, in quam tam largi, tam dulces, tam singulares sacrarum doctrinarum ac mysteriorum infusi haustus, sine omni gravedine amœnissimè confluxerunt! Nempe verum manet: *Vas electionis*, vas amplum, vas omnium pretiosissimum fuisse MARIAM, ex quo, adeo copiosè repleto, divinæ Sapientiæ dogmata, in alia electionis vasa, in Petrum & Joannem, Jacobum & Andream, Philippum & Thomam, aliósque Apostolos ac Prædicatores transfundi potuerint; & verò etiam ad irrigandas

(a) In Cant.

ar: 5.

(b) In Cant.

ar: 8.

das infidelium mentes aridas, in ple-
rósque sunt transfusa. Suspikor qui-
dem dilectum illum discipulum Joan-
nem, haustus fecisse largiores, & ma-
ximè in sui bibisse sanitatem, quan-
do in nunquam audita, nullisque,
sæculis visa convivatione ad ipsum
rerum abditarum fontem, Cor DEI,
est admissus; quid enim celaret Ho-
mo-Deus, postquam propinato in
sui amorem calice, & amanter pro-
stituto Corpore ac Sanguine ad hilarita-
tem incaluit? Credo etiam liberalis-
simè irroratos fuisse Apostolos,
quando factus est repente de cælo
sonus, & largiore profusa nimbo Dei
Sapientia in congregatos tunc im-
pluit; quo enim fundamento pin-
guis Minervæ homines, & ridentes
Democriti effutijsent illud; *Musto*
pleni sunt isti? (a) Existimo præterea
gentium Doctorem Paulum intimâ
subtilium secretorum dulcedine fu-
isse repletum, postquam ad Dama-
scenæ urbis mœnia prostratus in vas
electionis abiit; unde enim aliàs
limpidissimos illos de Fide, Religio-
ne,

(a) *Act. 9.*
c. 2.

ne, Gratia, Prædestinatione, Redemptione, alijsque mysterijs propinasset haustus, nisi ex ipsis fontibus Salvatoris? Nihilominus tamen fortissima teneor persuasione, si hos si-
verimus venire in comparationem Mariæ, nos cum mari flumina, cum flumine rivôs, cum rivo fontes, cum fonte guttas collaturos; cum cæteri velut minora vasa de plenitudine illius solùm acceperint aliquid, Maria autem, *Vas electionis* capacissimum, ipsam plenitudinem tunc complexa sit, quando se DEUS totum in eam infudit.

Néque defleunt ab hac sententia, mecum Marianâ gradientes orbitâ, sanctissimi Oratores. Eorum enim alius dictatoriô pro Dei-patente decernit calculo, *Eam non potuisse scientiam divinorum præterire librorum*:

(a) præfidentiùs edicit alius, *Virginem Mariam melius scivisse sacra biblia, quam Prophetas*: (b) illustriùs adstipulatur alius, *plenissimè doctam esse ab infantia in lege Domini, & Prophetis, & Psalmis de Christo scriptis*: (c) in titulos effusus alius

(a) S. Aug.
ser. 9. de
tempore.

(b) S. Vin.
Ser: serm. in
Nat: D.

(c) Gerson
Tract 1. super
Magnif:

eam

eam vocat Portam celi ; quia per eam alta
& sacra celi , & Scripturarum , ac Sacra-

(a) S. Bern.
Senen. tom.
4. ser. 13. a. 1.

mentorum mysteria reſerantur. (a) facundi-
us teſtatur alius , illam calluiſſe optime
Scripturarum Sacramenta recondita , & ab-
ſtruſos ipſarum nodos ſcientie clavi reſeraſſe ;
præmicantia Synai fulgura ; evibrata fulmi-
na ; fulminantes procellas mente cognoviſſe ;
& quomodo Erythræum mare ſe ſe Iſraelitis
panderet , Ægyptioſque undis ſubmergeret ;
aliâque ſimilia Scripturarum oracula diſpe-

(b) S. Greg.
Naz. relatus
à F. Ximene
l. 2. c. 23.

xiſſe. (b) Denique plena ſunt hac ve-
ritate pientiffimorum Authorum
volumina , è quibus illam litterarum

(c) B. Ruper.
l. 3. in Cant.

Sanctarum & Secretarium , (c) & Sigil-
lum , (d) & inſpirata veritatem Scripturæ ,

(d) S. Germ.
ſer. de Nat.
Domini.

(e) & elegantiffimum volumen , (f) & divi-
næ legiſ Magiſtram (g) eruditis affectibus

(e) Idem
ibidem.

evolvere poſſumus , & debemus. Ut
nefas ſit , dubitare , nos , quod initio

(f) Leo
Inſp. hom. 6.

intendimus probare , demum eviciſ-
ſe Scripturarum peritiſſimam , diffi-

(g) Rup.
Abb. l. 1. in
Cant.

cultatum ac dubiorum arbitram , ſa-
crarum litterarum Interpretem , uno
verbo , *Vas electionis* MARIAM.

Agite ergo , Auditores ; Si do-
ctrinarum ſititis fluentia , ſi limpidiſ-
ſimæ

finæ veritatis anhelatis aquas, si potentissima Spiritus divini desideratis vina, si dulcissimæ pietatis ambitis liquores; accurrite, gustate, bibite haurite. Ex hoc vase profluet canali non parco, quidquid necessarium ad solidas doctrinas, quidquid pulchrum ad rarissimas eruditiones, quidquid dulce ad tenerrimam pietatem, quidquid vehemens ad spirituale robur animarum, quidquid sincerum, illime, ac limpidum ad dispiciendam omnem veritatem. Ex hoc vase doctrinæ semper manabunt, & nunquam exhaurientur; haurientur semper, & semper exundabunt. Ex hoc vase replebuntur non tantum minora, id est, discipuli; sed insuper vasa majora, sive sacrorum codicum Professores; *bibétque unusquisque secundum suam ætatem*; (a) quia qui omnia (etiam scientias) nos habere, voluit per Mariam, per eandam *juxta mensuram vasculorum infundet liquores: tantum muneris largiens, quantum potest ille, cui donatur accipere.* (b) Adeste igitur, divinatorum oraculorum Præstitæ, ac arbi-

(a) *Dan̄l.*
c. 2.

(b) *S. Hier.*
in c. 4. ad Eph.

arbitri, & quod S. Augustinus dixit ad Filium, fontem vivum, vos dicite ad baiulam fontis Matrem: *Fons vitæ tu es Domina; ad te levavi animam meam, non contra te, tamquam vas attuli eam, im-*

(a) S. Aug.
in Ps. 142.

ple ergo me. (a) Anhelate cum Magno Gregorio ad profluvium illius fontis, quam ipsa posteritati sic signavit: *Fons occultus est Unigenitus Patris, invisibilis DEUS, fons verè patens est idem*

(b) S. Greg.
hom. 20. in
Ezech.

Deus Incarnatus. (b) Clamate cum B. Sophronio: *Agnoscamus te Domina pro fonte vitæ æternæ; nostras proinde animas de abundantia tua adeo divites redde, ut*

(c) Apud
Is: Nadasi in
ann: Mar:
anno 1636.
(d) S. Amb:
in serm: Isa.
c. 12.

salutaribus fluentis manare non desinant. (c) Desiderate cum D. Ambrosio (d) aquas de fontibus Salvatoris; appetite cum Magistro Hieronymo (e) de fonte aquæ, salientis in vitam æternam; sitite cum Nazianzeno (f)

(e) Supra
citato.
(f) Orat: in
S. Baptisma.
(g) Cat:
Script. Ecc.

quem S. Basilius etiam *Vas electionis* (g) nuncupat, de scaturigine fontis ejusdem; & spondeo futurum, ut in sensu litterali periti cum Hieronymo, in allegorico subtiles cum Ambrosio, in anagogico sublimes cum Augustino, in morali svaves cum

Gre-

Gregorio, in omni demum explicandi methodo faciles cum alijs Patribus ac Interpretibus felicissimè evadatis. Vos verò testor, attestorque discipuli, quicunque velut cervi ad scientiarum fontes anheli suspiratis, sitimque vestram desideriorum æstu magis ac magis accenditis, attendite, ac provide, nè vel ad lymphas lymphaticas incauti abripiamini; vel ad cisternas dissipatas, quæ continere non valent aquas, errabundi deflectatis, pro aquis sordes, pro melle fella, pro vita mortem bibitori. Invenientur, non dubito, complures magistri prurientes auribus, qui biblicos sales hinc inde spargent largiùs, & ex cælestium arcanorum tripode vobis loqui videbuntur facundiùs: dabuntur etiam non pauci, qui nobiliores de æternæ Sapientiæ fontibus propinabunt haustus; eorum tamen vobis & conversatio, & magisterium semper suspecta sint, quibus *Vas electionis*. **M A R I A** non sapit. **Dixi.**

BB

P R Æ

PRÆCONIUM.

Sapientia sapientis tanquam inundatio, (græcè: *Diluvium*) abundabit; & consilium illius sicut fons vitæ (Syrus: *sicut aqua vivæ*) permanet. Eccles. c. 21. v. 16.

ORATIO XIV.

MARIA, vera Christianorum Minerva, ideoque ceterarum honestissimarum

Magistra Artium.

QUo demum verget oratio, Auditores? singularumne seriem artium, quæ sub aliquam scientiæ rationem cadere possunt, singulis contexam conatibus? Ita quidem, sat amplius foret adhuc dicendi campus, in quo non sine rerum, verborumque copia expatiari, ac sagaci loco-

locorum indagine plures Mariæ
 laudis titulos investigare liceret : ve-
 rum existimo , evagari gestientem
 animum hic comprimi oportere ,
 tum quòd nefas sit excursu vagæ fa-
 cundia benevolentia Auditorum ab-
 uti ; tum quòd consuetaneâ proba-
 bilitate ista ex prioribus inferri , &
 in claram cujusque intellectus lucem
 exponi queant ; tum denique quòd
 unius orationis nisu , siquid dicen-
 dum superest , dici possit & expediri.
 Dabis proinde veniam , O pulcher-
 rima gratiarum Mater , & liberalissi-
 me fons venia Maria ! si quod feci
 oratione tertiâ , octavâ , & nonâ ,
 paucis denuo multa complectar , &
 decorum tuorum varietatem uno
 potius argumento , quàm verboso
 solutæ lingvæ confirmem ornamen-
 to. Dabit & vos veniam , Audito-
 res humanissimi, si ad confundendam
 gentilium falsitatem fabulosæ mulie-
 ris nomine Dei - Matrem subinde
 compellem , quod quidem nonnulli
 severitate judicij castigant, putantes,
 in nomine indecoram rerum simili-
 tudinem

tudinem utrinque prædicari; ego ta-
 men non nescius, nostra mortalium
 nomina, probis æquè ac improbis
 frèquenter esse cõmunia, nec ideo
 probum probis affigi; arbitror tan-
 tum abesse, ut aliqua parthenij no-
 minis splendori obducatur caligo,
 ut potius ex caligine, obscurisque
 ingenij humani commentis illustris-
 simi quidam radij eidem accedant.
 Non est animus, à fabulis dictioni
 vel hilum roboris accersere; non
 titillor eruditionis profanæ dulcedi-
 ne, quâ nonnunquam abrepti aliqui
 conferunt cum Orpheo aut Perseo
Christum, cum Thucidide *Petrum*, cum
 Attico *Paulum*, cum Apollonio *Lu-*
cam, cum Helena vel Danaë *Mariam*.
 Non ita infanio, ut delyrijs Sapien-
 tiam, profanis sacra, ludicra serijs,
 nugis solida confundam; hoc unum
 stat fixum mente, Poëtarum de sua
 Minerva mendacium convellere, in-
 déque quasi ex confracta concha
 gemmam, ex disjecto scorio aurum,
 ex propulsis tenebris veritatis lucem
 protrahere, ut eâ tandem discussâ in-
 pro-

profundæ oblivionis tumulum detrudatur falsitas, & una eâq; verissima, doctissima, sanctissima Minerva, hoc est; omnium honestissimarum scientiarum Magistra proferatur.
M A R I A.

Quod dum facio, vos obsecro, atque oro, Auditores; ut quas hæcenus expertus sum benefaventium animorum auras, iisdem conatui meo aspirare non cessetis, donec panegyres has sua coronide; benevolentiam verò vestram aliquo gratitudinis affectu coronem.

Multa sunt, eâque stultissima, quæ gentilis mentiendi libido, de nescio, qua Minerva, vel Pallade, mentia est posteritati. Illud in primis palmare ac impudens figmentum est: parturisse aliquando gravidum, & prægnans (delyrijs suspicor) Jovis cerebrum; & pro Lucinæ vel aliarum obstetricum auxiliari manu prævalidam Vulcani securim accitam fuisse, quâ in duas divisum partes caput, demum protruderet hanc ægide, casside, ac hastili armatam mulierculam.

Et ita factum esse , creditumque à compluribus , commemorant Stesichorus, Apollonius, Virgilius , Ovidius , alijque similis farinae homines. Sed O ridendam insaniam ! O infamem in pleno rationis lumine cecitatem ! O detestabilem , atque ex omnium memoria eliminandam impietatem ! Quorsum obsecro tam inhumanæ , tam monstrosæ , tam ludicræ commentationes, & figmenta ? Fortè, ut quemadmodum per nubila Phæbus , ita per fabulas veritas gratiosius illucesceret, & insolita unius mulieris sapientia exaggeraretur ? Sed non aliter vobis veracibus esse licuit, nisi sic mentiremini ? Non aliter in assensum trahi poterant auditores vestri, nisi sic illis imponeretis ? Apage gentilium stoliditas ; in sanctissimo Christianæ Sapientiæ Religionisque regno non sic desipitur. Minervam habemus ; sed quam ideo suspensis quodammodo sensibus stupescimus , quia hæc sola origine suâ pulcherrima & immaculata est : cuius sanctissimos parentes Joachim

&

& Annam ideo supplices invocamus, quoniam amici & consanguinei Dei-Hominis sunt : cujus pulchritudinem Sol & Luna ideo mirantur, quia non fabulosus aliquis Phidias, sed Omnipotens rerum Conditor DEUS, eximiâ præstantissimæ manûs suæ gloriâ eam ita exornavit, ut plus quàm cæteris hominum simulachris de majestatis fulgore tribueret, adeoque abundantem omnium scientiarum supellectilem communicaret. Et tamen necdum ullâ titillatione tangor, ut è capite Altissimi, aut è cerebro æterni Patris MARIAM prodijisse asseram, quamvis non una sic ludendi suppetat congruentia, nec desit autoritas hunc loquendi modum aliquo modo corroborandi. Testor enim te clarissimum sæculi tui lumen Gregori Nyssene, nunquid ex mente Dei progenitam dicere possem, cum eam *Filiam singularium Dei cogitationum* compelles? Nunquid congruente ratiocinio inferendum foret, in Patris corde conceptam esse, cum à Veritatis Magistro pridem

didicerimus, ex corde ascendere cogitationes? Nunquid eidem in lucem editæ applaudere, gratularique oporteret natalem beatissimum, si quidem *ex ore Altissimi* prodivit? Ita quidem; pulchra & longiori excursui opportuna hæc esset materia, nisi vererer radere priscorum viam; quæ in manifesta multiplicium censurarum pericula deducit. Quid enim opus est, per commentationum umbras incedere, cum in non dubia rationis luce ad finem unicè intentum progredi concedatur? Si perspicacitatem ingenij, si maturum consilij acumen, si vim, & indolem animi, si scientiarum varietatem extollere volumus in MARIA, quid est necesse, Numini cor, aut cerebrum affingere, ut eam inde quasi ex carcere protrahamus? Hoc profectò mentiri est magnitudinem, non metiri; hoc obscurare est, non illustrare, minuere non augere honores illius, quoniam ad veræ rationis trutinam non ponderamus. Age igitur, O pulcherri-
ma Mater! dic (parce interrogantis
auda-

audaciæ) dic, obsecro, amantissimo
tui Dionysio Richelio (a) quo funda- (a) *Lib. 2.
de pracon.
B. V. c. 7.*
mento gloriari poteras cum Sapien- (b) *Sap. c. 8.*
te: (b) Puella eram ingeniosa, & for-
tita animam bonam, sive Sapientia
natam ac congenitam? Dic nobis;
dic mundo universo; cur Bernardus
filius tuus in te Matre sua vel hono-
raverit, vel te salutaverit *scientiam sci-*
entiarum? (c) Non expecto responsum, (c) *S. Bern.
in Salve.*
O Domina, quia servus, quia manci-
pium sum; causam tamen non diffi-
culter assequi videor, quia nimirum
ex te tuisq; sacratissimis visceribus;
non tu ex illo, nasciturus erat Filius
DEI. Decuit autem, ut quemadmo-
dum Sanctus Sanctorum sanctissi-
mam, ita Sapientia Patris sapientis-
simam, omnibusque disciplinis in-
structissimam haberet Matrem; (d) (d) *Ex Ri-
chelio ibi-
dem.*
de qua fortasse pridem vel vatum
antesignanus Isaias: (e) Videbit, sive, (e) *c. 53.
v. 11.*
ut habet Hebræus, *sciet, cognoscer, &*
saturabitur copiosis rerum cognitioni-
bus; vel regiae nobilitatis propheta
David: (f) *Anima mea cognoscit nimis.* (f) *Pf. 138.*
Nimis; quia supra veteris Testamenti

Angelicus rerum divinarum notitiâ:
 in M A R I A autem & Svadæ argen-
 tum est, & Philosophiæ aurum, &
 Medicinæ flores, & Jurisprudentiæ
 purpura, & Theologiæ uniones, reli-
 quarumque ornamenta scientiarum.
 Et de his quidem, si non ad gustum,
 certè ad satietatem aurium hucus-
 que: de nonnullis residuis, quoni-
 am non exiguum faciunt vestimento
 decorem, qui venustate suâ facun-
 dus opificis manûs loquitur nobili-
 tatem, proditque non esse rudis Mi-
 nervæ opus, optatâ dicam brevi-
 tate.

In exilium proinde iterum com-
 menta, & fabulæ; veritati hic locus
 sit, & triumphus. Apage Theocrite
 cum poëtarum ducibus Ovidio (a) (a) Lib. 3.
Fast.
 & Virgilio, (b) qui quàm suaviter, (b) Lib. 7.
 tam fallaciter olim cecinerunt, com-
 mentitiam illam cerebrosi Jovis fili-
 am, ob peritiam tractandi colum,
 texendi telas, connectendi vestes, du-
 cendi fila, pingendi acu, fuisse artis
 hujus Deam & præsidem: elogium
 istud Sanctissimæ Christianorum de-
 betur

pientia Matrem, summo Architecto
 constanter attentam discipulam, ita-
 que confitentem. Quando preparabat
 celos aderam; quando cetera lege & gyro
 vallabat abyssos; quando ethera firmabat
 sursum, & librabat fontes aquarum; quan-
 do circumdabat mari terminum suum, & le-
 gem ponebat aquis, nè transirent fines suos;
 quando appendebat fundamenta terra, cum
 eo eram cuncta componens. (a) Quid au- (a) Prov.
 tem vel ad artis regulam concinni- c. 8.
 us, vel ad splendorem illustrius, vel
 ad stuporem mirabilius illâ cælitum
 domo, & magnificentissimo divinæ
 majestatis palatio? quid solidius ac
 jucundius hâc amplissimæ terræ ma-
 chinâ, à marmore, alijsque pretiosis
 lapidibus rigidâ, auri argenti que di-
 vite, montibus excelsa, fontibus ir-
 rigua, figuratum, formarumque va-
 rietatibus exornata?
 Obmutescant, necesse est, etiam
 Mithologi, qui aliam armorum præ-
 sidem, aliam victoriarum dispensa-
 tricem, aliam belli pacisque mode-
 ratricem, ore, vel calamo divulgant,
 quàm Viraginem Nazaream, cujus
 virtute

virtute post Deum maximâ niti possumus, confundi non possumus. Hæc enim verò *Mulier* illa fortis est, inter sæcula à Salomone quæsita, & à nobis tandem reperta: hæc illa heroina, in qua sola urbium munientarum præcepta clarissimè relucet, quia *ædificata est cum propugnaculis*:

(a) *Cant.*

6. 4.

(a) hæc illa refertissima Domus armorum, ex qua sola contra quoscunque sive aspectabiles, sive occultos hostes hostiûmque insultus *omni ar-*

(b) *Ibidem.*

matura fortium; (b) hæc illa præliatrix, qua sola præeunte, feliciter confligere possumus, quia in *uno crine collisui*, aut in *uno oculorum* suorum mille facit vulnera; hæc illa gloriosa triumphatrix per quam solam, certam de hostibus, præsertim turcis, victoriam dabit Deus, cum plerumque sit *luna sub pedibus ejus*; hæc illa procuratrix & prædatrix, quæ sola sufficientem militibus ministrabit comæatum, quia *facta est quasi navis institoris de longe portans panem, deditque prædam do-*

(c) *Prov. 31.*

messicis suis; (c) hæc illa militiæ Magi-

(d) *Apocal.*

6. 12.

stra (d) à qua sola condisci potest
aciei

aciei perfecta instructio, cum sit *terribilis*, ut *castrorum acies ordinata*, sive, ut vult Oleaster, (a) *acies rotunditate ver-* (a) *Oleaster*
tibilis, & ad quodvis ducis signum ex *in c. 1. & 2.*
Nam.
 quadrata in orbicularem, ex cuneo
 in rhombum, ex recta in obliquam
 commensans, exhibensque declinationes,
 conversiones, revolutiones, circumflexiones,
 aliasque exercitus totius motiones, militibus notissimas.

Denique fileant aliquando fabularum nundinatores, qui vel ab arte pingendi, & saltandi; vel à rerum nauticarum, agrestium, & oeconomicarum scientia infamem illam faminam religione superstitiosa efferrunt: longè altius extulit Mariam Deus, quando amplissimum ejus intellectum nobilissimis non harum tantum, sed aliarum etiam honestissimarum præceptis instituit; quæ universa discipulis suis facillima saltem methodo exponere potuit, si ob rationum momenta non placuit in præxim derivare. Ut non dubitem, quin præstantissimos quosque Apelles, Parrhasios, & Rubenios docere valuerit,

luerit, aut etiam monumenta eorum
 corrigere, si fortè vel partium distri-
 butio, & symetria in aliquo defecis-
 set; vel non satis temperati colores,
 non æqualiter recedentes umbræ,
 non nitidæ luminū eminentiæ soler-
 tiam artificū non prodidissent. Quid
 enim? nihilne Virgo didicisset ab eo,
 qui aquarum fluctus, ignium flam-
 mas, aëris aves, nubium globos, ter-
 ræ recessus, hortorum flores, prato-
 rum gramina, arborum ramos, ra-
 morum folia tam variè coloravit?
 Non edocta fuisset Mater à pictore,
 Filio, qui virilem suam faciem, vel
 potius dolorum imaginem, non tam
 in linteo, quàm in anima occurren-
 tis sibi Veronicæ tam appositè effor-
 mavit? Nullo exercitij lucro labo-
 rasset sedula operatrix, quæ ad nito-
 rem acu pinxisse scribitur; quæque
 se ipsam ad vivum expressit toties;
 quoties in collonives, in labijs pur-
 puram, in genis rosas, in fronte pu-
 dicæ amantitatis theatrum efforma-
 vit? Profectò non facilè in adversæ
 sententiæ placita concedam, nisi tra-
 ctus

aus ab ijs, quorum authoritas majus pondus habet, quàm habeant, viri in excellentiam Deiparæ magnificentissimè conspirantes.

Vnde néque illud nisi persuasus credam, in arte saltandi penitus exstitisse rudem, nec excutere potuisse honestè saltantium regulas; aut etiam pudicâ corporis agilitate nequijse choros ducere virginum castissimarum. Gloriosam fuisse Davidis saltationem coram arca Domini, ait Ambrosius, (a) quia totum de-

est, quidquid defertur Religioni (b); néque indecorum ducunt amplissima Hispaniæ Indiæque regna, si utriusque sexûs adolescentes ante Augustum

(a) S. Ambrosii. l. 4. ep. 30. ad Sabini.
(b) Idem lib. 2. de pœnit. c. 6. tom. 3.

Evcharistiæ ferculum modestos choros & choreas agant: (c) quis proinde temeritatis nos arguat, si vel piè sentiamus, vel modestè dicamus

(c) Cornel. à Lapide in lib. 2. reg. c. 6.

DEI Sponsam gratiosè saltare potuisse, atque etiam piè modestèque saltaturam fuisse, si hoc honoris & religionis obsequium ab ea expetisset divinus Sponsus, qui saltu, & saltantium capreolis, seu tremulis, mi-

(a) Cant.
c. 2.

rè delectatus ad eam venit *salient in montibus, transiliens colles, simul caprea, hinnulôque cervorum.* (a)

(b) Apud
Mendoz. Vi-
rid. l. 5.
probl. 30.

Sed de arte navigandi aliquid pronuntiandum est, Auditores. Principem enim locum etiam hîc obtinuisse illam toties decantatam Minervam, nonnolorum commentum est. Argonautas quôque omnium primos, seu navalis peritiæ principes audijſſe, ſomniant poëtæ, & ſcribunt tum Græci tum Latini. (b) Navigantium præterea præſides designatos eſſe geminos, in poëtarum cælum reſſatos, Caſtorem & Pollucem, armigeros per mare Tritones, & compoſitum ad tranquillitatem Neptunum, ſuperſtitioſa tradit antiquitas. Quid igitur dicemus de Virgine, cujus Filio etiam venti & mare obediunt? Eamne pulcherrimâ rei nauticæ intelligentiâ deſtitutam arbitrabimur, quam ſcientijs alijs â Deo abundanter imbutam hætenus aſſeruimus? O quàm vereor, nè, dum audaciſſe eloquentiæ vitium refugimus, ingratæ taciturnitatis probrum incurramus!

mus! O quàm metuo, ne indictum ab inani timore silentium veritatem non tantum absorbeat; sed Mariana insuper detrahat dignitati ac majestati! Nemo siquidem facundus nimium est, qui rerum & magnitudinem & amplitudinem nequit satis explicare. Quæ creaturas excellentijs excedit, ipsâ humanæ facundiæ excellentiâ est superior. Cui autem SS. Patrum oracula toties vulgata, tam peregrina sunt, ut nesciat, Deum creturarum excellentias in Matrem suam, velut in epitomen redigisse? Denique credendum est, â ratione absonum nihil, â veritate alienum nihil dici, dum navigandi scientiam commendamus in MARIA. Extollimus Nauceros, laudamus Palynuros, quòd captatis ventorum flatibus, observatis siderum nutibus, projectis opportunè anchoris, dextrè declinatis syrtribus, elusis informibus balænarum monstris, subactis oceani fluctibus, emensis undarum spatijs, omnibus demum superatis periculis naves suas in destinatos

portus feliciter intulerint; & quis improbet; quod horum laudibus velificemur? Nemo. Nemo? Néque ego proinde illorum affectum improbabo, qui Deiparentem etiam hic Magistram agnoscunt, eamque peritissimam, nullique secundam classium directricem recolunt; cum se talem exhibuerit sæpius non in magnis solum, sed & in maximis tempestatibus, quando nimirum miserandis naufragijs, ipsisque pelagi faucibus subduxit periclitantes. Et hinc promanasse suspicor illa tam apta, quam diversa encomia, quibus robustissimi Magnæ Matris præcones laudabiliter concertantes eam aliquando compellârunt *Magistram maris*; (a) *Portum navigantium*; (b) *Stabilem anchoram* ijs, qui tempestate jactantur; (c) *Navem*, nullo egentem gubernatore; (d) *Maris Dominam*, quæ mirabiles elationes maris solo nutu compescit; (e) *Protectricem servorum suorum in aquis*, juxta illud Isaie: cum pertransieris per aquas, tecum ero (f) *peritissima gubernatrix*: quos titulos viri tanti vix contulissent, nisi *ram*

(a) *S. Idiotæ lib. de consensu Vir.*

c. 5.
(b) *Hym. gr. de B. V. apud But. 127.*

(c) *Butto in Florilegio.*

(d) *Hesychius ser. 2. de B. V.*

(e) *B. Amadæus hom. 8. de Laud. B. V.*

(f) *Richard.*

à S. Laur. l. 2. de Laud. B. V.

ram maris trajiendi artē in Mā-
ria, etiam vivente, dispexissent.

De terræ cultura quid dicam?
adeone rusticam putabimus, ut se-
renissimam calī terræque Reginam
non decuerit? Mirarer certē huma-
nas mentes in tam notabilem igno-
rantia errorē prolapsas, cū ple-
rūmq̃ constet, summos ē nobilita-
te viros non semel rusticatos esse; &
gentium reginam Romam re ipsa
docuisse, dignam esse homine libero
agriculturam; imō ipsum Deum Pa-
trem prædicari voluisse à Filio: *Pater
meus agricola est.* (a) Si igitur Israëli- (a) *Joane*
tica stirpis patriarchæ Abraham, 6. 15.
Isaac, Jacob, & Joseph; si Scipiones
Africani, & Domitiani Cæsares in-
ter ingenua mortalitatis oblecta-
menta non postremam habuerunt
hanc curam, & culturam; si urbs,
orbis epitome, ac magnorum deco-
rum augusta nutrix hoc inter reliqua
complexa est, quòd hortorum, agro-
rūmq̃ colendorum scientiā com-
primis floreret; si Deus ipse, no-
stram indutus carnem, in campestri-

bus Bethleemiticæ fertilitatis nasci voluit, & â triumphata morte redi-
vividus, in subagresti hortulani forma
terræ cultor haberi: quidni deco-
rum fuerit Matri, scire, quod gravif-
simis viris, atque adeo ipsi D E O Fi-
lio pulchrum fuit usurpare? Hebe-
tudinis, vel animi non tenerè affecti
argumentum sit, ambigere, num â
Patre agricola hauserit agrorum scien-
tiam; â *Filio hortulano* perceperit hor-
tensis studij præcepta; â *conducente* in
vineam operarios didicerit vites
plantare ac excolere; â *Patrefamilias*
edocta fuerit *Ancilla* perfectas oeco-
nomiæ rationes, proindèque de hac
sedula, prudente, ac forti muliere
prædicari potuerit illud: *Consideravit*
agrum, & emit eum; de fructu manuum
suarū plantavit vineam, (a) non solū vi-
rorem, florem & odorem sed insuper
benedictum, atque ab ipso Sole ju-
stitiæ excoctum proferens fructum,
Botrum nimirum *Cypri Dilectum ejus in*
vineis Engaddi. (b) O verè insignem
Matrem familias, & per universas
Salomonicæ illius oeconomæ dotes
tam

(a) Prov.
c. 31.

(b) Cant.
c. 1. v. 13.

tam similem, ut ab ea velut à protasi, perfectissimam elogiorum apodosim ducere possimus! Enim verò si à Dei-Hominis nutritio Ioseph, vel ab ipso Christo, virorum Viro, quem ipsa circumdedit, conceptam de hac Muliere fiduciam exaggeremus; hîc si unquam verissimum erit illud: *Confidit in ea cor viri sui*. Si reverenti mentis oculo penitiùs introspeciamus virginem, viróque majorem ejus animum, videbimus *factam esse, quasi uxorem institoris*, juxta illud Poëtæ:

*Animus ratis est, quam ventus & unda
Quà lubet, impellunt:*

siquidem ferendis ærumnarum dolorumque procellis non minus assuetata, quàm excipiendis divinæ voluntatis Favonijs aptissima semper extitit. Si familiaris rei accuratorem, si diurnarum actionum assiduitatem, si super domesticos vigilantiam, si rerum necessariarum providentiam, & constantem tribuendæ mercedis promptitudinem inquirimus; deprehendemus omnino, illam diligentius considerasse semitas domus suæ;

arcendo frigori suos vestijſſe duplicibus ; non otioſam comedijſſe panem, nec ſtertuiſſe in multam lucem, verum de nocte ſurrexiſſe, didiſſeque prædam domesticis, & cibaria ancillis ſuis ; nihil denique omiſiſſe, quo vigilantijſſima comprobari poſſet. Oeconoma, qualem agnoverat Filius, quando eam familiæ, ſeu Eccleſiæ præſtituit univerſæ. Unde denuo memoriam ſubit partim acerbitas, partim dulcitus temporum evolutorum. Si namque mente ſolicita diſquiram, quandonam pro Patre ſuffecta videatur univerſorum Mater ; punget in primis triſte momentum, quo in ferali Calvariæ monte ſtanti ſub infame furca Diſcipulo dixit expirans agonothea : *Ecce Mater tua* ; & identidem animum delectabit illius pompa diei, quo in baiulæ nubis candore aſcensurus cælorum capitolia victor ; terris que, ac ſingulariter Marri, valedicturus, ultimam ab ore nectareo ambroſiam deſtillavit. Tunc enim : *Averte á me*, inquebat, *oculos tuos, quia ipſi me evolare fecerunt* ;

runt; (a) *averte à me* (repetit cum eo (a) *Cantic.*
Guilielmus) *ad fratres & filios meos: à* ^{c. 6.}

*me; quia assumptus ad Patrem a Matre non
 debeo amplius tenere diligi; in meos autem
 converte, quod oportet, me ab illis assumpto,
 materna tua pietatis teneritudine confoveri.*

(b) *Ecce verba, mellito plenissima* (b) *Apud*
succo, nec æterno dissona Verbo, qui *Delrio &*
bus non tantum Materfamilias de- *Did: Bæ-*
clarabatur M A R I A; sed ejus insu- *ram tom. 1.*
per affectus tenerrimus, nullique se- *l. 5. c. 7.*
*cundus palam pronuntiabatur, ad
 melleam quandam suavitatem pe-
 storibus nostris ingerendam, & reci-
 procam filialis observantiæ prom-
 ptitudinem provocandam. O feli-
 cem proinde Ecclesiæ militantis con-
 ditionem, quia suscepto in cælum,
 tenerrimorum viscerum Patre, tam
 benignam familias accepit Matrem!
 O incredibilem beatitudinem illo-
 rum, quibus contigit ab hac Matre,
 adhuc in terris sollicitâ, tanta regi
 affectûs (vavitate, tam dulcibus ocu-
 lorum flecti nutibus, tam prudenti
 curarum diligentia, maternique cor-
 dis officio confoveri! Non pruden-*

tissima priscarum matrum aliqua, non genitrices simul omnes ab œconomica industria prerogativis ita divulgari possunt, quemadmodum hæc *Mater amabilis*, & gratiarum dispensatrix MARIA. Non generis humani propagatrix Eva, non officiosa peregrinorum mater Sara, non Ægyptiaci Dispensatoris genitrix Rachel, non principum filiorum educatrix Rebecca, non aliæ quæcunque seu regum, seu gentium altrices faminae perfectioris œconomæ titulos sibi vindicare poterant, ut quibus omnibus condecorari debet MARIA, quæ tum temporalis tum æternæ Vitæ panem providit, & hæreditatem nobis disposuit regni mundi superiorem.

Agnoscamus te talem O MARIA! & pronissima devotione ad scabellum pedum tuorum provoluti fateamur cum S. Germano, (a) te maximam post Filium tuum gessisse curam humani generis; cum devotissimo Guilielmo, (b) neminem pari sollicitudine sibi & alijs invigilasse; cum Seraphico Bonaventura,

(a) *S. Germ. Const. de Zorina Virg.*

(b) *In 3. Cantio:*

tura, (a) magnam fuisse erga miseros miseris-
cordiam tuam, etiam adhuc in mundo exu-
lantis; cum S. Epiphanio, (b) re-
omnia observare, ac intueri, & inspectionem
tuam ad omnes se extendere; cum alijs
denique tuis panegyristis, te esse ac
semper fuisse Multoculam, Matrem pro-
vidam, Dei Thesaurariam, (c) uno ver-
bo, numeris omnibus absolutam
Oeconomam.

(a) In spec:
c. 2.

(b) Serm. 2.
de assum:
B. V.

(c) Raym.
Jordan: in
Prologo.

Apud te proinde & ego tantisper
fisto eloquentiæ, seu verborum meo-
rum supellectilem; non quidem ju-
dicio tuo ponderandam, quia levis
nimium, & exilis est; sed affectu te-
nerrimi cordis tui sustentandam, eo
siquidem conditur optimè, quid-
quid judicio dissipit, & excusatur
benignè, quidquid censorio calculo
notari potest. Honestissimarum ar-
tium, & scientiarum Universitatem
hucusque te celebravi; & ut com-
pendiaria quadam ratione dicerem
multa, divinæ mentis filiam, hoc est,
Minervam compellare præsumpsi.
Si conatu tibi non placui, mihi satis
erit, affectu non displicuisse. Tuarum
ex-

excellentiarum dignitas, adeo sublimis, fecit, quod illam dicendo assequi non potuerim. Magnificè tamē & amplissimè prædicari te putavi, quando quod proferebam, tuæ impar erat commendationi. Quæ dixi, vel SS. Patrum fultus auctoritate, vel præconum tuorum instructus facundiâ, vel rationis directus lumine, vel filialis observantiæ ac pietatis impulsus officio dixi omnia. Nec huic panegyri robur ultimum aliunde adsciscere cogito, quàm ex docta illorum penu, qui cantandis elogijs tuis velut Cygni immortui sunt, nè communicatæ tibi excellentiæ in animis posterorum emorerentur.

Audite proinde, quotquot hîc estis ad audiendum convenæ, ad credendum servuli, ad discendum condiscipuli mei; audite, quâ vocis contentione, quo cordis affectu, quo attonitæ mentis stupore, Religiosissimus Pelbartus, cum S. Ignatio Martyre abreptus exclamet: *O verè Monstrum celeste! O admirabilis ejus dignitas, & Scientiæ*

entia excellentia! (a) Audivistis? Non dubito. Sed, amabo, unde tam insolitæ admirationis magnitudo, tam liquida veritatis oraculum? Dicam. Legerat in Sacris paginis consignata Mariæ decora, quæ Sponsus, opifex Sponsæ, tenero simul ac canoro affectu olim decantâret; & quoniam inter cætera etiam colli venustatem Turri David, ex qua mille clypei pendere visi sunt, assimilata deprehenderat, in arcanam similitudinis hujus veritatem inquirens, non eas tantum, quæ in privatis Lycæis, aut publicis orbis Vniversitatibus docentur; sed mille omnino scientias, imò omnem armaturam Doctorum fortium in ea invenit: hinc revocatis velut à stupore sensibus varietatem illarum tantâ cordis orisque vehementiâ efferebat. Richardus porro à S. Laurentio, vir sanctitate non minor, quàm sapientiâ, cum perspicacioris mentis oculum defigeret in gratiarum mare, Mariam; videtque in hanc unam tantum beneficiorum torrentem, tot decorum rivos,

(a) l. 7. Stell.
P. 3. 4. 5.

(a) rivos, tot ab ipsa æternitate scaturientia sapientiæ flumina ex immenso Divinitatis sinu largiter confluxisse, quæ deinde ut Magistra optima refudit in discipulos; non dubitavit eam prædicare ipsam Sepientiam, & sic loquentem inducere: *Ego Sapientia effudi flumina, & ex me quasi flumine oriri feci alia: ego itaque impleta Sapientia ab illo rege, nato de stirpe David, & Mater æterni*

(a) *Lib. 9. Dei effecta sapientiæ effudi flumina.* (a) Quorum fluminum celebritatem cum in

de lau: B: V.

(b) *Serm. 1. par. 3.*

fuo *Mari magno*, ut vocat, seu tertia Marialis parte, invenisset Seraphici Ordinis decus, Bernardinus de Buxti, (b) nolebat ea cum alijs fluminibus committere; sed qua pollebat, discretionis virtute, secernebat singula, superque reliqua elevabat. Super Neronis peritiam, qui omnium artium liberalium, & mechanicarum præceptis insignitus perhibetur: super Aristotelis notitiâ, qui elementorum, rerumq;, naturalium arcana clariori mentis pupillâ penetravit: super Platonis cognitionem, qui substantiarum separatarum naturas studiosâ

diosâ indagine dispexit : super Pro-
 lomæi Ægyptij regis scientiam, qui
 sideribus constanter inhærens, eo-
 rum seu amicos seu hostiles obtutus;
 motus & influxus observavit: super
 Moyſis, ducum sapientissimi, doctri-
 nam, quâ instructus creaturarum
 originem perfectè novit, & perigna-
 rè edocuit: super Pauli altissimam
 Theologiam, quam raptus in cælum
 tertium mente avidâ liberaliter
 combibit, & divinorum rudibus non
 parcè propinavit. Tandem sic ait:
*Breviter concludo: Virgo benedicta habuit
 omnem scientiam, atq; cognitionem, quàm
 unquam aliquis hominum habuerit, vel habebit.*
 Concludo & ego cum hoc Or-
 dinis sui Seraphino, & quæ hucuf-
 que prolixiùs, compendiose hîc dico
 universa. Gloriosissima Dei-Parens
 scivit plus, quàm omnes Grammatici, Rhetor-
 es, Logici, Musici, Geometra, Arithmetici,
 Astrologi, Physici, Metaphysici, Legistæ, Ca-
 nonistæ, Theologi, & quicunque aliî pe-
 riti in quacunque arte liberali vel mecha-
 nica; (a) hoc est, MARIA non
 tantum fuit unica, eaque verissima
 Miner-

(a) Par. 2.

Marial.

serm. 5.

Minerva ; sed omnium omnino honestissimarum artium & scientiarum
 Antiquissima, Amplissima,
 & Celeberrima
 UNIVERSITAS.

Dixi.

~~—E3E3—E3E3—E3E3—E3E3—E3E3—E3E3—~~

PRÆCONIUM.

A Udi, fili mi, disciplinam,
 (DEI) patris tui, & nè dimittas legem (*ne obliviscaris eruditionem*) matris tuæ (*Mariæ*) ut addatur gratia (*præmium Sapientiæ*) capiti tuo, & torques collo tuo : Viquequo parvuli (*seducti ab impostoribus*) diligitis infantiam, (*ludicra studia*) & stulti (*simplices*) ea, quæ sibi sunt noxia, cupient. In Prov. c. i. v. 8. 9. & 22. Cornel : â lapide.

ORA-

ORATIO XV.

*Ad amatores MARIÆ,
 & litterarum, parane-
 tica.*

AD vos demum totus convertor,
 AA. quos vel sinceræ Sapientiæ,
 ac honestissimarum artium cepit pul-
 chritudo; vel quos curiosa sciendi cu-
 piditas ad inanes, mendaces, & tū vi-
 tæ perniciosas, tum ingenijs indecor-
 ras studiorum pompas, ostentatio-
 nésque pertraxit.

Vtrorúmque certè conditio me,
 vel delectat, vel medullitus contor-
 quer. Gaudeo enim, non paucos ve-
 strum, præterquam quod incitatas
 ad summa indoles, & capacissima
 omnis litteraturæ ingenia nacti, su-
 pra cæteros emicueritis, solidissima
 insuper integerrimáque scientia-
 rum pretia & splendores adeo co-
 piosè in animos vestros induxisse,
 ut supra gemarum fulgura, succen-
 sas ignibus purpuras, rutilantes
 Adamantis radios nitidissimè reful-
 geatis.

D d

geatis. Doleo tamen etiam non medocriter, quod multi non minoribus à natura donati gratijs in tam opima disciplinarum affluentia non solidis sobrijsque intenderint, vel adhuc intendant ornamentis; sed in nescio quas curiositates abrepti pro auro bracteam, pro veritate fucum, pro soliditate mollitudinem, pro duratura supellectile inanes bullas, futilia parerga, strepera crepitacula, leves ténias, uno verbo, splendidas putatæ scientiæ nugas comparent, & amplectantur. Et quæ causæ tantæ in mortalium studijs diversitatis? meliorne assignari potest, nisi quia illi secuti sunt fontem, in quem thesauri sapientiæ & scientiæ DEI affuebant; isti quia non auspice DEO, non Sapientum Doctorum ductu, sed blande corruptorum sciolorum invito temere ad artes contenderunt, ideóque quibusdam sciendi illecebris illecti crumenas potius suorum instructorum auro, quàm mentes proprias solidis eruditionibus locupletârunt? Magistrorum certè
delectus

delectus non minore sollicitudine habendus est, quàm prædivitis substantiæ patrimonia filijs comparanda. Illi siquidem virtutis; hæc vitiorum sunt fomenta. Enervantur non pauci, ut plurimum sint patres corporum, animorum patres esse, aut aliunde accersere, vel negligunt, vel tales adoptant, qui ad sæculi perversi mores cincinnati discipulos suos exercent in pugilatus dexteritate, linguarum diversitate, equitandi studio, saltandi agilitate, loquendi mollitie, sentiendi libertate, fucata conversandi ratione; quique conspurcatis per occultos affectus, & affectuum turpitudines proprii animi dotibus præclaras indoles ita ducunt, ut quandoque plures habeamus viros iniquitatum, quàm publicæ utilitatis. Tales profectò juvenum directores non aliter fugiendi sunt, ac dulcia lentèque serpentina venena; & curis oculatissimis eligendi, quorum transfusæ in ceream juventutem doctrinæ divinam quandam imaginem exprimant, ac non-

nisi cœli bonique publici procuratores efformentur.

Agite proinde tot, quot artium studijs animos applicuistis; & MARIAM habere magistram vel constanter pergite, vel alacriter inchoate. Non tam fortunata conditio apparuerit Herculi cum magistro suo Atlante, Achilli cum Phenice, Alexandro cum Aristotele, Traiano cum Plutarcho, Carolo Magno cum Alcoino, Angelico Thomæ cum Alberto, alijsque discipulis cum viris, virtute ac rerum peritiâ integerrimis, quàm hæc vestra reverâ fuerit, si, quæ ipsius Incarnatæ Sapientiæ Mater, est, audiveritis magistram, simulque studia omnia eidem consecraveritis.

Audivistis non semel, quot ac quanti viri, communibus foci nutriments, ex hac Mariana Universitate ad regnorum coronas, principum tiaras, antistitum mitras, magnatum torques, Doctorum epomides abierint; quibus singularem curam & patrocinium impenderit, non pigebit attendere. Periclitabatur magnus

gnus ille miraculorum Thaumaturgus, & ævi sui Moyſes, Gregorius, nè Origenis magiſtri ſui erroribus involveretur, & à rectè credentium tramite defleſſeretur; non deſeruit eum M A R I A, ſed periculum avertit omne, & ſubmiſſo, dilectiſſimo ſuo diſcipulo, Joanne, ut ſymbolum orthodoxæ fidei exponeret, infallibilis Sapientiæ clypeo communivit. Peregrinus quodammodo fuerat in ſacrarum ſcripturarum myſterijs Joannes Antiochenus: non tulit hoc mundi Magiſtra; ſed eundem domesticum ſuum filium actutum ablegavit, qui difficultatum nodos diſſolvit, tricas extricavit, tantumque effecit virum, ut in illuſtrandis ſacrorum librorum apicibus Chryſoſtomo par, in aureo Evangelij præconio non impar commendaretur. Laborabat divinarum litterarum cognitione Rupertus, Tuitij Abbas, illud Benediſtini dicam? an Benediſti Ordinis decus: non diſtulit ei ſuccurrere laborantium recreatrix; ſed tanta clienti ſuo mox indidit lumi-

na, ut in revelandis scripturæ arcanis
 palmam omnibus sui temporis Inter-
 pretibus præripuerit. Quid de alijs
 politiorum litterarum Studiosis pro-
 feram ? Nunquid devotissimos ha-
 bemus clientes Elzearios, Wencesla-
 os, Leopoldos, Casimiros, Step-
 hanos & Ladislaos, qui Marianæ Uni-
 versitatis membra, & avidi discendi
 discipuli à gentium Moderatrice
 tantum hauserunt doctrinæ, quan-
 tum vel ad explendum appetitum,
 vel ad feliciter gubernandas provin-
 cias abundabat ? Colit etiamnum
 Bohemia augustissimis ornatam ma-
 nibus Imaginem Deiparæ, ad quam
 in rebus dubijs velut ad domesticum
 oraculum recurrit, quamque nonnisi
 cum vita à se dimisit angelicus Dux
 Bohemorum. Recolit etiamnum
 Ungaria Sacram gloriosissimi Ladis-
 lai memoriam, qui bellorum suorum
 Præsidem non aliam habere voluit,
 quàm quæ esset *Castrorum acies Ordina-
 ta* : hinc contra Lunaticos pugna-
 turus, illum diem prælio suo destina-
 vit, quem Orthodoxi veteres Chri-
 stianæ

stianæ *Lune*, Virgini consecrârunt.

Celebrat etiamnum Gallia clarum,
â sanguine ac rarum ab indole, sed
tardiorum ingenio Elzearium, cui,
referente Surio, (a) Deus ipse Ma-

(a) *In ult.*
27. sept.

trem suam dedit præceptricem, ut
ab ea multiplicis eruditionis hausti-
bus potaretur. M A R I A nimirum
illud gratiarum est mare, quod soli-
dissimæ Sapientiæ hausit flumina, ut
in alios iterum dimanaret; est admi-
rabile illud speculum, quod æterni
luminis recepit radios, ut in tene-
brosos mortalium intellectus refun-
deret; est opulentissimum illud æra-
rium, in quod inexplicabilium præ-
tia thesaurorum congesta sunt, ut in
tenuis ac egentes egereret. Quid igitur
est, Auditores, quod non omnes
sitientes ad fontem; non omnes lu-
cis amatores ad hoc speculum; non
omnes scientiarum egeni ad hoc æra-
rium; non omnes studiosi ad hanc
amplissimam Universitatem concu-
rant? Accurrite! ecce invitat nos
materna benignitate: *Venite filij, au-
dite me.* Si ex indignitatis vestræ con-

D d 4 scientia

scientia filiali in Matrem affectu ferri
 trepidatis, saltem Davidica prom-
 ptitudine respondete Domina: *Ser-
 vus tuus sum ego, da mihi intellectum.* Ac-
 currite! ecce proposita est vobis
Domus sedesque sapientie; ut, si hospitio
 careatis, recipiamini *Domo*, velut ad-
 venæ & peregrini; si ab itinere fessi
 anheletis, quietis indulgentia detur
 in *Sede*, quò facilius juxta vetus Philo-
 sophi effatum, cujusque anima se-
 dendo fiat sapiens. Accurrite! ecco
 inclamat Sancta Mater Ecclesia, quæ
 vos suscepit gremio, portavit utero,
 potavit lacte, atque ad hunc ætatis
 florem perduxit: per quidquid cha-
 rum est, vos rogat; per quidquid
 Sanctum, vos obsecrat, ut hoc ejus
 squalori, quo est obsita; lacrymis,
 quibus perfusa; curis, quibus affe-
 cta, deferatis; & Marianæ, hoc est,
 verè Christianæ scientiæ fontes con-
 sectemini, queis poti emotarum
 mentium subtilitates, & tumentes
 fucos confundatis, ludentium inge-
 niorum sophismata retorqueatis, &
 falsarum opinionum portenta confi-
 gatis.

gatis. Non est Sapiens, nec honorum subfellijs dignus, qui in hac Universitate præcellentem studijs non navat operam. In illius corde non vult habitare Sapientia, cui Sapientia Mater cordi non est. Non est discipulus Christi, qui MARIÆ discipulus esse renuit. Eadem utrique schola, eadem doctrina: ut unius scientiam honorare, alterius respicere, sit utriusque conspuere dignitatem. An meliori spiritu agimur, quam Joannes, reliquique fidei nostræ ductores Apostoli, & Apostolorum succedanei gravissimi Patres? Istos non puduit à Deiparente plura discere; Christus ipse sub disciplina Matris versari decorum duxit; an nos aliter, meliusque sapere volumus, quam Christus, & tamen ex veritate Christiani dici, talesque haberi? O quam metuo, nè provinciæ, & regna integra, sua tranquillitate hucusque secura, similibus quidvis sentiendi libertate, in turbinem se sedemum convolvente, immaturiùs convellantur, & in infauistas syrtes,

ac deflenda sinceræ fidei salutisquæ
 naufragia præcipitentur!

Credite, O Juvenes! credite;
 hoc naufragandi periculum horret,
 averfatur, execratur patria veftra;
 & ut etiam vicinitatem illius decli-
 net, per amorem veftræ fuæque in-
 columitatis vos obteftatur, velitis
 nobilium ingeniorum genios non
 alijs Mufis; fed caftiffimarum virgi-
 num Regina, ac irrefragabilium Do-
 ctorum Magiftræ impendere, vosque
 obfequijs ejus penitus confecrare.
 Quod quia â vobis abunde præfti-
 tum fuppono, (ea enim finceris tan-
 tæ Patronæ clientibus folet effe de-
 votio) nefas duco, diutius hîc immo-
 rari, illud obiter contentus dicere,
 quantum felicitatis alij, nescio, qua
 indoctâ sciendi curiositate ad evani-
 da, erroneâque diftracti, confeque-
 rentur, fi in fchola MARIÆ, feu Ma-
 rianorum Doctorum politiori litte-
 raturæ vellent invigilare.

Grammatici certè nancifcerentur
 hîc reliquarum fcientiarum funda-
 mentum, non arenæ, non flumini,
 non

non aëri instratum, non vanæ ostentationis cæmento compactum, non illiteratarum levitatum arundinibus substructum; sed solidum, fixum, certumque. Dirimerent facile ludicra scholarum duella, quæ de interpunctione, de verbis aut syllabis ordine suo ponendis, de primæ notæ litteris bene locandis, de dictionibus, verborum transpositione non mutilandis, de vocabulorum usu, vetustate, novitate, concinnitate, inutiliter instituuntur: perdiscerent, quæ in litterarum figuris, vocum significatione, nominum verborumque expositione sunt solida. Dilucida puritate loquerentur; etymologias sinceras evolverent, obscuras illustrarent, dubias determinarent, & partes orationis omnes construerent ad singularem sive audientium, sive legentium voluptatem. Nec ignorarent ea, quæ ad vitam beatam, cui nati, & renati sumus, pertinent; sublimes siquidem hæc Magistra facit Grammaticos, qui ex tessera sua:

Declina

*Declina à malo , & fac bonum , continuo
vivunt ; averſatur verò*

Grammaticos humiles , qui ſolo cortice gaudet !

Quos non admittit intus pinguedo medullæ.

Poete quantos animos , quantosque
ſpiritus non ſumerent in hoc athe-
næo ? quibus amoribus non accen-
derentur diſcipuli in Magiſtram ?
quæ affectuum caſtiſſimorum lenoci-
nia non exercerent clientes ? quas
laudes verſibus non illigarent redun-
dantes tum in Deum , tum in ejus
Matrem , tum in ſanctos , tum in alios
virtute conſpicuos ? Res quælibet
efferretur verbis appoſitis , ornare-
tur elegantibus , decoraretur trans-
latis. Funderent plenos affectibus
Elegos , acuerent pungentes vitia
Jambos , replerent ſale riſuque mo-
deſto Satyras , modulis variarent Ly-
ricos , exprimerent heroas poëmate ,
ſimplicitate ruſtica condirent Eclo-
gas , ipſos etiam poëtas veteres ſu-
perarent. Ecquid mirum ? illi apud
neſcio quas Muſas de fabuloſis Par-
naſſi fontibus hauſerunt , ſeu veriùs
hauſiſſe ſomniârunt : iſti apud Ca-
ſtiſſimam

stissimam Virginem Mariam de fontibus Salvatoris, qui de Calvariae monte quinque scatebris fluxerunt, ingeniosam sitim & explerent, & proritarent.

Musici quid? Conciliarent hinc facultati suae saporem omnem, suavitatem incredibilem, argutias modulorum melleas, dulcissimas totius consonantiae Charites; mollitudinem tamen duritate nemo temperaret melius, ut qui nossent in hujus vitae ærumnis dulcissime colliquescere. Discerent præterea vocum instrumentorumque disparem concordiam; sed consonantes cum Deo animos simul conservarent, canerentque concentu tam melico, ut ferros etiam mortalium genios cicurarent, concentu interim virtutum beatas cælorum mentes ipsūque Deum excirent in amorem. Adeo perfecta, & vehemens est musicae artis facultas in hac Vniversitate!

Rhetores porrò non minore felicitate suam quoque componerent, expolirent, & absolverent eloquentiam.

tiam. Pectus, mentémque instruerent eruditâ argumentorum soliditate, ut ex corde, non ore nata dici posset oratio. Conformarent cordium proditrices lingvas, quia per eas, velut per canales conceptam intus Sapientiam fluere necesse est. Ipsa ora implerent melioribus verbis, fortioribus dictis, doctioribus sententijs; ostenderent suam in rebus sublimibus majestatem, suam in vibrandis sententijs gravitatem, suam in affectibus vehementiam, suam in mulcendis animis suavitatem. Nullum ignorarent eloquentiæ melioris genus, nullam elocutionis virtutem, nullum sermonis characterem, ut vario ac omni modo à gratis discipulis prædicari posset Magistra, quam beatam dicunt omnes generationes, etiam Oratorum.

Philosophi, Bone Deus! quàm solidò, nullòque adversariorum robore expugnabile consequerentur scientiæ suæ munimentum. Non opinionibus & vacuis conjecturis cum æmulis decertarent; sed argumen-
torum

torum nervo , & medullâ propugna-
rent arcana naturæ, evolverent cau-
sas, notarent effectus, rerum virtu-
tes perspicuis cognitionibus com-
plecterentur. Scrutarentur, ac me-
trentur terras, & nihil minus inten-
rent, quàm terram: lustrarent,
stellas orbibus suis affixas, & tota-
mente cælo hærerent affixi: discute-
rent num sol, Luna, cæterâque side-
ra in hæc inferiora ita influant, ut in
ipsas etiam animas aliquid propen-
sioris voluntatis depluant; & tamen
non nisi à Sole Justitiæ, Pulchrâque
ut Luna, Maria optarent influxus,
quibus mergi vellent, & submergi,
ut à tam felici morte (si tamen mors
dicenda est) felicissimi dicerentur
Philosophi.

Medici, quis dubitat? hinc exirent
non tantum doctissimi, sed & fortu-
natissimi, quales in provinciarum
urbibus veneramur pleròsque mor-
borum profligatores, & sanitatum
nostrarum vindices: nec tam auda-
cter divinarent tyrones aliqui in
aliena vita, & sanguine, quem dum
curare

curare intendunt, tunc primùm scientiam suam mercantur; tunc primùm incipiunt erudiri, postquam multorum animas proturbârunt de corporibus, quorum morbos, morborumque principia, defectu scientiæ, non cognoverunt. Si sinceri clientes, integrique forent Mariæ discipuli, condiscerent sanè infirmitatum causas, & turbati temperamenti originem vel effectum; caperent certiora signa, num morbi ab effusa bile, vel præcordiorum æstu; â viscerum frigore, vel prodiga humoris diffusionem; â sanguinis abundantia, vel defectu, similibusque mutationibus accersantur. Plenam denique medendi scientiam combiberent, quia non potest nonnisi co-

(a) S. Da-
masc. or. 2.
de dormit.

piosè fluere *Pelagus curationum* (a) M A-
R I A.

Jurisperiti quóque supremas rectasque lineas suæ peritiæ inducerent, & juris legumque interpretationibus illustrarentur. Quid enim? ab ea non reflecterent fulgentissimi radij in discipulos, quæ totum Justitiæ Solem

lem in se collegit ? A totius generis humani *Advocata* non discerent advocare studiosissimi , devotique clientes ? A Matre pijsfima non instituerentur illâ pietate , sine qua ex mente Sapientum néque veritas , néque sine veritate justitia consistere potest ? Vt insolens prorsus paradoxum videatur : negligere pietatem , jus tamen suum cuique dicere ; & non parvum Reipub: monstrum sit Advocatus insignis , & non pius . Vultis scire , quid factu opus , ut integerrimi Juris dicundi Antistites & sitis , & prædicemini ? Dicam. *Gemma gemmarum*, Mariam , portare in pectoribus necesse est ; teste siquidem *Æliano* (a) illi apud veteres justissimi censi sunt , qui imaginem ex Sapphiro , *gemma gemmarum* dicto , de collo in pectus pendulam gestabant . Ex hac *gemma*, credite , pretium vestri faciet Respub. pluresque alias in thesauros vestros cum hac referetis , quia Maria mare est , *gemmarum* parens . Ab hac *gemma* habebitis claritatem ad turbas , & honorem apud

E c

Se-

(a) *Lib. 14. vet. hist.*

(a) *Sap. c. 3.* Seniores ; (a) unde non inanibus
 w. 10. compellantium assentationibus , sed
 solidæ veritatis præconio *Doctores*
Clarissimi dicemini.

Sed & alij titulorum nominúmque
 veritate in sublimes elevarentur di-
 gnitates , si , quam hucusque prædi-
 camus, Eximiæ Magistræ ingenium
 operámque suam consecrarent.

Theologi enim verò aliàs semper
 Eximij , hìc tamen à copiosa Maria-
 narum gratiarum communione exi-
 mij minimè forent. Una scientiarum
 omnium quasi Dea, Theologia, divi-
 nos efficeret omnes apud divinæ
 Matrem Sapientiæ. Erudirentur,
 subtilitate clarissima in controver-
 sijs, quæ per scholas, pulpita, & ex-
 dras agitantur , simulque judicij ac
 ingenij magnitudine commensuran-
 tur : imbuerentur doctrinis, quæ fi-
 dei regulis, mortalium moribus , vi-
 tæque actionibus adæquantur : vi-
 derentur sine oculorum fucō, sapien-
 tiam non in superficie cerebri , sed in
 medulla cordis gestare , Deum in-
 telligere , sed simul diligere ; ejus
 arcana

arcana scrutari, sed simul profundè venerari. Prodirent dènum in arenam; & obsessam curiosorum opinionibus veritatem solverent, inflicta pietati vulnera sanarent, animarum damna reficerent, fidei neglectum, Deiparæ Sanctorumque contemptum vindicarent, Deum, unicum felicitatis nostræ centrum, non statûs (ut vocant) suorûmque commodorum idola loquerentur. Quæ causa, quòd non pauci reperiantur, qui Sacrosancto Theologi nomine, audire volunt, ex æqua tamen nominis sui mensura non sentiunt; nisi quia in Zelo Religionis sunt tepidi, in animarum cura incurij, in pietate erga Deum illiusque Matrem nimum remissi? A Numinis sincero cultu, à Deiparentis devotione, à Cælitum concessa veneratione recedere, est ab illimi sempiternæ veritatis fonte abire. Scimus autem, quòd, sicut rivuli quò magis à fontis vena discedunt, eò minus originem sapiant, ita qui longius deductas ab eo bibunt aquas, ipsam fontis sinceritatem

tem non combibant. *Fons est perenniter fluens* (a) M A R I A ; *fons uberrimus totius Sanctitatis* , (b) *quin & Origo fontium, & fluminum mare, virtutum auctrix, & scientiarum scientia Sanctarum.* (c) *Ex hoc proinde fonte qui non biberit; sed in dispersis, & per glebam minus piè opinantium derivatis undis vagatus fuerit, minus theologici dulcoris hauriet; cum*

(a) *S. Damasius: orat. de Dorm: V.*
 (b) *S. Methodius: orat. in hypapant.*
 (c) *Serm. super Salve apud S. Bern.*

Dulcius ex ipso fonte bibantur aquæ.

Ad vos igitur revertor ultimum, O Juvenes! quotquot estis reliqui puræ sinceræque Sapientiæ seu studiosi seu candidati; quotquot ingenuo faciliq̃ue conatu honestas litteras, litteris famam, famâ immortalitatem aucupamini; imò quotquot spreto solidarum scientiarum com-
 meatu, levibus ludicrarum artum paleis pascimini; néque in Gymnasijs pro lauro, sed in gynæceis pro vanitatis fumo decertantes studetis vultuum fictioni, sermonum blanditijs, vestium varietati, gestuum elegantix, adgeniculationum propudij, lenonum affectibus, citharæ,
 atq̃ue

atque utinam ! non citharistriarum, tactibus execrandis. Vos, (maxime postremos) iterum atque iterum per avorum vestrorum pietatem, per parentum exhaustas curas, per conservandæ ac illustrandæ familiæ vestræ spem, per patriæ, viris integris nonnihil destitutæ, suspiria, per ferventia proborum desideria, per sanctæ Ecclesiæ spiritum, per ingentia animarum vulnera, per benignissimi Dei, faventis cæli, & assecurandæ salutis vestræ amorem, obtestor, atque obsecro, ut à cisternis dissipatis, à poculis Circæis vos demum recipiatis, & ad nostrum scientiarum fontem accurratis, indeque quanta potestis aviditate hauriatis. Neminem transactæ vitæ pudor, vel tepiditas, status vel conditio, ingenij tenuitas, vel memoriæ debilitas retardet; quia mens omnis, pectus omne, ingenium omne idoneum est, ut hinc emergat instructissimum. Divitiæ æquè ac pauperi, docto ac indocto, valido ac debili, domino ac subdito, probo ac improbo, modò resipis-

centiæ sapor non dissipiat, plenum profundit sinum. Cuilibet, quamcunque melioris notæ scientiam anhelanti, ex hoc fonte sapor est; pro-na ex scaturigine potatio, larga ex ipso fundo undarum copia, eaque limpidißima dulcißima ac purißima. Vt necesse sit, Marianos discipulos, largiter ex ea potatos, in purißimos transire Doctores; cum etiam Christus ipse, omnium Doctorum Alpha, non ex alterius, quam Mariæ visceribus egredi voluerit, quia teste Cy-
 rillo Hierosolymitano (a) *decebat, ut purißimus puritatis Doctor ex thalamis puris prodiret.* Prohibitis & vos purißimi Magistræ hujus ac Matris Doctores filij, omniumque doctrinarum terminum, omnis spei & fiduciæ nostræ finem, omnis fidei & amoris metam, omnis perennaturæ felicitatis centrum tandem assequemini; si, quod hætenus cum reliquis impetrare, contendi, Augustißimam DEI Matrem, MARIAM, omnium studiorum vestrorum habueritis Patronam, eamque corde puro, & inflammatis
 charitate

(a) *Catech.*
 12.

charitate affectibus continua pietate
colueritis, voce pietatis indice invo-
caveritis. Quod ubi feceritis vel
consilij meis inducti, vel rationum
libramentis persuasi, persuasum &
ego habebō, me non tantum paucu-
las hanc panegyres, verum etiam
ipsum, quem vobis bibendum pro-
posui, Sapientiæ fontem felicissimè
coronasse.

D I X I.



Ad



Ad


MAJOREM DEI IN- CARNATI GLORIAM,

Et

IMMACULATÆ VIR- GINIS Mariæ HO- NOREM.

Ille dulcis Dominus, hac dulcis
 Domina, quia ille Deus meus,
 Misericordia mea; hac Domina mea
 misericordiae porta. Ducat nos Ma-
 ter ad Filium, Filia ad Patrem,
 Sponsa ad Sponsum, qui est benedictus
 in secula. Amen. S. P. Dam: ferm.
 11. in fine.





Errores aliqui sic corrigendi.

In indice orationum *profligendos* pro *profigendos*.

pag. 11. lin: 11. *inclementum* pro *incrementum*.

pag. 37. lin: 8. *nomine* pro *nomen*.

pag. 39. lin: *sanstum* pro *sanctum*.

pag. 58. lin: 13. *Neque dnum* pro *Neque dubium*.

pag. 67. lin: 22. *aurhores* pro *authores*.

pag. 173. lin. 13. *communicis* pro *communicavit*.

pag. 228. lin: 13. *Methodo* pro *Methodio*,
& lin: 19. *disperatis* pro *desperatis*.

pag. 233. lin: 13. *collorare* pro *collocare*.

pag. 242. lin: 14. *aquitatam* pro *aquitatem*.

pag. 326. lin: 10. *squamdis* pro *squamis*.

pag. 363. lin: 11. *jucunditabibus* pro *jucunditatibus*.

pag. 407. lin: 20. *sitenties* pro *sitientes*.

Aliqua vocabula sunt variè posita ut *Guaricus* & *Guaricus*. *Lycaum* & *Lyceum*. *cepi* & *capi*. *eclipsis* & *ecclipsis*. &c. quæ benevolus Lector facile corriget.

F I N I S.

